

清名家詞

(六)

竹

運

眠

運

司

司



黃景仁（乾隆一四——四八）

字漢鏞。一字仲則。自號鹿菲子。江蘇武進人。好遊名山。常經日不出。安徽學政朱筠會賓客於采石之太白樓。景仁年最少。頃刻成數百言。坐客咸輟筆。乾隆乙未。上東巡。召試二等。入四庫館。議敍。得縣丞。時畢沅爲陝西巡撫。景仁往訪之。途次解州卒。著有兩當

軒集。

竹眠詞

武進黃景仁仲則

減蘭 夜泊采石

一肩行李。依舊租船來詠史。四顧無人。君憶玄暉我憶君。
江山如此。博得青蓮心肯死。懷古悠然。雁叫蘆花水拍天。

憶餘杭 夜起

彖曲紅欄欹斷沼。潑刺遊鱗窺夢悄。披衣四聽闌無聲。長夜可憐清。
愁中心似闌中月。一片模糊難擺脫。冷風吹月入雲端。連月不教看。

大有 秋夜有懷次洪稚存韻

破帽尖風逗窗斜。月耐十分。秋枕寒悄。數征期。重陽節候將到。夜長自擁蘆花被。共
四壁、冷蛩都覺。幾處水上樓臺。一天雁聲籠罩。狂蹤跡。空自笑。洛水任漂流。土人
爭誚。來往江潭。回首驚魂堪弔。聞說故園霜菊。疏籬畔。數枝斜靠。還憶煞。歲歲花前。

797740

89030171

個人清妙。

醜奴兒慢 春日

日日登樓。一換一番春色。者似捲如流春日。誰道遲遲。一片野風吹草。草背白煙飛。
頽牆左側。小桃放了。沒個人知。徘徊花下。分明認得三五年時。是何人、挑將竹淚、
黏上空枝。請試低頭。影兒憔悴浸春池。此間深處。是伊歸路。莫學相思。

貧也樂

一匹馬。千金買。邯鄲少年有聲價。唱龍沙。拍胡笳。吾曹健兒。不聽箏琵琶。
漢家邊
釁今朝始。去去同生復同死。天蒼蒼。野茫茫。一片秦時。明月掛邊牆。

虞美人 閨中初春

繡罷頻呵拈線手。昨夜交完九。問春何處最多些。只在淺斟低唱那人家。
半枝嫩
柳當窗放。偷得新眉樣。晚霞一抹影池塘。那有者般顏色作衣裳。

綺羅香 金陵懷古

何處獅兒半空飛下。橫惹江東多事。霜驟金戈。開出千年佳麗。渡永嘉。雜沓名流。實
鍾阜。綿延王氣。到如今。一半興亡。南飛烏鵲。尙能記。莫問臨春結綺。共澄心百尺。
一樣南內。回首新亭。消得幾行清淚。歎曲裏錦樣家山。禁幾回。北兵飛至。只添他來
往詞人。多少滄桑意。

臨江仙 中秋夜秦淮水榭

三載紅橋舊路。輕塵暗換年華。依然燈火照香車。玉簫吹子夜。明月在誰家。前度
青衫淚溼。重來破帽簷斜。殢人風景又天涯。垂楊空繫馬。流水有歸鴉。

貂裘換酒 秋蟬

聒耳真無賴。到風前。一聲知了。樹間秋在。漸似詩人才盡日。尙作悠揚寒籟。只此後。
青林難賣。疏柳幾行。臨水驛。把吟軀。聽瘦斜陽外。巴山磬。清相賽。魂銷齊女芳華
退。更增他。淒涼宮鬢。愁紅慘黛。病瘦林中休作惡。風露餘生堪貸。珍重吸。枝頭沆瀣。
畢竟侍中冠上物。任孤高。難把深秋耐。仙蛻去。好相待。

又 秋雁

肅肅穿雲縫。是無情、一天冷雁。將秋來送。白草黃榆經不盡。帶得商飆瀕洞。早吹度、秦川朔隴。幾處高樓聞太息。把邊聲、攙入砧聲空。好防卻、金丸中。洞庭木落微波動。記清宵、蘆花明月。依依曾共。偏向霜前悲故國。叫得楚天如夢。渾似聽、伊涼數弄。聲漸不聞天更遠。更衡陽、萬里須珍重。回首處、離雲凍。

滿江紅 感舊

酒渴香消。夢汝在、意錢庭院。依舊是、春潮生頰。露桃如面。病後腰成花一捻。別來淚。繳珠千串。訴侯門、多少苦和辛。紅妝賤。鸞掩鏡。蟬分鈿。南去鵲。西飛雁。嘆崔郊戎。豈千秋空羨。二月竹枝辭峽恨。三更柘舞臨湘怨。夢回時、斜月滿關山。無人見。

昭君怨 初夏

一自護花消瘦。病過折綿時候。春去已天邊。又今年。擁住薄衾如水。守得篆灰心死。簾動有誰來。是風開。

拋毬樂 元日病中作

驀然沈睡驚醒。一歲今又聽紛紛。試庚傳勝。塵容難耐。閒情非舊。有無限。好景低徊。拌只向蒲團消受。可憎二豎尋人。攙著吟魔。按住呼盧手。嘆眼前兒女。背人貪長。祝來富貴。於吾何有。強起捧金卮。揮淚眼。含笑爲親壽。幸妝成椎髻。操作前來。梁鴻有婦。去歲一葉扁舟。正此日。襖被瀟湘口。楚巫喧。蠻鼓賽對景。幾回搔首。敗箠驚風。今日團圓豈偶。也被似水流光。似夢前塵。愁釀成衰醜。任飛揚跋扈。鳶肩火色。流連落拓。婦人醇酒。且莫負名山。論事業。尙有今而後。問春到誰邊。門前凍柳。

虞美人 吳淞道中

吳淞江上行人去。細雨征帆驚。此時無限是離心。卻似五湖煙水萬重深。鷓夷一舸今何處。徙倚煙花暮。消沈吳苑太匆匆。只在前溪一曲棹歌中。

沁園春 閩門夜泊遇鄭十一卽席有贈

君來維揚。我來毗陵。相逢古吳。正水搓鴨綠。剛搖畫艇。瓮浮蟻白。飽貯金壺。柳結同

心花開異地。紅燭題詩興有無。君須飲。看吳宮走鹿。越榭啼烏。青衫失路。啼噓。剩詞客、江東老鷓鴣。歎絮雖泥染。因風思起。灰非心死。向暖還蘇。帳底清歌。樽前白髮。醉矣還教紅袖扶。明朝事。且歸須緩緩。唱莫烏烏。

減蘭 題鄭濯夫圖照

千年風葉。四面秋聲聲撼撼。窈窕冥冥。如此林嵐大有人。一株枯樹。是我十年吟斷處。展卷沈吟。觸起聞雞五夜心。

酷相思 春暮

猶記去年寒食暮。曾共約、桃根渡。算花落、花開今又度。人去也、春何處。春去也、人何處。如此淒涼風更雨。便去也、還須住。待覓遍、天涯芳草路。小舟也、山無數。小樓也、山無數。

昭君怨

門外月明如晝。窗內一燈如豆。何物影空梁。水雲光。忽聽遠鐘微度。又被曉風約。

住。此際惱閒情。是浮名。

鳳凰臺上憶吹簫

洪稚存悼殤女和韻廣之

來是何心去耶真幻。爲他放下簾鉤。算浦珠初孕。嵐黛旋收。略似一灣新月。初生也。即便難留。惆悵處。紅茵繡襪。觸眼成愁。休休。西風又起。早一葉梧桐。吹下高樓。莫聽簫午夜。挑斷銀箏。擺脫紅塵浩劫。彭殤盡。一樣荒邱。休頻憶。經春鶴夢。總付悠悠。

蘭陵王

十六夜偕稚存泛月溪上次韻

清光足。卻似君才萬斛。把琴樽。挈下扁舟。拂袖凌風入空廓。一更天似沐。兩槳亂衝寒玉。展眼處。枯木蒼葭。古意茫茫墮高閣。慙慙杯共屬。歎錦瑟年華。幾時堪復。姮娥此景休相促。待五岳游過。九州閱遍。者回攜手白雲宿。禽魚共徵逐。滅燭。溯寒淥。漸鐵笛將殘。葛衣嫌薄。一聲歸櫓。空林角。倘此閒無爾。今宵少僕。城南明月。可也。悽慘孤獨。

鵲踏枝

寄龔梓樹

記得去年寒食暮。細馬輕衫。花裏揚鞭去。一路樓頭招袖語。銀箏彈遍蕭郎句。三
五冰輪簷際吐。爲問驚烏。今夜棲何處。兩地相思無一語。燕南趙北多紅樹。
幾度鍼詩愁共寄。望斷樓頭。不見雙雙鯉。常是故人書一紙。手香三載留懷裏。我
亦飄零無定止。君贈梅花。莫問江南使。日暮紅塵飛又起。天邊何處無歸騎。

采桑子 虞山旅舍送稚存歸里

荒雞喔喔山鐘歇。醉也麼哥。睡也麼哥。酒味爭如別味多。送君歸去吾仍客。歸意
如何。客意如何。雁叫霜天月浸波。

念奴嬌 虞山旅舍夜起是日稚存歸里

迷茫煙樹。算離腸會斷。幾回南浦。遮莫九龍山下月。今夜是君行處。一葉舟輕。片帆
風飽。欲住何能住。憑君孤棹。引吾鄉夢歸去。夢到阿母闈前。須臾復向。高館和君
語。此際烏啼。星作作。涼露碧天如水。好事纔圓。羈鴻又唱。一枕瀟瀟雨。蘭釭細剔。淒
淒城上更鼓。

醉春風 幽約

望斷青鸞信。寂寞瑤階冷。昨宵已下死工夫。肯肯。肯。肯。裊盡爐煙。敲殘棋子。移來花影。
嬾步挑釭燼。珠斗斜還整。柳梢月上已三更。等等。憶著幽歡。縱教沈醉。也應驚醒。

減蘭 中秋夜感舊

露濃煙重。一陣衣香何處送。倚遍回廊。九曲欄杆九曲腸。去年今夕。木犀花底曾相識。此夜花前。只有清光似去年。
相思誰說。水晶簾外朦朧月。憎煞嬋娟。偏對樓頭作意圓。綺窗人靜。露寒今夜無人問。廿四橋頭。一曲簫聲何處樓。

蝶戀花

我是揚州狂杜牧。似水閒情。占得煙花日。酒醒月明花簌簌。小紅樓上春寒獨。猶記綠陰深處宿。簾捲東風。重把幽期續。淚眼細將紅豆囑。那人家住雷塘曲。

醜奴兒令 春夜

春陰底事濃如結。半是離愁。半是春秋。釀得廉纖雨一樓。霎時雲散天如洗。月似銀鉤。涼似新秋。嫩綠池塘溼未收。珊瑚弱骨臨風倚。遮莫衣單。況是春寒。一半憐伊不忍看。欲行乍卻羞眸睨。背立欄杆。偷整雲鬟。半臂輕涼露未乾。

減蘭 登吳山遇雨

亂山無數。試問春歸歸底處。天際鵝毛。一髮錢塘暮雨潮。雨來江市。黯黯半天雲掛地。白鷺飛遠。片片輕舟盡落帆。

滿江紅 題岳仲子鄂渚吟詩後

老子當年曾幾醉。南樓夜月。但慘淡、獅兒霸氣。斷戈沈戟。一片武昌秋柳綠。三更鵠渚寒濤急。問扁舟、誰叫落梅風。聲聲笛。高宴會。西園集。狂嘯傲。南州客。向殘山剩水。射棚行炙。安樂宮門無片瓦。呂蒙城畔餘殘堞。想先生、憑弔日登臨。悲秋極。

鄂國王孫認一片精忠餘烈。想當日偏師背水，旌旗獵獵。帳外濤衝猿鶴，警軍中夜冷魚龍寂。到而今急雨打空江，猶嗚咽。沈不盡橫江鐵，燒不斷臨江壁。儘茫茫古意亂填胸臆。十載雄名留幕府，與酣如此方搖筆。把新詩點染舊江山，都生色。僕本狂奴，頻掩卷壯懷陡發。翹首處大江西上，暮雲明滅。樓上有人題健句，郢中自古生詞客。算浮生何日駕扁舟，衝雙屐。高吟罷雞聲歇，獨酌倦殘釭沒。忽天風吹夢，長鯨噴雪。下界霜鐘催去急，倒看萬頃蘋洲白。驀驚回風雪鎖嚴城，空淒切。

虞美人 弈

昨宵博簫今宵弈。曲院雲屏隔。月明猶界粉窗梅。只此春宵一局，不須催。金枰碎玉敲還寂。覓個中心劫。心知負了暈紅腮。忽地笑拈雙子，倩郎猜。

疏影 秋思

塵衣初典，卻一番商信，吹下空館。半枕還鄉，裊作輕雲，隔斷楚天來雁。請看十萬江南戶，只一夜秋聲都遍。作朝來微雨廉纖，失卻越山數點。尚有濛濛遠樹，捲湘簾

細認烟水無限。畫艇溪橋。幾陣金風。流出敗荷一片。小橫塘唱愁眸睇。正賀老臨風瘦減。忽低頭。瓜果筵前。孤負深閨歡讌。

滿江紅 京口感懷寄洪大稚存左二仲甫

蒜嶺西頭。曾醉過、幾場明月。屈指算、經年抱恙。三秋作客。白浪驅人貧有效。西風剗夢愁無跡。到江山、勝處忽悲來。頭堪白。萬里下岷峨雪。千古瀉英雄血。只茫茫入海。無聊之極。二十年來堪悔事。一聲山寺霜鐘歇。問南徐、風景近何如。歸來說。

點絳脣 春宵

宿酒初醒。閒情似水和腸軟。細雨三更。簾外春陰捲。一樹梅花。落向閒庭院。無人管。冷風過處。點點春愁糝。

又 雨霽

瘦骨無情。年年此際慊慊病。小立風前。討個傷春信。淡月微雲。作出春宵景。斜還整。斷無人處。卮字闌干影。

浪淘沙 幽會

連日愛新涼。更短更長。昨宵沈醉甚心腸。百樣溫柔呼不起。裊盡爐香。今夜醉柔鄉。且費商量。和衣霍地倒銀牀。不合郎來偷一覷。漏了春光。

又 懷閔季心

交識滿浮生。健者惟卿。憶從相識在蕪城。一揖四筵皆失色。氣是幽并。荷戟靖邊庭。歸去呼鷹。生憎脆管與繁箏。箭叫一聲雕落地。笑絕冠纓。

又 洪對巖

古渡白雲封。今雨樓空。我歌紅豆恨重重。纔出新詞君拍手。花底相逢。驪唱各匆匆。流水西東。馬頭細草又春風。檀板金樽山月曉。懊煞吳儂。

又 徐芸圃

人靜露溥溥。別意闌珊。桂花庭院捲簾看。今夜月明應夢我。同倚闌干。頃寄見懷詩云。今夜月明應入夢。桂花庭院捲簾看。世味各鹹酸。工到愁難。風前玉立瘦無端。只

恐夜深應化去。化作幽蘭。

如夢令 曉遇

細雪乍晴時候。細水曲池冰皺。忽地笑相逢。折得玉梅盈手。肯否。肯否。贈與一枝消酒。

九。聞說玉郎消瘦。底事清晨獨走。報道未曾眠。獨立閒階等久。寒否。寒否。剛是昨宵三

個。一陣雀聲噪過。滿院沈沈人臥。此去是書齋。只在春波樓左。且坐。且坐。我共卿卿兩

線。一抹蓬鬆香鬢。繡帶縮春深淺。忽地轉星眸。因甚紅潮暈臉。不見。不見。日上珠簾一

沁園春 夢斷

裊若輕烟。疾若驚鴻。噫嘻怪哉。正幽幽咽咽。鴟啼古屋。淒淒楚楚。月冷窗梅。幾載相

思連宵入夢。今夜銅鑲風動。開聞說道有千重巨浪。萬頃驚雷。如今雨打風吹。只一點殘燈未死灰。倘飄零重訴。卿應有恨。蛟龍未醒。僕願相隨。去是何心。歸還底處。鶴唳橫空到枕來。高樓外有荒雞喔喔。戍鼓哀哀。

醉花陰 春困

錦幕輕風吹又動。放去惺忪夢。生怕捲珠簾。尺五春陰。壓得眉尖重。滿院姊歸花外。唳。測測寒飈送。昨日上高樓。南北東西。芳草何曾空。

千秋歲 花朝

花朝到了。扶病披衣早。春只半。愁先老。數聲風共雨。一片烟和草。閒情似。游絲一縷空中裊。牒報東君道。蜂蝶休相擾。別來久。依然好。一杯爲汝壽。千萬君應保。休只似。年年歲歲教人惱。

鶯啼序 鄭誠齋先生招集白雲菴周幔亭圖爲小冊分賦用曹以南韻

童子何知。解領略。溪山詩酒。也繾綣。折柬招來。追隨許附塵後。疊嶂忽嵌高閣。聳巖

磯怒拍江聲吼。只畫圖深處。幾個閒人消受。兩袖空中。長襟風際。真個雲生肘。認微茫。城西十寺。疏鐘飄度溪阜。界隨青眼放時寬。情到醇醪傾處厚。忽清談。天外吹來。霏霏璠玖。書生此際。頓露昔時狂態。幾曾言擇口。更十五雲郎。喚向尊前。歌聲清瀏。幔亭有小僮善歌。客解吹簫。有客施姓者。能吹洞簫。郎能顧曲。曲皆幔亭自製。當筵相對移情否。問此樂。天涯幾人有。閒情豪興。一齊迸向吟腸。難按處。傾一斗。夜云深矣。飽酌金罍。四座交相壽。待到歡闌綺席。推起山窗。明星欲滴。蒼烟如糝。堤邊燈火。酒人歸去。數聲爆竹千山響。更深潭。驚起蛟龍走。者般高會。曾逢他日。溪山多應不朽。

木蘭花慢 月下登虞山哭邵叔山先生

君來因底事。今依舊。主芙蓉。空廿載經窗。半生閨苑。名落寰中。只何故。奪君恁早。詎天心。真個忌才工。萬里月明慘慘。五更海霧濛濛。九原休恨別匆匆。天上更相逢。待鶴唳歸來。鐘鳴蕭寺。影落青楓。今宵故人來此。問吟情。可與舊時同。千點淚珠零。

雨數絲霜鬢臨風。

人間呼殆遍。君似醉也應醒。但枯樹黏天。浮雲掛地。有影無形。痛一點。墓門紫火。空
嘔將。心血誤浮名。一自子期去後。曲終江上峯青。南沙城枕向湖濱。曾約共登臨。
怎芒屨來時。青山有恨。流水無聲。此閒玉霄不遠。叩天關。風雨泣山靈。千載仲雍言
偃。一般蔓草荒城。二墓皆在虞山。

風流子 前題

余年剛弱冠。曾飲博。慣縱狹斜場。幸北海尊前。容吾跌宕。東山座上。恕我疏狂。相將
久。庭前逢玉樹。帳後識諸郎。綠酒黃花。時陪歡讌。風晨月夕。每話行藏。其閒頻離
別。空江明月。野渡清霜。幾度詩緘遠道。辦祝名香。詎半生落拓。天憎遇合。數行風雨。
碑斷文章。一夢蟻窩醒也。萬古斜陽。

哲人今萎矣。算百歲。齒髮未凋殘。怪庚子日斜。妖禽有驗。龍蛇歲在。惡夢無端。佇望
處。徵車來地下。丹詔別人閒。講院歸來。半牀書掩。夜臺吟罷。數杵鐘闌。楓林紅于

血荒岡淚灑。萬樹齊殷。下有纍纍古塚。不辨何年。想先生當日。也曾憑弔。此時弟子。空哭青山。月落屋梁時候。想見蒼顏。

風馬兒 幽憶

子規窗外一聲聲。把醉也醒醒。夢也醒醒。細憶別時情狀。忒分明。盈盈。夜長孤館更清清。把鐘也聽聽。漏也聽聽。直到五更。斜月落疏櫺。冥冥。

鳳凰臺上憶吹簫 秋感

試望平原。悲哉氣也。人閒無處宜秋。被幾番哀樂。白了人頭。休道虎頭燕頤。誰曾望。萬里封侯。空惹下。一天憔悴。半世恩仇。漂流殊自悼。歎人皆欲殺。我定何尤。只風聲鶴唳。聽也都愁。堪笑百年終盡。瀛州遠。大藥難求。聊自廣。逍遙齊物。隨化悠悠。

南浦 泊鎮海

蛟門中劈。看天邊。一葉破空來。又向斷磯荒嶼。泊入浪花堆。多少鬣帆蜚雨。和龍吟。夜半似驚雷。更颺風驟起。含腥帶溼。白日冷於灰。此地孫盧戰後。警烽烟。幾度海

門開還笑建炎南避君相總。僉才回首亂鴉殘。堞聽沈沈戍鼓有餘哀。嘆蕭條身世。海天空處獨銜杯。

水調歌頭 仇二以湖湘道遠且憐余病勸勿往詞以謝之

一事與君說。君莫苦羈留。百年過隙駒耳。行矣復何求。且耐殘羹冷炙。還受曉風殘月。博得十年遊。若待嫁娶畢。白髮待人不。離擊筑。驩彈鋏。粲登樓。僕雖不及若輩。頗抱古今愁。此去月明千里。且把離騷一卷。讀下洞庭舟。大笑揖君去。帆勢破清秋。

金縷曲 勞濂叔手書大悲咒以贈云誦此可卻一切魔障報之以此

落魄吾之分。歎年來、病魔窮祟。公然作橫。君說驅除真易耳。此事吾能爲政。論慧力、圖澄堪證。一卷貝多魍魅避。更波濤、可與蛟龍迸。還說與、堪續命。檀那衣鉢何曾吝。更兼他、雄詞辟瘴。光芒難近。時有贈詩此去天南山鬼哭。脫卻女蘿逃盡。更鑿險、降魔杵奮。云曾有讀者見天神隨護。只恐夜深驚屈宋。月明中、難把騷魂認。一長笑、謝君贈。

又 仇麗亭邀飲吳山卽用前韻

飲啄皆吾分。笑年年、屠門大嚼。老鑿太橫。脫帽翻尊狂不減。管甚森嚴酒政。問潦倒、霜毛作證。賤子胸中饒塊壘。儘枯腸、甘與糟邱迸。任百罰。諸公命。緒言領略何曾。客聽懸河、分棚對壘。詞鋒難近。忽忽臨風來苦語。此地一杯須盡。更鯨吸、爲君重奮。別意酒悲渾不辨。待重來、再把吳山認。雲海誼、好投贈。

滿江紅 贈王桐巢

何物書生。曾躍馬、炎天雪窖。論家世、過江檠戟。文章忠孝。蕉鹿幾番驚往事。關山若個。常年少。更飄零。一夢落青樓。從頭覺。湘月落。青猿笑。楚天闊。哀鴻叫。把離騷。痛讀。千秋同調。好賦十年留恨別。雄心獨夜歸屠釣。訂他時、書卷換漁蓑。吳淞棹。

齊天樂 二月十三夜宴汪笛舫宅

楚天一夜東風到。吹綠萬家烟井。新燕樓臺。早鶯門巷。寫出異鄉風景。歌筵坐穩。算年盡逢丁。夜將達丙。紅燭如山。唱澈金元院中本。主人好客絲難繡。看紛紛投轄。

重門鑰冷。切切鷓絃。淵淵羯鼓。不醉教人怎肯。當杯猛醒。道此是天涯。陶然滿引。檀板驚飛。笑山禽村甚。時余酒困先逸。

換巢鸞鳳 十四夜宴王崑圃宅

日暖新晴。正柳青客舍。花放春城。南樓裙屐滿。西閣管絃盈。主人談是過江清。雜四座、齊諧楚聲。聽歌忽似一縷游絲初定。夜靜孤月正。銀燭光寒。中酒人微病。趙魏謀歡。應劉作劇。意氣公然豪橫。算二十年幾會逢。再三千里吾何恨。鞚歸鞭。有輕塵。把馬蹄襯。

氏州第一 花朝

昨夜狂風拔木發。瓦五更大雨而止。一睡夢騰。醒來獨怪。嫩日軟陰如水。莫道春猶淺。青上柳梢來矣。猛記今朝。百花生日。舊愁提起。猶憶去年曾懺汝。繡佛旃檀香裏。一喘吟魂。廿番花事。薄福都如紙。昔時風亭月榭。曾消得。幾遍彈指。且掩重門。任戶外。翦紅揉紫。

虞美人 春風

連晨驟暖春衣脫。一雨寒幾雪。舉杯長笑問天公。作盡炎涼何必在春風。晚來孤館苔痕閉。冷冷清清地。小窗破紙本無多。吹過廿番花信更如何。

七娘子 山行遇雨

一鞭裊入千山裏。樵歌洗胃鶯鍼耳。忽露青帘低飄竹塢。典衣爛醉今朝始。孤村流水桃兼李。此閒小住真佳矣。似有風來驟聞澗響。子規啼處春陰起。

摸魚兒 寒食漫興

夢驚回、今朝冷節。天陰難得窗亮。弄晴作雨春無賴。不管有人惆悵。休惆悵。猶喜是、天涯對酒人無恙。酒杯莫放。算落盡辛夷。將飛柳絮。好把碧欄傍。鄉園樂。今日榆羹花釀。錫簫吹暖門巷。歲歲風前悲蕩子。愁煞棠梨鬼唱。登樓望。問風景江南、半點何曾像。離波新漲。但芳草天涯。遠山一角。不語黯相向。

憶秦娥

湖天闊。清湘望斷三更月。三更月。猿聲是淚。鵲聲是血。曲終數點烟鬟沒。此閒自古離愁窟。離愁窟。幾叢斑竹。臨江猶活。

百字令 登益陽城樓

桃花江上向西風。落葉敵樓孤凭。尚有秦時明月在。縣爲秦建。黯黹蠻山相映。桂郡南連。零陵西拒。地制湘東。命幾多。蝸角紛紛。蠻觸爭迸。當日赤壁功成。左將軍作事。將毋太橫。從此孫劉誇割據。我笑大言子敬。故壘千秋。土山一帶。想像軍容盛。耕民可見。苔花敗鏃遺賸。

水調歌頭 岳陽樓

豈是夢中到。始覺楚天長。軒皇張樂去後。太古別離場。一曲湘靈鼓罷。再聽汜人歌盡。天老月荒荒。十二晚峯碧。萬里瘴雲黃。龍鎖脫。蛇骨斷。蚌帆張。陰陰一片。腥起微帶酒花香。不用憑軒流涕。只要朗吟飛去。倒影落瀟湘。揮手謝時輩。千載定還鄉。

霜葉飛 湘江夜泊

倩誰爲問瀟湘水。緣何一碧能爾。自從葬了屈靈均。只想成烟矣。不信道、騷魂未死。月明淒苦猶如此。算地老天荒。那一角、蒼梧野外。多少山鬼。我欲寸磔蛟龍。將君遺骨。捧出萬丈潭底。請看往日細腰宮。是一堆荆杞。又恐惹、衝冠髮指。問天呵壁從頭起。還伴他、□□□。霧鬢烟鬟。一雙帝子。

洞庭春色 登黃鶴樓

爲問司勳。誰家樓也。而汝題詩。算吾宗老輩。子安去久。玉京舊侶。叔瑋來遲。今日我遊。因薄譴。看城郭人民。半是非。還聞說。又吳宮楚館。電捲星移。千年謫仙。又去。空傳語。天上相思。望三湘七澤。無邊水氣。荆門郢樹。一片斜暉。只有此樓常不改。與江漢茫茫無盡期。歸與好。把落梅短笛。鶴背橫吹。

南浦 江口夜泊

蒼茫葭菼。聽西風夾岸響。騷騷。身是洞庭一葉。流下漢江皋。莫問殘山賸水。歎興亡。一半屬絲曹。共細腰池館。章華臺殿。一樣草蕭蕭。何處數聲蘆管。隔江沙。人倚木

蘭橈。多少倚篷心事。天外水迢迢。寂寞郢中白雪。悵騷魂、千古難招。且扁舟歸去。五湖三泖任逍遙。

風流子 江上遇舊

真耶其夢也。移舟語、悽惻不堪聽。道那時一見。庾郎年少。此閒重遇。長史飄零。□□□□□□□□□□。我未成名。卿今已嫁。卿須憐我。我更憐卿。潯陽江頭住。把去來帆看。極浦無情。憔悴感君一顧。百劫心銘。問此時意致。秋山淺黛。再來蹤跡。大海浮萍。語罷揚帆去也。似醉初醒。

雨中花慢 泊潯陽

未入吳雲。猶依楚岸。三千里外還家。對屏風九疊。艤住孤艖。是日江濤陡發。五更人語齊譁。推篷一望。江州夜火。十里金蛇。曉來攜笛。吹入江天。惹他雁起平沙。還朗誦、白家好句。楓葉蘆花。我亦青衫有淚。況今落魄天涯。閒愁萬種。打篷細雨。錯認琵琶。

采桑子 九日題江州海天寺

客愁底事腸回九。九派潯陽。九日重陽。九疊匡廬對舉觴。前人幾輩消沈去。老子樓荒。老嫗亭荒。且對江天醉一場。

青玉案 泊石鐘山下

噲呖巨響湖心裏。石作竅。風穿矢。石本無聲聲在水。夜深老鶻。非關人語。自會摩崖起。崖間似有殘碑記。欲讀高寒不能矣。多分簡牘兼陋李。蒼松兩樹。月中猶認。蘇氏賢喬梓。

喜遷鶯 舟過馬當山下

清江見石。尚沙痕十丈。濤頭千尺。鯨浪狂衝。蛟涎亂捲。百鍊崖根鐵色。太行呂梁合險。說也教人頭白。行不得。快招手烟波。喚他估客。帆直風助力。瞥眼經過。回首全山黑。獻履題詩。當筵作序。此事羨渠何益。江神一言聽我。我是海東頭客。再休惜。再一帆相助。吹還鄉國。

憶真妃 彭澤

衝波軟笛響悠悠。水風柔。放下布帆。幾葉蕩中流。
鞋山杏。彭郎到。小孤浮。今夜西江月好。幾人愁。

望遠行 采石

巍然一畝精鐵色。不遣濤頭衝去。夾岸成營。沿江設壘。多少南朝殘戍。爲問山靈。當日韓家擒虎。到此怎教橫渡。更一帆吹送。樓船難住。何處覓個漁樵閒話。見來往。精靈無數。一片黃蘆。半輪西日。襯出歷陽烟樹。畢竟上流荆益。中原鳳泗。方算江東門戶。者一拳能幾。幾曾堪據。

木蘭花慢 京口清明

今朝風日媚。佳節好。怎耐在天涯。只無情無緒。閒吟閒詠。江草江花。停尊陡然興發。寫旗亭。破壁數行斜。柳外蕭郎白馬。門前謝女香車。臨風不斷淚如麻。何物換年華。歎秋娘老去。青山依舊。望眼空遮。平添異鄉烟景。問游人。誰肯不思家。唱罷江樓。

囉噴。來聽商婦琵琶。

念奴嬌 憶城東舊遊寄稚存維衍

東城古院。記寒宵、曾聚詞壇數子。夾逕松楸風獵獵。霜冷月華如水。破壁潛蹤。深林幽嘯。乍見疑山鬼。頽唐失路。釀成狂態如此。屈指分手河梁。聯吟江滸。往事隨波。駛異地逢迎。原不少。無奈心情不是。便欲橫江。化爲孤鶴。飛透吳雲裏。開簾一笑。瞿曇今又歸矣。稚存常呼余爲黃面瞿曇

又 京口重訪僧寺

蒜峯西路。記昔年、曾入森陰古寺。連日石尤風作惡。天遣重尋舊地。笑問僧雛。那時一見。此景曾忘未。惹他沈想。依稀一半還記。那日風起蘋洲。雨昏山閣。到此閒題字。語罷青瞳剛一轉。頓觸隔年情事。几榻依然。往來閱盡。耐久禪家味。徘徊簷下。魂浮動江氣。

賀新郎 太白墓和稚存韻

何事催人老。是幾處、殘山剩水。閒憑閒弔。此是青蓮埋骨地。宅近謝家之眺。總一樣、文人宿草。只爲先生名在上。問青天、有句何能好。打一幅、思君稿。夢中昨夜逢君笑。把千年、蓬萊清淺。舊遊相告。更問後來誰似我。我道才如君少。有或是、寒郊瘦鳥。語罷看君長揖去。頓身輕、一葉如飛鳥。殘夢醒、雞鳴了。

點絳脣

細草空林。絲絲冷雨攙風片。瘦小孤魂。伴個人兒便。寂寞泉臺。今夜呼君遍。朦朧見。鬼燈一綫。露出桃花面。

醉落魄 當塗客舍醉中感懷

臨風痛酌。人生果信當行樂。幾曾泉下人重作。對面青山。葬老青蓮魄。咿唔□□□仰屋。六州鐵鑄從前錯。畢竟韶華難再續。笑問流光。可許千杯贖。

青玉案

春光漸到梅根冶。傷離莫、謀權且。無奈柔腸愁易惹。誰家歌管。此閒亭榭。少個憑闌

者。綺窗密語誰同寫。待寄蠻箋淚盈把。報道綠梅將放也。一年又盡少年幾日。告個尋花假。

西河 江上聞笛

遙隔浦。聲聲似泣如訴。知伊不過背鄉關。怨何爾許。茫茫一片水烟中。聽來誰不悽楚。既非是。亡國女。家山重疊無主。又非萬里玉門關。送人遠戍。只將花月好春江。吹他落梅如雨。少焉我亦欲起舞。漸鄰舟。嘖嘖嗟苦。若再橫吹將去。怕波心。不有蛟龍取。到曉尋聲知何處。

太常引 空館

屋多人少夢難成。落葉響縱橫。冷雨太無情。又灑過、三聲兩聲。人言此地。更深漏永。常見走英靈。小語在空亭。悄立到、窗兒外聽。

訴衷情

萋萋芳若滿平洲。雙槳去悠悠。一片落紅漂到。江水不勝柔。烟樹外。望歸舟。識歸

舟眼中明月圓在揚州。缺到西州。

賣花聲 立春

獨飲對辛盤。愁上眉彎。樓窗今夜且休關。前度落紅流到海。燕子銜還。書貼更簪
歡。舊例都刪。到時風雪滿千山。年去年來常不老。春比人頑。

賀新郎 辛卯除夕呈朱笥河先生

一歲過將盡。受幾處、颿衝浪打。羹殘炙冷。磨滅三河年少氣。獵獵敝裘風緊。到此地、
萍蹤方穩。廿載識韓今已遂。把今年、除了心還肯。此閒樂、忘鄉井。後堂絲竹喧闐
甚。轉眼處、陽春已到。拌將痛飲。但使年年常此夜。那用撥灰書悶。絕不似、亂山孤枕。
畢竟難忘惟結習。繫殘宵、還把長纓請。倘爲我、須臾等。

秋霽 立春後一日有感

昨夜春來正漠漠。寒原新意將滿。樹欲無聲。山如凝思。一綫逗來平遠。風情都軟。玉
簫吹得簾櫳暖。更窅窅、捲作幾絲微雨。隔池晚。屈指往日。試歲筵前。幾人同將紅

燭彈短。怕愁來、花關快掩。百般開落，誰重管。一册南華開更卷。此日猛省，任拋萬丈游絲，可能將我舊情牽轉。

豐樂樓

聞龔梓樹攜室之河南詞以寄意

故人巨卿頓首。少卿無恙也。記一揖西蠡河頭。紅燈綠酒相迓。待罨畫雪消時候。六旬老母登堂拜。更多少年情性。酒酣叱咤。座有瑯琊老子。矍鑠黃皮縛袴。覓暇日。謀歡劇飲。捲簾山色如畫。畏花驚。輕敲檀板。聽曲誤。潛書羅帕。霎時閒。剗夢西風。半空吹下。我囚向楚。君贅歸秦。六年離別話。聞君又別京華。辭舊侶。挈着數口。飄零走成皋野。少室峯高。陸渾山紫。黃雲亂草多。今古更天際。一綫黃河掛。洛陽似錦。料知到日。看花衣上。塵土堪卸。君今得所。僕亦還鄉。奈離愁。結綺難寫。是幾處。酒場吟地。月榭風亭。似夢如塵。經過便怕。當年落魄。頭蒙敗絮。身被短褐。非足下。綈袍。戀戀何人者。伏惟善保千金。有日相逢。袖重把。

雪初晴。簾正捲。未試春燈，先把春衣澣。第一番風須放軟。怯怯春魂，萬一驚他轉。飲厭厭。歌緩緩。猛地思量，春近家鄉遠。細粟柳芽枝上滿。待爾抽長，把我離愁綰。

沁園春 壬辰生日自壽時年二十四

蒼蒼者天。生余何爲。令人慨慷。歎其年難及。丁時已過。一寒至此。辛味都嘗。似水才名。如烟好夢。斷盡黃蘗苦筍腸。臨風歎。只六句老母。苦節宜償。男兒墮地堪傷。怪二十何來鏡裏霜。況笑人寂寂。鄧曾拜袞。所居赫赫。周已稱郎。壽豈人爭。才非爾福。天意兼之忌酒狂。當杯想想。五湖三畝。是我行藏。

瑞龍吟 人日登高寄左二仲甫

扶頭醉。門外似水香車。將愁碾碎。可憐短短春衫。禁他幾度。酒痕全漬。今朝事喚取細馬登山。作安仁記。還向極浦重尋。去年灑淚。傷春舊地。一歲登高幾次。今朝合了。重陽爲二。秋盡何似春初。兩般滋味。春將愁到。甚處可回避。淒涼極。雁後難歸。花前有思。況楚天迢遞。故人誰把。草堂詩寄。倩驛邊歸使。□寄了。梅花當平安字。只

愁到日再無來騎。

金縷曲 觀劇時演林沖夜奔

姑妄言之矣。又何論、衣冠優孟子。虛亡是。雪夜竄身荆棘裏。誰問頭顱豹子。也曾望、封侯萬里。不到傷心無淚灑。灑平泉、那肯因妻子。惹我髮衝冠起。飛揚跋扈何能爾。只年時、逢場心性。幾番不似。多少纏綿兒女恨。廿以年前如此。今有恨、英雄而已。話到從頭恩怨處。待相持、一慟緣伊死。堪笑否。戲之耳。

又 岳墳和韻

一吼燕雲裂。猛回頭、黑罡風起。大旗吹折。萬里長城憑汝壞。可念兩宮頭白。把錦樣、中原輕擲。三字獄成和議定。又墳前、閒過騎驢客。黃龍恨、不堪說。陰森宰樹松邪。柏。覓多時、枝枝南向。一枝無北。眼見玉津歌吹地。露冷音塵都歇。此處有、豐碑轟轟。地下定逢于少保。話南朝、天子生還得。千年血、土花碧。

漫登高。此閒不像今宵。望去數點紅燈。歷落逗林梢。淺淺幾家門巷。便幾聲笑語。聽也無聊。有別家年少。空牆徒倚。吹起寒簫。紅橋舊路。曾隨翠轂。拾過銀翹。不是難甘岑寂。奈風情漸減。轉覺蕭騷。夢隨塵散。踏歌聲。隱隱干霄。三五月。算今年初度。照他細草。已種愁苗。

謁金門

春寒中酒也。半些無用。城上蒼山。看似夢。風淒山欲動。一曲小池烟凍。一樹野梅香送。折到膽瓶添水供。水寒花骨痛。

梅花引 客病

懨懨悶。沈沈病。寓樓深閉誰相訊。冷多時。暖多時。可憐冷暖。於今只自知。一身常寄愁難寄。獨夜淒涼何限事。住難留。去誰收。問君如此。天涯愁壓愁。

摸魚兒 登滕王閣

幾何時。詞人帝子。消沈一樣如許。西山眉黛還依舊。蹙過幾回歌舞。君更數。在此地

憑闌。幾個人龍虎。前賢底苦。把一序當筵。浮名些子。占盡不教與。徘徊久。漸見月明南浦。帆檣亂落如雨。眼前是景堪供嘯。多了津亭吏鼓。君認取。此地是。番禺百越。雄門戶。登高四顧。歎多少興亡。滔滔章貢。流得此愁去。

生查子

笙歌沸地時。驀被風吹住。相顧各披衣。門外東西路。月落又烏啼。後約知何處。帶得舊愁來。換得新愁去。

石州慢 十六夜雨

背手巡牀。不到黃昏。窗兒便黑。無聊無賴。雨聲催過傳柑時節。江城今夜。不知冷院重門。鎖深幾個銷魂客。端的不成眠。在心窩兒滴。愁極。如此春宵。可能再說。千金一刻。纔見梅花。便妒者還了得。謝家兄弟。縱有好句池塘。夢兒可也難尋覓。明日認遙山。想眉峯俱失。

木蘭花慢 十八夜對月

月高才丈五。城頭上。鼓淵淵。道今夜收燈。半城猶照。剩管殘絃。爲問鏡兒那角。被蝦蟆銜去。落誰邊。斷送一年元夜。此時有恨。嬋娟。看來清淚總如鉛。不是不重圓。問此情何似。曲終錦瑟。客散華筵。只此夢騰過去。算半生。何事不堪憐。相對啁啾宿鳥。惹人添倍無眠。

小重山

一掬滄溟瀉酒杯。□□漚數點。是蓬萊。道人長揖自何來。低聲道。海上看山回。怪事莫驚猜。那時精衛石。漸成堆。幾多鯨鱉氣如灰。人閒恨。無力可相排。

茶瓶兒 歸雁

雁兒怱怱歸去早。春萬里。陽關開好。關外征人老。一齊回首。帶得書來了。雪盡江南歸路杳。留幾處。沙痕雪爪。莫道浮生巧。時南時北。只爲炎涼惱。

沁園春 題邵二雲姚江歸棹圖

有客朝來。興發滄洲。飄然一航。問四明窠業。故山無恙。姚江森森。此水何長。古有狂

奴後來狂客。揖讓其閒。總不妨。君休笑。算幾人到此。煞費商量。鳳池奪我庸傷。有浦上秋風。舊草堂。所居地名秋風浦。況傳家易在。繙而再注。故侯瓜好。熟矣堪嘗。其果行耶。樂寧有是。只惜蒼生望一場。披圖羨。羨名山歲月。到手差強。

謝池春慢 戒飲

酒腸全窄。說也增煩惱。記得盡歡時。半載西泠道。醉後眠花塢。醉醒啼山鳥。主還賓。昏更曉。一杯到手。百事都忘了。□□□□。懨懨息。岑岑腦。舊緒提難起。瘦骨吹堪倒。淚爲聽歌盡。戶到逢場小。留身在。捐杯好。麴生長謝。與爾緣偏少。

最高樓

樓上憶。意態忒分明。花照眼。月關情。遠詞已託微波寄。曉雲休傍別峯橫。牽羅袂。揩淚眼。可憐生。留下了。許多珍重語。分下了。一天離別苦。山水驛。短長亭。馬經舊地。嘶芳草。雁和殘夢落層城。共淒涼。俱老大。各飄零。

枝頭桃柳春將闌。趁此抽身早。今宵有夢待尋君。只恐花前消盡更無魂。黃昏庭院誰相問。一次傷春信。冷風飄動五更愁。化作半輪殘月掛羅浮。

買陂塘 登白紵山

冷清清、荒臺敗瓦。日斜來弔宣武。如雲賓從當年事。對面青山歌舞。飛蓋舉。下擁著、蝟鬚石眼人如虎。南州雄據。笑作賊恂恂。更何情緒來顧曲中誤。休相笑，尙解登山作賦。此兒還有佳處。一時裙屐原瀟灑。誰料轉頭黃土。江月苦。把一片歌聲、悄悄沈將去。雄心認取。聽漠漠蒼林。非絲非竹。打起佛樓鼓。

鵲踏枝 落梅和稚存

怪道夜窗虛似水。月在空枝。春在空香裏。一片入杯撩不起。風前細飲相思味。冷
落空牆猶徙倚。者是人閒。第一埋愁地。占得百花頭上死。人生可也當如此。
莫怨妒花風雨浪。送我泥深了。卻冰霜障。身後繁華千萬狀。苦心現出無生相。隱
約綠紗窗未亮。似有魂來。小揭冰綃帳。報道感君憐一晌。明朝掃我孤山葬。

又 春燕

挑菜湔裙猶草草。近海樓臺。燕子飛飛早。連日峭寒花放少。倩他絮與春知道。休
說置身高處好。等託簷閒。莫漫輕相笑。社屋白楊人共老。春風轉眼秋風到。

又 鷓鴣

管甚行人行不得。誰是哥哥。慢喚生疏客。只許隔花啼磔磔。啼時又惹天如墨。敗
葉遮身休歎息。有地孤飛。莫問江南北。前度詩人頭已白。黃陵廟外逢寒食。

又 百舌

偏是春來干汝事。報向林間。聒耳何時已。叫入五更忙欲死。請君一飲黃梅水。顧
眄自知憐紺尾。百種新聲。舌底瀾翻起。縱使學成些子是。半生只爲人忙耳。

水龍吟 寒夜披名山圖獨飲陶然竟醉

一杯看遍名山。空廚籌盡深宵火。某山某水。一邱一壑。曾行曾坐。小有登臨。憂生感
逝。百般難妥。喚山靈語汝。此閒好處。百年後。留埋我。莫說他年朽骨。只誅茆。幾時

纔果胸中五岳。須將長劍。剗平方可。誰耐將身。死兒女。手作僵蠶臥。待向平事了。頭童齒豁。尙能游麼。

春夏兩相期 晦日風雨

春寒甚。蕭條旅況。今朝小盡都忘。堪憎彌空。石燕撲穿花障。雨絲抽得柳芽長。草色黏來。溪流漲。最是難聽。夜深風急。鬼車南向。送窮難送窮相。願年年伴著。窮神無恙。□□□□□□□□□□。幾人花裏閉門居。誰家燭底低聲唱。爲算今年二分春剩。再休輕放。

眞珠簾 花朝雨

春陰潑墨人愁坐。把雨絲牽下。春雲如磨。千束芳心。昨夜鼓聲搗破。安得錦衾裁百幅。左右擁百花同臥。避過者。蜂攢蝶簇。雨顛風簸。莫道護花難妥。只惆寒悵暖春都難作。且趁是初生。理隔年功課。闌內自憑儂照管。外屬與金鈴犬邏。知麼。漸清江綠漲。待伊紅澹。

貂裘換酒 題萬黍維持籌讀律圖

那得金如屋。把人閒、異書全購。名流都蓄。欲覓錢刀。須作賈。休管儋何名目。奈心計、顛毛般禿。更問竹書三尺底。夜深時、多少錢神哭。蕭何律。須勤讀。先生此計思真熟。問蒼蒼、有才如此。賦窮何酷。阿堵且難求。便得大願幾時方足。總輸與、容容之福。莫向五湖精力盡。把致君、堯舜功名祝。一任爾餐珠玉。

行香子

曲唱涼州。曲唱伊州。送征人、萬里邊愁。車輪一轉。都望封侯。總不知春。不知夏。不知秋。一劍猶留。雙淚難收。鐵衣穿盡海西頭。舊時同伴。鬼哭啾啾。也有耶孃。有妻子。有田疇。

少年遊 初四夜見月

碧天無際暮烟收。新月苦凝眸。一曲如舟。織雲作槳。載下古今愁。看看望斷遠山頭。須上最高樓。急喚媧皇。將他鍊就。拌著不圓休。

滿庭芳

題下瓊籤喚來青使。邀他仙侶神洲。今宵會早。新賀玉成樓。約得羿妃同駕。笑冰輪、漫似銀蚪。招手語。閨風近也。待爾碧雲頭。雲璈纔奏罷。研光舞歇。無限新愁。道巨鼇釣去。海欲西流。正擬乘風歸也。奈三山、破碎難留。還羨爾。白頭戴勝。穴處得優游。

六州歌頭 愁

從來此物。埋葬幾書生。提便起。追偏遠。視無形。聽無聲。百計難迴避。和著夢。隨他醒。攙著淚。催他病。不分明。纔說人言。我欲先闌入。清鏡無情。便春花秋月。如在霧中經。略怕飛觥也難傾。或來如陣。索如負。重如障。固如城。盧號莫。湖稱莫。四誰名。九誰名。一事差堪取。遇秋士。始逢迎。隨宋玉。交吳質。友張衡。倘是傖才。儉父。休相覷。雅味平生。任江河日下。瀉不到滄溟。卻也堪憎。

應天長 題稚存小照

夢夢天正睡。怪靜夜誰來。盜他清氣。廓廓落落。著手蔚藍光膩。一鉤殘魄死。是小劫。

前身堪記。仙梵起，卻被天風斷續吹細。何人能到此。算此閒惟君，尙堪位置。換了狂奴，便有幾行清淚。無邊飛動意，切莫問、人間何世。還放爾、脚底青峯，出個頭地。

卜算子慢 姑孰春感

過年樣日，居斗大城，閒看好春如駛。極目平蕪，直恁冷清清地。詎南州、如此成佳麗。怎覓出、一輛香車。□□半行遊騎。若問當年事，有四姓衣冠，千門羅綺。一片斜陽，收了傾成名士。爲傷春、添出興亡意。且錦被、蒙頭睡過。□禁烟天氣。

風流子 送黍維歸宜興

桃花浮一片，雙槳急，江水去何長。算對泣楚囚，聚原無益。戀羣小鳥，別又堪傷。消魂極。新知俱失路，送客是他鄉。十雨九風，春人俱去，一亭兩榭，花月俱荒。鴉啼青山曉，離堂酒盡，殘燭黯無光。屈指自今以往，此夕難忘。只來日大難，憂貧憂病，前途宜慎。時暖時涼，折得可離盈把，助汝行裝。

念奴嬌 清明偕容甫稚存訪城東古院

蒼滅一角。被長林古寺。襯來如畫。客子入門。風習習。松是一千年者。石徑蝸涎。佛頭
鳥糞。鼠竄飄簷瓦。閒花滿地。舊愁無限。縈惹。不合攜手登樓。遠山常笑我。春魂未
化。三兩兒童相趁逐。也算少年遊冶。小有登臨。不成時節。添了離人話。只疑是夢。未
知此會真假。

又 送容甫歸真州

思親遠夢。記連宵。夜雨一燈分作。羨爾思歸。歸即得。飄若浮雲先去。客本非家。聚原
有散。但怪如斯遽。一鞭捎過。勞勞亭子邊路。今日世態波濤。才名瓦礫。無我疏狂
處。待有五湖三畝宅。多恐萱幃遲暮。歸旣難歸。客還送客。觸起悲秋緒。一言墮淚。不
知何地重遇。

小重山 壬辰三月晦日新安客舍

整整春光客底逢。是年元日立春。人隨波上下。絮西東。鶯啼草長。雨濛濛。花事盡。添
倍暮城空。門巷落英中。幾番尋不見。舊時蹤。餞春筵散。太怱怱。簾捲處。三十六遙

峯。

減蘭 黃梅

雨顛風駛。催得梅如金彈子。小摘吳娘。未忍沾牙只嗅香。 懊儂情緒。怕唱方回腸。斷句。半晌徘徊。聞道湖州刺史來。

南浦 寄仇一鷗

一鷗無恙。記烟波浩蕩舊盟深。貪看蒼梧雲去。五載斷瑤音。儘把六橋三竺。好湖山。一一讓君吟。況酒徒座上。有人宿草。說着總寒心。謂勞濂叔蔣思睿 負汝窮途一諾。奈空囊羞澀。到如今。拌把鬢毛絲盡。無處換黃金。聊倩南飛一雁。告別來。思淚滿離襟。問臨江樓上。那時醉墨。可能尋。

柳初新 七月初二日夜宴

雨聲滴碎梧桐院。早是悲秋病券。無端乙夜。哀絲豪肉。激得異鄉愁斷。更被澆腸熱。酒。水犀般。將愁分半。一半香溫。擗軟。前遊隔得如天遠。哀多於樂。醒常如醉。半爲

綺年難挽。待灑淚珠成串。怕驚他、四筵酬勸。

千秋歲 二喬宅 旁有井水常作胭脂色

傾城俊傑。流韻江東壁。空腹痛西陵客。玲瓏齊解佩。照耀分聯璧。誰不羨。一門佳婿。東風力。並倚攤書策。舊地餘荒宅。風雨暗。莓苔碧。土消蘭麝氣。井汲胭脂色。曾染出。南朝千載生香國。

一叢花 懷寧道中

小黃茅店睡初酣。風力透蘆簾。馬嘶人起。怱怱甚。正驚我、歸夢江南。一夜輕寒。五更殘月。閣住遠山尖。微哦依舊下車檐。酒面怕霜醃。才情薄負。渾多事。漂泊苦。久更難堪。孤負心盟。凋殘身世。流淚滿征衫。

春風袅娜 中秋夜使院對月

被冰輪入戶。喚起無聊。蘭炷滅。篆香消。悵平分秋色。露和人瘦。細搖花影。夢與簾飄。寡女絲虛。霜娥鬢冷。肯枉空齋絮寂寥。樹底捉金蟆客去。天邊駕彩鳳人遙。空自

兩手又拏。雙肩聳削。閒題句、糜費芭蕉。愁萬疊、淚雙交。盈階蟋蟀。半壁蠨蛸。急管三更。彌空作陣。繚垣一曲。畫地成牢。此時幾個。在好闌干畔。低低私祝。歲歲今宵。

踏莎行 十六夜憶內

珠斗斜擎。雲羅淺熨。蟾盤偷減分之一。重逢又是一年看。明年看否。誰人必。今夜蘭閨。癡兒嬌女。那知阿母銷魂極。擬將歸棹趁秋江。秋江又近潮生日。

玉燭新

影兒何處覓。剩空館餘香。綠苔行跡。曉風殘月。關山路、應減昔時薌澤。如許腰肢。怕掌上、少人憐惜。可念我、思淚朝朝。搵爛吳綃幾尺。多時客館相偎。把錦被濃薰。研箋親擘。檀槽撥到。剛私語、忽地當胸一畫。看花易老。況又作、花閒過客。拌憔悴、換得瀕行。眼波輕擲。

薄倖

斜披氍笠。耐西風、獵獵吹急。遞一陣、深楸虎氣。驢耳雙雙都立。轉平岡、細草黏空。誰

添幾點牛羊入。記來往南山。重逢此景。閒煞黃皮袴褶。顧瘦影、沈吟罷。清淚漬、草根都溼。詎茫茫大地。竟無歸處。此閒卻灑楊朱泣。且休嗚咽。算途遙、日暮今宵。可趁郵亭及。土壁繩牀。料是百憂橫集。

喜遷鶯 皖城懷古

荒城一曲。想碧眼孫郎。臨濠擁燾。赤壁燒餘。濡須戰罷。此地彈丸誰屬。莫道廬江重鎮。況是皖田如玉。三軍奮聽一聲萬歲。堞樓齊覆。攻速。記是役。慷慨爭先端仗。升城督。夾石兵收。潯陽寇翦。費了幾堆斷鏃。莫說千年王氣。到眼幾行殘局。和盤算。歎江流遺恨。孫劉未睦。

菩薩蠻 秋海棠

頽垣缺甃胭脂色。斷腸花對銷魂客。小樣卻中看。帶來些子酸。從今愁薄福。爲負傾城目。辛苦繫紅絲。暮秋逢嫁期。

好事近 阻風江口

一霎起驚森。我與浪花頭白。占得鷺鷥拳處。看楚天秋色。回風低送鼓聲搗。前灣有舟泊。少頃亂帆來也。奈去船無隻。

步蟾宮

一層丁字簾兒底。只繡著、花兒不理。別來難道改心腸。便話也、有頭沒尾。蘭膏半滅。衾如水。陡省是、夢中情事。可憐夢又不分明。怎得個、重新做起。

滿江紅 吳大帝廟

伯也無年。把草草、江東付爾。不數載、西連北拒。公然帝矣。彼國有人難逕渡。諸君爲將。偏甘死。只幾封、降表落中原。生平恥。垂珠冕。翹華履。睛點碧。髯掀紫。問生兒誰道。不應如是。半壁江山成夜火。一生事業憑春水。小朝廷、血食尙千秋。誰能此。

醜奴兒令 潁州西湖半沒爲田矣

聚星堂上人何處。一換揚州。一換杭州。碎割西湖十頃秋。千年魂魄重來此。高處眠牛。低處藏鷗。便是蓬萊清淺流。

鳳凰臺上憶吹簫。七夕舟發練江。諸同人送于紫陽橋上。風雨猝至。匿舟橋

下。不得出。送者亦散去。排悶爲此。

天上團圓。人間離別。一般徒倚長橋。詎填成烏鵲。直恁魂銷。其下潑翻銀漢。如箭駛。征舸似有語聲。天半翹首見。雙袖齊招。招手處。九天咳唾。別淚同拋。停橈。風雨驟。乍驅來入穴。不辨呼號。似尾生柱朽。豫讓聲消。歲歲洗車舊例。爲征人。移在今朝。猶隱隱。數聲珍重。飄落雲霄。

高陽臺 自湧金門至柳浪聞鶯遇雨

問水亭邊。湧金門外。三錢穩趁湖船。自我來思。于今又是三年。敗荷衰柳垂垂盡。似渠儂。一樣堪憐。更無端。冷雨敲篷。添倍淒然。扁舟悄艤蘋花岸。喚舟人小坐。卻話從前。見說當壚。于今尙記逋錢。兩峯不放修眉看。爲傷心。鎖合湖烟。且歸眠。淚是愁人。雨是愁天。

買陂塘 過聚景園舊址

怪行行、東湖一角。淒烟怨水如許。舊是趙家行樂地。那覓綺樓朱戶。君試數。剩幾點流螢。照打官蛙鼓。草蛩低訴。又垣粉零香。階瑤腐碧。歲歲葬秋雨。湖山路。不是幾番今古。樓臺塞破煙霧。荷灣柳港知多少。三兩漁舸占取。菱唱苦。向斜日橫塘。窈窕聽將去。野花無數。尙著露含風。年年開向。曾駐翠華處。

青玉案 泛舟丁家山下

湖天漠漠陰晴半。雙槳急、湖雲亂。雲到峯腰船泊岸。水蓮花放。木蓮花放。沒個人來看。回頭拍拍飛鳧散。隔岸猶挑酒家幔。莫爲聽歌腸欲斷。有情天地。無邊風月。不與閒人算。

江南好

西湖好。十頃碧悠悠。有怨只澆蘇小骨。無情不上范蠡舟。斷送幾人愁。西湖好。恨事古今無。邀得官家猶北顧。未曾亡國是西湖。唐突怨傖奴。

菩薩蠻 暮遊湖山神廟

分明有蝶孤飛去。轉過庭梢無覓處。悄步向花前。掃花人正眠。獨立成惆悵。更上湖樓望。湖上雨吹來。看花人盡回。

水慢聲 宿聽水亭

昨夜睡鄉真妥慣。年來水宿生涯。拍枕瑣瑣。連牀嗚咽。隔牆外、訴盡幽懷。醉情漠漠。耐聲聲柔櫓相捱。只有夢兒飛不透。煙波成陣。鷗鷺與徘徊。不是貧眠。非關病渴。水鄉深處。小住亦爲佳。君看十頃碧。一明如鏡。剛有薄雲如絮。來往相揩。雙槳休拏。半篙輕試。和怨一齊埋。還借取、峯頭雨意。遮住采蓮娃。

一叢花 花朝

不成供養不成筵。爲爾禮金仙。衆香國裏休回首。要重來、何事生天。羯鼓頻搗。并刀快翦。判取一生緣。好春剛半月剛圓。此景最堪憐。人生若使當今日。便百歲、也是中年。綵筆前身。紅塵去路。閱世總如煙。

金縷曲 次韻贈劍潭

數語容疏放。算神交、大江南北。十年相望。試問一江東去水。誰似此情難量。怎相見、轉成惆悵。半世顛狂誰念我。覓酒壚、酣睡陶家葬。西園梗。同飄蕩。直須位爾青霞上。耐些時、衝寒閣雪。梅花情況。結習未除猶綺語。使得瘦腰何恙。勤剝啄、綠陰門巷。一片竹西歌吹裏。伴枯桐、守住維摩帳。君試撫、衆山響。

又 酒後呈友人再疊前韻

莫把悲歌放。倚台垣、一星司命。熒熒相望。狂到一分窮得倍。半黍肯差衡量。惹我輩、坐愁行悵。願借一鋤乾淨土。取十年、詞賦深深葬。否卽付、秦灰蕩。幾人笑我層城上。把茫茫、塵沙下土。等閒相況。自見蓬萊清淺後。誰保鬢絲無恙。海水立、一條如巷。便踏白龜從此去。喚陽春、小揭東皇帳。敲赤日、玻璃響。

又 楊西禾招遊小秦淮三疊前韻

急買扁舟放。記隋家、玉欄珠楯。參差盈望。亡國未關行樂事。莫把此兒輕量。總付與、夕陽惆悵。一片景華宮下土。有深宵、十斛秋螢葬。光照見、香魂蕩。故人醉我荷香。

上情多情二分明月伴人清況南部繁華猶未減漸報煙花多恙且歸去踏歌深巷
詞客揚州同落拓問誰先夢覺梅花帳吹鶴背笛聲響

又送孫淵如歸里且訂白門之遊四疊前韻

忍便歸橈放不多時廣陵花月客中吟望除是邗江嗚咽水省識此愁無量問底事
臨風悵悵不信軟紅塵塚裏把珠光劍氣常埋葬滿六合悲心蕩憑君寄語高堂
上抵千金平安兩字邇年遊況鐵甕江聲京口樹依舊布帆無恙記後約烏衣門巷
一揖六朝殘照下又天涯聽雨聯秋帳更對策摩雲響

水調歌頭題明春巖圖照

爲問綠楊岸幾日漲痕添先生釣本非釣坐愛此澄潭不羨羊裘大澤那用綠蓑西
塞一領水紋衫風過忽飄舉意態絕清酣論家世高檠戟盛纓箋袖中活國雙手
先把釣竿拈便有五陵裘馬何似五湖煙水此味幾人諳掩卷莫重憶惹我夢江南

青玉案題金西書吟紅藥圖

烏絲界破箋兒鳳。芳意閣、春愁中。一縷茶烟凝不動。花光半面。衣香一桁。約得吟襟重。知君未是閒嘲弄。如此華年了非夢。茗椀筆牀疏不空。美人香草。名花傾國。淡薄文人供。

滿江紅 題高佩之圖照

大袖疏襟。憑管領、秣陵秋色。省古貌、鬚髯尺五。羲皇標格。三徑祇餘猶子守。半生悔作諸侯客。檢青箱、和笑喚孫前。經橫膝。淮水上。絲歌咽。冶城畔。車塵熱。住繁華窟裏。寂寥揚宅。肯讀便成佳子弟。看山可放閒蹤跡。待他年、風景按圖中。來尋覓。

珍珠簾 雪夜懷蔣耘莊青陽

一燈孤幌青無色。坐聽竹聲都寂。擁鼻正微哦。奈亂愁千結。窗內紅爐窗外雪。只一紙、寒溫便隔。□□。況懷人天際。關嶺重疊。念爾回首無家。祇隨身弱季。依依作客。絮語夜闌時。問可曾眠得。瘦損腰圍多病後。詎損了、江湖綵筆。相憶。倘有句裁成。寄南飛翼。

湘月 春夜

犀簾爛盡問深宵。幾回枕上彈指。生慣春愁。怎昔日不到愁心如此。幾陣風時。數聲雨後。心碎如窗紙。睡鄉纔穩。隔花鐘又敲起。試算大地茫茫。斷無春到。只有霜毛裏。莫問尋歡便好夢。不許而今重理。病沒人知。寒無人問。守得衾成水。銷魂尙可。更無魂可銷矣。

賀新涼

壽州遇桐城吳竹亭丈話舊。因及甲申歲常州知府潘峨溪先生試

童子拔予第一。丈卽先生中表也。先生後作浙江寧紹台道卒於官。

往事爲翁數。記當日詞場跳盪。猛於乳虎。正值憐才潘騎省。籍甚衆中一顧。把江夏無雙見許。是日論文翁在座。費三條紅燭。三搗鼓。感此意極辛苦。而今同賦淮南樹。且聯牀。十年愁話。一燈分訴。聞說東山絲竹盡。誰慟西州門路。翁矍鑠。依然如故。怪我早衰蒲柳質。問牛年那得常三五。慚愧煞。受恩處。

沁園春

題程仲南印譜卽索刻小印

刻石鼓詩勒燕然銘。姑從緩圖。向蝨彝窠豆。尋些事業。銅斑玉血。墾出膏腴。莫恤譏彈。何妨篆刻。世上由來幾壯夫。人閒事。被幾番鐘鼎。換盡蟲魚。一言翁定胡盧。肯爲試劖天妙手。無問書同雅點。姓名誰識。文惟醬覆。印信何須。我爲翁言。翁誠許我。我當靈威赤虎符。臂此去。辟山精。跳敵路。鬼擲揄。

南鄉子

秋夜寄懷維衍

生怕數秋更。況復秋聲徹夜驚。第一雁聲聽不得。纔聽。又是秋蛩第一聲。淒斷夢回程。冷雨愁花伴小庭。遙想故人千里外。關情。一樣疏窗一樣燈。

踏莎美人

發壽陽

背郭依山。投村向驛。古原何限勞勞客。夕陽秋思正清酣。坐對數行。秋樹古淮南。帳飲還醺。衣塵漸染。送人只有清淮遠。幾堆殘戍幾家村。當日錦帆行樂。是何人。

琵琶仙

留別孫吟秋程雲槎

綠酒紅燈。剛遣卻。蕭索九秋風景。又早白雁聲聲。離程被攢緊。是解得。別原未免再

一晌流連便怎。花替人愁。酒供人淚。幽恨誰省。問何苦、幺絃瀕洞。把如此歡場變。悽哽。縱有金壺汁瀉。奈此情難盡。試壯語、神仙將相。和錯刀、留贈公等。拌取爛醉離觴。一程程醒。

江神子

顫提裙袂步蒼苔。首驚回。甚時來。昨宵花底。風露爲誰捱。念我一番寒澈骨。分半角。錦衾裊。

端相一霎太津津。乍微嗔。卻回身。人間天上。此景最消魂。我戀卿卿卿自會。卿戀我。是何因。

風流子 懷錢三夢雲滁州

去年當此日。秋城內。傳語秀才康。卻南巷逢君。短衣縛袴。西泠載我。素舸輕裝。相將去。登山傾一慟。入市倒千觴。詞客生平。大都蕭瑟。酒徒散後。兩地顛狂。環滁皆山色。朝朝畫閣。掩映新妝。可念舊時游伴。添鬢蒼蒼。記鄂舟雨夜。同眠繡被。彭城佛寺。

相贈檳榔。莫話十年前事。倍惹淒涼。

念奴嬌 渡江至京口

銅琶鐵板。問何人解唱。大江東去。如此山川才稱得。一個寄奴家住。花月茫茫。魚龍混混。淘洗英雄處。金焦兩點。爲誰閱盡朝暮。卻好南倚金閭。北連淮海。劃斷繁華路。我渡此江。凡幾遍。自對夕陽低數。送客依依。笑人鹿鹿。不少閒鷗鷺。卸帆京口。聲聲萬歲樓鼓。

催雪 懷遠舟夜憶內

爲語長年。前途暝色。莫犯支祈神怒。向漁火叢中。將毋小住。擁鼻待賦。懷人翦燈風。又在篷疏處。一船離恨。一腔思淚。付淮流去。夢斷蘭閨路。對古國塗山。荒祠啓母。爲問娶塗人。別家何處。天地平成猶易。只此恨綿綿。終莫補。蕭蕭雨。拍枕波聲。似有英靈來訴。

讀萬卷書。從十年征。歸來策勛。有聞名破膽。白狼青徼。望風稽顙。熨女髻君。黔蜀烽
銷。西南埃一脫。劍仍歸。鷓鷯羣。承明暇。拉一時燕許。置酒論文。長安車馬紛紛。只
左擁尊彝。右典墳。算才還得福。文昌司令。知能兼勇。司馬行軍。絕域功名。熙朝柱石。
天下蒼生望雨雲。書生意。感牛心分炙。白練題裙。

久客京華。落拓無成。哈吁暮朝。歎名場已醒。夢中蕉鹿。酒徒難覓。市上荆高。冰柱如
山。雪花比席。昨夜征衣換濁醪。塵土外。但西山一角。冷翠迢迢。朝來寒竟須消。怪
賤子何當折柬招。卻幾層幕底。歌圓似豆。一重門外。風利于刀。顧曲心情。當場意氣。
今日逢公頗自豪。明朝事。任紆干雀凍。鷓旦蟲號。

齊天樂 題朱澧泉夢游圖

玉華久斷層城路。被君夜魂飛透。枕倚遊仙。臺經靈夢。樓上有人垂手。分花拂柳。乍
獻果猿驚。銜芝鹿走。一笑相逢。可憐宵裏那時候。依稀琴韻數弄。露涼風細處。按
節輕奏。衣上香多。袖中雲在。不似人閒星斗。此鄉真有。便花月精靈。儘難消受。烟外

霜鐘一聲聲聽取。

換巢鸞鳳 王述菴先生招集陶然亭

素景商飆。正羈懷落漠。病思蕭寥。忽飛天外賞。來赴酒邊招。羣公車蓋滿亭皋。文雄
談綺。書狂飲豪。非此會。可不負。鳳城秋好。清眺山容悄。偏愛秋山。耐得斜陽照。對
酒能歌。拈花解笑。未損年時懷抱。吟情孤嫻。慕停杯。長天看得征鴻小。歸鞍遲。鞞角
聲催度林杪。

湘春夜月 竹簾同蓉裳賦

是何人。生生擘碎湘雲。掩映綺閣銀櫳。漠漠漾波紋。界土一絲絲月。又幾絲花氣。約
住爐薰。任軟紅十丈。此閒清絕。不到纖塵。昔遊還記。黃陵廟外。青草湖濱。細認綠
烟一段。有未枯怨血。不斷離魂。晝長宰地。看模糊。猶帶烟痕。斜捲處。把冰紋篋展。楚
詞讀罷。如見湘君。

到黃昏。廊虛屋古。和烟繚忽飛動。佛樓山館時來去。捎破晚風一弄。穿畫棟。休攪亂。香窩燕子尋花夢。名經鑿空。怪鳥鼠都非。羽毛難別。生不屬麟鳳。神仙種。何必淮南丹汞。羞他雞犬相共。寄人簷下須臾事。且耐冷嘲閒諷。尋古洞。聞說有。松脂石乳烟霞供。人間無用。便老爾千年。明砂拋盡。不值一錢重。

石州慢 蒲扇

澤畔苻離。妙手拈來。製成風翳。愛他涼沁露葉。平鋪烟條細摺。聚頭新樣。倘將巧思翻來。模糊綠認春帆葉。堪笑牧豬兒。把陳編空緝。妥帖。個是吳儂。水鄉風味。舊曾諳習。任說團蕉。鏤竹一清難及。甄妃善感。便教塘上吟成。秋風不效班姬泣。莞蕩展方花。共波紋重疊。

水調歌頭 題王蘭泉先生三泖漁莊圖

一幅好東絹。烟水煞空濛。先生曾讀書處。差許輞川同。閒覓釣師罟友。共飽金盞玉鱸。樂事總無窮。三面寫晴泖。九朵削遙峯。營門外。馬背上。直廬中。時時一展圖畫。

歸興滿吳淞。已是文章千古。又待功名萬里。何暇思秋風。魚鳥莫相憶。此意在天公。

東風第一枝 送錢獻之之西安

易水風寒。幽州日淡。誰教我輩遊此。君行忒恁。恁去。醉古長安市。茫茫身世。那禁得。幾番不是。放空囊。老鐵成虹。添得關門氣紫。杯酒外。離愁似海。攜手處。月華如水。不知秋爲誰深。豈意別從今始。經過壁壘。問成名。幾多豎子。更咸陽。一炬秦餘。可有蝨魚乾死。

醉太平 夏夜聞鄰院歌聲

庭陰綠莎。牆頭翠蘿。照人迢遞星河。忽誰家皓歌。華心暗磨。歡場夢過。不聽時也愁多。況聽時奈何。

燈前眼波。尊前頰渦。也曾題遍香羅。喚當筵唱過。紅兒玉娥。花娘麗哥。半生清淚如波。爲伊曹費多。

江城綺羅。遷鶯鬧蛾。聲聲攙著聲婆。被輕風遞過。中年感多。人生幾何。便教徹夜

清歌問伊家怎麼。

買陂塘 歸鴉同蓉裳少雲作

倚柴門、晚天無際。昏鴉歸影如織。分明小幅倪迂畫。點上米家顛墨。看不得。帶一片、斜陽萬古傷心色。暮寒蕭淅。似捲得風來。還兼雨過。催送小樓黑。曾相識。誰傍朱門貴宅。上林誰更栖息。郎君柘彈休拋灑。我是歸飛倦翮。飛暫歇。卻好趁、江船小坐。秋帆側。啼還啞啞。笑畫角聲中。暝烟堆裏。多少未歸客。

飛雪滿羣山 冰花

水欲凝時。風還蹙住。偶然五出成紋。開原頃刻。色香何許。可知泡幻前因。空花先現。處是姹紫。嫣紅後身。髣髴看取。幾絲宮繭。隨翦落紛紛。應自笑、傾陽無分也。借霜姿一點。雪豔三分。鏡菱初展。瓶梅欲坼。一般冷意相侵。鏤成都逼肖。卻輸與、文章有神。不愁漂泊。春風古澗。尋斷魂。

燭影搖紅 燈花

慕地凝眸。蟬紗減卻銀釭亮。嬾成蘭氣不多些。幻出花花相。深掩珠屏斗帳。莫教他、
一絲風颺。金錢罷擲。棋子停敲。剪刀輕放。莫是明朝。青鸞有信堪凝望。只愁今夜
似前宵。刻意將人誑。憎絕侍兒愁樣。報聲聲、妝臺斜傍。且挑香穗。書就桃箋。寄伊惆
悵。

雨中花慢 不寐

坐夜如年。將宵作晝。不知是底心情。怪愁偏黯淡。影最分明。又是一絲涼雨。和風捲
入疏櫺。□真淒絕。夢都拋我。忒可憐生。屏空屋古。骨冷神清。階前葉墮。還驚誰省。
識、拋乾鉛淚。溼遍桃笙。偏是黃雞睡穩。滴殘花漏無聲。再休相笑。空堂燕蝠。各有生
平。

醉花陰 夏夜

烟外鐘聲飄數杵。風過涼生苧。隔竹捲珠簾。幾個明星。切切如私語。
滅燭坐沈香一縷。悵好閒庭戶。和淚囑流螢。莫近蓮塘。照見雙棲羽。

洞庭春色 帆影

十葉高懸。一痕斜漾。慣趁行船。過綠蕪野岸。還爭燕掠。白蘋深港。不礙鷗眠。最好夕陽低映處。待揩遍秋江一幅箋。輕移去。怕風花易卸。水葉常偏。江樓有人徙倚。看不定。檻外簾前。更遙黏夜火。閃波如電。背飛落月。貼草疑烟。長是送君南浦後。與銷贖離魂共黯然。相思夢。願從伊飄去。落向郎邊。

壺中天慢 柝聲

九門鎖上。早蟬更報急。淒淒夜永。常向漏聲疏處補。街鼓頻番相應。古驛銜山。荒城抱水。幾個人欹枕。欲沈猶未。星星蕭寺鐘殷。便擬刁斗千屯。胡笳萬帳。無此聲。悽警。獨火營門青似豆。打得霜酸月冷。今夜嚴城。傳來虎旅。一樣愁清聽。可知獨客被他鄉夢敲醒。

滿江紅 瓦松

浪得松名。借片瓦。託根而已。也只伴。牆蒿城草。一般生理。餘氣慣催金碧換。劫灰不

共鴛鴦死。博詞人、爭詠昔邪房。香生齒。鷓鴣畔。魚鱗裏。連斷蘚。交叢杞。怪宮空寢
壞。爾曹偏喜。似有客樓新雨綠。更無僧寺斜陽紫。怕深宵、發屋走妖狐。齊飛起。

沁園春 送安桂浦之廣平

有客長安。西笑多時。今方作裝。向邯鄲古道。訪平原客。叢臺落日。弔武靈王。暇卽登
樓。豪宜置酒。城上千山走太行。清狂甚。喚娃嬴挾瑟。一代名倡。姦雄已事堪傷。七
十二遺墳。蔓草荒。笑此曹作計。將毋俊儻。吾儕弔古。倍覺蒼涼。此去關河。大都遼廓。
匹馬嘶風度濁漳。憑君去。問仙翁一枕。可熟黃梁。

金縷曲 久不獲稗存薇隱書時二子同客姑孰

往事君應省。記南州、吟聯山騎。昔時遊俊。今得孫郎應勝我。君自不憂孤另。念獨鶴、
風淒露警。時與稚存有猿鶴之稱。豈意江潭寥落後。覓一行、征雁都無影。何久不枉
芳訊。縱教懶作長安信。也應憐、長安市上。故人貧病。我夢慣隨江上下。那管蛟龍
睡醒。羨二子、相依爲命。抵死不沾京洛土。算從頭、作計輸公等。相憶苦。筆難罄。

又 送楊才叔試令甘肅

羨爾抽鞭早。把人閒、玉堂金馬。付之一笑。人說用才多錯。迂我說此行偏好。便潘令、輸伊年少。卻怪連宵同按曲。早風前、屢犯伊涼調。是此日、送行稿。長城盡處河流繞。更經心、洮湟關隴。幾重邊要。昔日羌戎皆錦繡。試擁專城坐嘯。莫認作、功名草草。只我送君真有淚。爲文章、知己如君少。名山約、莫忘了。

摸魚兒 自題揖樵圖

記曾聽、春山伐木。丁丁聲度林杪。斧聲漸歇。歌聲近。帶得夕陽歸了。君莫笑。我識字無多。不解談王道。名山難到。便到得山中。也愁岐路。片語乞相告。塵世擾。谷口攜家須早。半生惟爾同調。人閒無處容長揖。愁絕蹇驢席帽。休懊惱。判爾許腰身。折向伊曹好。浮生草草。待爛得柯殘。夢醒蕉後。相與出塵表。

八歸 題吳哲甫湖田書屋圖卽送其歸里

生綃一幅。水鄉烟景。圖就無限清感。山脚平拖湖影綠。還被葑田數稜。織成漪簟。白

板閒扉垂柳處。總付與、水風開掩。論活計、春雨菰蒲。秋稅足菱芡。見說罟師別久，農經拋卻。誤踏軟紅塵。窳香引思。鷗波入夢。茶尾吟邊愁黯。今朝歸計穩。小別斯須袂重攬。烟波樂、莫教句住。好憶臨歧。西山眉黛斂。

金縷曲 送汪曉山試令江蘇

南國蜚聲價。看紛紛、同時鶚薦。盡居君亞。似此才名真第一。合遣輪扶大雅。怎百里、屈君腰胯。一笑宰官身已現。問西清、東觀何人者。揮手去、暫相謝。江城此去真如畫。記前遊、五湖烟水。一帆曾借。鄉郡不分襟帶水。親舍便如官舍。我亦庇、萬閒之廈。他日願隨諸父老。聽清琴、獻頌棠陰下。相與勸、引金罍。

念奴嬌 元夜步月

天街放夜。看香車寶馬、一時流水。風過笑聲多處軟。吹不軟紅塵起。西域燈輪。東京火樹。百變魚龍戲。萬人開處。蠻王倒跨獅子。誰道有月空中斜。飛兔脚圓過今宵矣。便不爲燈須爲月。肯放華心竟死。影忽疑仙。身還是客。踏遍閒坊市。乞天從願。年

年今夜如此。

減蘭

彩雲成隊。衆裏橫波偏不奈。昨夜窗前。掩袖迴燈劇可憐。新詞解讀。誰道吳兒心似木。笑殺兒曹。只愛當筵脫錦袍。

芰房含雨。冷落相憐心最苦。紙閣薰爐。一幅春風鬢影圖。別筵易醉。酒綠燈紅都是淚。雪壓鞭梢。回指衙衙第七條。朝來雪塞衙衙口。東草場東第七條。顧梁汾句。此

景適復似之。

百字令 宿王介子先生齋頭話舊

荊州初識。記霜清憲府。天寒夢澤。絲竹後堂容我到。醉倒留髡十石。湘月窺簾。岳鐘殷榻。半載長沙客。楚雲千里。回頭都是陳跡。今日金馬還公。蹇驢老我。相見黃塵陌。住近城南天尺五。一水遙通太液。藥圃圍棋。草堂翦燭。話到東方白。殷勤強飯。蒼生還望安石。

定風波 和余少雲

底因緣。席帽黃塵。五年人海爲客。桂老巖空。魚荒水冷。兩地難棲息。素衣緇。黑頭白。臺上黃金慘無色。何益。待重新整頓。看山雙屐。石歌邊調口。爲消愁。轉助愁千尺。任馬醫脂販。鳴鐘列鼎。那覓牛心炙。杜陵茅馬。卿壁。我更無家可歸得。今夕。且將鉛淚。和伊同滴。

貂裘換酒 潞河舟次

行矣吾何憾。但西山、依依送客。相看未厭。穩買潞河舟。一葉載去。昔時書劍。趁滑笏、半川漪蕩。柔櫓一聲塵夢覺。任荒雞、促舞三家店。分芋事久無驗。新妝不爲投時。豔問幾輩。飛騰馬價。遭逢狗監。漁弟漁兄相待久。莫負螯肥酒醞。贖篋裏、宮袍無燄。零落江皋原不恨。奈浮雲、落日光陰澹。從尹卜、學鳧泛。

清平樂 河閒曉發

茅檐土銼。著個淒涼我。替戾聲催裝上馱。冷雁一繩先過。昨宵翠袖紅絃。知他今

夜誰邊。報道郵籤百二。驚回鄉夢三千。

塞垣春 初九夜金棕亭招飲病不克赴詞以柬之

後日春來也。遲酒伴、將春借。梅皴玉蕾。釀浮花乳。春影如畫。賸薄寒、料峭融春冶。便結個、嬉春社。更紅箋、春詞好。霎時傳遍都下。頻念苦吟人。似未解春來。孤負清夜。待作討春遊。奈絲騎慵跨。戀銀燈翠罽。相望春城。但愁和燭奴話。留約聽譙鼓。看春將春打。

御街行 十三夜偕少雲同步燈市

城東昨見青旗轉。陡撲面、風情軟。玉簫吹起試燈人。門巷笑聲烘暖。六街拋得。月華如練。今夜無人管。和君舊是清遊伴。奈往事、心頭滿。無情一片是春雲。隔得兩家天遠。星橋影墮。踏歌聲散。三嘆歸空館。

月華清 十五夜偕金棕亭王竹所集少雲法源寺寓齋因偕步燈市

絲麵搓成。香蠶煮熟。招攜同話松院。解事靈妃。早擁一輪天半。是今年、初度逢圓。祝

後會一樽常滿。行散愛流輝。紫陌分光翠殿。莫道夜蛾心懶。被幾陣衣香。暗中句轉。似水車輪。不遣車中人見。十分清露下歌聲。一例俊燈前人面。流玩算年華暢好。忍教輕換。

摸魚兒 雪夜和少雲時同寓法源寺

怪朝來春陰如許。同雲已閣簷際。擁爐鴿炭頻番換。膚粟漸平還起。禪窟裏本不稱春來雪。況紛紛地。尋思往事。共燭短更長。寒深屋淺。話凍玉蟾淚。問家具。經卷藥爐而已。可憐青鬢憔悴。君貧我更貧兼病。愁竟不須迴避。高枕睡。倩屋角西山與夢通清氣。江鄉風味。漸燕筍登盤。刀魚上筍。憶著已心醉。

又 疊前韻

倚松寮。斜陽澹澹。天圍遠樹無際。樹頭漸有歸鴉宿。又被暮鐘敲起。人海裏。只我兩閒人。吟占蕭涼地。十年來事。似病馬依牆。窮猿入檻。悽絕轉無淚。春漸半。十日九風而已。只愁春也憔悴。韶華不向愁邊好。它日逢花須避。休便睡。共佛火深宵。一榻

分雲氣。禪和滋味。歎我已能堪。君真可惜。還覓市酤醉。

補遺

滿江紅

靜念平生。忽不樂、投杯而起。無因瀉、長江萬斛。剖胸一洗。識路漫誇孤竹馬。問名久似遼東豕。道飛揚、跋扈欲何如。窮殺爾。禪中蝨。真堪恥。車中婦。伊誰使。向青山慟哭。只應情死。斫地莫哀終有別。問天不應無如已。且浮生、花月醉千場。吾行矣。

邁陂塘

題湯緯堂吟秋圖

綠陰陰、夏初庭院。何來秋意如許。丹楓黃菊都移到。似聽候蟲無數。聲在樹。有尺五疏襟、約得吟情住。問秋來路。是流水煙村。夕陽漁網。風柳最疏處。賢明府。十載鳴琴單父。筆牀茶竈家具。苔窠石徑尋詩坐。剛散竹閒衙鼓。吟更苦。任侍史青童、竊笑官何故。圖中如遇。聽閩嶠東西。鼇江上下。爭唱使君句。



詞美



運筆

蓉石



山

館

楊芳燦（乾隆一八——嘉慶二〇）

字才叔。號蓉裳。江蘇金匱人。工詩文。受知於學使彭元瑞。以拔貢應廷試。補伏羌知縣。設計平田五之亂。以功擢知靈州。不樂外吏。入費爲員外郎。與修會典。丁母憂歸。主衢杭及關中錦江諸書院。修四川通志。著有真率齋稿芙蓉山館詩文稿。

芙蓉山館詞

金匱楊芳燦蓉囊

虞美人

獸鑲不啓文鱗鎖。寂寞熏香坐。陰陰斜照上簾衣。一片落花、無語背人飛。羅衣巧
襯雙金鳳。猶怯寒威重。春愁如夢不分明。央及杏梁燕子、喚他醒。

浣溪沙

宿雨初晴度洩雲。流鶯猶自惜餘春。棟華落盡閉閑門。小市酒旗風帖帖。橫塘漁
網水鱗鱗。垂楊影裏浣衣人。

蝶戀花

獨倚畫屏山六曲。喚起雛鬟。鎖上文鱗鑰。貼地球簾烟翠薄。隔牆風弄秋千索。斜
抱銀箏嫌寂寞。蚪箭三更。好夢偏擔閣。一架薔薇華自落。濛濛涼月聞姑惡。

清平樂 泛舟

芙蓉山館詞

鏡奩眉嫵。湖水清如許。蘭葉輕風槐葉雨。好個秋光無主。興闌欲泛歸橈。隔溪漁子相招。一帶藕華深處。夕陽人影紅橋。

燭影搖紅

孤棹逶迤。溼雲如夢吳天暝。一彎微月到蘆花。晴雪寒無影。離思忽忽未定。更那堪、漏長人靜。倚舷凝眺。山澹無姿。水明生暈。悵悵冬郎。已涼天氣江南恨。冷蛩哀雁攪余思。淚點青衫凝。拚向旗亭酌酎。奈愁思、易催人醒。爲秋銷瘦。詩號秋懷。賦題秋興。

浪淘沙 聽雨

落葉帶愁飄。敲響窗寮。相思人度可憐宵。幾片涼雲流不住。夜雨蕭蕭。鵲尾嫩香銷。燈也慵挑。羅衾如水夢無膠。自是儂家聽不得。錯怪芭蕉。

浣溪紗

殘月窺人畫閣空。碧紗網戶小簾櫳。相思人在峭寒中。衾角淚淹愁有跡。枕函香

冷夢無蹤。一聲寒雁五更風。

如夢令

何事芳魂栩栩。飛入翠紅深處。香夢忽驚回。暖日半庭花雨。無語。無語。又被蘋風吹去。

鵲橋仙 初冬

遙山欲暝。濃陰猶滯。雁唳一天雲溼。初冬時候恁溫和。好換卻、單衫白帽。茶甌浮綠。墨池泛紫。寫得香箋一摺。輕雷細雨似殘春。只多了、半庭黃葉。

踏莎行 別情

乍引離觴。已添別緒。美人和淚星星語。今宵身在木蘭舟。夢魂仍向樓頭住。明月蘆花。清霜楓樹。出門便是天涯路。一聲新雁送殘秋。個儂也到秋邊去。

少年游 懷儲玉琴

美人何處碧雲流。魚信久沈浮。一行冷雁。幾株衰柳。併作十分秋。西風若解懷人

意吹夢到揚州。心曲愁濃。眼中天遠，獨倚夕陽樓。

清平樂 秣陵秋旅

半林黃葉。幾點寒鴉黑。一展酒旗風獵獵。人醉六朝烟月。故宮玉樹誰攀。土花血影斑斑。欸乃聲中歸去。愁雲鎖徧鍾山。

臨江仙

草滿瑤階塵滿鏡。鵲爐殘麝香焦。相思瘦損楚宮腰。花廊月廡，從此罷吹簫。倚徧危闌十二曲。平蕪去路迢迢。夕陽流水小紅橋。別時折柳，今又長新條。

滿庭芳

柳戶雲欹。蘭窗篆裊。晝長瑤瑟慵彈。紅絲小研，纖手試麋丸。縹緲琳華仙曲，繡新譜、寫上冰紈。香肩並。歌唇銜雨，羅袖唾花寒。無端。千里別，空江孤棹，烟水迷漫。漸雙飛入破。聽到離鸞。後夜相思難寄。吳天遠，落月如盤。人何處。夢魂長繞，十二碧闌干。

菩薩蠻

琉璃箋譜香函句。惜春怕到春濃處。門外雨蕭蕭。梨花落畫橋。淚珠霑粉臉。蛤帳和愁掩。鸚鵡懺多情。金籠學誦經。

東風輕薄窺羅幕。雛鬢曉啓蒼琅鑰。錦雨隔窗紗。夢回聽賣花。相思銷玉貌。慵揭

菱花照。香霧繞垂鬟。濃熏金博山。

無情燕嘴銜花去。多情蛛網黏花住。去住總銷魂。紅巾凝淚痕。水晶簾押靜。寒浸

春人影。新恨壓眉頭。嬌波橫不流。

酷相思

一翦香風吹柳絮。惱亂寸心如許。儘望斷、天涯芳草路。春去也、花無主。花落也、春無主。回首池臺行樂處。斜照飛紅雨。只可惜、流光空擲度。人愁也、鶯無語。鶯愁也、人無語。

念奴嬌

多情風雨伴春來、忽又送春歸矣。彈指聲中春九十、麗日輕雲有幾。笑也含愁、醒還

似夢。慵上高樓倚。牀頭醺醪。判他真個沈醉。萋萋芳草池亭。蟬前鳩後。到處愁人
意。擬趁良朋櫻筍約。錦字奚奴先寄。小鉢研香。圓爐焙茗。寂寂簾垂地。無慘頻問。杏
梁雙燕歸未。

臺城路

明霞逗出涼蟾影。空階徧流銀汞。詞譜三中。笛吹四上。彷彿瑤天簫鳳。輕颺又動。怕
紈扇驚秋。舊愁催送。一鏡芳池。藕花香入鷺絲夢。溼螢時駐。槐影繞回廊寂寂。更
與誰共。古研麋丸。磁甌雀茗。儘算騷人清俸。幾回吟諷。奈只是無眠。夜深烟重。清簟
胡牀。醉歌懷二仲。

摸魚兒

韓景圖有句云歸來坐深林悟到秋生處心甚愛之作此以寄

據胡牀。深林獨坐。微茫天色催暮。碧雲幾葉流無影。率地感秋成悟。秋有語。道還叩
騷人。識我家何處。君應不誤。想籬豆花邊。涼蟬聲裏。依約認前路。淒涼意。不數庾
詩江賦。天然空外琴趣。俚俚我亦悲秋者。忍搯檀槽遺譜。拚睡去。枕半榻。明蟾夢與

秋同住。玲瓏窗戶。正露沁蓮池。夜深人靜。花氣冷如雨。

喜遷鶯 立秋日東顧立方

琉璃窗牖。正紵衫初試。嫩涼盈袖。一抹銀雲。三分璧月。酒醒黃昏時候。儘開簾滅燭。攬不盡、清暉盈手。闌干曲。只拈將抹麗。暗香偷嗅。回首空感舊。沈李浮瓜。往事卿思否。菡萏池塘。蠭蛸庭院。贏得而今倜傥。相思無可寄。聊數遍、暝鐘清漏。怱悵也。稜稜玉骨。共秋爭瘦。

賀新涼

蕉館蛩聲起。足清歡、未寒時節。已涼天氣。著意悲秋秋不管。何苦爲秋憔悴。且領略、露華烟小。小炷沈烟翻梵夾。正桐陰、滿院簾垂地。雕梁靜。燕歸矣。高樓四面山光裏。又何須、揮杯開宴。燭奴燈婢。銷遣閒情無長策。作達放顛而已。儘拈遍、豔詞香偈。眉月半窗花影轉。拂藤牀、藉月和花睡。蝶夢覺。颯然喜。

思佳客

七寶鐙前卸翠翹。更更更漏可憐宵。三分華月芙蓉館。一水明星烏鵲橋。栽恨葉，種愁苗。綠窗擁髻倩魂銷。他生願化無情樹。不宿青鸞宿伯勞。

一翦梅

秋到黃昏最寂寥。鳳脰頻挑。鵲腦頻燒。玉人孤坐按秦簫。曲點紅么。淚裏紅綃。夜色陰陰上綺寮。空院蟪蛄。寒雨芭蕉。魚書無便托江潮。千里人遙。一段魂銷。

雙調望江南

秋如夢。一院雨廉纖。亞字闌干之字路。桐花庭甃棗花簾。側側晚寒添。相思意。竟日未曾忺。筆染青螺翻黛譜。墨研烏鰂寫霜縑。因使寄江淹。腰圍減。芳思漸銷磨。白紵單衫裁卻月。紅鹽怨曲唱迴波。閒處斂雙蛾。人跡少。瓊砌草成窠。鬢影恰同花影瘦。淚絲持比雨絲多。悵悵奈秋何。

昭君怨

一派雁聲如語。一院寒聲如雨。愁夢不成圓。夜如年。香閣鸚哥睡未。繡榻狸奴來。

未。閒事最相關。喚雛鬢。

喜遷鶯 泊舟楓橋聞歌有感

微雲如霧。送晚來幾點。菰蒲涼雨。林影皴紅。潭痕渲翠。做弄秋光如許。悵行蹤無定。繫一葉、扁舟沙渚。誰相伴。有蘆花深處。一行眠鷺。凝佇。天已暮。露柳霜蓮。秋滿楓橋路。絃響棖棖。蠟光隱隱。隔院謝娘眉嫵。歌聲留不住。又化作、水烟飛去。淒涼意。算者般情味。綵毫難賦。

滿江紅 寒夜感懷和謬齋舅氏韻

一夢黃塵。人世事、隨他翻覆。君不見、香桃自笑。風桐自哭。儘有熱腸堪任俠。惜無媚骨能諧俗。看容顏、強半爲愁銷。秋眉綠。元蝶化。緗千軸。白鳳吐。才千斛。算墨池滋味。此生嘗足。詩好只應供鬼唱。文成誓不教人讀。錦囊空、只賸一編書。東華錄。少日詞場。揮彩筆。雲蒸龍變。曾記得、夢中拜賜。玉泚金硯。書上欲摩烏集闕。賦成不數靈光殿。十年來、意氣漸消磨。聲名賤。千丈髮。隨年換。一掬淚。和愁嚙。恨流光如

此最難消遣。蘸墨細臨鷹嘴帖。挑燈快讀虬髯傳。向人前、擊碎古桐琴。花成片。
霜幕風簾。青楊樹、幾番搖落。翹首望、青天碎碎。珠星作作。一院明蟾清影瘦。五更白
雁寒聲惡。耐淒涼、自倒酒罇看餘醅脚。劍欲活、青萍躍。鏡欲死、紅蕤落。問人生那
得窮年寂寞。市上好從騶卒飲。朝來更逐毛公博。好男兒、俊健似生猱。寧甘縛。
墨寶騷茵。人爭笑、腐儒塗抹。渾不信、窮愁累我。文章無色。枉費千杯元麝髓。難求半
點青蚨血。只贏來、磊塊不能平。填胸臆。蘭膏燼、心還熱。蠶絲絕、腸應直。嘆年來只
與蠹魚分食。至竟縹緗成底用。少來楮棘何勞刻。不如他、估客競錐刀。驅南北。

菩薩蠻

葡萄桃豔錦絲雙扣。龍梭墮地沈吟久。夢雨溼輕容。巫山十二重。玉屏花鎖鎖。獨聽
啼蛄坐。無奈洛神何。騎魚慣撇波。
櫻桃花軟棲黃蝶。珠簾掩映春雲葉。門掩寶釵樓。朝來嬾上頭。石榴裙樣巧。線壓
雙鴛鳥。茜帶一條條。相思瘦舞腰。

玲瓏窗掩桃花紙。蟻蝨甲弄三絃子。繡被狄香熏。蟠蟠罨鈿雲。月篩花影碎。人傍
花窩睡。惱是夜烏啼。花飛月又西。
冰紋小簾銀絲細。綠鬢着枕蘭膏膩。懶唱懊儂詞。病闌春去時。燭花雙苜小。龜甲
屏風透。花外雨瀟瀟。春魂何處招。

蘇幕遮 燕

柳風輕。梨雪溶。翠味紅翎。不羨颺颺鳳。薄暝歸來香雨凍。絮語相偎。似訴春寒重。
掠珠屏。穿繡棟。那管人愁。又踏簾鉤哢。滿地落花紅不動。銜入新巢。軟襯雙棲夢。

摸魚兒 寄王淙雲

閉重門。悄無人到。荒階苔已成篆。蠻箋摺疊成方勝。倩寄舊時吟伴。腸已斷。問春色、
和愁畢竟誰深淺。危欄凭遍。愛空翠濛濛。斜暉澹澹。一縷斷虹茜。芳洲路。細草高
低似翦。柔波來去如澱。冶游情事渾如夢。花雨半樓人倦。春婉婉。拚讓與、尋香小蝶
棲香燕。如何消遣。聽曲泉廊西。丁冬鈴語。也似訴清怨。

據蒲團。楞嚴讀罷。旃檀縷縷烟細。閣黎公案誰能悟。略遣煩愁而已。拈短偈。蚤度取。一番小劫春聲裏。烏皮斐几。笑斑管欹斜。粉箋狼籍。詩句沒頭尾。文窗下。一種悲涼滋味。滿襟無限清淚。落花穩傍苔衣臥。無奈軟風驚起。憔悴矣。怪如此穠春。卻有悲秋意。筠簾垂地。又清影窺人。夜闌人寂。松頂月如水。

浣溪沙

窄地球簾小院空。薔薇香露沁嬌紅。月痕如夢隔疏櫳。釵影垂垂欹玉鳳。燭煤的的墜金蟲。自摹花樣拂輕容。一繫斑駁甚處尋。畫橋依舊柳陰陰。別來憔悴到於今。未許梨花通半夢。怎教梔子結同心。軟風吹淚溼蘭襟。

念奴嬌 答顧學和

嶽崎歷落。笑譚間、棄筆投觚而起。少日詞場吞彩鳳。人識盧家千里。辛味都嘗。丁年易過。氣短謀生計。有誰知得。溫生是大才士。須信狂受人憎。才非汝福。寒餓應如

此宿瘤無鹽都已嫁。只有夷光未字。世盡言愁。僕原多恨。卿復何爲爾。茫茫交集。伯
輿當爲情死。

石州慢 過鄒愚谷十二樓廢址

桐帽棕鞋。無端尋到。最銷魂處。交鑲凝紫。碎屏腐碧。誰家庭宇。斜陽一片。照見十二
樓空。釵光扇影銷何許。雙燕不知愁。只銜花私語。淒楚。靖安坊冷。金谷園空。繁華
無主。付與攤錢。牧豎撈蝦村女。微波如澱。可惜金粉塘邊。芙蓉蓮子。隨他去。賸一樹
棠梨。葬年年春雨。

臺城路 爲晴沙舅氏題春風啜茗小照

頭銜最愛稱茶部。高風更懷桑苧。柿簾拋時。桐瓢攜處。飄出冷烟千縷。青驄纔駐。約
不夜侯來。共伊容與。此客殊佳。未須更顧索郎語。松濤時沸幽耳。又疑瑤甃畔。亂
響春雨。細點紅薑。輕研綠雪。小盞盈盈勻注。清幽如許。吹不上京華。一分塵土。謾解
朝衫。腋風輕自舉。

一肩茶具隨行屐。竭來錦城閒憩。巴峽寒流。峨眉飛瀑。可似江鄉風味。郵筒頻寄。問
蒙頂春初。雪芽生未。折脚鐺中。空明滿貯。冷雲髓。軒窗長日無睡。愛披襟獨坐。風
日晴美。琴韻悒悒。墨香浥浥。添上半甌寒翠。閒情如水。憶小杜當年。落花風裏。何似
真長茗柯饒實理。世說劉尹茗柯有實理

長吟平子歸田賦。翩然遂吾初服。調水符閒。清人樹老。無恙家山新綠。浪翁水樂。愛
別有宮商。不關琴筑。貯月分雲。不勞遠去向甘谷。眼前塵事都遣。向林泉勝處。管
領清福。冷纈冰花。香凝雪乳。抵得明珠十斛。燃將楚竹。看魚眼勻圓。嫩湯初熟。破睡
風來。萬松涼謾謾。

生綃畫出江南夢。而今果饒歸興。綠拗盈階。紅尖照水。彷彿圖中風景。烟霏雪凝。看
水色茶香。故山都勝。只是風前。鬢絲換卻舊時影。相看共有茶癖。記輕風細雨。催
喚烟艇。祕色窰邊。長生瓢畔。細和昌黎石鼎。頭綱八餅。怕題起前塵。便勞追省。悟到
無言。聽流雲出嶺。

荷葉杯 寄二弟

一點幽懷難寫。深夜窗燭背人紅。三更殘夢雁聲中。相見總朦朧。冷月黃花籬落。蕭索。一別兩重陽。故園對酒也淒涼。何況是他鄉。

蝶戀花 吳江道中

秋水一灣雙槳舉。又送行人。過卻吳江浦。回首津亭天欲暮。碧雲如畫含殘雨。獨倚危舷愁不語。無限吟情。付與崔郎句。夾岸丹楓無別樹。夕陽紅到銷魂處。

水龍吟 舟中對月有感

浪紋千頃玻璃。蘭舟棹入空明地。推篷遙望。露華吹溼。薄羅衣袂。蠟燭幢幢。簾痕隱隱。清輝如水。恰愁人無賴。眉間心上。無限事。都提起。莫是誤來人世。倩姮娥。把愁遙寄。奈他碧落。深沈長是。玉樓深閉。五夜哀蛩。一天冷雁。逼人愁死。看方諸影裏。絲絲點點。替彈清淚。

齊天樂 雪夜排悶

海神慣作魚龍戲。漫空六花零亂。細刻圓冰。輕研碎玉。裝點誰家池館。簾絲串斷。愛
呱呱如塵。當庭吹滿。一曲新歌。衍波箋紙付蕭貫。青燈掩冉如豆。擁裘孤坐處。更
箭頻轉。蓮子杯空。蘆花被薄。無分酒香裊暖。淒涼誰管。便憶起天涯。兩三吟伴。凍合
江雲。夜深離夢遠。

蝶戀花 旅夜

金柝敲更蘭夜半。燈暈迷離。抱影眠孤館。一榻青綾偎未暖。荒雞又把行人喚。袖
上霜花吹欲滿。裊裊鞭絲。催過溪橋畔。回首吳關天樣遠。柔腸只共車輪轉。
替戾鈴聲寒轉急。絮起閒愁。百種鎔心鐵。塞北風高綿欲折。蒼涼古道沙如雪。底
事芳辰輕遠別。昨夢還家。似有人憐惜。坐轉碧欄干外月。曉寒珍重分明說。

眞珠簾 冰花

誰將面面琉璃鏡。照出瓊華層疊。香色了難尋。最高寒標格。花工小住光明界。早枝
葉。生來都別。瑩徹似一叢鴛樹。逗來圓魄。惜少噉雪瑤霜。做紅嬌紫姪。助他顏色。

移傍水晶簾。怕阿誰偷折。奈他彈指銷融後。便化作冷雲無迹。愁絕似殘春風雨。一般憐惜。

河傳 夏夜聞隔院歌聲有感

宛轉。淒怨。路迢迢。隔斷紅牆綺寮。香喉一串可憐嬌。長宵。惱人翻六么。我亦康陵傳舊譜。箏琶鼓。紅豆當場數。到而今。恨飄零。空庭倚欄和淚聽。記否。紅袖綺筵前。玉指纖纖攏絃。念奴嬌破想夫憐。纏綿銷魂自去年。觸起前塵惆悵夢。江南弄。驀地風吹送。棗花香。月影涼。思鄉夜深人斷腸。

木蘭花慢 竹簾

是湘雲一片。誰翦落。影娟娟。看愁淚無痕。離魂欲化。院後廊前。玲瓏冷波低蕩。任花風、裊上水沈烟。曉露千絲碧窰。夕陽一桁紅偏。明珰戍削可人憐。最好已涼天。憶舊家風景。蕙花小閣。箬葉輕船。而今水雲無分。只紅塵、遮斷便疑僊。留伴桃笙八尺。日長枕手閒眠。

念奴嬌

錦筵紅燭。酒三行以後，拍張言志。但得索郎同旅語，眼底何知許事。如此良宵，爲招座客，各試平生技。蔗竿爲仗，下階三中其臂。便擬火底調笙，柱間縛角，演出魚龍戲。打鼓搗來騎屋棟，竟作摻搗而起。人笑顛狂，我誇跌宕，任達爲佳耳。誰能端坐，讀書作老博士。

臨江仙

花瑄無聲虬水咽。比肩人倚紅樓。拈將夜合入磁甌。玉纖斟翠醪，珍重解郎愁。疊疊涼雲相掩映，素娥也似嬌羞。曲闌干畔笑凝眸。滿簾花影好，不肯上簾鉤。

應天長

半簾花影西風颭。冷逼鳳燈孤燄閃。移妝檻。鋪文簟。十二雕窗和月掩。離愁濃似醖。宮樣雙蛾長斂。檀枕夢醒回粉臉。淚珠三四點。

卜算子

稜稜畫屨牆。窄窄湘裙衩。一寸秋波不耐嬌。彈淚秋千下。錦字十三行。半摺箋新
研。鸚鵡無情也。解愁學說相思話。

更漏子

卸鸞釵。熏翠被。深院夜寒如水。珧窗掩。畫屏空。個人愁思濃。篆香重。銀液凍。醞造
一牀愁夢。霜片墜。月華低。早鴉烟外啼。

水龍吟

涼波一片空明。飄來露脚如烟細。沙鷗撲漉。草蛩叨絮。攪人無寐。獨凭危欄。紫蕉衫
薄。夜涼如水。正嫦娥嬌嬾。裝成半面。徐徐被雲扶起。忽聽歌聲搖曳。想高樓有人
偷倚。香咽珠字。玲瓏一串。紅紅難記。已是他鄉。那堪消受者般情味。看綠窗深處。雙
條絳蠟也飄秋淚。

菩薩蠻

譙樓搗鼓聲聲徹。小窗初上迷離月。獨自翦秋燈。畫屏山幾層。夜涼衾半擁。顛倒

江南夢。心事倩誰傳。此間無杜鵑。

浣溪沙

初試生衣怯下牀。小鬟拂鏡促朝妝。露桃紅影上銀牆。曲院春寒螺黛斂，重幃風細麝烟長。夜來好夢費思量。

蝶戀花

小院涼生簾半揭。羅幕如烟。一點明蟾入。浴罷凭欄雲髻側。輕紈掩映芙蓉雪。誰傍花陰調鈿篋。觸起柔腸。多少愁根節。銀漢迢迢蘭信隔。露華和淚吹衣溼。

臨江仙

一自游驄花外去。經年久絕音塵。空箱疊損鬱金裙。鏡鸞羞獨照。衾麝惜餘熏。碧海青天人悵望。斷腸最是黃昏。紅箋小字寫迴文。淚絲山枕雨。夢影鎖窗雲。

虞美人

四條絃子龍香柄。紅燭幢幢影。當筵催賜錦纏頭。小隊霓裳、都解按涼州。夜闌漸

覺聲淒促。不是江南曲。離人聽罷轉無聊。憶著吳娘。暮雨唱瀟瀟。

生查子

微紅頰暈生。淺綠眉痕逗。侍女約簾鉤。繡閣妝成後。細步下香階。慢卷宮羅袖。折得小桃花。背立東風瘦。

女冠子

多生慧業。憶在蕊珠宮闕。玉臺前。明鏡圓規月。輕羅澹卷烟。機中挑錦字。花底語香絃。無限關心事。惜華年。

謁金門

更漏轉。獨夜最難消遣。惆悵意中人。不見。銀河清且淺。隱隱簾波斜卷。曲曲屏山不展。露溼秋星三四點。熒熒如淚眼。

蝶戀花

記否蓉湖湖水漲。千柄風荷。紅影爭搖蕩。消夏灣頭停兩槳。新詞付與玲瓏唱。久

客不須頻悵望。料得年來。風月應無恙。一葉扁舟烟水上。他時容我長蕭放。

百字令 過班定遠墓

蘭臺著作。讓阿兄獨步。甘心投筆。別有奇功垂史冊。伯仲居然雙絕。遠度龍荒。窮探虎穴。不負封侯骨。傭書碌碌。小儒何處生活。當日絕塞留屯。孤軍制勝。拓地通疏勒。萬里功名真唾手。依舊玉關生入。故國魂歸。高原塚在三尺麒麟碣。我來憑弔。英風猶振林樾。

摸魚兒 家伯初過興平有弔貴妃墓詞因和之

是耶非。人間天上。一抔埋恨荒土。蛾眉訣絕須臾事。此地六軍曾駐。君看取。剩滿地。苔錢。淚灑胭脂雨。延秋古路。悵凝露香銷。翦霜紅葬。寂寞佛堂樹。傷心處。零落霓裳小部。千秋絕調誰譜。一般解脫龍華劫。不及雪衣鸚鵡。真浪語。渾不信。玉真自返蓬山去。香盟已負。縱拔地生天。慧因重證。此恨也難補。

樓角初融晴雪。簾旌低襯明霞。佳游彷彿章臺路。細馬玉鞭斜。小豔疏香時候。嬌歌脆管人家。東風從此須珍惜。二十四番花。

定風波 道中見新月

側側輕寒夜漏分。纖纖月影碧籠雲。逗出春光剛一線。初見。如塵似夢最銷魂。看到團圓知有待。無奈。清輝偏照別離人。總把閒愁拋撇去。凝竚。鏡中眉樣又逢君。

齊天樂 鈴聲

耳鳴不是聞鞞鐸。鈴聲晚來淒警。古堠烟寒。空槽月落。一片宮商相應。清圓入聽。更似怨如愁。助人銷凝。夜雨唐宮。千年恨事劫灰冷。花叢舊遊堪憶。綰風絨索動。香夢初醒。鸚母簾前。獨兒帳底。不是者般情景。千迴記省。問飄蕩行蹤。甚時方定。伴我心旌。共搖春夜永。

又 柝聲

是誰散打蝦蟆鼓。聲聲恰環鄰屋。逗破黃昏。敲殘白曉。不管離人眠熟。跳珠撒菽。似

玉虎牽絲桐魚呼粥。記否當場。箏瑟滾徧六州曲。嚴城曾伴刁斗。正邊烽夜警。急響相續。舊事心驚。長途耳倦。孤枕那禁根觸。更闌轉促。又攙入寒雞。數聲呶喔。催墮燈花。背人紅簌簌。

摸魚子 過邯鄲

兩茫茫。神仙富貴。邯鄲古道行客。酒邊卻話才人恨。零落好春堪惜。薄命妾。休悵望。鈿車夢斷瓊樓月。茗華一闕。記當日叢臺妖歌嫵舞。轉眼也消歇。人何處。謾道上清淪謫。蕊珠依舊宮闕。年華最怕經風雨。多少粉魔香劫。尋解脫。除非問青瑩枕裏丹砂訣。情腸倘熱。便金屋藏卿。雲臺著我。還是夢中說。

臨江仙 人日

屈指春來才七日。行人去去何之。別離不慣苦相思。倩誰簪綵勝。爲我把金卮。雁後歸期全未穩。吟情也比花遲。江南消息早梅知。疏香官閣夢。冷蕊草堂詩。

蕩晴雲。流曉月。綠影渺無際。橋斷虹腰。匆匆阻征騎。舉鞭指點斜陽。英雄何處。怎烟
景蒼涼如此。黯凝睇。惆悵銅雀高飛。無人識遺址。鴛瓦零星。也沒魏宮字。只餘一
掬春波。盈盈東注。是多少。望陵人淚。

漢宮春

旅舍見迎春一樹花甚爛熳因成此闋

除卻江梅算春風消息。伊最先知。蕭疏籬根石角。見兩三枝。宮羅幾疊。怯朝寒。纖瘦
難支。依稀似玉人。梳貌。懨懨小病闌時。香國何人。試巧。怪輕勻蜂額。細翦鶯衣。風
流未輸弱柳。金縷低垂。初三淡月。逗微光。偷照幽姿。憑寄語。東君著意。莫教擔誤花
期。

蝶戀花

鐵門阻雨

滑滑春泥朝雨罷。小卓雙輪。人住旗亭下。一抹淡烟青欲化。乳鳩還把輕陰罵。韶
景拋人彈指乍。柳惜殘春。槐自迎初夏。爲問晴光如可惜。丙丁帖子催教畫。

洞仙歌

有贈

趁時梳裹。恰明姿玉潤。花朵盈盈壓危鬢。更橫波犀利。巧步尖纖。誰得似。一種可人風韻。綵雲行不得。笳嘯音高。羯鼓勻圓四絃緊。袞徧小涼州。淺立筵前。又軟語、流鶯聲近。長記得、相逢踏青時。看細馬春衫。倍憐輕俊。

幾番邂逅。信十分閒雅。不是矜持見時乍。看銀泥裙褶。金屑檀槽。貪顧曲。不覺酒闌燈灺。也應憐宋玉。月夕霞朝。爲爾腰圍瘦堪把。秀色遠山橫。好倩丹青。寫鬢影、春風圖畫。算標格、真應伴才人。坐翠竹叢邊。玉梅花下。

阿環嬌麗。正穠妝卻扇。半鞦叢鬢貼金鈿。恍羅浮鳳子。五色翩跹。雙垂手。三疊霓裳拍徧。有緣連榻坐。對話江南。吳語關心最清軟。一曲紫雲迴。賞殺嬌喉。紅氍毹上。明璣鋪滿。更別有、風流繫人思。聽冷雨幽窗。恁般淒怨。

天然點豔。是薰香佳俠。放誕卿還用卿法。正落梅妝罷。墮馬梳成。同心帶。雙綰紅綃尺八。鴛鴦生怕捉。隔著芙蓉。未許相親便相狎。聽語故嘲伊。淺笑佯嗔。腮渦畔、紅潮一霎。只病酒、心情可憐生。便小盞當花。忍教輕呷。

鸞咽。姮唱。聽紅牙頻點。銀燭千枝吐蘭燄。怪纖纖過酒。小小藏鉤。看瘦影。何事翠蛾
偷斂。紺園留慧種。梅樹雙林。肯共羣葩鬪華豔。回首夙生因。解怨飄零。道歌扇舞
衫都厭。料別後。秋心定淒涼。對月淡花疏。此兒堪念。

東風第一枝 人日

拂戶風柔。隔屏寒淺。佳辰入春纔七。綺筵初泛。清樽華旛。漫題彩筆。團圞官舍。數樂
事。最宜今日。只故園。遠隔天涯。卻憶梅花消息。恰金斗生衣。乍熨更篆鼎。水沈旋
爇。逗來樓角明霞。減卻庭陰殘雪。熏桃注柳。看取次。春光如纈。愛清屑。脈脈多情。簾
外微黃新月。

探春 銀川旅舍元夜偶成

寶暈銷痕。仙雲散影。三五明蟾豔婉。暗釀春嬌。全迷夜色。燈火六街零亂。無奈餘寒
峭。尚未放。繡簾高捲。一般笑語盈盈。翠樓多少游伴。誰念旅愁孤館。覺點碧裁紅。
舊情全懶。心字香銷。雙花燭炮。怕聽邊城歌管。凝想江南信。早開過。梅花一半。剩有

閒情彩箋新句題滿。

鳳棲梧 與二弟別後宿平戎驛作

萬里分攜真草草。流水東西。嗚咽傷懷抱。削雪千山山四繞。塞程迢遞何時到。我亦風塵行未了。羸馬黃昏。缺月來相照。獨火熒熒郵店小。夜寒禁斷人聲悄。

百字令 旅夜有懷舊遊

華年彈指。最難忘、只是酒旗歌扇。金粉南朝行樂地。水榭中宵絃管。楊柳情絲。海棠夢影。醉眼春撩亂。分香帕子。行行新句題滿。誰念關塞棲遲。吳雲萬疊。離恨連天遠。烟月秦淮無恙在。依舊蘭橈波暖。畫角吹愁。銅荷飄淚。聽徹更長短。沈思往事。酒醒人在孤館。

生查子

游蜂觸樹僵。啁雀爭枝墜。暗裏覺春回。尚有餘寒在。小步粉牆陰。別雪尋梅蕊。零落惜花魂。滿眼傷春淚。

百字令

藥爐烟裏。怪春來、小病厭厭如許。玉琢相思金鑄淚。只有此情難訴。麝炷香銷。鉛波鏡掩。誰與修眉譜。沈思往事。總如春夢無據。須信交頸鴛鴦。雙頭菡萏。慣入閒詞賦。留得情腸。經劫在花鳥也。堪千古。光碧堂前。蕊珠宮畔。待覓游仙侶。三生慧業。未妨多作情語。

蝶戀花

紅遍花枝青遍柳。彈指韶華。又是清明後。長日厭厭如中酒。閒愁空在眉尖鬪。拋卻金針慵刺繡。率地簾波。料峭輕寒透。薄暮倚闌垂翠袖。落花風裏春人瘦。

燭影搖紅

且食蛤蜊。那知奴價高于婢。裸衣亭上大聲呼。何與癡人事。年少疏狂意氣。嘆此日、消磨盡矣。風沙裘劍。莽莽天涯。竟無知己。仰屋著書。千秋萬歲誰傳此。不如魚鳥見流連。肆意酣歌耳。客舍西風又起。憶故國、尊鱸正美。幾時歸去。一棹飄然。五湖烟

水。

摸魚兒 九日蘭山登高

傍層樓、晴雲數點。霜空萬里無際。年年此日題糕會。佳客樽前同醉。離別易。真個似、萍蓬聚散無根蒂。漫郎憔悴也。中酒懷人。星星滿鏡。旅鬢早斑矣。誰相念。十載邊城孤寄。西風吹夢迢遞。故山雲壑應無恙。何日好尋歸計。秋色裏。依舊是、紫萸黃菊傷心麗。凭高引睇。又猛拍闌干。曼聲長嘯。塞雁忽驚起。

菩薩蠻

相思人隔榆關道。芳心卻怪春來早。低語祝花枝。人歸開未遲。黃昏聽玉漏。影背明燈瘦。香夢遶屏山。雲迷第幾彎。

齊天樂 三弟寄椒珠並蜀箋數種賦此二闕示之

申椒密綴驪珠顆。玲瓏是誰呈巧。郁烈盈懷。勻圓在握。雅稱騷人襟抱。奇芬繚繞。似頰過靈花。酌來春醪。佩作香瓔。辟邪不用鑄剛卯。休嫌幻成圓相。當風偏逆鼻。生

性孤峭。蘭是同心。桂原共氣。風格自憐差老。禪機悟早。愛百八牟尼。一般香妙。證入
聞思。帶些辛味好。

文鱗六六。巴江到。蠻箋百番相贈。海藻輸華。溪藤讓滑。幅幅琉璃光瑩。粉痕紅凝。更
染透桃花。十分妍靚。韻事流傳。錦官城外薛濤井。宮中曉寒曾賦。衍波題未了。仙
夢催醒。冶習銷磨。香詞零落。不似當年吟興。舊游追省。把袍襖留題。徧鈔還贖。待做
銀鉤。撥燈銷夜永。

倦尋芳 春陰

留烟渲翠。借霧迷香。春意無限。薄靄冥濛。吹上苔衣微泫。鵲腦慵添。爐篆細。龍唇罷
撫琴絲緩。傍雕闌。問小桃無語。似含嬌怨。聽屋角、午鳩頻喚。惆悵芳時。晴景難見。
窳地簾波。斜倚枕函人倦。好夢竟隨蘭信杳。幽情不逐花風展。望吳關。謾凝眸。綠蕪
天遠。

鵲踏枝

錦瑟無端移玉柱。客鬢蕭疏。彈指華年誤。婪尾酒寒杯嬾舉。勸人空費流鶯語。試
看小園桃李樹。嫩綠陰陰。一抹朝烟護。花片似知春去處。隨風萬點尋春去。

浪淘沙

衰柳石橋邊。且放江船。夕陽明上鷺鷥肩。瑟瑟叢蘆聲似雨。萬頃秋烟。風緊布帆
偏。黯澹霜天。袂衣寒重要添棉。回首家山青漸遠。鄉思悽然。

謁金門

愁脈脈。抱影獨眠荒驛。階下寒蛩啼不歇。秋聲高一尺。涼浸羅衾疑溼。露氣隔簾
吹入。單枕中宵頻轉側。夢雲無處覓。

臨江仙

記否徵歌桃葉渡。當筵頻醉羅裙。東風吹暖一樓春。花香歡氣息。柳弱妾腰身。
泊天涯人易老。佳遊早謝前塵。藥爐經卷伴黃昏。鬢沾秦塞雪。夢斷楚山雲。

解語花 鞭春

鮮雲乍卷。麗景初舒。簫鼓晴郊鬧。朱幡翠葆。紛成隊。兒女攔街歡笑。蹄瑩角矯。訝刻畫形模。偏肖。待來朝。撲散香塵。看綵絲爭裊。陌上春泥融了。漸軟紅吹漲。花信先到。玉驄驟裏。尋芳客。別有珊瑚鞭縈繞。田家相報。聽遠樹、架犁催曉。好呼童、飯犢煙坡。勸東畝耕早。

又 剪綵

妝成梅萼。頰過椒花。儘有閒心性。春風曉鏡。雙蟬鬢。宜貼銀幡華勝。金刀手冷。怪幾日、峭寒猶凝。颭晴霞、活色生香。乍看來不定。花戶油窗相映。愛晨光微逗。分外幽靚。葱纖巧逞。新裁剪、多恐蝶魂催醒。明姿端正。便香國、司花也稱。傍妝臺、小立盈盈。散滿身紅影。

又 賣燈

春情豔婉。夜色迷離。小市華燈徧。方空素絹。新描畫、露葉風枝低顫。燭花初翦。看萬點、琉璃齊泫。隔簾波、悄擲金錢。不道韶光賤。最憶雪晴池館。正蕙花香散。翠幙初

卷。月華如練。人微醉、那管漏催銀箭。春風圖面。在夜火、闌珊庭院。悵江鄉、一種佳遊。問甚時重見。

又 試鼓

架塗青漆。牀釘圓花。百面春雷響。雲窗霧幌。傳聲處、攢得和風駘蕩。歌場十棒。恰袞徧、六么高唱。遶花叢、紅萼催開。更翠萌齊長。少日蕭郎伎癢。搗來騎屋棟。意氣豪上。一般俊爽。花奴手、可似漁陽清壯。休誇跌宕。怕絕調、更無人賞。近天街、且聽淵淵。和康時擊壤。

臨江仙

露井冰銷寒意淺。抱琴人在閒庭。蕙鑪香裊戶初扃。卷簾邀夜月。滅燭數春星。憔悴司勳才思減。天涯廿載飄零。江南山色夢中青。梅魂無處覓。柳眼幾時醒。 憔悴

翠樓吟

丙辰二月花朝適逢春分社日詞以記之

春色平分。花期剛到。又逢簫鼓卮社。韶光看總好。問何處、最宜閒寫。少年遊冶。記關

草池塘。簸錢亭榭。彈指乍。前塵如夢。舊歡都謝。牽惹萬縷閒愁。待雙燕歸來。訴他情話。花梢寒料峭。猶未放。一枝紅亞。春魂欲化。漸苔髮風梳。柳眉煙畫。酣清夜。且傾佳釀。月波同瀉。

浣溪紗

一桁簾紋窳地垂。天涯芳訊費尋思。閒愁惟有翠眉知。煙裊綠痕歸柳重。霞分紅意到花遲。殢人最是早春時。

邁陂塘

楊梅

記冰廚、吳鹽如雪。滿盤鶴頂初破。年年筍老櫻殘後。便盼洞庭煙柁。園叟過。看拾到、筠籠翠箸重重裹。勻圓百顆。笑嬌小吳娘。玉纖拈處。先怕粉裙澆。閒銷暑。露井水亭清坐。不須料理茶磨。夜深一口紅霞嚼。涼沁華池香唾。誰餉我。況消渴。年來最憶吾家果。歸田願左。便買夏論園。山資未辦。作計甚時可。

又 枇杷

傍牆根。篩煙漏月。濃陰一簇如畫。蠟珠密向枝頭綴。壓得翠梢低亞。梅雨灑也。染就嬌黃軟。縐宮羅帕。林鶯姪姪。縱香夢驚回。金丸在手。爭忍便拋打。誇珍品。只有江南亭榭。離離子熟長夏。相如錯認秦中樹。賦筆空勞摹寫。纖露下。愛摘向雕盤。俊味甘於蔗。閒情又惹。記端正窺人。當風鄣袖。花底小門罅。

又 青李

憶江南。堆盤碧實。拈來露氣猶溼。青房別是瑤池種。不數千株玉葉。寒水滷。恰好共。浮瓜顏色爭蒲鴿。甘回齒頰。似青子紅鹽。分來風味。入口卻微澀。招涼處。偶傍閒階小立。兒童樹底爭拾。一痕細認嫣紅凝。西子春纖曾捻。歸思切。正獨坐幽齋。寫到來禽帖。歡遊未愜。羨當日南皮。名流佳譙。挈爾伴蠻榼。

齊天樂 珍珠蘭

疏花隱葉。渾難認。清宵露痕微泫。細裊冰絲。斜穿翠縷。瑟瑟寶珠成串。兜娘試翦。愛插向蘭雲。倚風輕顫。一斛樓東。向人憔悴訴清怨。疏簾剛逗新月。坐來冰簟滑。漏

箭初轉。乍覺生香如聞吹息。慣惹離人腸斷。愁深夢淺。問碧影纖纖。甚時重見。剩有清芬。夜涼浮茗盃。

又茉莉

瓊田萬朵仙雲墮。名花幻成奇絕。玉骨玲瓏。冰魂縹緲。不識人間炎熱。看來總別。似夢入瑤臺。月華如雪。未信炎州。出塵有此好標格。碧紗幮畔銷暑。玉壺曾貯處。一樣瑩徹。冷豔疑銷。空香欲化。頻向枕函邊覓。仙姿誰匹。怕素奈青梔。比來差劣。澹到無言。滿庭涼露白。

又夜來香

紗櫺月上玲瓏影。幽懷不禁根觸。似有香來。不知花處。葉色隔簾微綠。芳叢幾簇。愛人定風微。麝薰吹足。素女多情。空中也爲撒金粟。追涼最宜露坐。傍垂蘿低蔓。冷翠如幄。碧玉娉婷。綠珠嬌小。相對黛眉雙蹙。明河絡角。只可惜涼宵。漏聲催速。漫展蕉箋。譜新詞一曲。

高陽臺 新秋息園晚眺

小雨催涼。微雲弄晚。一庭秋色澄鮮。茶具攜來。呼童試瀹清泉。遶廊靜聽風甌語。澹吟懷、句可通禪。記前番、藥甲開時、曾放觥船。閒階幾簇秋花瘦。倚玲瓏小石分外幽妍。垂柳多姿。蕭疏已惹愁煙。林鶯總惜春紅老。到秋蟬、綠也堪憐。正銷凝、新雁行行。又過樓前。

秋霽 本意

涼雨初過。喜天放新晴。滿眼秋色。林響蕭騷。池光澹沱。苔痕綠透簾隙。溼雲無迹。斜陽影裏殘虹直。更杳杳、屋角遙岑。微露一螺碧。蒼然平楚。暝色催愁。幾番巡檐。暗數歸翼。望吳天、故園何處。山中猿鶴正相憶。萬里雲波蘭訊隔。凭高目斷。又是根觸離心。小樓風外。一聲長笛。

步月 玉簪

玉筍留痕。冰壺蘸影。冷光微映簾押。幽叢淺綠。比蕉心差狹。看露下、素萼開纔。訝雲

外。瑤姬來。雲搔頭小。吹墮碧欄。幻成香莢。麝薰園。匝匝正拜月。妝成葉底。爭拈。個人纖媚。傍蘭雲低插。愛一縷香。逗秋衾。正半夜。夢回涼榻。清韻足。沈水罷添睡鴨。

水龍吟 蓼花

小紅開徧遙汀。明漪倒浸玲瓏影。花工似惜。秋容催老。渚蓮千柄。故着幽姿。叢叢點綴。水鄉煙景。料閒鷗也愛。風標如許。拚立到斜陽冷。宛轉虹橋相映。正湖干。釣絲風定。柔枝婀娜。低捎翠藻。弱牽青荇。擊碎珊瑚。罨將瓔珞。粉零香賸。悵江南路遠。何時花外。更維蘭艇。

紅情

小園雨過。看盈盈葉底。危花難妥。照水亞枝。顧影偏憐態。纖瑣薄暝殘霞數點。晴煙外。怯風吹墮。似靜女。病起慵妝。臨鏡鬢雲禪。一朵最婀娜。乍點注絳脣。笑齒微瑳。冶情無那。怕點閒階翠苔破。分付催春杜宇。莫更把。茜痕啼澹。任高閣。客去也。且留伴我。

綠意

嫩晴臺榭。又壓檐新綠。一片低亞。試拓窗紗。几硯生涼。碧痕潑眼疑瀉。漫研螺墨。爭題句。正滑膩。苔箋初研。羨尋香、小燕身輕。穿過幾重煙罅。況是迷空翠雨。遠山愁黛斂。秀色難畫。挑菜期過。採菜人歸。可惜好春無價。便尋遊伴。攜蠻榼。拚醉倒。青莎堪藉。怎因循。負了韶華。彈指惜惜槐夏。

玉京秋 曉月

天宇碧。冰蟾又飛上。半規孤白。翠波不動。霎華疑裂。挂壁昏燈無燄。漸秋窗、涼影如雪。催行客。夜烏驚起。繞枝淒咽。冷浸星痕欲滴。點征衣、方諸淚溼。如許清輝。無因向、紅樓人說。馬背尋殘夢。髣髴身到。琳華宮闕。太相逼。一片烟霜曉色。

徵招 霜花

玉煙匝地殘蟾起。高空夜雲齊斂。青女鬥嬋娟。散瑤花如糝。着衣明冉冉。只吟鬢、怕

不依枝。逐西風輕颺。草嫌姿太澹。好秋色。儘伊烘染。看霞外。幾樹丹楓。比茜桃還豔。
菩薩蠻

舞鸞鏡。匣流塵滿。曉妝無奈鸚哥喚。掠削鬢雲偏。蘭釵欲墜肩。陰陰香霧凍。欹枕
春愁重。簾捲正西風。落花飛向東。

金縷曲 黃藥林自興安軍營寄梅花小幅因題四闋於左方

廿載辭江國。記尋春、毳衫茸帽。歲寒泉石。拋卻家園三百樹。漂泊天涯爲客。聽吹徹、
玉龍淒咽。縞鶴青猿勞悵望。繞寒溪、幾度飄香雪。江天遠。夢難覓。故人知我心相
憶。研生絹、一枝疏瘦。翦來煙驛。海月流光明似鏡。冷挂珊瑚七尺。彷彿見、舊時顏色。
不分何郎吟興減。索枯腸、試點春風筆。燈欲炷。研剛炙。

尺幅傳心素。傍南枝、淋漓題徧。相思新句。慷慨短衣隨玉帳。不道此行良苦。看揮灑、
儘饒風趣。只我沈吟添別恨。黯銷魂、細雨關山路。佳人遠。碧雲暮。飄零總怨前塵
誤。漫裁詩、嘲桃詭柳。賞心難遇。記否巡簷同索笑。雪北香南俊侶。空回首、舊遊何處。

甚日相攜官閣畔。對疏花、重把淒涼訴。展瑤席、酌蘭醕。

薄醉吟肩聳。正邊城、臘寒三九。敝裘孤擁。竹外橫斜看最好。恰伴小齋清供。須省識、寄時珍重。手炷水沈烟一縷。拂琴絲、譜出江南弄。冬心抱。有誰共。四簷晴雪懸冰凍。照文窗、凌兢蛟背。墨波浮動。十二屏山圍屈曲。似有暗香偷送。賺兩兩、翠禽幽哢。獨夜蘭釭明似豆。擁青綾、定作羅浮夢。寒月影、逗簾縫。

彈指華年過。掩重關、鬢絲禪榻。六時清課。知己關情千里別。貌出寒花似我。有多少、冰霜摧挫。客到任嘲玄尚白。只素衣、空惹緇塵浣。名山約。幾時果。懷人遠道情無那。劃爐灰、喚添商陸。徹宵癡坐。一派角聲邊月曉。冷豔盈盈欲墮。更玉齒、粲然微瑳。姑射仙姝天際想。笑騷人、有句吟難妥。憑驛使、寄君和。

百字令

喜藥林至高平。招同周倬雲、陸秀三遊柳湖。卽席賦此。

廿年舊雨喜天涯。握手倍增幽興。遲日園林新霽後。占取風光殊勝。瘦竹迎筇。枯苔印屐。柳色明衫影。湖光湛綠。小亭恰似漁艇。最愛泉味清甘。瓶笙細響。就石支茶。

鼎似此佳遊。曾幾度。記否故山烟景。靜識禽音。樂知魚意。懶愜閒雲性。踏歌歸去。一林疏翠。初暝。

玉漏遲 憶鷗小艇玩月

晚霞初散綺。正素月流空。光逗簾額。試拓疏窗。淺印一方珂雪。涼意蕭蕭。竹樹人靜。後。滿庭秋色。河影直。遠山不動。夜雲堆碧。攜手共覓清歡。好料理吟箋。莫負蘭夕。記否頻年。對景漫勞相憶。小閣玲瓏如艇。渾疑泛鷗波。千尺更漏急。生衣露華吹溼。

沁園春 中秋卽席用迦陵韻同二弟作

今夕何年。皓月當頭。停杯問之。記隱囊塵尾。曾陪庾亮。皋禽朔管。曾伴陳思。清讌西樓。冶遊北里。多少騷人絕妙辭。今何處。只瓊宮無恙。環佩袿徽。晴空霧斂。烟霏算此景。年來見亦稀。儘掀髯老我。音情頓挫。隨肩愛弟。才調恢奇。蘭席平鋪。螺窗盡拓。觚爵齊騰。逸興飛。燒高燭。擘蠻箋。十樣醉墨分題。

風度疏篁。露下高梧。清輝轉揚。更涼莎繞砌。蛩聲斷續。明雲度水。雁影微茫。綠釀浮

盃紅紗照坐。起舞當筵低復昂。秋光好。且冷吟閒醉。此計差長。偶然闌入歡場。有俗客、前來興也妨。恰人如兩晉。襟懷灑落。樽開三雅。裙屐迴翔。笑語官奴兼呼末婢。落筆爭誇錦繡腸。流連久。愛清言郭象。狂態袁羊。

對月高歌。細數生平紛紛角張。嘆少儒戎幕。征裘凋敝。相如園令。賦筆摧藏。寄淚音書。驚心烽火。容易人歸百戰場。吾衰矣。漸容銷秦鏡。鬢點吳霜。風沙古塞伊涼。竟誤認他鄉是故鄉。悵五湖煙水。空思泛宅。廿年塵土。未許褰裳。忍負盟鷗。更騎官馬。羞向關西道姓楊。誰招隱。說小山叢桂。吹滿秋香。

疏影

爲顧伴繫題梅邊吹笛圖用白石詞韻

明漪浸玉。恰小舟如鷺。波上棲宿。寂寞冬心。黯澹春魂。併付一枝橫竹。泠泠清磬聲。相應。恍人在、香南雪北。好招他、入寺湖光來伴吟懷幽獨。坐到月高花瘦。天風吹暈小。空影微綠。夜氣高寒。孤櫂初迴。燈火前灣漁屋。延緣不盡湖山興。絕勝似、當年刻曲。寫清遊、腕筆冰壺。留取疏香尺幅。

百字令 初七夜月

靈辰過了。愛微黃新月、隔簾初上。星影闌干雲數點。引得吟情搖颺。街柝才傳。庵鐘乍歇。空外箏弦響。小歡微醉。算來不負清賞。恰好倦枕琵琶。北窗企脚。天際眞人想。從此清輝看漸滿。留客細傾佳釀。燈蕊銷紅。茶煙裊碧。墨泛空明浪。夕陽西下。笑他鄰女猶唱。

又 初八夜月記去年與荔裳在高平話別時用前韻卻寄

去年今夕。正半輪皓魄、空桐山上。偏照離人催部曲。一派旌旗搖颺。聞道傳烽。急郵飛羽。笳鼓連天響。良辰三五。可憐孤負歡賞。轉眼又是經年。燕山蜀棧。各有天涯想。料得高堂應念我。對月懶傾家釀。暈未全銷。圓如有待。夢怯巴江浪。謝家詩句。吟成誰和高唱。

又 初九夜月適姚春木吳兼山過寓同周倬雲夜話三疊前韻

晚雲齊斂。又月華滿地。新弦剛上。佳客翩然欣入座。風引畫簾低颺。茗淪皋盧。火添

商陸靜聽瓶笙響。門無剝啄。閒中頗愜幽賞。莫話蜀道風塵。吳江烟水。兼山將歸。吳門人海飄零想。差喜清光千里共。排悶且沽春釀。境自空明。人俱疏俊。我亦甘流浪。一聲銅鉢。敲殘更促清唱。

又 初十夜月飲周約齋儀部寓時約齋將乞假南歸四疊前韻

閒園小閣喜銜杯話舊。明蟾初上。兩樹寒梅齊破蕊。坐覺暗香微颺。妙句調絃。清談夏玉。何必箏琶響。廿年隔面。今宵好縱清賞。羨子得遂初衣。東華夢裏。浩蕩湖山想。京口鰲魚春正美。爛醉洞庭新釀。遲我三秋。買他一棹。共鼓烟江浪。歸田賦好。讓君且作先唱。

又 十一日夜月紀香谷吏部招飲與涼州沈太守話舊作此柬二君五疊前韻

樽開三雅正清郎。休沐襟情豪上。一院月痕寒似水。隔幔霜華飄颺。綠蟻頻浮。紅牙試鬥。腰鼓春雷響。松明張王。圍爐雜坐歡賞。廿載關塞棲遲。故人相見。觸我前塵

想記否蘭山曾買醉。十斛蒲萄紅釀。華髮盈顛。流光彈指蹤跡萍隨浪。伊涼新曲。只今誰擅高唱。

又 十二日夜無月。顧晴芬以詞集見示。讀至三更。月復明朗。六疊前韻。

春寒料峭。把文窗六扇。一齊關上。窗燭垂花圓似豆。一縷水沈煙颺。霧淞模糊。霎華
匝。匝。風裂輕冰響。笛家琴趣。深宵隨意吟賞。吟到烏夢難圓。梅魂欲化。最耐人閒
想。惜少紅紅能記曲。且自淺斟新釀。堅坐星闌。重看月起。雲散魚鱗浪。不禁忍俊。抽
箋約共酬唱。

又 十三日夜月同春木兼山晴芬倬雲步月廣慧寺訪詩僧鏡徹七疊前韻
攜朋散步。愛多情皓月。照人衣上。逐隊最嫌燈市鬧。車馬六街塵颺。十棒嬌歌。千羣
戲鼓。何似鐘魚響。禪關試叩。佳哉此夕遊賞。才是小據蒲團。同拈香偈。便作逃禪
想。留客仲殊偏解事。蜜酒半罌剛釀。高下樓臺。參差金碧。層疊翻銀浪。花宮人靜。冷
泠仙梵猶唱。

又 十四夜月吳穀人先生張船山檢討招飲八疊前韻

詞壇鉅手。數叔庠淹雅。景陽適上。綠酒分曹。邀客醉逸興。一時飛颺。隔座藏釣。交竿舞蕉。鼓擿銅丸響。狂歌痛飲。九分圓月堪賞。漫道磨盾飛書。橫戈入陣。萬里風雲。想縱使功名垂竹帛。不抵一杯新釀。釣渚波平。漁舟夢穩。嬾破長風浪。黃雞白日。玲瓏且慢催唱。

又 十五夜月過鄒曉屏侍郎寓齋小飲九疊前韻

遙山翠暝。又一輪圓鏡。半空飛上。漸覺鳳城春豔。婉簾捲東風徐颺。梅格孤清。蕙香閒澹。茶鼎松濤響。鄒陽興劇。開樽邀我同賞。卻語杞菊畦荒。雲波路隔。十載家山想。夢裏蓉湖無限好。水色綠於新釀。悄共鷗盟。閒聽鴨語。泛宅桃花浪。倚舷吟嘯。和他西塞漁唱。

又 十六夜大雪十疊前韻

姮娥豔絕。惹玉妃嬌妬。跨鸞飛上。亂撒瑤華迴舞袖。恰趁落燈風颺。簷裏懸冰。窗敲

急霰竹樹蕭騷響。玉壺天地。今宵別有奇賞。使我神骨清冷。擁裘孤坐。得句無凡想。潤柳吹桃工作態。一半春嬌先釀。銀地無塵。瓊田不夜。碧瓦生寒浪。梁園賦手。招來試鬥妍唱。

菩薩蠻

冰紈小扇裁圓月。羅衫愛染秋藍色。繡作折枝斜。疏疏落墨花。晚晴深院宇。涼滴青桐雨。簾卷盼銀河。新添幾尺波。

木蘭花慢

雨餘秋淨麗。林影外。蔚藍天。奈一段鄉愁。憑空送目。杳杳無邊。風前。晚霞紅盡。漸遙山黯澹。欲成烟。草際初翹。暝鷺枝頭。尙咽涼蟬。蕭然素髮已垂肩。飄泊問何緣。悔黃塵烏帽。頻番噩夢。過了華年。遷延漫籌歸計。惱羈懷。不是爲無田。但祝布帆安穩。西風好趁江舡。

百字令 七夕招浣霞芙初孟士竹素春木青士小集寓齋分韻得睡字

溼雲斂影。正愁霖乍歇。嫩晴天氣。淡淡銀河橫遠碧。數點落霞明綺。葉響催涼。煙痕送暝。夜色清如水。邀朋共賞。拈毫無限秋意。莫話天上靈期。人閒幽恨。乞巧兒時事。投老情懷偏嬾散。贏得小歡深醉。顛倒桃笙。縱橫茗椀。堅坐渾忘睡。羅心燭。冷螢飛上衣袂。

金鏤曲 闌干

梵字玲瓏極。遶迴廊、行來約略。舊曾相識。不似尋常閒院落。十二瓊樓寒色。正一把、柳絲無力。約束春情教宛轉。拗明蟾、肯放花陰直。蓬山路。萬重隔。當風不礙疏香入。蕩湘波、簾紋窄地。翠煙如織。回首遊仙成昨夢。記否曾調鈿笛。更幾度、弓弓點屐。多少啼痕纖指印。待重來、覓徧全無迹。苔花老。滿階碧。

邁陂塘 題樂蓮裳訪琴圖

望巉岩、蕭然獨往。此中真有佳處。調刁萬竅號天籟。天際恍聞琴語。空響聚。正滿澗流雲、昨夜西山雨。前塵頓悟。縱夢斷人遙。絃孤徽冷。懷抱自千古。幽尋苦。足繭一

雙芒屨。秋衫半浣蒼土。林風灑面涼如水。日落但聽樵斧。愁淚注。嘆野爨煙寒焦卻。桐無數。良材倘遇。便攜訪成連。滄波浩淼。海上刺舡去。

蝶戀花

月落空庭雲影度。斷夢難尋。添上秋情緒。搖蕩簾衣輕欲舉。流螢閃閃隨風去。二
十五聲殘點誤。凭遍回闌。夜靜無人語。忽覺花梢飄冷露。曉星移上牆頭樹。

菩薩蠻

琉璃一片空明夜。珠簾半卷榆花謝。花露暗吹香。瑤天鶴夢涼。離心空脈脈。斗轉
銀河直。風外坐調笙。秋光別樣清。

又 浣霞聽珂諸君約遊西山不果作此柬之

秋風薦爽涼雲碎。倚闌望斷西山翠。古夢落誰邊。夜星沈瘦煙。飛仙何處覓。石徑
無行跡。洞口月明多。年年長綠蘿。

百字令 九日偕法梧門學士賈素齋上舍遊極樂寺

攜明出郭。正疏風迎面。滿襟秋緒。衰草黏天。迷望眼。一碧更無今古。老柳長隄。殘荷淺沼。曲徑通村墅。林梢翠溼。猶飛昨夜涼雨。最愛梵宇玲瓏。僧樓縹緲。絕好登高處。只恨黃花消息晚。寂寞斜陽荒圃。香繞藤輪。茶翻石鼎。靜裏通禪悟。鐘魚催暝。遲回未忍歸去。

邁陂塘

送吳兼山旋里卽題其湖田詞隱橫卷

話江南。共饒鄉思。輸君真個歸去。春明門外朝煙綠。官柳陰陰無數。傷別緒。儘曳雪牽雲。不繫斑駁住。銷魂漫賦。算歸到家園。六朝山色。冷翠滴秋句。湖干路。窈窕煙波深處。櫓聲軟學吳語。明漪萬頃。韓文細。淨浣征衫塵土。驚倦旅。有飛夢隨君。先落蒹葭浦。丁寧舊侶。待招隱吟成。浮家計就。遲我狎鷗鷺。

聲聲慢

題生香館主人茶煙煮夢圖

梨雲欲墮。蕉雨纔停。微煙低裊湘竹。夢境迷離。響聽瓶笙相續。文窗綃帷半卷。漾溶溶。翠痕如縠。詩魂悄。定應吟遍。萬山涼綠。更着一庭花氣。約幾縷爐熏。暖香浮屋。

彷彿天風吹度碧城闌。曲惺忪。慧心易警。正鸚鵡簾鉤催覺。扶倦起。淪靈芽嫩湯初熟。

蝶戀花

元夜大風寒甚有作

萬頃銀雲迷夜色。杳杳瓊樓。一點高寒月。卷地風威棉欲折。半盃松葉玻璃結。疊鼓無聲蓮漏咽。蠟淚堆紅。窗紙都吹裂。凝想江南花信息。落梅香散春燈雪。

百字令

春夜聞雁

夜亭寒峭。正風高欲暈。月波微皺。雁影一繩聲嘹唳。萬疊吳雲飛透。細草生煙。殘花飄霰。才是歸時候。星沈雨滯。天涯多少。僂。廿載別卻江南。君行過處。風景依然。否。水國荒涼。生計短。菰米莓苔非舊。潦倒羈懷。飄零倦翮。各自爭春瘦。哀音漸遠。擁衾惟聽清漏。

濃陰罨曙。被東風、散作滿園浮媚。六曲迴廊人不到。一片苔痕香膩。鶯粉銷黃。蝶魂悽碧。都爲春憔悴。西山眉嫵。鏡中猶鬪穹翠。難得兩度花朝。韶華百二。彈指今餘。

幾。豔影飄零殘夢斷。小雨也拋紅淚。鈿笛偷吹。冰綃暗寫。惆悵年時事。鵲爐煙瘦。峭寒簾外如水。

洞仙歌 憶蓉湖

故鄉雲水。憶蓉湖佳絕。滑笏波光漾春色。何時歸計準。小坐苔磯。衣塵浣。俯照明漪千尺。昨宵清夢好。柔櫓咿啞。驚起輕鷗度環碧。略約夕陽斜。穿過前灣。林影外、煙嵐層疊。有三兩、漁舟傍桃花。看網出銀鱗。一罾紅雪。

賀新涼 初夏過陶然亭尋壁間竹素青士筇雲舊題半已磨滅矣悵然賦此

散步城西曲。愛蕭疏、江家亭子。數椽幽築。蝶後蟬前紅意盡。換了悒悒濃綠。正雨過、煙蕪如沐。一片涼光雲樹外。看遊禽、三兩間相逐。耽嘯詠。謝羈束。登臨悵望流光速。背斜陽、藤花吹滿。小闌干角。俊侶飄零天末遠。回首不禁根觸。重認取、舊時游躅。壞壁摩挲題字脫。只蘚痕、斷處蝸涎續。消魂句。忍重讀。

短短紅蘭映碧紗。倚闌人瘦態天斜。鎖香庭院謝娘家。峽蝶情多宜掌夢，鴛鴦恩重合司花。三生惆悵隔天涯。

菩薩蠻

無情霜片催花落。纏綿絮語紅衾薄。嬌喘細難支。秋魂剩一絲。花叢千窈窕。最憶針神巧。彈指彩雲銷。遊仙去夢遙。迎陵仙鳥傳嬌語。迴闌悄立司花女。劫後再來身。相逢證夙因。接天秋水碧。樓閣玲瓏極。人倚小芙蓉。紅香四面風。

摸魚兒

重九後一日同梧門薌泉過極樂寺訪菊遲袁蘭村不至

叩招提、四三吟伴。襟懷蕭澹如許。黃花半已移根去。寂寞亂莎荒圃。霜葉舞。任紅到銷魂。不是吳江樹。鄉心漫苦。只目送寥天。閒雲過盡。一碧洗殘雨。西風裏。野色蒼涼無主。亭臺高下煙霧。山僧留客餐香積。共趁瓢堂齋鼓。聽俊語。道此度清遊。惜少袁臨汝。沿畦小步。又回首疏林。依依暝翠。雁背斷霞暮。

水龍吟 錢謝菴吏部綠伽楠精舍銷寒第二集分賦得騰禧殿詠劉夫人遺

事

瑤池八駿歸來。後車載得真佳麗。明姿絕世。香柔粉秀。六宮誰比。生小傾城。肯輸漢殿。延年女弟。是瓊葩無種。移根天上。莫認野花偏媚。
野花偏有色。康陵句也。聞道碧霞旛底。儘雙題、九重名字。昔年扈從。珠璫共輦。錦袍連騎。諫獵書稀。當熊人去。淒涼舊事。問遺簪何處。蘆溝橋畔。一灣流水。

瑤臺第一層 芙蓉山館銷寒第三集分題吳彩鸞寫韻圖

寫出蕊珠仙子展。銀光點素毫。嬌鬟低亞。八千韻字。纖指能鈔。靈書留祕笈。想簪花、絕世丰標。癡憨甚。從旁袖手。卻笑文簫。蕭條。傭書生計。便神仙也。覺無慘。筆牀塵冷。硯池波涸。情障難銷。上清淪謫久。倩青禽。傳語藍橋。盼三霄。悵眠蠶字滅。跨虎人遙。

天香 程春廬駕部瑞鵲巢探春第一集分賦佛手柑

篤。擣香濃。兜羅綿軟。諸天金界。招手。指月玲瓏。逆風芬馥。爪甲了無塵垢。禪機參透。
問彈處。華嚴現否。供向烏皮几淨。伴人小窗清晝。蓮臺鎮長合十。願皈依。赤華青
豆。鼻觀聞薰。未必妙因無漏。應是拈花笑後。帶一種。氤氳自靈鷲。小屈雙尖。似持神
咒。

玉漏遲 正月十三夜

中庭閒徙倚。試燈時節。試香天氣。雪意垂垂。釀得春寒似水。疊鼓嚴城。暗數看蜜炬。
頻銷殘穗。風又起。迷離月暈。小窗深閉。幾處佳宴傳柑。喚銀甲彈箏。繡巾香膩。縱
覓歡場。無奈心情不是。顛倒江南歸夢。只遶徧。玉梅花底。空引睇。迢迢夜雲千里。

沁園春 朱意園水部齋中小集分賦得落花香

搖蕩東風。滿地零紅。餘香尙留。伴茶煙微颺。吹過碧盃。水沈初燼。裊上銀篝。喘細疑
無。噓輕易斷。蘭氣氤氳。澹不收。閒庭院。覺舊情一點。猶遶枝頭。穠華彈指成秋。剩
翠霧。清陰溼欲流。況春歸玉塞。麝迷青塚。魂銷金谷。珠墮紅樓。蝶倦還尋。蜂憨苦戀。

十里輕塵萬斛愁。仙蹤遠。縱返生堪覓。何處麟洲。

甘州 爲小謝題西溪禪隱圖

怨罌風吹折到青蓮。燈火禮金仙。算埋愁無地。淒涼身世。佛也應憐。空說曼陀法界。
歸去再生天。只幾番情劫。斷送華年。稽首香臺發願。便飄然瓶拂。到處隨緣。向團
蒲穩坐。清唄磬聲圓。莫重題、三生舊恨。怕參來、都是斷腸禪。誰相訪、西溪雲水。添個
漁船。

高陽臺 江亭感舊

山色零青。土花剩碧。蒼涼亭榭重過。泥雪行蹤。能禁幾度銷磨。梨魂絮影迷離極。認
前塵、比夢還訛。遶回廊、斷盡柔腸。燕子知麼。青衫我自傷憔悴。怪紅羞粉澀。一樣
蹉跎。風颺殘花。無端吹蕩簾波。西陵翠燭知何處。渺天涯、斜照關河。恨無情、春水林
塘。弄影羅羅。

聲聲慢 題陶鳧香客舫填詞圖

蕙香淺渚。鷺影明波。一枝柔艣輕搖。待艤烏篷。漫空晚雨飄蕭。遙山數峯愁黛。對離人商略無慘。繙舊譜。正空江獨夢。落月歸潮。愧我長年漂泊。悵鱸鄉釣里。小隱誰招。渺渺蒼洲。輸君吟到魂銷。何時共呼烟艇。趁水天涼夜。吹簫聲未了。伴小紅、低唱過橋。

甘州 題張子白邊城插柳圖

拍金笳別譜。柳枝歌。攙入角聲多。渺荒寒一片。夕陽影裏。搖兀明駝。記否藏烏亭榭。春水碧於羅。更層陰駐馬。舊夢蹉跎。惆悵風姿如許。恁孤根無分。移傍靈和。認塞烟沙雨。此地我曾過。向離亭送君西去。折長條。宛轉奈愁何。人空老。漢南回首。此樹婆娑。

滿庭芳 閏六月十九夜暑甚夢後作

青乳初零。素華微暈。天風別樣高寒。弄梭人倦。垂手玉闌干。指點瓊田萬頃。三山遠。紫府程寬。知何處。飛來飢鳳。偷啄碧琅玕。銀彎橋未就。盈盈一水。香霧迷漫。聽瑤

笙。幽咽清響隔雲端。坐到榆花影瘦。秋如水。孤對晶盤。銖衣薄。綃衫換著。千二百輕鸞。

臨江仙 擬賀方回人日詞

幾陣東風融豔雪。紅霞一抹初妍。者回春色倍嫣然。柔卿纔卻扇。定子正當筵。曉日低低飛瑞鵲。牆頭樹已含煙。合歡羅勝影翩翩。爐薰還解事。扶暖上釵鈿。

臺城路 題葉小鸞疏香閣眉子硯拓本

瓏玲片石銷沈久。空留數行題字。鏤雪詞新。簪花格瘦。綠影淺分螺子。疏香閣裏。想幾度摩挲。定勞纖指。無限清愁。遠山低鎖一痕翠。瑤臺環珮去遠。只雲絲帖帖。暗記蠶紙。蕉葉微涼。櫻桃細雨。滴盡玉蟾清淚。蓮臺證偈。早綺障全空。罷修眉史。楓冷凋紅。水天談舊事。

念奴嬌

溪風迎面。望長淮。墳起狂濤如屋。濁酒澆腸。杯快倒。酣嘯好平肌粟。劍事猿公。經繇

鹿女奇氣偏驚俗。旅懷頽宕。雄才誰念蕭育。獨夜越鳥號寒。蒼茫渴日。電走華年速。蚤歲長楊誇賦手。健筆濃揮散卓。佳俠名虛。談交金盡。無地堪投足。商音催響。高吟還對孤燭。

摸魚子

望鄉園柴桑松菊。風船小住淮浦。寒潭雪影明漪浸。淨浣征衣塵土。還起舞。憶幾載、平泉滿座誇豪舉。京華俊侶。定酒暖茶甘。清歡淺醉。刻燭引詩虎。長干好好。在石城東渚。蒼波澹宕佳處。五陵遊俠揮金盡。短髮霜絲垂素。驚倦旅。聽獨夜西烏。杳杳南飛去。吟身感遇。證後約前緣。林扉深隱。真不羨懷祖。

木蘭花慢

愛清淮水閣。珠袖卷。玉簾絲。喚載月青舟。酒痕零碧。吹上生衣。幾度騰騰淺醉。聽紅鶻啼過落花時。梨夢悠揚蝶見。桃魂黯澹鶯知。天涯佳約斷星期。艇子卻歸遲。好踏歌小海。湘靈悽怨。瘦損吳兒。蕭蕭夜潮寒色。怕驚烏。難戀定風枝。留客新彈短燭。

香苔閒寫情癡。

指雷塘舊路。烟影外。雨絲飄。記昔日佳游。囊琴載酒。岸曲停橈。迷離碧蕪城郭。問錦帆、何處蕩春潮。寒食玉鉤斜畔。落花飛過紅橋。魂銷。蘭信渡江遙。商女學吹簫。怕後夜香衾。二分月色。孤照無憀。相思雪晴東閣。折苔枝、閒惹翠禽嘲。便擬清歡更續。莫教華鬢先凋。

慶宮春

漁浦雲荒。野門陂暝。天半落帆風色。頽岸沙瀾。空潭冰鏡。吳縣真恐吹折。旅宿淹留。羨水鶴、踏波無迹。冷淡冬心。淨名經卷。好依枯佛。夜靜星斗高寒。舡尾商聲。玉龍吹雪。遙山瘦盡。烟魂欲化。飄出一絲絲碧。玄暉老去。但博得、吟懷清發。更長夢醒。霜氣如潮。海蟾孤白。

踏莎行 莫愁湖秋泛

浴鷺明漪。藏鴛近渚。小舟涼載菰蒲雨。晚山相對話清愁。當年曾是盧家住。衰草

迷煙幽蘭泣露。鬱金堂上。人何處。西風吹冷。半湖秋。雙栖海燕。辭巢去。

憶舊遊 倉山月話圖

又鷗邊過酒。蛩外尋詩。人在池亭。樹老倉山路。約舊時月色。來話飄零。百年幾回圓缺。愁鬢易星星。怪一片冰痕。照人前夢。別樣分明。關情舊遊處。記霧閣圍花。雪屋停燈。冷落琳華曲。悵醉翁仙去。飛佩瑤京。迴廊尙留題句。小字署蘭成。待過盡涼雲。夜峯數朵。煙外青。

虞美人 題曉寒仙夢圖

仙鬢十八明妝靚。鸞背娉婷影。瓊樓高處佩聲寒。一抹朝霞。紅近曲闌干。眞珠密字香箋小。帖帖雲絲裊。通詞無計托微波。歸去白榆風裏。落星多。

念奴嬌

林光靜鎖。映樓前。渺渺川鋪澄練。水宿悽迷。疑中酒。小極吟情微倦。嫩約鱗遙。虛盟鳳杏。風外鄉心遠。黛纖眉薄。晴峯千朵。低見。應嘆簾動。棲鸞紗空引蝶。客裏年華。

晚。臥對殘釭。凝淺紫。層疊珠裙雙捲。載雪清遊。敲詩癡坐。缸火明沙岸。海蟾飛下。冰痕照破霜苑。

蝶戀花

六曲屏山愁萬疊。深掩孤嚙。宛轉牽雲葉。十二瓊樓人小立。翠帷高捲明蟾入。花
落黃昏宮漏急。夢冷春魂。紅淚羅巾溼。瘦斷玉腰裙百摺。寶奩香散泥金蝶。

湘月 爲倪米樓題蘆中秋瑟譜

雲荒古汶。寫愁漪。黯淡一匳秋鏡。權入蘆花。明似雪。人坐蕭蕭寒影。殘葉敲燈。涼枝
過笛。霜意添疏鬢。寶洲按譜。玉絲風外。淒緊。當日畫閣徵歌。旗亭貫酒。冶習消除
盡。小艇招鷗。烟水曲。古調而今誰聽。蒲綠裁帆。荷青製笠。結屋成漁隱。新知最好。浮
家有約同訂。

高陽臺 又題夢隱詞

散帙消愁。支琴送日。一番惆悵誰憐。殢酒懷人。思量往事如煙。吟魂同伴梨雲住。醒

春愁莫近啼鵲。向翩翩、蝴蝶前身。悟到詩禪。繁華彈指春明夢。把三分塵土、輕換
流年綠遍西泠。樓前春水浮天。鏡塘香冷蘋花瘦。掩烏篷、雨外閒眠。任飄零、一枕瞢
騰。都付遊仙。

憶舊遊

又題酒邊花外詞

記迴闌門酒。小閣吞花。同款青尊。倚遍紅紅曲。認春衣零落。猶帶香痕。回首六橋烟
柳。濃綠已巢鶯。消受年華。幾番吟醉。惆悵前塵。家鄰。湖畔路。憶筵上橫簫。歌罷囊
笙。水榭瀟瀟雨。只畫簾香暗。怕近黃昏。重省三生舊事。幽句慣題裙。儘刻意傷春。小
桃樹底深閉門。

水調歌頭

爲馮墨香題自在舟吹笛圖

烟水渺無際。自在泛輕舟。一聲嫋嫋橫竹。隔浦和漁謳。薄宦三茅山下。舊宅三高祠
畔。風月足佳遊。閒夢驛橋雨。按拍譜蘋洲。長干曲。桓家步。儘勾留。據牀爲作三弄。
四座散清愁。隨意含商咀徵。乘興提鷗。挈鷺蹤跡信沈浮。吹徹玉龍曲。浩蕩海天秋。


臺城路

柳絲不綰離人住。篷窗一枕殘醉。衣上香痕。酒邊愁緒。小夢暗隨潮尾。紅牙拍碎。忘不得樽前。銷魂曲子。解說相思。曉寒曾汲井華水。輕橈堤畔初艤。望高樓天末。個人憔悴。林月微黃。溪風澹碧。夜色半江迢遞。倚舷凝睇。又津鼓頻催。峭帆千里。渺渺啼鴉。水天漁唱起。

幽

運

水



詞

樂

鈞

(乾隆三一

——嘉慶一九)

字元淑。號蓮裳。江西臨川人。嘉慶六年舉人。師事翁方綱。以才名遨遊公卿間。詩古文辭務追古人不傳之隱。曾燠尤稱賞之。著有青芝山館集。

斷水詞

臨川樂 鈞元淑

少拾香草。頗呢么絃。長而悔之。每思焚棄。意蕊未翦。情塵間飛。同調縱與。謂非乖雅。興旨回向。增製日夥。如刀斷水。斯之謂矣。鈔撮成帙。取以爲名。泛涉淺嘗。要非所解。蓮裳居士識。

疎影 簷馬 以下乾隆癸卯至己酉

銀冰碎裂。只峭風乍拂。都化寒鐵。訝是金鈴。搖近花邊。不似者般淒切。前生記打梅。花磬。尙嫋嫋。餘音將歇。更夢中。一片玲瓏。恍聽玉人環玦。偏是廊空院靜。被伊猛賺得。心緒千結。戰騎宵鳴。征勒晨嘶。怎怪愁人愁絕。紅樓一角。誰家住。也一樣。丁東。嗚咽。總讓他。塔語分明。喚醒暮烟殘月。

風馬兒 戲調友人 三首

一聲簾押響空堂。把笑也分張。愁也分張。但早片時。猶自在前廊。剛剛。無人時候

立花旁。便遠也無妨。近也無妨。奈有侍兒、來送紫香囊。將將。
那回轉出繡屏風。看衣也猩紅。襪也猩紅。行近人前、又轉入簾中。怱怱。
怯惺忪。怕花也羞儂。鳥也羞儂。只有夢魂、到處儘從容。空空。
初時相見尙丫頭。但朝也藏鉤。暮也藏鉤。只道只知、憨笑不知愁。不不。
更無由。似河也分流。漢也分流。未必橋邊、織女憶牽牛。休休。
如今欲見

倦尋芳 題采蓮圖

鏡天蕩影。簫路流歌。人度深柳。綠蓋紅衣。低映翠釵羅袖。珠佩晶晶搖不定。玉肌靡靡香應透。笑相逢。是蘭姨蕙姊。隔船招手。
念無數。蓮花蓮葉。蓮子蓮心。蓮蒂蓮藕。意苦思長。狂蝶野鴛知否。且去休妨南海睡。重來又恐西湖瘦。奈情何。悵年年。斷腸依舊。

一翦梅

拌去流光不忍看。日似金丸。月似金盤。柳條拖水綠漫漫。郎住長安。妾住長干。眉

鎖春愁。放不寬。生怕春寒。又怕春殘。偶來鴛夢得團圓。一夜心歡。幾夜心酸。

齊天樂

玉人漸解眉梢語。剛才十三年紀。嫩綠鋪愁。新紅繡影。記得池闌同倚。癡迷燕子。甚翦破簾波。啄殘香字。別卻珠樓。謝伊常到夢魂裏。如今雲鬢更膩。自來曾見。慣爭用迴避。金葉偷窺銀魚暗贈。應憶當年情事。蕭郎易死。漫倚竹傳聲。隔花彈淚。兩扇窗兒。甚時還半啓。

菩薩蠻

西家蛺蝶東家燕。絳桃花裏迷茫見。曉起自鉤簾。春寒凍指尖。廉纖針樣雨。吹上屏風去。屏上畫仙姝。仙裙溼也無。

滿江紅 擬峴臺秋望

雨歇天高。一千里、碧山紅樹。城牆下、水光磨鏡。照人心腑。雁背風吹銀箭落。魚鱗雲帶朱旗舞。訝籠銅、一片晚雷聲。譙門鼓。臺上客。曾懷古。懷古客。今何處。但估帆魚

艇時來時去。醉後登高疑幻化。愁中望遠如羈旅。感襄陽、太傅對中郎。傷心語。

阮郎歸

晝長花落小樓陰。簾波日影沈。闌干曲曲徑深深。教人何處尋。經繡戶、聽瑤琴。關心直到今。如今已分不關心。愁來爭自禁。

三字令

寒繡箔。倚雲屏。太娉婷。鴛袖廣。燕釵輕。乍回眸。還顧影。怎無情。風未起。日猶明。兩扉扃。花寂寂。草青青。曲闌邊。歸鳥過。響金鈴。

眼兒媚 晚燕

烏衣第宅鎖烟霞。刺促向誰家。紅迷樓榭。錦垂簾帶。綠暗窗紗。營巢自有香泥在。未肯寄檐牙。影藏桃葉。情飄柳絮。夢冷梨花。

探春 針

麥穗輸尖。蘭芽讓瘦。怪底鋒釵纖小。九孔玲瓏。寸光明滅。賺得秋波斜暎。幾度拈難。

穩已漏人。麻姑長爪。倚窗閒數花鬢。誤認蜂兒拖倒。最是靈芸擅巧。向淡月昏燈。綵一穿了。繡出鴛鴦刺成鸞鳳。誰識秋豪神妙。鈍杵磨來久。空十指如椎堪笑。爭似兒童猶解敲鉤垂釣。

前調 線

繡譜花縈。金牀雲委。盡是紅蠶絲股。刺綺成紋。縫羅揀色。寸寸煩他紅女。乞得天孫巧。又引出深閨情緒。漫將日影閒量。恐有山龍須補。歎息貧娥獨處。作待嫁衣裳。爲人辛苦。隔幔低牽。封紗緊繫。締就良緣無數。唾去殘絨好。勝拆襪。條條如許。聊理箏絃。聽唱秋孃金縷。

前調 翦

燕尾雙叉。蛟眉互紐。巧出并州形製。重壓瑤筐。輕旋鐵鉸。開合都隨纖指。判碧分紅處。比二月春風尖利。只應無奈情何。難斷吳淞流水。浪說裁雲妙技。也滿手繁蕪。一腔纖碎。宋殿銀旛。隋宮綵樹。枉費幾人心事。夜對西窗燭。止不住。桂膏成淚。獨鶴

籠中反被摧殘霜翅。

前調 尺

平截紅牙。燦填一粟。較定毫釐分寸。蜀錦橫銅。吳綾細熨。寬窄短長休問。漫說裁縫巧。怎離得、線彈輕粉。但教玉指重圍。倒有些兒憑準。原是黃鍾爲本。甚漢異周同。幾番增損。碧海千尋。丹崖萬丈。臆度終應難信。哲匠操何物。把幾許、人才量盡。惜取光陰。那管城南天近。

菩薩蠻

門前溪水悽鳴玉。人家十里隨溪曲。曲到畫樓邊。樓中人正眠。幾回牽短夢。報與春寒重。長是替伊愁。伊曾替我不。

前調

柳翠花笑誰能遣。春愁衡與春深淺。燕子等開簾。紅拖雙尾尖。濛濛輕霧入。手搵香氈溼。明日是清明。與誰同踏青。

滿江紅 章門覽古

倚劍秋城。斜陽外、古蹤都杳。論形勝、楚腰吳脊。粵襟閩抱。漢將勛名收晚末。唐家寇竊爭昏曉。歎明藩、更作檻中羊。籠中鳥。西山石。峯巒峭。東湖水。煙波渺。羨神仙隱逸。異時同調。一路樵風吹錦樹。幾星漁火明紅蓼。念平生、何事比前人。空長嘯。

雙頭蓮令

棟花時節雨滂沱。溝水漾微波。送春無路奈春何。愁比落紅多。玉筐新繭破蠶蛾。珍重莫相過。鷓鴣傳語得知麼。行不得哥哥。

醉花陰

葱白衣裳雲碧袖。蝴蝶雙雙繡。身似玉釵纖。不解相思。卻又因誰瘦。海棠一萼紅初透。恰受春風穀。千萬莫開花。試看枝頭。幾朵紅依舊。

暗香 蕉影

嫩苔一色。但綠天暗處。都成煙墨。亂卓翠旗。疊疊重重映窗格。誰道芳心尙卷。已通

入、錢郎詩筆。記昨夜、雨溜空階。聲外了無跡。今夕更寥寂。正淡月半規。透光檐隙。短牆又隔。應有愁人倚蒼石。憑仗維摩畫取。愁雪後、模糊春碧。問是夢、還是醒。有誰會得。

惜紅衣 燈花

桂蕊叢抽。蘭心半吐。夜長春促。乍落旋開。紅情定誰屬。幢幢短燄。難照徹、愁人心曲。幽獨。棋子漫敲。但矇矓凝矚。螭盤雁足。歌舞人家。千枝燦華屋。鼉更向盡。碎影各攢簇。別有翠樓思婦。心事向伊潛卜。甚暗蛾飛到。飄墮玉蟲金粟。

百宜嬌 春日西湖花神廟以下庚戌

各現雲姿對凝霞想。玉女青童嬌小。妬被封姨。謫經王母。依舊年年年少。東皇眷屬。正未許、韶華催老。到如今、遊戲人間。彩雲猶自縈繞。闌檻外、紅隨綠渺。何故任飄零。不關懷抱。燕約鶯期。蝶團蜂陣。無數情魔牽擾。空香幻影。太賺得、癡魂顛倒。想湖邊、解佩歸來。但拈花笑。

賀新郎 生日對月獨飲

七月初三夜。正多情、彎彎月子，悄窺窗罅。二十四秋如彈指，又早風梧落乍。記每歲、今宵燈下。碧玉花瓷紅玉酒，有旁人替我殷勤瀉。今此酒對誰把。明河一抹天如畫。認紛紛、青鸞銜紙，紫鸞驂駕。故國他鄉何分別，恨少雲車風馬。算只合、高歌聊且。便欲寄愁天上去，料嫦娥亦是傷心者。離別淚，恐同灑。

瑤臺聚八仙

碧草油油。秋到也、蟲聲昨夜啾啾。曉來方睡，風響又早颼颼。梧葉飄將離合夢，柳絲繡出短長愁。甚緣由。自來便爾，何況今秋。身居燕南趙北，問故鄉近遠，楚尾吳頭。九曲黃河，還隔九派江流。未知春水再長，可容得、歸人破浪舟。傷心曲，借玉琴譜定，寄與妝樓。

臨江仙 題寒鴉古木圖 以下辛亥

白草烟寒紅葉盡。西風黯淡吹光。楚烏如墨點昏黃。紛紛迎冷月，啞啞送斜陽。鏡

裏秋娘雙鬢綠。學渠巧樣梳妝。春心繡出滿衣裳。紫蘭飛蛺蝶。紅藕宿鴛鴦。

點絳脣

飲罷歸來。素娥懸出天邊鏡。院空廊靜。人似薔薇影。抱被橫眠。認作闌干凭。香蘿徑。翠消紅冷。花落人應病。

蝶戀花

簾外廊腰才幾步。手拍闌干。踏盡天涯路。明月西頭凝望處。行過明月東邊去。蟋蟀鳴階鴉繞樹。欲入孤帷。顧影還延佇。玉漏頻催天不曙。聲聲點點成風露。

瑣窗寒 都門雪夜

鐵馬禁嘶。銅龍斷瀉。滿庭燕雪。前番較可。不似者番寒徹。畫爐灰、微吟漫歌。硯池已是玄冰結。更松醪似水。蘭釭無燄。布衾成鐵。愁絕。憑誰說。歎一片冬心。冷於霜月。梁園樹老。數點寒鴉棲屑。莽迢迢。天末故鄉。凍雲千里無寸裂。記年時、麈尾籬邊。正有梅。折。

探春 宋雲墅儀曹座上詠白丁香花以下壬子

雪碎猶凝，雲團欲散，瑤窗瓊樹低鞞。柔是香心，弱爲情骨，春夢惺忪無那。鶯燕丁寧久，莫輕啓、葳蕤金鎖。可憐百結芳愁，東風隨意猜破。爲問詩人知麼。是小玉嬌魂，烟外吹墮。屈與添香，煩教貼翠，除是梅妃才可。素面嫌脂粉，怎禁得、酒痕輕灑。最賺相思，饒他紅豔千朵。

行香子

正月元宵。二月花朝。好時光、過得無聊。香街繡戶，紫陌紅橋。有燈千檠，花千樹，柳千條。五里揚鑣，十里停橈。更誰家、鼓瑟吹簫。芳春易盡，仙侶難招。歡事悠悠，情脈脈，夢迢迢。

南浦

同羅兩峯布衣周載軒太史宋雲墅儀曹吳茗香明經蘭雪上舍遊草

橋迴香亭觀荷花早飯賣花翁家已而痛飲柳樹下席蘆據石泊暮而歸雨
澌澌霑車帷矣分韻得韻字長短句

聯轡出城南。謝輕風、報與瑤宮花信。逢著賣花翁。拈花笑、疑是前生廝認。風裳水佩，柳陰低送。嬋娟影。傾出真珠紅一甕。瀉入碧筩千柄。今年已負春陽。任桃濃李豔，天涯飄盡。今日也。恁恁顛狂處。差賸往時標韻。催歸細雨。霎時洗落斜陽暈。蝴蝶鴛鴦都不見。殘月照人初醒。

西子妝 題仕女竹間對弈圖

爐篆烟疎。篔簹紋水滑。繡戶棗花簾動。蘭姨蕙姊困天長。借楸枰、破除香夢。涼雲翠湧。漸敲醒、滿林青鳳。費思量、鎮釵撩鬢。脚手循衣縫。眉痕重。一著爭差。小語成嬌鬩。隔窗鸚鵡報花開。怕飛來、局邊抓弄。殘編悶擁。羨兒女、心靈猶用。便旁觀、消得閒愁萬種。

步蟾宮 題師啓堂姬人瑤臺望月圖

玉娥戲翦雲花裂。悄放出、一天明月。青荷小樣自團圓。照不見、眉梢低結。檀郎底事輕離別。要盼過、桂花時節。夜深香露溼生衣。正庭院、鳳搖金雪。

金縷曲 康龍山落京兆解往徐州覲親作此送之

歸夢凌風起。願同君、衝冰踏霧。一鞭南指。戲馬臺邊停馬處。路隔銅街千里。今夜向、誰家投止。茆店酒醒回首望。但蘆溝、冷月明如洗。應念我、獨留滯。月來共灑悲秋淚。對黃花、持螯擘脯。浩歌沈醉。此後西窗銀燭黯。誰與龍淵吐氣。且約看、明春桃李。倘過彭城煩買棹。把離心、先寄黃河水。休再說、往時事。

長亭怨慢 寄遠

自離別、流丸飛箭。兩聽寒蟬。再逢新燕。碧草黃雲。夢中歸路更遙遠。鏡邊花外。曾幾度、尋來徧。著眼未分明。又不奈、旅窗風顫。重見。想朱愁粉瘦。不似舊時人面。晨烟暮雪。罨斷了、故山千點。只顛倒、一領青衫。那消得、年年金線。正日暮天寒。樓上垂簾休捲。

柳梢青 以下癸丑

小小桃花。縱然紅了。知落誰家。每日關心。干卿何事。自想真差。幾重雲霧窗紗。更

不奈紅牆半遮。燕子飛來，蜂兒飛去，各自天涯。

鵲橋仙

花朝過了，海棠楊柳，十日尙無消息。春工果肯爲花忙，不信是、東風無力。雨輕烟冷，朝朝暮暮，又早做成寒食。今年拚是不傷春，奈樓上、愁人吹笛。

齊天樂 夕陽

人間第一愁時候，薄暮碧雲芳草。斷樹猶明，遙山半醉，人倚樓闌心悄。長庚見了。漸牛背邨埭，馬蹄烟杪。做出黃昏，片霞隱隱送歸鳥。休驚少年易老，問誰禁受得，如此憑眺。野渡呼船，寒壚聽笛，更是愁伊相照。無情便好，任城上烏啼，雨餘蟬噪。下卻簾鉤，玉釭長夜曉。

前調 殘月

素娥愁黛無人掃，眉彎自描剛罷。玉鏡匣收，冰輪軸澀，來到人間深夜。星稀露下，早香閉蝦簾，翠寒鴛瓦。悄映孤燈，小窗猶有未眠者。誰家人又去也，夢醒門正啓，門

外嘶馬。暗樹驚魂。秋蕪貼影。惻惻相看平野。傷心漫寫。更蟾魄無歸。桂花全謝。畫角吹殘。寺樓鐘又打。

如夢令二首

幾樹同栽香徑。只有桃花薄命。風動落銀牀。吹入燕支露井。如鏡。如鏡。中有傾城片影。
鳥語隔簾輕透。訴說垂楊綠皺。眉黛一般愁。過了冶春時候。知否。知否。人比影兒還瘦。

浪淘沙 七夕

謫限幾千年。枉作神仙。年年淚灑鵲橋邊。不信天孫能擅巧。自誤良緣。負債惱青天。無計還錢。天教月缺怎生圓。十萬星娥都嫁否。各自嬋娟。

東風第一枝 晚春登怡邸浩然閣南向凭闌悵悵有作以下甲寅

的的奇才。明明好夢。當年豪氣如許。破除烟月閒愁。小別薜蘿舊侶。催花掃葉。太潦

草。春來秋去。看幾多。公子飄零。大半少年羈旅。風翦斷。兔園夜雨。烟暖徧。鳳城春樹。寄書曾託燕鴻。勸歸更煩杜宇。山青雲白。望不見。開帆來處。悵故園。還似蓬瀛。未許片時飛渡。

滿庭芳 畫紫薇

綸閣仙郎。玉堂詞客。生來福分清華。月明風細。一幹幾叢花。道比芙蓉早放。秋深矣。尙映窗紗。芳名好。紅能百日。端合讓伊誇。如今開罷了。晨消絳雪。暮散朱霞。問生綃寫照。見自誰家。顏色依然豔冶。肌膚嫩。一任搔爬。真成錯。關情妙處。何事畫來差。

浪淘沙 以下嘉慶丙辰

小住碧城隈。曲巷雲迴。角門塵鎖不曾開。引路春風人乍到。踏碎莓苔。睡眼暈紅腮。廣袖弓鞋。亭亭一樹柳新栽。斜整綠雲鬆未穩。溜了金釵。

南浦 章門南浦亭作時往粵東於此解纜

流水綠無情。是古來。消魂第一多處。春色惱江郎。秋時候。還引子安愁賦。西山一帶。

柳。淒。花。怨。渾。無。主。夕。陽。細。雨。剛。風。笛。吹。殘。各。人。歸。去。頻。年。書。劍。飄。零。向。雁。後。分。襟。
鷗。邊。問。渡。今。日。又。孤。舟。知。前。岸。多。少。翠。灣。紅。渚。搖。搖。柁。尾。浪。痕。都。是。鄉。關。路。客。心。自
苦。空。羨。煞。漁。翁。醉。聽。津。鼓。

蝶戀花 以下丁巳

絃。索。一。聲。人。語。悄。水。色。雲。光。盡。逐。遊。絲。裊。滿。樹。斜。陽。天。不。早。生。生。啼。煞。催。歸。鳥。歸
去。定。隨。金。爵。倒。醉。亦。難。禁。不。醉。尤。煩。惱。別。院。梨。花。都。謝。了。夢。中。春。恨。知。多。少。

減蘭

娟。娟。楚。楚。楊。柳。腰。肢。年。十。五。怯。怯。生。生。又。似。無。情。又。有。情。花。釵。媚。子。前。日。上。鬢。隨
阿。姊。學。度。新。腔。兩。頰。紅。潮。漲。碧。窗。

柳梢青 以下戊午

碧。天。雲。破。蕊。宮。歌。女。被。風。吹。墮。一。笑。相。逢。三。生。略。記。片。時。同。坐。重。來。應。自。分。明。怎
尙。把。劉。郎。認。左。白。蕩。香。中。玉。梅。花。下。不。曾。真。箇。

蝶戀花

時節乍寒還乍暖。浪說看花。花信無人管。牆北牆南蝴蝶滿。花開花落青春短。悔
飲藍橋漿一碗。一寸柔腸直做千回斷。桃葉桃根波際遠。渡頭不敢高聲喚。

浪淘沙

以下已未

歌罷酒顏紅。船小江空。仙仙衣袂惹輕風。玉臂雲鬟波上影。明月當中。沙渚淡烟
籠。隔岸聞鐘。流蘇羽帳夜香濃。喚起倚兒教淪茗。隕釵蟲。

人月圓

關心幾日黃梅雨。新水漲河橋。迷茫柳岸。舟輕人瘦。恐被風飄。月明如此。又偏無
奈。夢影迢迢。劉郎前度。卿須記取。恰是今宵。

浪淘沙

水仙

小玉最玲瓏。雪貌冰聰。珊珊骨節佩搖風。薄命可憐生水國。羅襪波中。明月浸珠
宮。寒透簾櫳。瑤情一縷倩誰通。悵望湘妃來極浦。寫入絲桐。

鬲溪梅令 以下庚申

半江春水半江風。落花紅。幾處愁人酸淚，寄花中。一時流向東。淺斟低唱儘從容。太怱怱。記得州魂橋畔，繫青篷。隔窗飛柳絨。

水龍吟 英德道中曉發北面諸山吐雲如海橫截峯尖船頭小坐欣然命筆
夜來雨歇沙明。潁陽峽湧銀蟾小。夢涼酒醒。星辰都落。客船開了。石骨花攢。峯腰練束。雲容奇巧。是何人擘絮。半空遙露。河靈掌麻姑爪。摹得誰家畫稿。似玄暉、楚山清曉。炎荒暑路。恁般佳趣。能逢多少。涇翠微乾。濃光漸薄。火輪飛到。又關篷愁偃。雙眸漆暗。寸心苗稿。

念奴嬌 以下辛酉

那回相見。是鏡中樓閣。花南烟水。亞字闌干田字町。芍藥妬人姿媚。欲去難禁。欲留未可。影貼斜陽膩。運船燈火。霎時紅霧千里。誰料燕子盧家。鸚哥鄭曲。此處門庭是。杏子單衫蕉葉扇。斜立茜羅窗裏。黛綠疑攢。櫻丹忽破。卻問遊湖未。蓮花橋外。白

蓮當又開矣。

驀山溪 武陽渡旅夜

荒洲古渡。沙闊行人語。蘆筆兩三枝。寫不盡、秋聲無數。魚鱗雲起。曾記上歸船。從此去。別南浦。又上南州路。丹楓幾樹。隔岸迷烟霧。猶認杏花開。不道是、斜陽紅處。獨輪生角。趁不上前邨。天已暮。渡頭住。一夜風和雨。

金縷曲 以下壬戌

一見三生業。記虹橋、水香雲嫩。畫船迎接。翦翦輕風飄荇帶。頃刻吹紅玉頰。恁起坐、都成嬌怯。斜倚碧闌歌白紵。破櫻脣、低振瑤笙葉。聽未了、恨千疊。飛來一陣驚蝴蝶。恣輕狂、沾紅惹翠。亂侵宮箠。何必淒淒連夜雨。已是桃花小劫。怎怪得、眞珠盈睫。欲放鸚哥還隴樹。愧青衫、不似黃衫俠。料恐是、石家妾。

河傳

語香情軟。記燈邊酒外。私貽團扇。誰料夜來。道是再難相見。渡秋江。蘭棹遠。珠簾

不爲遊絲捲。一帶層樓。誤盡尋巢燕。明歲嫩紅。開向誰家庭院。雨和風。愁未免。

金縷曲 景賢樓秋夜

月出梧桐夜。聽西樓、丁丁磔磔。玉壺聲乍。又是淒涼時候到。倚徧朱闌粉榭。渾一種。秋心難寫。定有冷紅三四點。被輕風、吹落苔甌罅。和草露、暗飄灑。平生已分傷心怕。更誰堪、啼螿未歇。又嘶簷馬。翦剔蘭煤知幾徧。依舊朦朧半炷。是淚眼、麻茶相射。歸夢不成眠不得。悵關山、但見明河瀉。早過了、漏三下。

念奴嬌 題汪飲泉秋隱庵填詞圖

客窗秋老。但井梧籬菊、冷閒相媚。一管生花蘭蕊筆。蘸取小紅眉翠。雁夜摹聲。魚天繪色。寫入宮商裏。酒邊低唱。有人時醒時醉。憐我滴粉名虛。裁雲技拙。短笛憑誰倚。幾度垂楊隄上望。好片六朝山水。冷月虹橋。叢祠社鼓。自古填詞地。江南江北。費人多少才思。

江亭怨 題飲泉萬石園圖

曲徑紅苔烟鎖。深院綠梅風墮。樓閣化斜陽。愁絕蘭孫重過。今日秋風滯我。三逕黃花開麼。一片故園心。更被寒螿啼破。

瑣窗寒

竹柏樓居圖爲袁壽階作

日黯蒼筠。烟清翠葉。北堂春遠。茹荼食蘖。在日苦心誰見。聽秋聲、夜深捲簾。淚珠暗滴樓闌徧。似脫雲片月。叢階幽草。戀巢孤燕。難遣。孤兒恨。記課讀催燈。停機落翦。春暉寸草。示我當年衣線。倩丹青、追寫舊居。血痕漬滿鵝溪絹。看圖中、雪節霜柯。尙與西風戰。

桃源憶故人

題壽階紅蕙卷

湘娥醉被瓊宮謫。兩頰春痕猶赤。待跨紫鸞無力。風露都憐惜。丹脂經粉爭塗飾。誰似者般標格。吹氣已堪傾國。更占桃花色。

滿庭芳

題單竹軒運判晚香圖 以下癸亥

儉府敲紅。隋堤裊綠。可耐三日清霜。幾家庭院。蕭瑟賸斜陽。惟有疎花冷蕊。西風裏

漸漸吹香。寒無那。金英數點。猶自向人黃。秋心憐晚節。輕紈寫照。老圃尋芳。任枯
叢蝶散。高樹蟬涼。我亦東籬寂寞。眼前事。一醉都忘。尋詩處。雲寒水冷。白雁楚天長。

喝火令 感秋

紅友添朝倦。青奴伴夜涼。流螢點點點衣裳。最是者些時候。分外費周章。水已盈
盈淺。花都淡淡香。宜愁也。否要商量。試問隋堤。幾樹綠垂楊。試問霍家池裏。幾對紫
鴛鴦。

憶江南 雙調 詠閨人對月

迢迢夜片月。伴焚香。浸得湘簾寒似水。又偷花影上東牆。牆外卽他鄉。心中事。蛩
語替商量。闌角是儂常倚處。請君來此對秋光。看看可淒涼。

滿江紅 題萬梅臬刺史丈歸帆圖 以下甲子

鐵甕城邊。歸去也。石頭津上。知一路。好山相送。布帆無恙。茂苑林香花萬點。嚴陵石
碧雲千狀。記年時。孤棹熟經過。江如掌。明鏡裏。推篷望。明月下。拈毫想。讓詩翁消

受水柔風壯。野岸羣鷗尋舊約。高空一鶴流清響。盼鄉關。幾度倚樓闌。潮消長。

瑣窗寒 繡鳳圖

六曲銀屏。三重翠幙。幾聲金翦。輕霞薄霧。顏色較量深淺。唾殘絨。絲絲亂飄。落花惹向風中轉。鎮繡筐拈籤。無情無緒。晝長人倦。春院飛孤燕。甚彩鳳雙棲。彩雲一片。新桐裊碧。滿樹枝條都軟。念蕭郎。何處倚樓玉簫。冷落芳信遠。問金針。不解穿愁底事。愁如線。

玉漏遲 天寒翠袖圖

竹邊人影膩。雲添鬢綠。烟含眉翠。淺碧衣裳。襯出淡紅雙袂。信是佳人絕代。卻不似。天寒愁倚。風漸起。侍兒報道。玉郎歸矣。別有薄命幽居。但掩鏡傷魂。罷琴揩淚。自惜紅顏。脈脈又還梳洗。獨立黃昏過了。有鸚哥呼人簾裏。愁不寐。禁他月明千里。

惜餘春慢

露冷苔乾。酒溫花瘦。併作斷魂時節。輕羅掩扇。薄絮裝衣。天氣乍寒微熱。斜照的是

多情紅過黃昏。等將明月。奈金壺驟響。催人歸去。砌蛩初咽。空記得、柳葉纖眉。櫻桃小吻。更是聰明冰雪。紅巾拂面。翠袖凭肩。一種暗情纏結。如此風懷。怎禁那待歌喉。百迴千折。再相逢。一度爭得心腸似鐵。

醉花陰

南塘以下乙丑

額黃暈壓眉花翠。照影南塘水。誰信似今朝。一片青篷。雨雨風風裏。只隔垂楊三四里。容易思量起。不見也消魂。一桁紅簾掛在紅船尾。

一翦梅

花朝沂州道中

小院春寒昨夜風。燈也朦朧。月也朦朧。桃花一面背人紅。來也怱怱。去也怱怱。不似江南二月中。愁也從容。笑也從容。曉鶯啼煞舊簾櫳。春也無蹤。夢也無蹤。

醉花陰

嫩綠嬌黃三兩樹。似是逢人處。風起便黃昏。一縷愁絲。飄入濛濛雨。尋春自是來時誤。馬踏殘泥路。夢裏枉分明。行過庭心。轉過廊腰去。

百字令 德州道中和劉芙初題壁

春城躍馬正河橋。雨歇晴雲初曉。行到行人懷舊處。消受鳥啼花笑。獵獵斜風沈沈遠霧。樹比當年老。軟紅十里。並無一半芳艸。聞道隔院箏絃。當窗扇影。驀地都停了。不是重來。渾不信。門外屨痕如掃。小廟牆傾荒亭瓦碎。賸有空烟繞。一杯冷酒。又添新恨多少。

前調 再疊前韻

郵亭夜半甚荒雞。迷亂悞催天曉。欲撥銀釭重照影。又恐燈花相笑。釵燕將飛。鈿蟬猶掛。各抱芳愁老。愁短恰如門外春草。猛憶錦線年華。香絲魂夢。隨意消沈了。底事月明風露下。惆悵落紅難掃。馬足塵埋。車輪蓬轉。頃刻雲山繞。仰天細數。殘星尙有多少。

前調 過趙北口三疊前韻

水天無際。只漁舟幾葉。蕩搖昏曉。十二橋邊千樹柳。偷倚東風低笑。賣酒樓空。吹簫

市遠馬共征人老。荒洲冷落。有誰來拾香草。往日蛇巾城腰。魚登屋脊。萬竈都沈了。麥隴幾番黃又綠。尚有沙痕未掃。浪借風飛。隄愁雨漲。爭似清溪繞。年年春盡。落花流過多少。

前調 四疊前韻

一聲車鐸。又怱怱離別。曾無分曉。如此百年都浪擲。那值雲仙一笑。驛樹鴉聲。河橋馬色。斷送春人老。試看前路。夕陽紅徧枯草。縱是懊惱聽歌。淒涼買醉。合把心情了。儘有迢迢星月夜。幾見蛾眉輕掃。殘夢吹烟。新愁化水。枉逐風花繞。離腸幾寸。未知曲折多少。

前調 將至涿州五疊前韻

非關惜別。又非關感舊。傷心誰曉。認作世間兒女恨。也被林花冷笑。殘夜呼尊。高秋把劍。淚灑西風老。無端歸去。無端又踏燕草。記得日下層城。烟中古塔。五度經過了。幾箇黃金臺下客。不把舍人門掃。射虎山空。釣魚磯冷。夢裏千回繞。蘆溝橋畔。馬

蹄躑躅多少。

誤佳期

人在紫蘭香逕。兩面闌干對凭。黛眉深淺不分明。春夢如昏鏡。未肯一回真。料是三生定。落紅又比昨來深。昨夜東風緊。

浪淘沙

花影蕩簾紋。淡月殘春。箇儂時候共誰論。直到五更寒未了。今只黃昏。香冷莫重溫。留伴愁魂。幾家庭院閉閒門。芳草綠時心便死。休怨王孫。

臺城路 題何書田秀才其偉籀山草堂圖

江南處處宜花竹。君家草堂尤好。檻側吹香。簾邊滴翠。更有溪烟縈抱。庭階淨掃。向樵友漁兒。較量詩稿。白鶴歸來。一雙雙自臥芳草。人間清福最少。只編茅種樹。奢願難了。野館呼雲。荒臺弔月。都是天涯歌笑。青山易老。便插劍囊琴。已輸君早。滿地江湖。水長歸路杳。

減蘭 題李白樓鴛湖並載圖

喁喁私語。同到湖心花裏去。一瓣紅蓮。化作尋香載酒船。明明秋水。別有簫聲隨棹尾。莫憶當時。何處鴛鴦不並飛。

御街行 題畫

小桃經雨新紅透。小院裏、春時候。棗花簾下捲簾人。報道爐烟初瘦。東風如翦。夕陽門巷。燕子歸來否。天涯乞得丹青手。畫蛺蝶、圍衫袖。綠楊元是故鄉情。縷縷絲絲依舊。相思無那。竹西歌吹。勸醉旗亭酒。

浪淘沙 昨夜

昨夜立空廊。月地流霜。影兒一半是衣裳。如此天寒如此瘦。怎不淒涼。昨夜枕空牀。霧閣吹香。夢兒一半是釵光。如此相逢如此別。怎不思量。

鳳皇臺上憶吹簫 題張秋崖小照

明鏡非臺。衆香爲國。情禪最是難參。但好花零落。便此優曇。誰識青蓮世界。任玉女、

來與同龕。安心竟。珠簾繡幙。總是茆庵。麩麩。幾株翠柳。遮幾曲闌干。春在江南。更一雙紅袖。兩股瑤簪。莫問情長情短。分明是、自縛春蠶。相思處、燒殘絳蠟。溼透青衫。

金縷曲 雪如將還吳門有相待於半塘之約爲作此解送之

且莫傷離別。照問心、江南江北。一般明月。此去洗妝梅花下。判取玉釵寒徹。記那日、酒闌曾說。衣上珍珠千萬顆。是三年、淚點迎風結。因往事、又嗚咽。遲迴心事今來決。問相逢、綠楊門巷。燕飛時節。十里橫塘東流水。比似情波千折。更眼裏、一天冰雪。多少吹簫紅粉伴。看江頭、打槳呼桃葉。歌此曲、重淒切。

南鄉子 題水南邨舍圖

何處水南邨。綠是溪光白是雲。飛過一雙閒翡翠。柴門。十里桃花不見人。雙槳蕩吟魂。來看揚州月二分。冷雨寒風兼小雪。黃昏。一樹梅花不算春。

一翦梅 題畫 以下丙寅

隱隱高樓下笛吹。雪意垂垂。風意淒淒。孤山籬落悄寒時。花影微微。人影依依。紙

帳銅瓶點綴宜。簾外敲棋。檻外尋詩。更須添箇小吳姬。朝對描眉。暮對添衣。

南鄉子 題杜宛蘭後簪花圖

花露溼雲翹。鏡裏新妝筆底描。烟粉百年香未散。今朝。又寫崔徽上素綃。霧閣對星橋。記撥鶻絃唱綠腰。聞說雲英今嫁了。春宵。舊院餘花只自飄。

菩薩蠻 以下丁卯

簾櫳密密闌干亞。多情啼鳥愁春謝。東面好風來。好花隨意開。花開無落處。卻向東風訴。花意自模糊。問花知也無。

翠樓吟 吳珊瑚女史名瓊仙字子佩吳江人歸徐山民待詔達源有寫韻樓

詩草隕玉數年遺。編未梓。魂依夢語。倍愴河陽。丁卯春遊廣陵。出以相示。爲譜此闋。以助神傷。

字折釵痕。香留粉印。一編斷腸遺稿。年時真燕婉。儘酬唱。月秋花曉。風輪飛攪。把綺思飄殘。詩魂吹倒。簾櫳悄。錦屏無恙。素琴僵了。草草蕙死蘭枯。似者般酸淚。替彈

多少。傷心今第一。感郎處。又兼才調。瑤京人杳。更野渡船孤。離亭燈小。燕城道。獨吟誰和。柳梢啼鳥。

喝火令 初至雪如墓

冷草迷孤蝶。新烟繚斷鴉。送春舊路已天涯。不道保安橋外。咫尺路猶差。碧血紅心地。黃泥紫玉家。一行碑字隱殘霞。惜少周圍。幾丈短籬笆。又少幾竿斑竹。幾樹白梅花。

玲瓏四犯 三月十六日招同江夢占王載園鄒春田劉春農史補堂仲仁黃厚庵楊輯亭余半池胡鶴泉周菊隱并攜潘靜蘭蓉香愛芝三女郎泛舟山塘酌酒雪如之墓

燕子話愁。梨花飛夢。荒郊寒食無主。畫船簫管地。往日辭家處。分將一抔豔土。對青松。幾家坟墓。蠟燭冰銷。紙錢風散。春恨獨千古。泫泫綠波東注。歎鍾情我輩癡甚。兒女。幾杯腸斷酒。化作冥冥雨。兼勞女伴深深拜。問何意。相憐如許。垂淚語。他時事。

憑誰記取。

瀟湘夜雨 沈楚仙女史屬題美人葬花圖團扇

淚是明珠愁如香草。被人比作湘君。飛花時節斷腸人。憐絕豔、深宵墮雨。傷薄命、荒徑鋤雲。花知否。儂非葬爾。自葬前身。家家庭院。落紅未掃。都化輕塵。更東風吹去。落溷飄茵。凭畫檻、忘歸繡閣。拈翠帶、斜腕湘裙。垂楊外。鶯來蝶往。多少可憐春。

高陽臺 五湖一角山房伯治浣華伉儷所居也巷曲門低秋芳絢檻昨劉芙

初過訪曾填此調今亦繼聲

綠漾琴絲紅侵繡譜。一庭草草花花。青粉牆邊。藤苗織滿籬笆。評書讀畫人都倦。有涼陰、低冪窗紗。小蓮娃、簾裏添香。簾外分茶。天青海碧人間世。歎蓬心百轉。柳路三叉。鶴駕星輶。無端也到天涯。年時載酒停橈客。替文簫、添箇鄰家。且搏沙、去算征鴻。住算棲鴉。

探春 郭頻伽義女薛娟字月璘杭州人姿性豔穎年十七不肯字歿於越州

頻伽爲返葬於孤山之側而銘其碣作春山埋玉圖屬題此闕

桂殿呼鸞。梅梁減燕。冥冥天半輕霧。淚泫紅冰。肌消豔雪。人掩西陵麝土。誰惜明珠墮。有他姓、阿耶慈母。孝娥江畔招魂。冷花吹徧歸路。多少秋坟無主。算擇地埋香。禁受風雨。鴛牒先燒。雀屏空畫。未要蕭郎諛墓。寒食清明節。任女伴、桃天爭賦。終更淒涼。玉釵知葬何處。

臨江仙 題陳謙谷徵梅山館圖 以下戊辰

一樹明珠千瓣玉。夢中先有香來。玲瓏璧月淡雲階。枕邊飛綠鳳。恰似燕投懷。不比梨花雲冷落。玉妃還下瑤臺。銖衣輕拂水松牌。倚窗含笑說。要試謫仙才。

摸魚兒 二月十三日與內子晚坐貸園池亭見小梅梢上翡翠相語已飛入深樹暮色如烟遂不可見

戲蘭苕蹴波飛起。雙棲原在珠樹。炎洲料得巢難穩。也自遠離鄉土。來復去。恍惚似天孫、織錦拋鸞杼。紅飄翠舞。漸桂葉流烟。松鍼刺月。千里碧雲暮。愁心遠。憐爾多

情伴侶。如今歸向何處。池邊不設誇郎網。花裏儘堪同住。須聽取。君不見人間、何物非羈旅。珠簾繡戶。更燕子尋梁。鸚哥鎖架。幽怨向誰訴。

惜紅衣

廿九日出潯墅。關舟中野望。曉雨絲絲。遂作此闋。索胡鶴泉和之。

野屋紅迷。遙坡綠軟。連城春色。鼓引輕雷。平江第三驛。些些曉夢。剛和入、烟中無迹。淒瀝。微雨乍收。看吳山都碧。鶯湖泛宅。才算家鄉。孤舟又江北。東風細柳。節候近寒食。幸有故人相伴。共破一天愁寂。念廣陵花事。可似往年消息。

臨江仙

雨後望惠山憶去歲四月初二與曾賓谷王鐵夫金手山陶香泉諸

君同遊山寺俯仰陳迹。怊悵何已。託詞以宣。

樹隔低雲。雲隔水。惠山已化濃烟。石龍垂首吐新泉。暗和侵澗雨。流傍渡江船。記得停橈烹茗處。寺樓花韻晴天。午風吹影竹爐前。羨魚遊綠沼。看螳上紅輒。

高陽臺

上巳京口渡江至揚子橋

石菑雲苗。沙拖水蔓。蒜山遙對瓜洲。塔影如錐。何曾插住江流。珠宮晃出金鰲背。仗

風潮送過輕舟。算春遊、揚子橋邊。楊柳樓頭。踏青門草。今朝事。記花驚倦眼。酒滑歌喉。舊夢無痕。模糊說與閒鷗。絲絲冷雨才飄斷。看斜陽、紅射邗溝。漾新愁、扶柁吳娘。猶唱吳謳。

惜餘春慢 揚州旅次雨中題壁

四扇窗闌。一鉤簾放。雨氣滿天濃黑。支頤寂坐。豎膝橫眠。閒煞阮家雙屐。對屋便有高樓。簷溜空垂。也無人迹。但沈沈霧裏。濛濛花外。數聲遙笛。饒盼到、杏蕊烘雲。楊枝挂月。不是往年春色。聽鶯客散。繫馬人狂。處處畫闌敲側。休問湖山豔遊。一片愁痕。怎生禁得。便飛來燕子。到眼都非舊識。

露華 方式亭同年將需次江右以金陵女史王德卿貞儀畫白桃花幀子屬

題德卿習經史律曆之學兼能詩二十餘歲歿式亭之表叔母也

玉真跨鳳。歎現過優曇。短似春夢。自寫化身。開作瑤池仙種。素妝怕澹脂痕。只借碧雲輕捧。風過處。盈盈淡魂。和影吹動。人間倍合珍重。問絹粉毫香。標韻誰共。謾說

絳奴顏色空迷溪洞。寄心露井銀牀，肯逐浪花紅湧。潘令去，河陽定須徧種。

蕙蘭芳引 爲王曉塍題畫

春送水流，水流處，渡名桃葉。看一舸搖風，帆影半明半滅。謝他燕子，傍畫槳，替人迎接。想碎紅逐浪，正值江南三月。柳絮狂飛，荷珠輕墮，處處傷別。更情種王郎，還把豔歌再疊。秦淮東去，路添幾折，空斷腸、烟外艣聲都歇。

清平樂 題餘姚方雨林小照

萬山圍屋，雲浸衣裳綠。三尺枯桐橫瘦玉。中有松風古曲。銀箏錦瑟多情。年年和燕酬鶯。今日逢君一笑，亂花吹徧蕪城。

西子妝

月轉鶯簾，酒涼鷺杓，背著銀釭私語。綠楊門巷，繡街東，要同行、送儂歸去。蘭情半吐。道深夜、君歸何處。路迢迢，怕薄緜衣服，難禁風露。空延佇。魄醉魂癡，一霎愁無主。恁恁絮別未分明，聽譙門、零鐘碎鼓。前期易阻，願斟酌、香盟休誤。被今番、賺得相思

更苦。

點絳脣 題吳小軒竹月當窗夜讀書圖

竹屋書聲。半窗夜色搖秋影。未煩燈檠。懸出天邊鏡。映雪燃藜。古意饒君領。銀壺靜。露涼幽徑。青鳳眠都醒。

高陽臺 題陶鳧香客舫填詞圖

笛譜翻秋。笙囊貯夜。煙波一葉吳舲。雨雨風風。篷窗點點聲聲。年年處處愁無那。仗豪尖、與破愁城。又牽情、東岸飛花。西岸啼鶯。如今不載江湖酒。已搖槎星漢。浣筆蓬瀛。笑問旁人。我詞何似耆卿。鱸鄉正有浮家客。硯池中、魚唼輕萍。太癡生、怎爲填詞。換了科名。

西子妝

蝶冷空牆。蟬瘖廢圃。早是燕辭深巷。傳來隱語忒丁寧。似檐鈴、訴風淒響。鴛樓怕訪。記樓外、簾波輕颺。料如今、是翠銷塵積。奩封絲網。空凝想。馬滑霜濃。往日曾低唱。

盟心要待月圓時。奈三更半輪斜上。情孤事往。只秋扇團圓。無恙更愁伊也。立斜陽
悵惘。

法曲獻仙音 題潘朗齋大令填詞圖

香露津豪。豔雲蒸墨。的是陳髯才調。情剝蕉心。夢銷桃靨。年年畫中人笑。繡箔外。瑤
窗裏。聲聲和啼鳥。蜀岡道。認河陽種花園。縣花放也。閒筆又添詞稿。解意一枝簫。
甚閒愁都替吹了。別自迴腸。怕春風仍未分曉。問靈均騷怨。定有幾莖香草。

虞美人 頃見孫蔚堂作此調亦述一解繼之時戊辰十一月初三日

愁天釀雪先零雨。底是凭闌處。酒杯歇後夜寒來。鎖著愁城此後爲誰開。往年原
是淒涼我。心事猶差可。莫憐新月似蛾眉。未到更深已是月斜時。

壺中天 題月香畫蘭卽書其蘭言漫錄後爲贈

湘靈怨魄。被冰絲彈斷。飄歸何處。別有芳根成絮果。歲歲花開無主。露外零香。風餘
出態。小影親描取。贈珠捐珮。漢皋重見神女。已分舊館雲虛。閒窗紗破。寂寞長如

許誰意樓前還繫馬。聽誦當年題句。銀甲調箏。玉壺傾酒。此段人多誤。騷奩粉鏡照。伊獨自眉嫵。

洞仙歌

書孫蔚堂紅橋漁倡後卽依原調率成三闋

星眸水盼。認三生情種。愁壓雙蛾翠痕重。但拏簾送軟。隔座吹香。須抵得、十載揚州春夢。情禪參不破。買笑歸。脈脈尊前淚波涌。應是不關伊。九曲迴腸。被幾縷、鬢絲牽動。勸今後、相逢莫相思。算陌上閒遊。柳迎花送。

又

旗亭客散。歎過來草草。姊妹當年正年少。記城隈水曲。處處分明。剛只有、月魄花魂知道。詞人偏惹恨。十樣蠻牋。續出瑤窗斷腸稿。何用玉簫吹。誦向渠儂。敢賺得、病魔顛倒。縱未解、鴛鴦怎生書。也合裏香羅。繡奩收好。

又

霜淒午夜。是分張時候。風揭鶯簾凍殘酒。問情長情短。一味模糊。爭知道、拋盡江南

紅豆。休論鞋底綻。市月思量說著紅樓便回首。香燼蠟乾時。各自營騰。還歎息。那人消瘦。漫惆悵。歸程阻層冰。怕開盡黃梅。繫船衰柳。

南樓令

題張雲樵畫士女支頤獨坐。几設酒果。若有所期。瓶梅交枝。媚映銀

燭云仿仇十洲筆意

花影繡銅蠡。空房燭淚垂。怪檀郎、直恁癡迷。曾指鏡兒通密約。應語是、月圓時。倚戶看參旗。當頭又轉西。喚雛奴、收了雙卮。儂到者番。才會得、再休與說相思。

滿江紅

劉智廟旅次有懷劉芙初庶常以下己巳

夢繞春山。驚坐起、擁衾懷舊。蘆簾外、有情斜月。似儂佳友。醉裏豪詞書旅壁。愁來壯淚淋征袖。是前番、秣馬廣川時。儂今又。紅土廟、蹲銅獸。青麥坂、排金柳。仗一行燈火。夜光如晝。怨鐸搖風。淒畫角。狂塵作霧。迷珠斗。問西清、日影上花磚。人醒否。

過秦樓

題譚君農郎中待渡圖

慧是蓮心。香爲蘭性。並種紫微仙館。編雲作筏。瀉月成波。遊戲碧羅天半。浮世忒恁

迷茫情海風翻。愛河冰斷。問因緣簿子。司花人注。散花人管。都羨煞。少伯攜家。堯章載酒。蕩得五湖春滿。參將鏡影。悟徹爐烟。只了雇花公案。儂已扁舟廿年。繫柳津亭。泛桃溪岸。悵橫塘舊路。一笑三生夢短。

金縷曲 都門旅寄雨窗沈寂答湯雨生法源崇效二寺同看海棠之作

未起前窗暮。是明明、鐘殘夢斷。奈無醒處。算把今朝添昨夜。人說時辰近午。漫悵惘、前遊情緒。蕭寺夕陽花滿眼。再開行、冷坐何曾許。君不見、者般雨。遙憐陌上嬉春侶。問恁恁、紅泥旋去。聲馬可如紅土。但望檐聲收淅瀝。還出芒鞋舊路。任此後、風淒雲楚。計到江南拚醉煞。棹金閨、聽打龍舟鼓。梅熟也、合歸去。

過秦樓 蓮花博士侍書岳綠春吳蘭雪姬人也能寫蘭余既數見之爲述此

解卽題陸祁生所作碧桃記院本後

紫擺風香翠翹雲晃。映靨瓶花低亞。搜從帳後。拜近鞋尖。笑道酒徒顛也。知是阿堵風魔。和客褰簾。向儂求畫。便低呼小玉。分甌仙茗。解伊醒罷。曾見說、聘卻千金緣。

慳雙璧。遇了玉郎才嫁。情根慧苗。性蕊憨開。不枉鏡臺佳話。多少詞人豔傳。曲譜宜春。歌名子夜。甚桃花兩朵。換得蓮花侍者。

南鄉子 再贈綠春

花有美人香。樹影玲瓏畫粉牆。道不解詩儂未信。吟將佳句分明似沈郎。笛譜按宮商。此技兒家不擅場。聽曲暗拋紅豆記。思量。要發鶯喉賽暖簧。首二詔綠春句闕雪云

臺城路 周春田扇上畫王吟香小影湯雨生筆也屬題此闕

因緣不載鴛鴦牒。又不算金蘭簿。戲認梅兄。喬呼月姊。顛倒生辰年譜。青春暗度。歎壺箭平催。瑟絃空數。燕領蛾眉。鏡中一樣怨遲暮。憑君漫提舊語。那時歌吹歇。原是羈旅。醉送鈿車。歸拏紙帳。各自聽風聽雨。勾魂畫取。記偷看弓鞋。賺伊回顧。巷曲垂楊。問今無恙否。

高陽臺 五月初三夜聞壁間蟋蟀

蛙鼓初喧。鶯簧未澀。模糊已似秋聲。誰意王孫。訴來忒煞分明。愁邊乍歇黃梅雨。步空階、忍更相驚。太無情、汝自悲吟，那管儂聽。移時便有西風響。怕苔心冷徹。草路吹醒。才是難堪。如今算甚飄零。寒蟬寂寞終無語。但簷前、鐵馬冬丁。夜三更。秋也無多。夢也難成。

鬲溪梅令

題孫碧梧女史畫芙蓉楊柳應屠琴塢之屬

月痕霜信小樓西。斷腸時。聞道芙蓉如面、柳如眉。畫來剛是伊。綠疎紅冷兩三枝。影離離。歎息春風未解、惜芳菲。問秋秋便知。

念奴嬌

荏平旅夜聽兩雛女彈琵琶聲態俱妙沈文起紀以七律余亦次韻

意有未盡復成此闋

短長亭子。歎年來年去、冷春炎夏。鐸舌才瘖窗眼黑。銀燭條條空地。引夢無香。揮愁失劍。付與么絃寫。笑呼殘月。此時應算良夜。可奈碧玉垂髻。青娥秀鬢。欲換無名馬。絮果易成花命薄。只恐東風難嫁。燕壘紅乾。鶯簧金澀。怎入仙蟲社。迷茫塵劫。鴨

兒也莫輕打。

洞仙歌 汶上旅次聽雨不寐呈文起及朱苾園

雲生月死。釀瀟瀟梅雨。燈影幢幢照愁侶。縱饒伊徹夜。簧暖笙清。禁不得、瀝淅簷鈴
淒語。亂愁千萬點。來自愁臺。願託回風帶愁去。忽又憶江南。枕簟逡巡。魂和夢、把
愁留住。待聽過、黃河水濺濺。便側耳青篷。棹歌津鼓。

長亭怨慢 偶閱許彥周詩話錄司馬池行色詩一絕云冷於陂水淡於秋遠

陌初窮見渡頭。賴得丹青無畫處。畫成應遣一生愁。余川陸備經諳覩。斯境
根胸挂臆。演以二詞

怪車馬、怱怱何事。驛館迴燈。夢殘天際似霧非烟。霎時消入曙光裏。陌頭塵矮。才辨
得、山和水。斜照一鞭紅。又閃出、暮愁千里。行矣。便旌旗照野。也自眼昏神醉。鴻邊
雁外。況琴劍淒涼如此。漫說到、塞月邊沙。只排遣、風花無計。賸一片離痕。尋取酒家
澆洗。

聽津鼓。通通敲罷。柳翠濃曠。蓼紅紛灑。恰似離容。水痕烟影替描寫。斷霞飛鳥。斜趁著孤帆挂。遠浦忒冥濛。漸點點、輕舟搖下。行也。歎平生一舸。閱盡雨晨霜夜。江湖萬里。有多少。銷魂圖畫。最無奈。殘月窺篷。望沙岸、平連空野。認故國迷茫。雲樹重重相亞。

月下笛 秋陰

宋玉騷心。潘郎賦手。自來愁歎。西風不管。把羅雲、更吹亂。庭梧鎮被低空壓。看葉落、蒼苔漸滿。驟天涼如水。霉生葛帔。潤鬆紈扇。深院。簾長捲。但豹脚無聲。暗侵人面。零星去燕。無聊空等新雁。桂花時節。分明到。甚雨脚。朝朝未翦。又不似、釀春天。融得香泥盡軟。

掃花遊

伯治爲杜素芬寫照。余名之曰憐影。雖取小青詩意。亦承素芬之旨。

云爾

曉妝鏡掩。算此外憐儂。一池春水。影兒自媚。幸蕭郎見後。更知心事。縷縷情絲。度入

冰綃卷裏瘦相對。似月下冷梅。修竹斜倚。離恨知有幾。便畫檻同凭。也成千里。晚風又起。看玻璃皺處。臉紅都碎。數點飛花。暗傍橋心雁齒。替彈淚。和儂身。一般根蒂。

天香 貨園殘桂

珠雀斜穿。紅鱗亂唼。薺林樹樹秋碎。偃瓦錨金。均甄貯雪。冷落畫闌愁倚。蓬蓬翠葆。賸半額。宮黃未洗。爭信青腰守護。偏教木犀風起。遙憐廣寒殿裏。有嫋娥。暗傷憔悴。待折一枝招隱。小山誰繼。收取零香萬斛。試爇向薰爐。勝沈水。露掌空寒。無人料理。

綺羅香 九日雨中獨登郊趣樓作樓在假宅之後嘉樹園中

桂杪篔簹金。藤根綴綠。窄窄彎彎行處。愁殺重陽。果是一天風雨。便全家攜手登樓。簾櫳外。盡成烟霧。爲垂楊。獨自凭闌。衣裳先被溼雲污。他鄉秋已耐慣。何況連年此日。居然歡聚。少卻黃花。不怕醉鄉無主。任瀟瀟。簷響階聲。要勝似。往時羈旅。想佳辰。半是平拋。這番才細數。

瑤花 題折梅仕女圖

微微春信脈脈春心。只梅花堪證。霜籬水閣。閒徙倚。蝴蝶都無蹤影。瑤情漫寄。渾一片嫩寒嬌凝。被凍雲膩住香魂。又被晴風吹醒。仙姿合在瓊樓。奈玉骨冰肌。難耐清冷。何郎何處。明月下。各自禁他孤另。紅闌一帶。有幾箇。淒涼人凭。待短牆笑弄青梅。已負十分芳景。

憶江南 雙調 以下庚午

春將去。猶在客愁中。芳草似烟還似霧。垂楊宜水更宜風。豔殺小簾櫳。清明過。穀雨且從容。天氣乍寒仍乍暖。花光非淡亦非濃。春意只怱怱。

南鄉子

梅信者番乖。等著桃花一起開。寒食清明連上巳。奇哉。如此春情怎的猜。湖上豔陽纔。忙殺東風報小齋。待向看花花已盡。歸來。燕子銜泥落滿階。

掃花遊 高郵道中呈手山

獨眠未起。夢滿樹桃花。亂飄橫檻。好春驟減。正無聊醉倒。酒波猶泛。倦眼微晴。陡覺
雲昏霧慘。浪花撼。是一葉小舟。枯柳斜纜。天色如此暗。更雨鏃風弦。射人心坎。旅
懷易感。況柔愁似水。快刀難斬。昨日今朝。也費三生悟懺。久和暫。箇中人。替儂參勘。

洞仙歌

王春波畫斜倚薰籠圖陳曼生屬題此闕

蘭釭碎茁。賺秋波愁凝。綺壁朦朧鬢花影。漸沈烟綠散。獸炭紅微。禁不起。夜久天寒
人靜。腰肢如此弱。底事眠遲。爲怯鴛文繡衾冷。小夢恰淒迷。玉漏丁丁。連窗外。鸚
哥都醒。更有箇愁人在天涯。正月苦霜辛。枕囊斜凭。

一萼紅

汪劍潭金手山凌芝泉鄭柿里諸君篠園看芍藥校書鳳珠佐觴焉各

製此調三闕僕頃自都還邗上依數繼聲局外環中別有深感時辛未七月
也以下辛未

乍歸來。怪珊瑚萬朵。偏又背儂開。瘦借雲肥。愁支玉怯。年時忒惹風懷。問容華。如今
似否。怕重遊。難認舊亭臺。寂寞窗櫺。淒涼院落。潦倒裙釵。羨煞同舟仙侶。更收香

梨。淺。綴。豔。松。牌。軟。語。牽。愁。閒。情。攪。夢。送。春。猶。勝。天。涯。試。回。首。豐。臺。花。事。但。模。糊。風。雨。雜。塵。埃。昨。夜。秋。聲。已。到。吹。冷。莓。苔。

又

太。無。聊。負。青。春。十。載。杜。牧。鬢。絲。飄。水。色。疑。伊。烟。痕。似。我。到。眼。都。是。紅。橋。有。多。少。花。謠。柳。讖。算。將。離。名。字。最。魂。消。梅。雨。零。邊。麥。天。寒。處。各。自。今。朝。莫。道。湖。心。路。近。只。船。頭。頭。尾。便。已。迢。迢。扇。掩。香。空。絃。凝。響。絕。酒。醒。何。處。停。橈。歎。從。前。天。紅。斜。紫。破。封。姨。收。付。廣。陵。潮。賸。了。江。南。詞。客。重。話。鐙。宵。

又

倚。危。闌。看。疎。枝。倦。蕊。未。放。已。闌。珊。鶯。戶。銷。金。蝶。牆。飄。粉。燕。子。都。辦。西。還。任。十。二。紅。樓。傾。倒。有。誰。來。圖。畫。冷。湖。山。新。笑。剛。逢。古。哀。旋。趁。賺。破。情。關。九。十。春。光。過。了。道。此。花。能。殿。依。舊。凋。殘。寒。草。低。黃。陵。松。慘。翠。一。例。催。老。朱。顏。且。休。說。蕭。郎。謝。女。便。花。神。如。夢。住。人。間。拌。把。珠。愁。玉。怨。此。後。全。刪。

解連環 驟涼

夢酣偏醒。訝單衾翠薄。暗帷香靜。待曉來、起看庭花。便紅紫惺忪。悄如新病。昨夜今朝。陡收盡、一天炎景。試重臨水閣。半面西風。舊檻愁凭。沈沈滯雲似暝。又高梧脆葉。飄墮金井。記夕陽、斜帶廊腰。任橫偃桃笙。汗珠猶迸。恁地難禁。料不到、者般淒冷。笑秋人、正如倦蝶、避將扇影。

三姝媚

秋陰釀雨。庭卉潛然。聞湖上藕花盡矣。賞會無端。詞以遣意。

淒風連夜響。料芙蓉吹殘。水雲空蕩。鷺冷鴛寒。向敗荷深處。暫時偃傍。待覓纖鱗。早收在、漁竿漁網。縱有垂楊。難繫遊驄。怎停歌舫。只算金焦無恙。又墮影江心。和潮來往。細雨乾時。把舊愁千縷。寄還天上。草草庭花。更何事、爲伊惆悵。正似南樓秋夢。迷離半响。

春從天上來

鏡聽消寒第三集作

竈馬馳煙。正祀過黃羊。守歲無眠。更攜明鏡。私卜新年。鏡兒待照誰邊。仗鏡神潛引。

和司命、杓柄迴旋。報儂知，是鄰家吉語，燈下遙傳。常時晚妝樓上，鎮悄對菱花，自惜嬋娟。有限情懷，無多消息，只願似鏡長圓。問玉郎歸否，記深夜、頻擲金錢。總茫然。料者回佳讖，靈似神仙。

永遇樂

木瓜

消寒第四集作

以下壬申

氣息吹蘭。衣裳賽菊，香色都妙。帶露黏花，和金蹙繡，更數宣州好。移根時候，最宜秋社，熟比錦橙還早。試漸入、桃花醋裏，風味又添多少。佳人投贈，幾回珍重，可是瑤瑤。報羽帳深藏，銅槃小供，伴得千花老。漬將紅粉，勻來素面，遮卻睡痕如掃。只無那、心酸意楚，怕伊未曉。

玉京謠

落燈風

消寒第五集作

十里星橋路，閉盡珠簾，寂寞魚龍夜。怪煞封姨，都將銀燭吹熄。但半規、明月多情，又
不奈、行雲如馬。誰遊冶。香車影絕，瓊簫啞。春宵欲買真無價。兩方歇，早上元過也。閃爍殘釭，時時窗眼輕射了，不是花信相催已斷送。盆梅飄灑，聽來乍。譙鼓暗中

遙打。

探芳信 宣德銅瓶消寒第六集作

映窗牖。認翠潑苔花。斑凝土鏞。是勝朝形製。宣德字深鏤。移芳占景。知何限。水暈今猶透。伴蕭齋。紙帳燈斜。鵲爐香瘦。閒器自長久。勝漢殿金仙。晉宮銅獸。中有花魂。曾見靜慈否。靜慈仙師宣宗廢后也。景陵往事如烟月。一笑休回首。幾枝春。尙算當年舊友。

鬥百草 鬥草消寒第七集作

拾翠相逢。踏青乍見。花間路。鬢摘珠翹。腕除金釧。閒把好春戲賭。繞芳叢。似蝶趁蘭皋。鶯捎藥圃。任壓繡鞋鬆。揉藍袖褪。汗凝香露。猶記秋千樓外。雙陸窗邊。都是兒時尋伴處。丫髻才梳。小眉初畫。蛟輸贏。嬌嗔笑舞。尋常慣。時節何曾待端午。莫孤負。便嬉遊。也難再補。

如夢令 題夏慈仲桃花春水渡江圖

夾岸天紅萬樹。都被綠楊風妬。流過錦帆涇。便是西施葬處。春暮。春暮。別有秦淮古渡。

一萼紅 春夜聽雨和慈仲作前夕夢泛紅船仰見江月遽然以覺竹雨正喧爰并述之時客真州

蕩蘭橈。正江天闊處。和月看金焦。樓鼓催歸。塔鈴傷別。夢醒身世迢遙。只闌珊、幾竿窗竹。甚風葉、吟得太蕭蕭。水氣成烟。梅魂隔霧。已近花朝。有客夜深翦燭。把新愁細語。舊恨重挑。野店雞聲。荒簷雁語。捱過多少今宵。歎華年、空如錦綺。被春風、翦作幾千條。近日心腸都死。那有魂消。

木蘭花慢 木筆花 春游第一集作

是何人夢裏。將彩筆。向空投。恁紫蘸霞濃。香霏露飽。翠掃烟流。梢頭自開自落。替羣花、先寫一春愁。不似青蘆細削。無情描畫荒洲。知不。一束豔豪柔。都費錦心抽。歎江郎才盡。青蓮老去。臣管誰收。凝眸暮天霽色。似雲藍。題句傍高樓。入夜三星帶月。

更看心字斜鉤。

減蘭 爲屠怡泉題汪素珍簪花圖 二首

幽花媚鬢。蛺蝶潛遭花氣引。倚翠樓頭。宛宛吳江蕩遠愁。同心密約。月下雙雙人影薄。月要重圓。還要常娥待五年。

送郎何處。丁卯橋邊千疊樹。杜牧歸遲。綠葉成陰子滿枝。往情猶記。偷看新妝明鏡裏。記不曾真。今日崔徽卷裏人。

琵琶仙 春紅已暗夏綠方濃觴詠相尋互爲主客竹溪蓮社去今不遠也穀

人祭酒紀以一闋乃依調繼聲焉 消夏第一集作

年去年來。把多少、酒社詩盟耽閣。端爲何事。忽忙良辰恁拋卻。人漸老、愁添笑減。問當日、可曾知覺。翦月無光。攔春不住。情味蕭索。幸贏得、身似閒雲。伴仙客狂吟更清酌。庭下碧桃開盡。換瓶中紅藥。休再憶、華年舊侶。但眼前、已判今昨。此後鴻雨鴉天。漫忘佳約。

一萼紅 送手山隨許秋巖漕師入都

望長安。記荒城古驛。人嬾路漫漫。雞柵連牀。馬通炊黍。馱鈴催上征鞍。笑年來、囊琴匣劍。任佳節、無處可凭闌。酒熟梨花糗香。菰葉客味辛酸。今日翩翩書記。有雲隨畫舫。風轉旌竿。放開伸眉。推篷縱眼。領略前度關山。且休憶、隨隄柳色。算歸期、猶趁菊天寒。定有紀行新句。先寄儂看。

點絳脣 陳季淳屬題帳額

似霧疑煙。一簾花影搖殘醉。簟紋如水。鶴醒人初睡。月又成波。蕩入瑤窗裏。微風起。鴨爐香細。閃閃銀缸碎。

買陂塘 盆荷消夏第二集作

釀微波。綠雲低舞。日長庭院風細。江妃半褪生塵襪。步近短闌斜倚。妝乍洗。任錯落明珠。迸入苔痕碎。屏山鏡裏。看榴燄輕然。蕉旗亂颭。遙影淡相媚。玲瓏手。偶借盆池小試。露盤擎出纖指。香中未許蘭橈泛。容得錦鱗遊戲。憑解佩。渾不用柔情脈脈。

愁煙水。閒情又起。問北渚秋寒南塘月曉。幽恨向誰寄。

湘月 馬湘蘭蘭竹消夏第三集作

南朝金粉。和暖雲涼露。毫端揮灑。冶葉柔梢無限態。小照玉娥能寫。燕尾拖香。鸞翎舞翠。影落丁簾下。青溪明月。一時流照。吹榭。原是楚畹娟魂。湘濱秀骨。小謫紅樓者。當日千金酬一笑。換得冰綃無價。佩結芬芳。金搖瑣碎。想見房櫳雅。卷中標韻。算伊親自描畫。

眉嫵 柳如是小像

訝烏巾籠鬢。翠帔垂肩。依約露紅袖。怪底人如玉。倚枯陽。當年偏嫁蒙叟。自家姓柳。肯再教。飛絮依舊。論青眼。本屬雲間客。問夫婿知否。何處邨名紅豆。歎絳雲樓燼。榮木樓朽。明月空無恙。梅梁下。嬌魂應更回首。詠花對酒。占幾多。良夜清晝。看圖畫朝雲。還值得買絲繡。

石湖仙 壽吳穀人祭酒

香山詩老。是騎鶴仙人。飛下蓬島。風月滿西湖。早收歸、吟囊賦草。鑿坡簪筆。記灑過、墨花多少。長嘯指舊林、數點歸鳥。

邗江十年聽雨。和羣賢、金尊共倒。一座詞壇。幾許星辰環照。紫桂初香。碧荷猶裊。倚花談笑。秋雨小。新涼正爽。懷抱。

滿庭芳 詠海桐

翡翠環洲。珊瑚冑網。南方草木都奇。分來海樹。銀幹碧瑤枝。幻出纖纖妙手。遮明月。弄影清池。花如雲。丁香褪盡。素豔尙依稀。高梧空百尺。琴材易老。鳳羽難期。但西風幾日。玉井黃飛。爭似冬心自保。涼消息。未許秋知。羣芳裏。煙濃露淡。青過歲寒時。

玲瓏四犯 綵腔 以下癸酉

才到新年。訝五色羅雲。飄墮金翦。草草花花。擎出社前輕燕。先看貼上屏風。更插沂翠翹珠鈿。喚侍兒。送與鄰家。春色一時分遍。婉姸初戴誰曾見。早傳來、漢宮唐殿。坡仙也有簪花興。頭上銀旛高顫。剛只幾縷紅絲。裊得韶華嬌軟。問合歡名字。相贈

答情深淺。

東風齊著力。花朝

雲粉輕彈。煙絲柔裊。泥煞晴光。花魂十萬。隱躍下瑤房。怪底東風狡獪。多時候。孕玉胎香。簾櫳外。鶯喉漸滑。蝶隊都忙。聽說杜秋娘。金縷曲。勸人早早尋芳。紅嬌翠軟。作意媚韶陽。莫道今朝最好。還悽斷。幾箇冬郎。青幡下。金鈴絮語。一味郎當。

一萼紅 二月望日雪中探梅

冶遊時。甚龍公試手。重遣玉花飛。竹色平沈。苔痕半掩。蕊宮深鎖。葳蕤了不是。羅浮夢裏。淡妝人。含笑隔簾窺。金眼仙蟲。綠毛么鳳。何處雙棲。料得故園春暖。漸榆錢疊疊。柳線垂垂。水國寒多。風亭信晚。素顏才點燕支。又喚起。鄉愁一片。認常年。殘醉遶疏籬。只少有情霜月。伴影樓西。

暗香 紅心草

紫蘭銷歇。賸冷紅碎吐。和煙淒絕。麝土半堆。原是前朝葬花穴。愁煞枝頭杜宇。訴春

恨、年年啼血。總沁入、九地情根。千載寸心苗。釵折。古離別。似舊日唾壺。淚痕凝結。夕陽照徹。秋蓼寒楓共明滅。猶認殘脂數點。遙灑向、吳王宮闕。問故國、今在否。斷蛩忍說。

法曲獻仙音

桃花庵看牡丹預爲廖復堂都轉壽同人各賦一闋以當侑觴

因有此作

屏綴流蘇。佩翻雕玉。照耀人間金紫。瓊島移根。寶闌遮影。層層露光霞氣。草木狀。憑題品。風華定誰比。使君喜。把芳尊、對花微笑。明月下、今夕與花同醉。月色滿湖天。映華燈、紅透煙水。願借觥船。泛天香、爲壽花裏。羨琅弧挂日。更簇滿庭蘭桂。

瑤花

題鄒藥莊二分明月圖

無雙亭畔。第一樓邊。占許多明月。霓裳低按。三五夜、認得常娥親切。牙籌賭酒。奈眉語、難分癡點。算只有骰子玲瓏。八骨相思能說。娉婷猶傍垂楊。問往日花枝。今被誰折。情因情果。空對著、畫裏朝雲傷別。青天碧海。杳隔斷、廣寒宮闕。怪怎生不早商

量鑄錯料應無鐵。

憶舊遊 北郭外觀菜花 以下甲戌

望平原蹙繡野水拖藍。襯出嬌黃。借得鶯雛色。趁隋家柳嫩。同媚春楊。細聽幾梭風過。渾似故園香。記側傍瓜疇斜連麥隴。一種芬芳。迷茫竹西路。鎮一片金沙布地。輝煌莫訝花容淡。是煙苗雨甲飽染清霜。雅宜餉婦簪髻。點綴儉梳妝。甚秀色堪餐。穠桃豔李空路旁。

夢橫塘 燕來

漢釵曾化。楚石猶翔。海天搖蕩空綠。亂翦游絲。更萬點飛花平蹴。朱雀橋邊。綠楊城畔。去來差熟。趁新收社雨。處處尋巢。珠簾捲。盧家屋。非因舊壘重來。甚紅絲一縷。久繫雙足。總是他鄉都莫論。草堂金谷。但休向吳宮小住。驀地焚窠傍誰宿。畫棟泥融。且停春影。讓鶯遷喬木。



梅譜

邊

吹

笛

運



凌廷堪（乾隆二〇——嘉慶一四）

字次仲。安徽歙縣人。乾隆五十五年進士。與洪亮吉同出朱文正門。並以宏博見稱於時。官寧國府學教授。博覽強記。貫通羣經。而尤深於禮。解音律。由燕樂以通古樂。故所爲詞。無不合律。著有校禮堂集。

自序

少時失學。居海上。往往以填詞自娛。相倡和者。唯同里章君酌亭。後出游。漸知治經。得交儀徵阮君伯元。談說之餘。時或及此。蓋亦深於詞者。其他朋輩。多以小道薄之。不敢與論也。年二十許。遂屏去。一意嚮學。不復多填詞。舊稿久束之篋中。及官宛陵。暇日檢出閱之。頗有敝帚千金之想。乃編爲二卷。酌亭已前卒。不得見矣。舊取白石暗香句意。名之曰梅邊吹笛譜。蓋詞人習氣。亦不復追改也。又少作。但依舊詞填之。不知宮調爲何物。近因學樂律。少少有所悟。而宋人之譜。多零落失傳。又以琵琶證琴聲。故燕樂二十八調。多與雅樂異名也。今取其可考者。注宮調於其下。不可考者。不注也。阮君今以侍郎巡撫浙江。命小史錄一本質之。不審能傳於後否。稿中所用四聲。非於唐宋人有所本者。不敢輒爲假借。所用韻。凡閉口不敢闌入。抵齟鼻音。至於抵齟與鼻音亦然。異時有揚子雲當鑒此苦心也。嘉慶五年歲在庚申端午日。凌廷堪次仲書。

跋

梅邊吹笛譜二卷。先師次仲先生所手定也。其錦賦性拙魯。於此夙未究心。然嘗竊聞其緒論矣。詞者詩之餘也。昉於唐。沿於五代。具於北宋。盛於南宋。衰於元。亡於明。以詩譬之。慢詞如七言。小令如五言。慢詞北宋爲初唐。秦柳蘇黃如沈宋。體格雖具。風骨未逾。片玉則如拾遺。駿駿有盛唐之風矣。南渡爲盛唐。白石如少陵。奄有諸家。高史則中允東川。吳蔣則嘉州常侍。宋末爲中唐。玉田碧山風調有餘。渾厚不足。其錢劉乎。草窗西麓商隱友竹諸公。蓋又大曆派矣。稼軒爲盛唐之太白。後村龍洲亦在微之樂天之間。金元爲晚唐。山村蛻巖可方溫李。彥高裕之近於江東樊川也。小令唐如漢。五代如魏晉。北宋歐蘇以上如齊梁。周柳以下如陳隋。南渡如唐。雖才力有餘。而古氣無矣。填詞之道。須取法南宋。然其中亦有兩派焉。一派爲白石。以清空爲主。高史輔之。前則有夢窗竹山。西麓虛齋蒲江。後則有玉田聖與公謹商隱諸人。掃除野狐。獨標正諦。猶禪之南宗也。一派爲稼軒。以豪邁爲主。繼之者龍洲放翁後。

村猶禪之北宗也。元代兩家並行。有明則高者僅得稼軒之皮毛。卑者鄙俚淫褻。直拾屯田豫章之牙後。我朝斯道復興。若嚴蓀友李秋錦彭羨門曹升六李畊客陳其年來牧仲了飛濤沈南淳徐電發諸公。率皆雅正。上宗南宋。然風氣初開。音律不無小乖。詞意微帶豪豔。不脫草堂前明習染。唯朱竹垞氏專以玉田爲模楷。品在衆人上。至厲太鴻出。而琢句鍊字。含宮咀商。淨洗鉛華。力除俳鄙。清空絕俗。直欲上摩高史之壘矣。又必以律調爲先。詞藻次之。昔屯田清真白石夢窗諸君。皆深於律呂。能自製新聲者。其用昔人舊譜。皆恪守不敢失。況其下乎。吾師之詞。不專主一家。而尤嚴於律。嘗自謂幼年精力誤弊於此。壬申冬。江鄭堂先生亦語錦曰。令師學問精博。悉臻絕詣。禮經樂律。固其千秋大業。卽駢體文章詩餘小技。亦不落第二流也。爰案次寫其目錄。置諸卷端。以便檢閱。外有花犯一闋。與折桂令諸散曲。旣不欲棄置。亦不敢竄入。惟補錄於後。以公同好云。時道光六年仲秋月望日。受業宣城張其錦謹識。

梅邊吹笛譜

古歎凌廷堪次仲

齊天樂 杏花

雨晴日暖春波淺。臨流半開如笑。乍送鴛簫。旋飄酒旆。韋杜紅歌芳草。天街破曉。想碎錦坊前。玉鞭曾到。羨汝風流。曲江偏愛近年少。尙書佳句豔冶。見枝頭蓓蕾。春意爭鬧。茜欲分衫。嬌還戀鬢。香色知添多少。胭脂淡掃。自不與西園。海棠同調。寫上雲箋。趙昌新畫藁。

摸魚兒 吳牖雲招同章酌亭飲桃花下

釀東風、乍寒還暖。枝頭侵曉紅亞。和煙掃出三三徑。花底滿浮金罍。春似畫。見幾點、燕支淺襯垂楊罅。臨風豔冶。任開過迴欄。遮將別院。不礙繡簾挂。攀花坐。忍放流光去也。憐春方信無價。櫻桃永巷同牆女。誰是溧陽先嫁。休更話。算寂寂蓬門。卜偏花陰卦。閒愁細寫。但燒燭論詩。分曹射覆。醉倒翠紅下。

點絳脣 曉起

破曉。寒簾。畫欄東畔。東風劣。海棠吹折。滿地胭脂雪。記得開時。花底人離別。朦朧月。此番圓缺。又到春分節。

角招 春雨

夢南浦。垂楊岸。曉來添翠影無數。對牀人共語。夜暖打窗。深掩朱戶。茶蘼院宇。見滅沒。歸鴻遙度。做出離愁千縷。傍桃葉渡頭看。正冥濛如霧。何處。酒醒日暮。扁舟送遠。心逐春帆去。探芳期尙阻。料得前邨。新花遮路。飄燈俊侶。記水榭依稀曾遇。舊曲吳娘休譜。晚晴後。待重吟、樊川賦。

徵招 秋雨

淒淒幾陣西風緊。羅幃漸生幽況。小院乍來時。是梧桐先響。暗催愁夜長。恍人坐、空江煙浪。向日心情。昔遊滋味。一時都上。休放綠尊空。清商怨、聲聲爲誰惆悵。薄冷正侵人。莫登樓西望。雁來書未往。總分付、玉溪高唱。暮山外。洗出新秋。露數峯清曠。

霜天曉角 題程序堂畫秋柳小幀

舞腰如束。畫出秋盈幅。也自拂船縈馬。渾不似、舊時綠。斷續離別曲。郵亭人信宿。

仿佛小紅樓畔。殘夢醒、弄寒玉。

花心動 同章酌亭劉氏莊看桃花

三月春深。踏春郊。桃林雨餘紅透。燕認舊巢。鶯囀新枝。都傍好花前後。有時微露嬌黃出。是花外、呢人春柳。板橋曲、嫣然一樹。照波娟秀。水色山光滿袖。曾幾日、輕陰做成春晝。十里絳紗。千尺晴絲。遮莫小園如繡。向人含笑都無語。似微覺、玉梅纖瘦。待重訪、天台莫迷洞口。

天香 和樂府補題宛委山房擬賦龍涎香

幽可潛珠。芳偏韞鬢。何時領下偷取。既冷還添。將銷更爇。織就翠綃千縷。珊瑚半捲。恰幾陣、廉纖微雨。薰畢藏鉤素手。重吟個儂佳句。相思倩誰寄與。噴金猊、滿庭春霧。漫說水精宮遠。馭風能去。花外濛濛散了。乍髣髴、湘煙夢龍女。喚起洪芻。來評雋。

語。

水龍吟 和樂府補題浮翠山房擬賦白蓮

粉痕吹滿銀塘。翠奩虛掩。幽芳淨。亭亭小立。珊珊微步。疑遮疑映。不辨花光。但聞人語。露涼風定。漸遙天。佩響空江。月淡。翩然墮。飛瓊影。池上菰蒲搖冷。惜瑤華未遑持贈。雲英化水。煙波無際。都非塵境。可是鴛鴦。冰綃圍夢。被誰驚醒。賸歸舟浣女。搵香妬色。照芙蓉鏡。

摸魚兒 和樂府補題紫雲山房擬賦蓴

脫龍校。玉絲柔滑。空明深處湧翠。洛妃笑擲花鈿小。添起滿湖秋意。秋色裏。待擷取秋雲。煮出秋滋味。鱸魚正美。算金馬門前。銅駝陌上。唯汝動歸思。吳鹽下。羊酪真成浪擬。嘉名曾說千里。扁舟剛做西冷夢。夢到六橋煙水。浮碧沚。便喚作鳧葵。卻比鳧葵細。香甘沁匕。任解芼。鏹羹能充豆實。不入五都市。

齊天樂 和樂府補題餘閒書院擬賦蟬

糞丸九轉初成後。輕身乍疑鴻漸。淺抱疏風微吟。墜露人臥虛堂。清簟吳霜未點。笑
猶曳殘聲。別枝高占。一樹無情。五更秋色碧於染。山城遙接水驛。獨行驅倦馬。沾
酒郵店。綠鬢吹涼。紅綏弄影。都帶齊梁宮豔。危機最險。指黃雀螳螂。靜中誰驗。且讀
南華。雨晴門晝掩。

桂枝香

和樂府補題天柱山房擬賦蟹

菱湖半畝。見夜火照沙。秋罟迎溜。還憶吳江雨細。楚天霜厚。西風吹綻東籬菊。最難
忘。稻香時候。華門客至。糟牀酒熟。恰當重九。煦不盡。留犁瑩透。好分付廚娘。嫩黃
輕剖。應笑螯螘誤食。是何紕繆。雙螯聽得穿蘆急。學泠泠。樊路低奏。乍寒天氣。田家
況味。幾人消受。

滿庭芳

憶別和酌亭

油壁初歸。香輪暫駐。碾破芳草萋萋。昨宵春雨。依舊綠盈隄。幾度重尋往事。凝望久。
蹤跡都迷。垂楊畔。遺鈿不見。唯有玉驄嘶。無題傳好句。樊南寄興。彩鳳靈犀。便石

榴紅後。猶說分攜。訝許雙魚又斷。無語處。溝水東西。銀河轉。相思夢杳。空付汝南雞。

二郎神 卽景用徐青山韻

暮煙送晚。仿佛見。去年樓影。恰翠箔低垂。朱欄斜倚。應怕花梢露冷。便有僧繇傳神。技寫不出。離人心病。早乍啓寶奩。初開塵匣。月圓如鏡。誰省。裴航去後。瓊漿空凝。縱約取卿卿。夢中私語。又怕宵來夢醒。滿地落英。一天飛絮。孤負別時光景。閒拂拭。瘦玉臨風。訴與小窗幽靜。

秋宵吟 蟋蟀

短牆幽。瘦路古。喚起淒涼無數。疏燈翦。正一穗微青。雁霜侵戶。語千迴。恨萬縷。似說天涯離緒。寒機倦。怨寂寞。王孫帶愁歸去。唧唧無端。隱竹几。清尊怕舉。漏長羈舍。月暗深閨。總向夢回處。嘈切聲如許。著意尋秋。秋在廢圃。最難聽。夜冷苔荒。黃葉纔落更細雨。

齊天樂 同章酌亭夜話

夕嵐遙送芙蓉影。濛濛翠生庭宇。繆玉成羹。調雲作液。不放吟秋人去。清尊論古。恰纔說英雄。又憐兒女。瘦月窺窗。綺箋商略舊年句。微吟將斷。復續。隔牆誰弄笛。驚起離緒。碧草難銷。紅芳易感。那得年年長聚。相思最苦。便龍腦香殘。未妨重炷。莫忘今宵。剪燈同笑語。

摸魚兒

曉起大風雪戲作

灑瓊瑤。亂堆庭戶。寒雲天外凝結。朝來有客眠初起。驚看一天風雪。心頓熱。空羨取連錢。夜踏南山裂。神珠硬發。看生擊黃鑿。橫穿老虎。下馬飲其血。誰英傑。腰下摩挲尺鐵。豪情何日方洩。不然也向銷金帳。羔酒一時都設。今漫說。相對祇閒庭半樹。梅花折。幽香細閱。笑蓬戶蕭條。茅檐寂靜。日午爨烟歇。

齊天樂

寄吳松屏

海天寒逼雙峯晚。離愁頓生如許。越劍龍吟。吳綿蠟縮。落葉爭鳴高樹。尋春舊侶。正叢桂吟成。小山羈旅。渺渺魚波。數聲新雁向南去。回思胸上握別。片帆初挂後。驪

唱何遽。日澹前山。雲疏遠岸。目斷蘋花深處。關河間阻。算唯有長宵。夢魂能度。倦隱烏皮。怕聽秋夜雨。

八歸 聞程時齋邗上將歸之信

冰花向暖。苔枝含凍。門掩小院寂寞。相思況值春將至。空盼遠鴻佳信。早梅芳約。偶憶烏絲紅燭夜。定夢繞揚州東閣。忽報道。已卜歸期。跨否廣陵鶴。遙想風流逸興。繁華回首。往日曾經行樂。二分明月。十年香夢。又到綠楊城郭。把閒情打疊。載取清歌滿囊橐。相逢日。舊詞重改。按了紅牙。同君花下酌。

金蕉葉 獨酌花下

浮名浪擲。醉鄉春。正宜愛惜。濁醪無限妙理。臨風更岸幘。野水新添數尺。記花時。去年送客。離情纔放未久。垂楊又弄碧。

醉翁操 寫別懷

長隄。輪蹄。高低。草萋萋。煙迷。離懷黯黯無端倪。已拚沈醉如泥。壺勸提。試聽暮禽啼。

更柳邊幾聲馬嘶。翠樽未罄。重倒玻璃。鈿車未發。人影花光正齊。詩與君曾同題。酒與君曾同攜。今君歸舊栖。何時來前谿。徙倚畫橋西。看山明日還杖藜。

荷葉杯 望遠

渺渺一江春浪。凝望正銷魂。賣餠簫裏杏花雨。歸去又黃昏。

鬲溪梅令 題畫扇

碧城十二玉闌干。響珊珊。漫想乘風飛向月中看。洞天聞珮環。不知何事憶人間。下蓬山。鍊得桃花成藥駐朱顏。夜深騎鶴還。

河傳 用韋端己韻

今晚。衾暖。寶猊香滿。遙想伊人。踏青應倦。羅襪誰剔芳塵。待侵晨。倚闌嬌困濃於酒。低垂手。濯濯如春柳。新詞成未。離角月澹烟昏。瘦吟魂。

又

柳浦遊女。競攀烟縷。逐伴聲輕。牽衣笑淺。風外聽不分明。說春晴。夕陽芳草歸時。

路。還私語。又怕來朝雨。薔薇滿架。多分映戶。遮樓替花愁。

紅情 櫻

翠陰綽約。訝明珠綴雨。香垂纓絡。萬顆壓枝。瞥眼金丸飛落。誰鏤珊瑚豆小。堆錦案、勻圓交錯。尙記得、花下梳頭。拳破碎雲薄。盈橐看灼灼。似採取蜂胎。佐客芳酌。睡餘繡閣。一口紅霞夜深嚼。應念青青諫果。休使道、微甘輸卻。飽食後、還靜諷。輞川舊作。

綠意 筍

耕雲種壁。正春蘇凍土。三徑初闢。雨後侵階。風外穿籬。粉籜看看盈尺。新雷一夜香苞綻。便斲取、琅玕誰惜。想故人、載酒招提。玉版正參禪伯。曾是田家味美。煮葵更探蕨。聊送朝夕。縷切湘波。輕蘸吳鹽。茱得銀鱗堆碧。區區果腹尋常事。好養就、摩霄鸞翮。待夏來、靜聽笙竽。小院夜涼留客。

拾翠年光。皺晴波、水面吹來風軟。愁深醉淺。望斷去帆難戀。連宵細雨。早牆角、杏梢紅徧。猶記得、車走雷聲。又隔雁雲千片。離情怕教人見。但徘徊小立。盈盈流眄。銀塘半畝。照影暗窺深院。空階絮語。倩誰放、喚春雙燕。花徑悄、迴步樓西。畫簾自捲。

花犯 題畫梅

裏龍綃。亭亭淡影。翩然畫中現。瘦橫蒼蘚。漸弄粉調脂。移向輕練。更誰趁此并刀便。纖雲和翠翦。乍凍蕊、一枝初放。毫端春尙淺。江南路遙。夢迷離。閒情又幾度。松窗暮徧。思喚取、真真下。伴儂吟硯。移燈去、素屏挂冷。聽細雨、虛堂簾半捲。記載酒、雪溪深處。疏香風外展。

掃花遊 綠陰和玉筍山人

幾番夜雨。漸老卻流光。綠深西崦。翠陰暗染。愛和烟弄影。比花還豔。擁檻侵階。淨掃殘紅數點。曉風颭。算啼到杜鵑。脂褪妝臉。芳意空冉冉。想繾綣留春。繞闌都厭。樹頭細檢。怕餘香尙在。有人凝念。蘇徑歸來。寂寞雙扉自掩。碧雲斂。早濃陰、又遮湘簾。

摸魚兒 梨花

撲簾櫳。一天香雪。何人輕翦瓊片。當窗幾樹垂垂發。花裏有人開宴。春不淺。愛玉樹臨風。人與花難辨。閒情自遣。趁苔徑無塵。粉牆有月。席地布芳薦。重門閉。又聽新鶯乍囀。無端添起春怨。依稀記得前游處。樓上半窺嬌面。人漸遠。悄不覺。年年怕共春相見。魚箋靜展。待調露研辭。焚香琢句。訴與杏梁燕。

望湘人 秋海棠

乍秋生錦砌。人倚畫屏。數枝和露初秀。綠鬢橫釵。翠綃佩玖。費盡西風雕鏤。旅雁飛時。亂蛩吟處。都難消受。怕曉來、無限新涼。更爲瓊腰添瘦。江上離帆去久。想柔情望遠。欲拋還又。訝嬌面娉婷。恍見昔年思婦。苔邊繡襪。竹邊羅袖。折取應煩纖手。笑弱質、也似春花。莫把餘香重嗅。

霓裳中序第一 中秋

冰蟾冷挂玉。一片琉璃圍樺燭。香徑木犀漸馥。乍影溜紺珠。光涵銀粟。纖雲散靄。見

數峯天際如簇。乘槎倦、羽衣弄笛。海上駕黃鵠。娛目。清輝盈掬。便滿爇、心香暗祝。尋秋曾記杜曲。有繡翮雙飛。錦翼同宿。衍波誰共讀。寫不盡、閒愁萬斛。良宵永、佳人何處。翠袖倚脩竹。

念奴嬌 秋日同程序堂方方山吳牖雲章酌亭過李問原村居

稻香天氣正新晴。約伴溪橋同涉。十畝臨流紅糲。蟹箔漁樁相接。問渡人稀。談玄客少。閒倚鷗邊楫。柴扉方啓。隔籬飛過黃蝶。一笑賓主忘形。開軒煮茗。坐對雲千疊。指點疏林烟缺處。片片昏鴉如葉。遠岫皴青。斜陽繪紫。雅與吟情愜。園亭佳景。爲君圖上湘筵。序堂善畫

柳梢青 玉簪花

香玉珊珊。搔頭一朵。斜壓雕欄。莫是瑤天。仙娥遊戲。擲下高寒。恰宜霧鬢風鬟。摘歸向、妝臺細看。比較珠鈿。摩挲寶釧。可似人間。

十六字令 螢

螢。墜露浮煙數點星。輕羅撲。飛上翠圍屏。

點絳脣 新秋

疏柳搖煙。曲池波細風初定。玉樓人醒。應念芙蓉冷。欲採芳馨。遠道憑誰贈。纖雲淨。寶蟾如鏡。照見鴛鴦影。

隔浦蓮近拍 送吳牖雲之泰安

秋聲何處最早。古樹霜風峭。有客將登岱。吟鞭東指雲表。齊魯青未了。憑高眺。日觀金輪曉。衆山小。滄溟萬里。披襟容汝舒嘯。秦碑漢碣。此去莫辭蒐討。長句山東李白好。新稿歸來添得多少。

掃花遊 秋夜作

寶簾夜啓。正月印中庭。碧空澄湛。帶圍又減。早蘼蕪夢冷。怕臨妝鑒。隱隱靈犀。最是清商易感。柳陰暗。記當日去時。曾繫春纜。池上凋菡萏。望萬里關河。與誰憑檻。寄書未敢。悵赭鱗漸遠。楚江波澹。墨淺香深。更取紅箋細覽。隔葭菼。弄秋聲。雁霜微撼。

齊天樂 霜降魚 卽吹沙魚產海上者入秋最肥美又名沙洗魚

秋深潦盡清霜下。沙頭賣魚人到。織葦盛來。編蒲裹去。入市偏宜侵曉。山厨最好。便鹽豉輕加。筍菹微芼。午酌茅檐。一盂麥飯爲卿飽。江鱸河鯉自美。此中含別趣。難與相較。沮洳無嫌。鱗鬣可辨。遠勝侯生垂釣。苔磯漫掃。又何羨臨淵。老饕貽笑。散步前溪。靜看穿翠藻。

疏影 蠟梅

黃雲晝捧。見風融磬口。春意潛動。莫是金仙。天際飛來。冉冉梅檀香擁。綃衣淺借。中央色。似月窟。新分嘉種。便蠟珠、信手穿成。好挂翠翎幺鳳。掩映鵝兒酒畔。比將杏蒂小。纖蕊含凍。試採蠶鬚。輕綴龍鱗。占得宮眉矜寵。橫斜一樣。疏籬側。自不與、逋翁同夢。倩裏蹄、鑄出相思。看取玉奴情重。

浣溪沙 黃昏

鵲尾黃昏炷麝臍。壓簾新琢辟寒犀。是誰門巷玉簫低。日自南回梅漸北。風從東

至柳微西。翠禽偏向夢邊啼。

長亭怨慢 別緒

灞陵岸、情人歸後。折得河橋。一枝垂柳。越水緘愁。隴雲凝恨。淚霑袖。幾番憔悴。拋不下、纖纖手。昨日柳邊過。見萬縷、柔條依舊。回首盼、魚箋未至。但覺個儂消瘦。南樓夢遠。最難度、雨宵花晝。更小語、祝徧春風。願人比、青山長久。待寄與相思。都在離離紅豆。

無悶 夾竹桃

裁破青霞。分與絳雲。疑笑疑啼欲綻。似粉面妝成。隔簾凝盼。料得湘靈醉也。駕翠鳳、飛來天台畔。瘦能解語。嬌還抱節。淡濃相半。應喚玉人看。便日對此君。錦衣新換。漸露井煙迷。渭川花滿。種了琅玕萬頃。更擊碎、珊瑚疏疏間。好惜取、羅袖天寒。獨倚暮愁何限。

永遇樂 過韓侯釣臺

蒼莽長淮。王孫當日。曾此垂釣。帶劍何爲。不慚袴下。俛首人盡笑。區區亭長。喁喁漂母。寧識英雄懷抱。算將軍。淮陰市上。可人只此年少。一朝遇合。登壇傳檄。指顧三秦全掃。相背成虛。臣心如水。鐘室誰與弔。嗟峨片石。蕭條野岸。尙有漁人來到。君知否。長陵坏土。共爲茂草。

木蘭花慢 高郵弔秦七

挂蒲帆十幅。趁春色。過秦郵。看水繞孤村。天黏芳草。景倩誰收。溫柔。泥人句好。正輕寒、惻惻尙如秋。何處東風乍起。畫橈搖到前洲。悠悠。過客偶停舟。慨古意難休。笑黨籍碑中。干卿甚事。也預清流。深幽。故山夢冷。問風光、可似古藤州。寂寂吟魂未返。甓湖烟柳生愁。

夢揚州 泛舟平山堂

綠無涯。鼓畫橈。搖破春苔。細雨乍晴。幾樹桃花爭開。粉香飛滿重簾下。聽佩環、人在樓臺。湖光冷。玻璃滑。好風吹盡纖埃。無限淒涼客懷。思賦得新詩。好景偷裁。淡柳

弄黃恰好鶯兒飛來。十年留得青樓夢。笑杜郎、虛負清才。寧似我、豪游載酒。不問金釵。

掃花遊 己亥四月真州送客用樂笑翁韻

鴨桃作雪。乍話別城南。綠陰新洗。又歸故里。正江波皺縠。畫橈初艤。撥斷琵琶。送得春光未幾。竟何意。更風笛數聲。離恨重寄。相約空屈指。問此去迢迢。甚時來此。翠箋笑裏。記重逢節候。亂紅如綺。恰好經年。認取青青杏子。舊吟地。待渠儂。再看春水。

點絳脣 春眺

青粉牆西。紫駟嘶過垂楊道。畫樓春早。一樹桃花笑。前夢迷離。人遠波聲小。年時到。越溪雲杳。風雨連天草。

聲聲慢 懷酌亭

按花做粉。搓柳成綿。青陽老去無痕。靜啓文窗。試看多少銷魂。東風撲簾幾陣。把相思吹得紛紛。無聊極。算懷人念遠。不爲驚春。尚記秋來逸興。儘衝泥載酒。曾到孤

村細酌檐花。聽雨同掩柴門。如今舊遊在否。漫回頭。無限春雲。知何日。踏漁舟。重訪故人。

憶舊遊慢 東城看荷花用趙虛齋荷花韻

正涼雲蘸碧。碎錦吹香。一望都平。鼓棹中流去。看風鬟霧鬢。舊訂深盟。美人已隔天末。誰與共調冰。怪藻荇交橫。菰蒲掩映。底事青青。閒亭問何處。有玉液流觴。紈扇盈庭。葉葉含涼意。是曉來翠蓋。嬌露初承。向風舞裙搖動。羅襪涉波行。忍趁晚歸來。紅香冷落明月汀。

喜遷鶯 江上覽古

江天無際。奈僕本恨人。心驚不已。疊岫猶龍。奔濤疑馬。千古獨標形勢。一杭賦詩空返。萬騎投鞭難濟。太平日。但蕭蕭蘆荻。雲低殘壘。迢遞秋樹外。黃葉夕陽。不會登臨意。貼地金蓮。沈波鐵鎖。分付棹歌聲裏。漫尋六朝陳蹟。賸有一江秋水。劃然嘯。早鍾山凝碧。和烟飛至。

永遇樂 秋水

秋老西風曉。凝南浦。澄碧初蘸。孤雁驚寒。雙鷗點鏡。波上秋影澹。生紅灑葉。嫩黃懸柳。掩映數叢葭菼。想年時。流芳照豔。可憐祇今都減。當初記得。別離情況。更覺比春銷黯。短棹搖烟。長汀浸月。行子初解纜。鴛鴦夢冷。鯉魚書杳。贏得粉愁香憾。春回後。重來略約。有梅信探。

探春 聞許書谷將遊黔中賦此寄之

彈粉鴛幃。畫眉鸞鏡。風流白晳年少。赤幘籠頭。黃繩壓手。聞道將遊邊徼。蕭瑟長途裏。算只有。蠻烟荒草。刺桐花下。經行鷓鴣啼破殘照。空有銀鞍繡鞵。應不似玉樓。夢回春曉。瘴雨驚秋。夷歌流月。莫使故人書杳。吳市吹簫客。又半載。淹留江表。試問何時。金樽同罄懷抱。

眉嫵 雨後望隔江山色

乍齊開殘照。盡卷纖雲。江上過疏雨。疊岫青如洗。西風外。張郎新畫眉嫵。黛痕半吐。

被淡煙依約遮住。漸惆悵、一帶銷魂極。有蒼翠如許。懷古淒涼誰語。望弄顰呈秀。回合無數。休問南朝事。繁華盡、飄零金粉何處。舊愁在否。賸兩行、蛾翠凝聚。愛相對纏綿。都挹取上詩句。

爾零鈴

真州城南訪柳三變墓詢之居人並無知者

秋容初肅。向城南道細訪幽躅。春風柳七曾弔。尋仙掌路。親攜醺醪。欲酌秋墳。寂莫處。應薦寒菊。更喚取、誰按紅牙。唱徹當年曉風曲。那知望古空縈目。賸淒迷、野草年年綠。無人解道陳迹。惟只見、亂鴉相逐。指點吟魂。一縷斜陽掛在疏木。但悵望、無語。江湖暗打寒山麓。

秋宵吟

己亥秋客真州涼夜支枕見桐影橫窗月白如晝殘夢初回角聲蛩

響亂起念舊日吟侶南北星散魚雁久疏淒然有懷爰用白石飛仙自製曲

譜之兼和其韻

冷霜凝。夜色皎。漏永簾櫳幽悄。窗斜掩、乍印上桐陰。月明如曉。點疏烟。散細葆。已覺

秋盈林表。離情苦、更助起相思。亂蛩吟草。擬采芙蓉。怕此際、紅香漸老。玉箋空拂。錦字難書。耐可恨牽繞。江上梅花早。敗驛沈沈。春信尙杳。賸朦朧、好夢將成。風咽殘角又斷了。

一萼紅 九日登魏文帝賦詩臺用石帚人日登定王臺韻

晚雲陰。趁重陽載酒。誰把菊花簪。高岫迷煙。空江卷雪。臺上無限銷沈。問千古、英雄不見。只見有、高下暮天禽。幾度悲歌。一聲長嘯。如此憑臨。當日氣吞吳會。記橫江駐馬。不盡雄心。荒草霾碑。殘苔蝕砌。雖有遺蹟難尋。漸蕭瑟、西風乍起。遠林外、黃葉亂堆金。且酌茱萸。倚欄莫厭杯深。

國香慢 月夜登樓憶吳牖雲客歷下因用弁陽老人自度曲奉寄

怕惹離愁。任秋光老去。不上危樓。今宵偶然乘興。暫豁雙眸。浩浩長江聲壯。盪明月、千古東流。情人怨遙夜。竟夕相思。都爲清秋。故人何處在。但風淪歷水。烟鎖齊州。七橋花柳。湖上知共誰遊。寂寞江干遊子。也顧影、憔悴無儔。何時一尊酒。握手高歌。

重看吳鉤。

定風波 己亥十月十三夜真州寓齋聞雨聲瑟瑟因憶春來同章酌亭雨中

校白石道人詞情思宛然如昨日月幾何相去忽已千里檐聲燈影能無離
索之感賦此紀之他日對牀示我故人也

擘鸞箋、換羽移宮。難空酒畔結習。嫩雨黃簾，柔風碧榭，細讀堯章集。互標題，共蒐緝。
紅壓春衫杏花溼。難及似瓊妃弄影，褰雲孤立。一編再執，向江樓、又聽寒聲入。早
芙蓉人去。芭蕉夢悄，瑤草誰同拾。對疏燈，冷花澀。偏是今宵打窗急。於悒。緩歌聲罷。
餘香猶襲。

瑞鶴仙 秋草

一番秋雨後。便覺得、長隄微黃都透。王孫漸消瘦。更清霜凝野，馬蹄初驟。荒城廢堠。
似無數、淒涼做就。接斜陽、幾點寒鴉。又是別離時候。知否。碧銷南浦。芳歇西洲。可
能如舊。春歸未久。凝眸處。漫回首。蹴香塵記得。鈿車陌上。研破層層軟繡。到如今、總

變消魂。共誰載酒。

賀新涼 寄許石園

十載邊關客。躍連錢、據鞍盤稍。鬚眉如戟。雨雪貂裘飛狐塞。耳後弓鳴霹靂。親射虎、白登臺側。一笑歸來胸山道。但沉酣、往往掀高幘。曾共我、話游歷。東風曉送蒲帆碧。向河梁、長歌分手。又成南北。任昉溪頭寬閒處。小闢蓬蒿矮宅。儘戲弄、江鄉春色。兩鬢蒼蒼雄心在。住青山、不耐看泉石。騎代馬、展輕策。

杏花天影 獨飲酒肆醉後用石帚自度曲歌之

繡春園畔花低亞。驟嘶過、長隄駿馬。解鞍還上酒家樓。最怕玉人窺、繫柳下。都無暇、金尊翠罍。笑生小、知心便寡。且將沉醉博癡名。莫訝向江東、問米價。

綺羅香 登壯觀亭

雁外青天。鴉邊黃葉。亭上秋光如許。萬里江山。齊向此中奔赴。見隔水、幾疊峯巒。似微帶、六朝煙雨。戰西風、苔瘦榛荒。斷碑猶有老顛賦。徘徊空對舊蹟。如見風流載

酒。掀髯箕踞。雪下前村。留得可人佳句。問當時、豪興如何。有點點、白鷗飛去。拂吟鞭、試覓歸途。寂寥誰共語。米顛壯觀亭詩如何。夜來風獨下前村雪。

摸魚兒 昭明太子讀書臺

詡金甌、騎兵將老。諸郎誰解匡濟。綸兒庸劣。網兒弱。何況七官文士。君可謂超一代、翩翩濁世佳公子。才華信美。更鶴禁餘閒。龍墀偶暇。握槩漱芳藝。寒江岸、寂歷斜陽滿地。風流文采難繼。荒臺瓦礫狐狸嘯。傳是讀書遺址。人去矣。空拂拭、殘碑無字。苔花紫。頽垣漫倚。想建業雲沉。江陵草長。先後盡如此。

霓裳中序第一 水仙

亭亭翠袖薄。裹住仙姿。嬌成削。波上寒稜漠漠。乍翦破楚天。湘雲如濯。思王賦洛。想斷魂、飛去無著。瑤京外、是誰招得。一縷寄冰萼。蕭索。空江雪落。愛弄月、生塵步弱。肌如冰玉。縷琢。笑礬弟梅兄。真態難學。素妝雖淡薄。點粉額、金鈿繡錯。知何日、重逢交甫。始踐佩環約。

月下笛 周清真小雨收塵一調題曰月下笛而與白石玉田諸作迥異今細校之卽瑣窗寒唯換頭處少一字耳片玉集中暗柳啼雅詞可按也疑是瑣窗寒別名非月下笛本調旣用之以賦落梅復附鄙見於此俟知音辨焉

徑貼遺鈿。階沾墜粉。一春淒切。羅浮夢轉。翠羽聲聲啼徹。惜殘英、空復戀枝。曉風幾陣吹作雪。使湘簾不捲。文窗虛對。舊時明月。樓頭若個。尙裊裊臨風。玉龍吹裂。如綿細語。記得芳時同折。悵春衫、猶染暗香。玉人已是經歲別。繫相思、繞徧疏籬萬匝。誰共說。

暗香 憶胸浦梅花

玉姿皎潔。記舊時共賞。春痕初洩。惜取暗香。不忍盈盈遽攀折。海上何來此種。多應是、孤山冰雪。徙倚際、耿耿娟娟。相對互愁絕。淒切。照明月。奈玉笛數聲。促起離別。素心暗結。猶記低低向花說。清夢從今漸遠。寧便許、青禽啼徹。想伴侶、何處覓。此君亮節。

疏影

春光漠漠。想別來已久。誰護香尊。瘦草封階。脩竹欹門。應嫌翠袖寒薄。東風若肯常
爲主。莫便把、紅英吹落。待趙郎、打疊吟懷。樹底再尋芳約。深悔無田十畝。忍將此
素質。拋置林壑。綠葉成陰。青子垂珠。祇怕重來蕭索。他時倘得花如舊。酌酒向、青皇
深酌。任廣平、鐵石心腸。也只此情難卻。

惜餘春慢 落花

錦障圍春。繡鈴驚曉。無限劇憐深護。禁風欲笑。受露還慵。恰恰翠嬌紅嫵。爭信啼鴉
數聲。下得無情。送教歸去。念芳心一點。也知相戀。奈難爲主。凝望眼、隻雁何來。雙
魚空託。撲簌一簾愁雨。衣沾賸粉。袖染殘香。總是繫人心處。莫向東風斷腸。綠葉陰
陰。低回無語。擬春來重訪。穠華仍在。彩鸞休誤。

雪獅兒 詠犬

重環繫著。愛搖尾、騰擲香階。依人馴擾。取次砧邊。竊肉憎他貪飽。寒村返照。點綴處、

吹聲如豹。倦更向、花陰柳隙。閒眠芳草。迢遞東門大道。逐狨鞞錦勒。月題霜爪。搦兔爭先。後日恐遭烹了。如何渠好。深夜護、雙扉幽悄。頻頻繞。莫使俗人輕到。

念奴嬌 秋思

新寒驚幙。動羈人離緒。頓起長歎。飛盡蘆花秋又老。別懷不與俱拚。素簡裁成。紅箋封就。無處覓鸞翰。那堪江上。萬重烟樹迷漫。空有匣底瑤琴。囊中錦瑟。古調向誰彈。回首同心分袂後。賞心自此應難。夢怯江攔。情隨天遠。迢遞水雲間。蕪城明月倚樓何日同看。

夢芙蓉

此夢窗甲藁題尹梅津所藏趙昌芙蓉圖自度曲也調極幽咽竹垞

樊榭嘗用之而萬氏詞律失載己亥九月真州江上見紅葉遂以此調譜焉
纔驚秋荏苒。望楓林濃處。錦屏爭豔。遙山弄碧。青女黛蛾斂。淡妝應久厭。紺裙紅袖。新染。馭靄驂霞。漸珊瑚欲下。旋被絳雲掩。波定江光潏灩。幾許秋容。穩把嬌春占。渾疑畫裏疏處。露茅店。亂鴉千萬點。夕陽天外遙閃。屬付西風。擬乘流寫怨。須向綺

窗颭。

八歸 秋柳

疏枝漏月。空條含雨。江上又早秋色。長汀寂寞誰相伴。惟有蓼花初紫。荻花全白。澹影依然搖曳處。竟未許、鶯兒藏得。任滿目、細草輕波。總不是、嬌碧。猶有閒情載酒。停橈相傍。似把春光重覓。瘦梅纖骨。小桃香靨。此際都無消息。見宮腰正舞。水畔何人弄長笛。休生恨、可能禁否。幾陣西風。寒林同寂歷。

摸魚兒 春蔬

暖絲絲、嫩冰融盡。朝來初過疏雨。東風幾陣春泥透。濃綠亂堆沙渚。誰摘取。算只有、盈盈陌上攜筐婦。連根爛煮。羨軟玉流匙。清香沁盃。風味淡如許。山廚下、不用園官送與。荒畦佳品無數。吟朋有興來相過。供給咄嗟能具。同笑語。佐粗糲盤餐。儘可成歡聚。磁盃共舉。笑勸客駝羹。腥人鯨膾。空作老饕賦。

醜奴兒 曉起

朝來漸覺春寒減。雲散檐牙。日上窗紗。起汲新泉自煮茶。門無屐齒蒼苔滿。淡處紛華。閒裏生涯。細數庭前未放花。

踏莎行 讀花外集即用碧山題草窗詞卷韻

積玉敲聲兼金鑄調。除將樂笑齊驅少。一從花外翠簾空。天涯處處生芳草。梅影深情。蕙香幽抱。於今俊語無人道。孤吟山鬼語秋心。鑒湖霜後芙蓉老。

摸魚兒 趙叟雪篷於市中得歐陽信本書姚恭公碑蠹簡二幀僅二百許字

綜錯成文爲孫讚祖墓誌一首蓋憑虛公子也裝潢成冊持以見示屬製長短句紀之遂賦此解

羨先生、率更書法。零章殘簡親購。天吳紫鳳頻顛倒。拆碎海圖重繡。亡是叟。今爲汝、一篇隧石殷勤構。秋魂未朽。倘此夜鐙前。徘徊瞰室。奠汝一杯酒。文章事。祇要天機在手。何須苦脫窠臼。殘槍半段哥舒用。辟易萬人皆走。君記否。諛墓物、千金徒作劉君壽。何如信口。向廣莫鄉中。虛無境裏。子細說烏有。

滿江紅 鄔覺庵招飲席上以懷其友胡君新詞見示屬余和之爲賦此解
豪士相逢。閒抵掌、芳醪細斟。翻玉露、退紅簾罅。空翠庭陰。云有故人真快士。每攜古
調覓知音。惜春江、昨已送歸橈。無路尋。吟俊語。勞我心。知此日向誰吟。望淮山青
處。一往情深。斯際短章聊刻燭。何時長嘯共開襟。譜相思、一曲和清商。彈素琴。

壽樓春 春憶寄和酌亭

愁青山迢迢。縱相思有夢。難度長宵。那更花飛江館。柳垂溪橋。眠又起。真無聊。笑客
愁、渾如春潮。奈燭外淒涼。尊前冷落。今夜倩誰消。情空遠。途非遙。想雙蛾此際。猶
自含嬌。擬覓松間油壁。水邊蘭橈。春思斷。離魂銷。聽翠樓、誰家吹簫。算何日相逢。瑤
琴共調忘寂寥。

高陽臺 庚子清明日同方竹樓趙雪篷鄔覺庵諸君飲郎鉏月城西園亭

社鼓調鶯。錫簫警燕。清明人在天涯。賴有吟朋。尋芳約到山家。春痕幾日無消息。伴
小紅、潛上桃花。透柴扉、一縷新煙。應是烹茶。相逢競道郊原好。有爭馳繡鞵。疾走

鈿車十丈香塵，惜惜吹滿晴沙。何如小坐維摩室，引翠尊、同酌流霞。醉歸來、微墊烏巾。雨細風斜。是日將歸遇雨。

絳都春 福印庵看牡丹

憐春老去，甚獨訪殿春，親來琳宇。幾疊翠綃，一片紅雲，縈芳緒。霞裳纓絡無重數。更七寶、莊嚴如許。自慚居士，難空結習，漫勞天女。嬌嫵風前，綺麗似浮世富貴，總難憑據。認取妙香，如幻空花，誰能悟。拈來微笑呼禪侶。但相對、含情無語。綠陰他日，平階幾番夜雨。

南浦 新潮和方竹樓

風滿驛樓空。雨絲絲、遠近江聲連曉。猶記去年時，柴門外、驗取舊痕將到。縠紋乍起，望中惟覺前洲小。沙嘴高低吞吐處，已有白鷗飛繞。朝來試覓漁蓑，擬持竿兀坐，臨流垂釣。磐石遍苔花，東風起、須倩綠楊先掃。烟波浩淼，故人曾放春前棹。此際溪頭，雙鯉便迢遞，尺書應早。

疏影 新綠和竹樓

年芳暗惜。賸遠林幾疊。空翠如織。掩映疏煙。遮斷孤村。欲共前峯爭色。蒙茸染得嬌如許。悄莫道、東風無力。怕夜來、冷月橫窗。碎影亂侵簾隙。那更連朝暗雨。望中但一片。春已狼籍。寂寂橋頭。漠漠牆腰。一縷斜陽猶碧。濃陰半壓。生衣重。甚滿地、寒雲堆積。想玉人、此際憑欄。尙覓斷紅消息。

齊天樂 豆棚

廢畦滿地秋陰瘦。疏花亂垂高架。漸挂蠟蛸。潛移蟋蟀。都向茅檐橫亞。磁甌對把。愛香茗初斟。檜條籬下。五五三三。晚涼閒共故人話。幽棲仍有樂事。曉來輕摘。取聊供杯罍。小筴初肥。修藤半老。妝點廚娘聲價。西風暗打。聽無限蕭疏。盡投窗罅。絕勝芭蕉。雨聲連夜灑。

水龍吟 真州送程時齋

二年南北迢迢。清尊又聚。鬢江路。征衫乍拂。相看一笑。離悰休訴。山翠飛箋。荷香侵

硯水亭無暑。趁湘簾、蕩簟織塵不到。重檢點、當時譜。雨後霜毫共舉。按紅牙、細敲新句。聯吟未幾。西風又早。送君南浦。對此茫茫百端交集。重逢何許。漸扁舟欲解。微黃著柳。記分攜處。

解連環 潘氏園看桂花

一林香粟。記前番到處。尙含濃綠。乍樹底、纔度西風。早齊換淡黃。道家裝束。月裏天香。笑人世、無他芬馥。算深憐劇護。貯此阿嬌。祇有金屋。淮南又吟舊曲。悵難招隱士。孤負林麓。漫席地、輕撥湘絲。便金縷歌殘。怎訴幽獨。占斷秋光。似遲暮、佳人空谷。向名園、伴伊對飲。澹然意足。

摸魚兒 雨後江上晚眺

暮天空、乍收涼雨。隔江飛過清冷。烟鬟綽約山容潔。掃得兩蛾幽靚。無限景。縱倩取、鑲冰琢雪。應難詠。斜陽未暝。見別浦殘荷。迴汀折蓼。都作淡紅影。江光遠。蹙起靴紋萬頃。微風恰好初定。盈盈十五吳娃小。笑與碧波相映。嬌妬性。有意要、驚他沙上

鴛鴦醒。青裙半整。便急打蘭橈。空明擊碎。搖過采菱艇。

齊天樂 乞張桂巖寫姜石帚暗香詞意小照

截金鑄作姜郎句。孤飛白雲娟秀。月舊花新。情長夢短。總是銷魂時候。梅邊對酒。愛紫綺斜披。玉龍低奏。試問塵容。可堪移入畫圖否。文窗晴色淡冶。剡藤裁幾幅。閒度清晝。細拭并刀。輕調越粉。比似香詞誰瘦。宵寒坐久。好添取花陰。亂堆吟袖。除卻疏枝。夜深誰是偶。

揚州慢 博士金棕亭先生招同林庾泉吳暮橋金畹芳尺五樓看芍藥花

荷貼波圓。棟搖風碎。繞闌芍藥齊開。坐花天尺五。近閨苑蓬萊。看妝點、芳園麗景。玉盤金帶。紅紫成堆。更圍屏深護。雲根何日移栽。畫船載酒。羨湖山、裙屐頻來。愛郁郁濃香。亭亭豔影。遮映池臺。莫信殿春歸去。多情甚、轉約春回。算端明題後。於今誰繼仙才。

玲瓏四犯 題張竹軒詩卷

赤壁洞簫黃樓橫笛聲聲無此清峻。安希餘子步竊祕中郎本。都從筆端遣盡。卻依然六朝遺韻。捉搦新歌。紆那別調。丰致最相近。方牀雨餘微潤。正荷風細寫桐露。徐引。近來詩派雜。大雅無人問。牛溲鼠腊爭相貴。有誰似先生持論。須忍俊。攜歸向琅邪舊隱。

摸魚兒 題桃溪圖用石帚體

費東君、幾番煙雨。桃花千樹開了。澄溪一帶明於鏡。時有亂紅飛到。人悄悄。倩誰問、年年底事春信早。扁舟趁曉。便燕外窺香。鷗邊覓路。輕泛武陵棹。遙天裏、隱約峯巒合抱。衣沾蒼翠多少。低枝半亞春流上。脈脈向人含笑。情渺渺。想前度、纖肌秀鬢應更好。披圖夢繞。但月鎖山腰。雲封洞口。處處盡芳草。

浣溪沙 白門春望和張平伯

桃樹遮門柳拂隄。春光多在石城西。胭脂井畔曉鶯啼。不見美人青玉案。空聞遊女白銅鞮。畫輪歸去草萋萋。

淡黃柳 同林仲深阮伯元游淨香園

春波溜碧。黃染初三月。買得蘭橈輕且潔。盪破疏煙淨淥。來看牆東數株雪。怕離別。天涯正啼鴉。慢惆悵。遠芳歇。料東風、不比秋騷屑。記取今宵。故人同話。垂柳依依待折。

浣溪沙 諸葛武侯故里

五事虛傳訪軼聞。淒涼綿竹冷斜曛。琅邪名士孰如君。才過曹丕寧十倍。運移漢祚竟三分。故山喬木尙連雲。

霜天曉角 大風同胡眉峯野飲黑窯廠

滿天蕭索。拂面風如削。野肆冒寒沽酒。千古事、共商略。漠漠塵土落。傾杯還對酌。牧豎隔離相笑。應不解、兩人樂。

齊天樂 同汪容甫訪江豫來留飲

泥人金粉雷塘路。依依半城煙柳。俊語雕花。清辭鏤月。比戶鴛鴦爭繡。儒風在否。好

攜取經神。華門偕叩。訓政專家。阿誰吳下。嗣紅豆。欣然相視一笑。便盤餐小酌。同話耆舊。易溯荀虞。書研馬鄭。信有師承傳授。淵源細剖。漸暝色蒼然。月窺虛牖。洗盞重斟。碧筩香到酒。

憶舊游慢 泛舟歷下亭

愛青涵雉堞。綠浸魚樁。小雨初收。點破玻璃影。趁斜陽未晚。喚取蘭舟。練光乍開。塵鏡無限。鵲華秋。笑半日停驂。征衫暫拂。聊與淹溜。風流但陳跡。想玉佩雲山。北海曾遊。寂寞空亭外。賸菰蒲一片。飛下輕鷗。漫尋舊時名士。煙冷白蘋洲。漸老卻芙蓉。花邊仿佛人倚樓。

齊天樂 趵突泉

阿誰謀報中央德。空山鑿成三竅。水欲騰天。泉能拔地。信是神工奇巧。峯巒四繞。看鳴玉跳珠。匯成清沼。涌若車輪。措辭唯有酈元妙。鍾離祠宇競葺。二堂存廢址。無與菟討。碧榭棲鸞。丹臺控鶴。總學方壺圓嶠。仙蹤半杳。算霞外孤情。幾人舒嘯。擬拂

虹竿翠瀾深處好。

臨江仙 乙巳三月十八日偕張桂巖胡樹思牛次原觀京城諸伶賽會
幾陣廉纖春夜雨。西山洗出修眉。曉晴沙路馬行遲。薔薇將謝後。芍藥半開時。 角
觥天街陳百戲。靈風吹滿華蕤。巴童也自效吳兒。旗亭今夕酒。知唱阿誰詞。

霜天曉角 丙午六月二日晚涼偕張鄂樓牛次原閒步陶然亭遇雨

暮天岑寂。遠岫涼煙暮。曲榭凭欄閒話。聽細雨、響蘆荻。 浙瀝池上滴。芙蓉舒紫葯。
觸起故山情思。風柳外、數聲笛。

摸魚兒 萬華亭招同陸以寧張桂巖葛菱溪唐柘田汪繡谷小飲寓齋醉後

作

笑吾曹、挾書燕市。青袍終日塵擁。殘盃冷炙酸辛極。幾見翠筵炮鳳。俱蟻蠓。算只有、
簾前春色千金重。豪情乍湧。似渴驥奔泉。長鯨吸海。今日酒徒共。 天涯會。都是荆
高伯仲。簷花深夜風動。消磨諛慕囊中物。買得杜康盈甕。誰賈董。使瑣瑣虛名。身後

知何用。鷓鴣互捧。任蕭寺鐘鳴。譙樓鼓歇。不醒醉鄉夢。

眉嫵 同章實齋武虛谷小飲朱少白未之思軒時予與少白新下第也

正窗蕉敲雨。徑菊搗霜。同坐翠陰下。不敢吟歸燕。貂裘敝。茫茫羈緒難寫。晉甄漢瓦。笑近來、齊耀聲價。幾曾具、鐵網珊瑚識。漫評議真假。壁上懸漢瓦拓本甚多 休訝

頻傾芳翠。便校成七略。何似三雅。舊日湔裙伴。青雲外、聯翩鸞背高駕。大詔快馬。憶少年、還共馳射。算金線輕拋。蓬戶底爲誰嫁。是科朋輩如萬華亭方茶山張鄂樓胡

樹思翁石峯唐栢田牛次原孫淵如阮伯元南北榜皆中式

祝英臺近 丙午下第南歸覓章酌亭遺稿不得誌悼

玉成塵。花作雪。魂逐亂雲去。燈黯書幃。綺語向何處。料應天上飛瓊。慵聽舊曲。竊歸作、瑤宮笙譜。已千古。嘔出昌谷心肝。飄零錦囊句。七寶樓臺。尋徧絳霄路。異時誰輯遺聞。英光再見。好編入、胸陽流寓。

解語花 雨後舟中望廬山瀑布

高梁瀉月。疊嶂穿煙。初換潯陽柁。九仙招我。乘蒼翠。雨後素霓交墮。江光澹沲。玉叢裏。匡君端坐。疑半天。吹落銀河。界得青山破。雲外浮嵐靜鎖。擬香鑪峯側。依樹閒臥。彩鸞飛過。登臨約。躡屩甚時方可。芙蓉萬朵。掛冰縷。織塵難浣。圖畫中。遙送微吟。都共誰酬和。

八聲甘州 滕王閣

瞰空江。傑閣與雲平。秋風送微波。想圖中雙蝶。霞邊孤鶩。古意良多。指點西山山色。依舊翠於螺。苔蘚殘碑蝕。誰與摩挲。健筆昌黎作記。附三王名後。此語非阿。笑兒曹輕薄。何苦廢江河。挂高帆。乘槎萬里。尙未知。風信竟如何。憑欄望。擊珊瑚玦。釀酒長歌。

一萼紅 覃溪師試南昌畢。讌客百花洲。侍坐卽事。

泛輕舟。值衡文偶暇。賓讌百花洲。旣屏笙歌。仍稀儻從。圖史聊佐觥籌。指雲際。匡廬秀色。羨宗匠。深坐玉壺秋。翡翠蘭苕。珊瑚碧樹。入網都收。細數西江詩派。問涪翁

去。又誰別源流。天社編年。青神著錄。雙井高躅猶留。聽揮塵、清談未已。晚涼後、乘月更登樓。試與題名選石。共紀茲游。

高陽臺

蔣修隅招同吳蘭雪飲藏園兼晤其令弟秋竹孝廉

竹翠敲涼。荷香淨暑。風來水榭無塵。舊雨開筵。招邀盡是畸人。君家兄弟如龍虎。酒半酣、笑語生春。客中身、劇飲淋漓。誰主誰賓。十年細讀藏園曲。儘移宮換羽。挹徧清新。接席何由。雲端悵望驂麟。須眉展拜疑相識。向畫圖、凝想前因。是日拜心餘。先生遺像。拂征輪、記取洪都小駐兼旬。

齊天樂

謝蘊山先生招同胡維君小飲蘇潭上并示西魏書凡例

夜涼翦燭蘇潭上。千秋是非同究。殺癩騰天。焦梨齧索。曲直於今誰剖。流傳既久。算驚蝶雄才。尙存紕繆。帝紀尊西。幾人能繼彥深後。談餘還檢舊稿。發凡矜且慎。高論希有。太素遺編。行沖軼簡。可惜飄零難購。風窗對酒。笑褒貶紛紛。見聞都陋。異日書成。玉堂勞大手。

渡江雲 漢口旅舍題壁

樓高黃鶴遠。扁舟小泊。南望武昌城。四更山吐月。客夢初回。浩浩大江聲。疏燈照夜。激秋風。雄劍龍鳴。傾數杯。寂寥村酒。難遣旅中情。休驚。烏林赤壁。紫蓋黃旗。付辭人題詠。銷不盡。曹興劉蹶。魏戰吳爭。青山如故。周郎去。算後來。誰是豪英。眠未穩。依然枕上詩成。

念奴嬌 汝寧懷古

戍樓吹角。正西風驅馬。孤城橫路。控引長淮形勢在。云是南朝懸瓠。浴鐵成羣。鳴笳結隊。都作沙場土。秋花開徧。鬪髀相視無語。奚況標榜虛聲。牛醫馬磨。瑣瑣誰憑據。賸有姦雄居亂世。此論差能千古。唐代強藩。金源毅魄。留得閒詩句。停鞭遐想。葛陂何日龍去。

卜算子 吹臺

騎馬汴城東。老樹秋風撼。寂寞梁王賸廢臺。滿地斜陽淡。浩浩走驚沙。解轡還登

覽。不見當年阮嗣宗。遠寺來清梵。

戀繡衾 大梁元夜

梁園風細度玉簫。颭春燈、梅蕊亂飄。漸隱約、歌聲動、晃銀花、樓上翠翹。湘簾半下紅窗暖。喜同心、樽酒夜邀。說不盡、喁喁語、惹天涯、芳草夢遙。

齊天樂 同方子雲洪稚存徐朗齋陳覲光遊鐵塔寺聽寺僧彈琴

晴空遙見浮屠立。高低繚垣遮護。紺色凝霄。青光照晚。疑有神工陶鑄。荒寒殿宇。看鷓尾斜陽。半縈煙樹。寂歷高天。一鈴風外學人語。離披蒿艾滿目。綠痕沿斷砌。同散幽步。乍響疏鐘。初通曲徑。仿佛禪扉微露。僧枯地古。恰茶話依依。又添新句。後約重來。瘦桐休再鼓。覲光最惡琴。聞人言琴必大詬之。

琵琶仙 懷次原

生怕秋來。便牽動、旅思重重難釋。何意纔送。西風新寒更驚客。空折了、疏梅一樹。奈無數、水程山驛。酒淺紅深。衣寒翠暖。誰共瑤席。夢魂遠、同此離愁。恨車馬勞勞困。

行役須倩曉雲扶起。向長安花陌。猶記取香詞似錦。詠漢陂。翦破嬌碧。好句都說相思。倍憐標格。

摸魚兒

戊申秋過湯陰不及訪圭塘遺址卽次圭塘欸乃集摸魚子韻又集

中此調起處皆用量无咎買陂塘旋栽楊柳成句今亦仍之

買陂塘。旋栽楊柳。生平多少經務。巍然至正文章伯。也算濟時霖雨。吟北渚。料魏闕關心。不比梅花嶼。憑誰寄語。便黃閣三登。烏臺再入。商略竟何趣。歸來後。漫幸君恩見許。青雲將次干呂。乾坤俯仰兵戈滿。愁讀黍離章句。傾秫醕。共難弟嘉賓。小緝田家譜。行人眺古。悵馬跡匆匆。雞聲喔喔。何處問荒圃。

鷓鴣天

磁州道中荷花盛開

六月驅車暑未徂。潞陽風景勝三吳。宜人山似佳圖畫。稱意花如美丈夫。雲壁絮。雨跳珠。紅情綠意兩相扶。環城野水菰蒲長。曾有鴛鴦作隊無。

高陽臺 望蘇門山

黛影分螺。嵐光撲馬。雲邊秀色深深。一朵芙蓉。隨煙捧出疏林。何人脫屣蒼霞外。聽
半天、吹下鸞音。想如今、公和去後。冷落登臨。區區典午當塗際。笑英雄豎子。都付
閒吟。抗手羣仙。卑他阮嘯嵇琴。青山不挽征夫駕。悵古歡、無路追尋。滌塵襟、空餘澗
壑。似寫遐心。

瑞鶴仙 光武廟

六龍方鬪野。發突騎、漁陽邯鄲初駕。滹沱賴王霸。記蕪婁亭側。燎衣邨舍。中原未下。
不遑問、公孫躍馬。築雲臺、天上星辰。盡入中興圖畫。休訝。赤符膺瑞。白水徵祥。半
成虛話。雄風逝也。千載後。孰真假。但秋原古廟。椎牛醢酒。父老年年賽社。讓桐江、一
叟披裘。釣竿自把。

好事近 正定道中小飲

秣馬鎮州城。城外荷花無數。解轡柳陰沽酒。看鷓鴣飛去。太行天矯控中原。形勢
自千古。莫問前朝興廢。有青山如故。

祝英臺近 牛次原招同孫淵如胡樹思阮伯元小飲秋影山房

雪初情。簾乍捲。新月照杯酒。吳笳齊鹽。花下聚良友。趁他寒夜沈沈。論文看劍。且休問。巖城更漏。半酣後。驗取春意潛迴。疏梅已如豆。一曲清歌。底用倩紅袖。相將鑄古陶今。唾壺敲缺。儘重酌。蒲桃盈斗。

滿庭芳 晏城曉發

斜月如眉。明星似李。栗栗霜壓征驂。撲衣濃翠。都是曉山嵐。高影離披滿地。知夾道、官柳毵毵。凝眸處、微茫雉堞。猶在亂雅南。休耽京洛夢。同心乍遠。無限情含。早宵輪晨鐸。風味重譜。十載勞薪苦矣。思諫果。何日回甘。全輸卻。枯僧擁絮。燈火閉茅菴。

戚氏 端午日遊寶障湖

木蘭艤。衝波搖過翠雲砭。碧艾懸檐。絳榴堆几。俗敦厖。淙淙水流瀧。離騷吟罷憶南邦。靈均毅魄安在。佩芳人遠。汨羅江。雲外何處。笙歌鼎沸。更饒金鼓齊撻。漸衣香鬢影。柔櫓伊軋。都近船窗。荆楚國士無雙。忠諫大節。直可配龍逢。神弦急。乍調郢曲。

又犯吳腔。思難降。健筆萬石誰扛。且倒綠酒盈缸。線纏角黍。飯裹圓荷。湖上應薦蘼
茫。競看穿簾燕。攪浮水鴨。逐吠花龍。水戲今年最盛。赤金刀。厭虎更緣幢。雕題繡
額。效叩駝。隔牆仕女。嬌語喧深巷。且趁閒。迴棹依花港。早斜照。蕭寺鐘撞。傍華屏。蟹
斷魚椿。那人家。不亞鹿門龐。向歸途望。沿城繡閣。盡爇銀釭。

法曲獻仙音 揚州送葛菱溪

隋苑經過。廣陵留滯。幾日欣同吟硯。燕啄晴泥。蝶飛芳草。匆匆又看春餞。恰正是。前
遊處。桃花映人面。爲誰戀。聽驪歌。數聲催發。微醉後。還取碧箋重展。柳外綠波平。
渺吳天。舟共人遠。落照孤帆。尙依稀。隔浦望見。悵離情千疊。那得并刀頻翦。

惜紅衣 同方又輝喬樗友葉英多飲李艾塘處

煮酒方濃。烹鮮正熟。共來茅屋。驟雨敲荷。聲聲瀉寒玉。風微晝永。揮瘦塵。清談驚俗。
幽獨。三徑冷香。散閒庭花竹。高吟遠矚。簾捲黃昏。苔痕上階綠。菟奇選勝。未足更
然燭。十里畫船煙柳。軼事幾人能錄。待異書成後。秋樹借儂披讀。

念奴嬌 汪晉藩招同焦里堂小飲酒肆

堞雲深處。見青帘偃蹇，籬端飄出。試拓南窗招客坐，恰好煙疏風密。竹几無塵，花盃有酒，大可開緗帙。芰荷香送，賴君消此長日。自是吾輩疏狂，當壚眠審，傭保何妨。匹作賦論兵，俱逝水。樓上休彈瑤瑟。夜月三分，春風十里，往事猶能述。半酣歸去，碧桐涼沁吟筆。

摸魚兒 題汪損之家慶圖

護茅檐、枳花籬落，雙扉深掩清晝。拂雲千尺靈椿古，回映北堂護茂。還見否。有繞砌芝蘭，郁郁臨風秀。閒庭坐久，看雞哺鴉兒，童闕雉子，佳瑞更誰有。披圖處，想見君心孝友。紛華羞與相遘。嶺梅旖旎江籬薄，何況滿蹊桃柳。營半畝，待荷耒江鄉，共作歸耕耦。蒔花釀酒，願慈竹平安，貞松健在，長此介麋壽。

一翦梅 晚泊燕子磯

百尺危樓俯瞰江。山旣崆峒。水又春撞。閒吹玉笛不成腔。風顫銀釭。月浸篷窗。愁

見牙檣燕一雙。詩筆休扛。酒盞難降。無端驚起隔花厖。船鼓逢逢。心事椿椿。

高陽臺 同黃秋平焦里堂雨花臺觀劇

慷慨秦歌。婆娑楚舞。神前擊筑彈箏。尙有遺規。勝他吳下新聲。無端委巷談今古。混是非、底用譏評。鬱藍生、雜劇流傳。體例分明。挺齋不作東籬去。算青藤玉茗風氣。初更。輾轉相師。可憐僞體爭鳴。何人禮失求諸野。悵碧天、無限遙情。暮雲輕。曲散人歸。月上高城。

水調歌頭

詞須擇調如四字沁園春五字水調歌頭七字鷓鴣天步蟾宮皆

玉田金淵所訶者秋日登石頭城眺遠偶製此闋方家幸勿以未能免俗見誚也

天塹本天險。形勢控三州。一時多少豪傑。分付水東流。不見沈江鐵鎖。但見沈沙鐵戟。六代總浮漚。古堞土花碧。山鬼晝登樓。霞散綺。濤湧雪。黯生愁。江山勝處。應有裙屐少年遊。已把齊竽吹裂。又把秦箏撥斷。重復看吳鉤。細數石城事。殘壘荻蘆秋。

蘭陵王 臺城懷古

抱秋麓。隱隱荒城送目。斜陽遠、波映女牆。寒浦縈迴鷺爭浴。迢然古意足。誰續。南朝舊錄。僧樓外、憑弔故宮。六代君臣此鳴玉。淒涼半樵牧。慨老去蕭郎。貽恨空谷。金甌一擲成殘局。算白馬如練。紫雲如蓋。妖祥前後類轉轂。笑多事蠻觸。蕉鹿。競馳逐。暗屈指千年興廢何速。黃塵莫唱當時曲。怕擊碎秦缶。按殘燕筑。雄圖都盡。但細草到處綠。

小重山令 高坐寺

寶月金容絡暗塵。琉璃青黥。照前因。老松歲久漸通神。孤雲外。曾見六朝人。階下野狐馴。空山留故穴。幻中身。天風颯颯嘯荆榛。疏鐘寂。花雨滿苔茵。

摸魚兒 阻風燕子磯晤史望之小飲舟中

訝朝來、石郵方急。驚沙終日吹面。餘皇萬斛連檣泊。何況小舟如燕。情正倦。喜此際、吟朋恰向津亭見。煙蒲乍捲。更指點寒林。徘徊古岸。靜挹翠微遠。篷窗底、相對村

醪酌徧。堆盤銀鱸香軟。吳雲漠漠還西望。目送去帆千片。何足羨。笑世事環生頃刻。陰晴變。羈懷共遣。待詰旦開頭。長江直下。趁取好風便。

齊天樂

邵二雲先生招同談星符牛次原兩孝廉魯習之王晚馨兩同年小

集

先生箋釋蟲魚倦。乘閒偶招畸士。竹牖煙疏。桐階日朗。無限西山晴翠。清言未已。便諸謔軒渠。亦徵經史。更啓名山。酒邊商略宋朝事。高齋塵累不到。軟紅同作客。如許幽致。越飯抄雲。吳羹斫玉。都是江鄉風味。花光照几。恰香破盆梅。半含春意。曲曲迴欄。醉餘還共倚。

清波引

泊柳林闌

水隨天遠。聽漁汶、笛聲宛轉。汶流清淺。柳疏翠猶展。夕影送煙雨。映帶芙蓉紅徧。賦情曾寄微波。照秋色、有誰見。高檣大艫。飽帆舉、輕迅似箭。漸迷蒼巘。但雲樹難辨。篷窗數杯酒。恰愛青齊香軟。望裏無限羈愁。醉時都遣。

摸魚兒 過程蘊光幽居

築幽棲。數椽臨水。重重花竹深護。柴扉只許同心到。三徑別通行路。開藥圃。愛面面軒窗。總是看山處。清樽共舉。指北苑烟林。南宮雨岫。宛在畫圖住。徘徊久。自笑天涯倦旅。征衫時拂塵土。燕臺春色梁園雪。都傍馬蹄飛度。須記取。記此日佳游。恰好閒中遇。新詩漫與。向華子岡前。欒家瀨側。細領輞川趣。

側犯 檢書得章酌亭遺札淒然有作

淡煙送碧。綺窗一抹斜陽晚。塵案乍檢得書中故人簡。愁如衛洗馬。懶似嵇中散。無限。猶自覺。離情滿柔翰。空歌宋玉。不見吟魂返。人莫挽。玉樓成。仙路隔雲漢。記得蕭齋。共斟翠瓊。如幻。於今爲誰凝盼。

湘月

宜興萬氏。專以四聲論詞。畏其嚴者多詆之。瀘州先著尤甚。以爲宋詞宮調。必有祕傳。不在乎四聲。今按宋姜夔白石集。滿江紅云。末句無心撲。歌者將

心字融入去聲。方諸音律。徵招云。正宮齊天樂慢。前兩拍是徵調。故足成之。及考徵招起二句。平仄與齊天樂脗合。又宋史樂志載白石大樂議云。七音之協四聲。各有自然之理。王灼碧雞漫志。楊柳枝舊詞起頭。有側字平字之別。然則宋人皆以四聲定宮調。而萬氏之說。與古闇合也。先著妄人。寧足哂乎。余恆謂推步必驗諸天行。律呂必驗諸人聲。淺求之樵歌牧唱。亦有律呂。若舍人聲而別尋所謂宮調者。則雖美言可市。終成郢書燕說而已。今秋舟過荆溪。感而賦此。以酌紅友。卽白石所云念奴嬌。鬲指聲也。按鬲指亦謂之過腔。念奴嬌本大石調。今吹入雙調。故曰過腔。謂以黃鐘商過入夾鐘商也。小舟盪月。正篷窗眺遠。涼夜支枕。罨畫溪光。望不盡。百頃江鷗波浸。斷渚拖煙。高城攔雨。秋意蕭疏甚。樓臺明滅。數株楊柳。低蔭。空想堆絮園中。停尊按拍。製新詞如錦。律比申商。料後世。應有知音題品。花外簾空。山中雲杳。謂中仙樂笑宮調無人審。臨風歌罷。扣舷聊佐清飲。

慶春宮 雪後泛舟孤山

晴意將迴。春痕微透。粉光研上湖光。雙鶴盤空。孤峯聳秀。小亭寒色蒼茫。照波清淺。是何處、疏梅破香。吟花人渺。雪後園林。孰與商量。先生舊隱荒涼。憑眺柴門。酌酒盈觴。短短疏籬。深深曲徑。昔年曾岸華陽。此中佳處。不輸似、東皋醉鄉。晚來風緊。蘭槳方移。凍合平岡。

醉垂鞭 春日湖上

草色接樓陰。長隄路。搖鞭去。匝地落花深。馬蹄何處尋。無端縈惹動。相思夢。別離心。擁袂盼青禽。唯聞橫笛音。

花心動 葛嶺

空碧玲瓏。傍湖濬。岡巒四圍迴抱。水學佩環。雲想衣裳。人去尙留丹竈。野棠開過春飄泊。井眉上。亂紅誰掃。隔深隴。東風緩遞。數聲幽鳥。抱朴書成送老。回首望銅駝。洛陽難到。阮籍詠懷。郭璞遊仙。都是後先同調。合離風雨羅浮側。笑王馬。其他江表。

問遺蛻、煙霞滿山路杳。

曲遊春 西泠春泛用草窗韻

日暖湖光靜。望淺波凝練。機上新織。白舫青窗。露春痕都傍。柳叢花隙。十里珠簾隔。聽何處、畫樓吹笛。愛遠山、一抹濃嵐。含笑效人眉色。綺陌晴雲弄碧。記前日輕寒。芳信猶勒。攜酒重來。早長隄黛染。短籬霞暝。落絮魚爭食。繫蘭槳。水亭清寂。惹個儂、夢影迷離。有誰認得。

湘江靜 表忠觀

陌上春深歸騎緩。望中原、李花零亂。霜寒一劍。潮迴萬弩。怕誰穿錢眼。不著柘黃衣。擁旄節、開門無患。屏孫納土。明廷報功。猶留得、表忠觀。奠菜羹。攜麥飯。奏神絃。里巫初散。紅妝仕女。青袍父老。指南來新雁。落日霸圖銷。靈旗上、疏風搖晚。英雄逝矣。行人弔古。空摩舊券。

燕蹙風來。鳩呼雨去。融融做出芳時。小約探春。舟輕不遣鷗知。蘭橈劃破浮萍影。啓翠奩。都是琉璃。學蛾眉。幾樹垂楊。次第成絲。沿隄綠鞵紅酣處。見參差金碧。微露叢祠。如此湖山。主持合有靈祇。麗人水畔乘春禊。燕瓣香。同禮花枝。語遲遲。但說團圓。樂莫訴相思。

霓裳中序第一 杭州府志西馬塍有姜白石墓乾隆甲寅冬游湖上尋之未
得及晤鮑君淥飲始知在武林門外約暇時同訪且擬表石於其上各填一
詞紀之未幾余之官宛陵遂不果途中耿耿卽用白石韻賦此解庶他日重
游踐前約也

湖山自秀極。隱隱前游仍記得。探古莫辭倦力。怕情夢易沈。吟魂難索。樓陰樹隙。悵
斷碑。誰問詞客。梅邊月。此番照我。尙作舊時色。寥寂。句昏塵壁。況小徑。疏烟細織。
空濛何處故跡。草綠裙腰。僅見阡陌。話餘空太息。更指點。雙峯送碧。他年約。同尋坏
土。小酌畫船側。草窗作後半闕多一字然此調創自白石宜從之

百字令 阮伯元閣學以重建曝書亭落成再用竹垞圖韻新詞見寄依韻奉

和

小長蘆畔。記烏篷支雨，抽帆曾泊。曝後遺書知在否。寂寞空亭疇託。載酒探幽，研經送老，想像先生樂。風微人往，岸花猶自開落。今日使者南來，衡文訪獻，事事勞參酌。檢點荒煙尋舊址。更蒼桐窗松幕。拓取鷗波。分將鶴俸，負此舟藏壑。新詞遙和，爲君重按宮角。

齊天樂

蒲圻張耘溪登岱見德星巖石上刻其尊人白蓴翁所作銘下馬拜之羅兩峯爲繪岱宗拜石圖同人題者甚衆遂賦此解

向平五嶽游蹤徧。天門雪鴻曾住。碧玉礮成，青霞鏤破，留得驚人奇句。捲風傲雨，算鬼物年年，夜深呵護。令子重來，舊題猶在數峯古。摩挲當日手蹟，夕陽牛礪角，瞻戀難去。竹素頻鈔，氈椎細拓，再拜秋雲深處。鬚眉認取，恰想像圖中，口吟心慕。至性纏絲，老顛休並舉。

又 題孫雨窗公子香稻村莊圖

枳籬短短柴扉靜。高低翠畦環繞。岫擁青來。波扶綠起。都入晴窗憑眺。烏皮晝悄。使時覺檐牙。稻花香到。瘦柳垂陰。夕陽牛背笛聲小。恆農恆士最古。帶經鋤倦後。閒坐芳草。種樹新編。區田舊法。多少生平懷抱。秋成萬寶。愛場圃如京。倚欄吟嘯。指點雲邊。桂香應更好。

補錄

花犯 甲子秋仲宣州官廨春海棠盛開和施雪帆

倚雕欄。嫣然顧影。天寒映羅袖。碧雲方瘦。纔半卷湘簾。疑是春晝。似嫌定惠文章舊。翻新真未有。試悄問、小山僊客。紅妝曾見否。清秋更吟杜秋詩。穠姿睡醒未。宵涼初透。裁蜀錦。何人情。素娥重繡。西風外。暈生笑臉。應不比、朱唇朝帶酒。但祝取、美人長在。黃花同耐久。

上
第

運
彰

柯



詞

張惠言（乾隆二六——嘉慶七）

字皋文。江蘇武進人。乾隆五十二年進士。官翰林院編修。工篆書。嘗奉旨篆太廟列聖御寶。治虞氏易。長於古文辭賦。詞則大雅遒逸。有起衰之功。著有茗柯集。

茗柯詞

武進張惠言舉文

虞美人 胡蝶

斜陽誰遣來花徑。春色三分定。游絲無力繫花腰。忙煞枝頭相送、亂紅飄。
尋春莫向花間去。花外游蜂聚。南園芳草不曾空。收拾春魂、歸去遶香叢。

雙雙燕

滿城社雨。又喚起無家。一年新恨。花輕柳重。隔斷紅樓芳徑。舊壘誰家曾識。更生怕、主人相問。商量多少雕簷。還是差池不定。誰省。去年春靜。直數到今年。絲魂絮影。前身應是一片落紅。賸粉。不住呢喃交訊。又惹得、鶯兒閒聽。輸與池上鴛鴦。日日闌前雙暝。

傳言玉女

多謝東風。吹送故園春色。低晴淺雨。做清明時節。昨夜花影。認得江南新月。一枝枝

漾春魂如雪。卻問東風，怎都來、伴闋寂。繡屏綺陌，有春人濃覓。閒庭閉門，拚鎖一絲愁絕。夢兒無奈，又隨春出。

粉蝶兒 春雨

甚心情還自來。小樓凝望。一絲絲、看他愁樣。軟東風，暫禁着柳花飛颺。卻無端、催着桃花飄蕩。者心情付春雨，繞遍天壤。一絲絲、看儂愁樣。是啼痕染就了。萬重烟障。問江南芳草，可還惆悵。

青門引 上巳

花意催春醒。和雨做成雲性。流杯不敢趁輕陰。游絲一縷，箇是江南影。無端燕子呼殘病。說道春將盡。出門卻看芳草青青，放出垂楊徑。

南歌子 長河修禊

雲重纔尋翠。風輕已試香。桃花好在柳初黃。和着三分飛絮，便輕狂。舊蹟鶯能說，新愁水自長。只須坐石莫流觴。若到三分薄醉，耐斜陽。

水龍吟 瓶中桃花

疏簾不捲東風。一枝留取春心在。劉郎別後。年時雙鬢。青青未改。冷落天涯。淒涼情緒。與花顛顛。趁紅雲一片。扶儂殘夢。飛不到。垂楊外。看取窗前細蕊。釀幽芳。幾多清淚。六曲屏風。一痕愁影。攪來都碎。明月深深。爲花來也。爲人無寐。怕明朝。又是清明。點點看他飛墜。

前調 寒食次計伯英韻

向前還有多春。廿番花信從頭計。西風做冷。東風做暖。桃花都記。守得春三。禁烟時候。雨醞雲醉。怕玉樓深處。游人未見。又一片。拋春外。共說踏青去好。恐看花。爲花凝淚。舊燕不來。新鶯多語。春情誰繫。到晚憑闌。西山見我。相看娥媚。正疏疏簾底。輕陰不醒。蝶兒清寐。

前調 清明次計伯英韻

陌頭試問垂楊。清明多少春人至。芳塵十丈。嬌雲千片。飛來容易。胡蝶須邊。黃蜂翅

底。搓成花味。看昨宵寒重。今朝暖透。春一樣。遊情異。剩有無家燕子。過花期。未收
愁睇。繡戶無蹤。海山何處也。隨花戲。欲向殘紅。殷勤說與。留春無計。只東風不到。重
簾隔斷。游絲天際。

木蘭花慢 楊花

儘飄零盡了。何人解。當花看。正風避重簾。雨迴深幙。雲護輕幡。尋他一春伴侶。只斷
紅、相識夕陽間。未忍無聲委地。將低重又飛還。疏狂情性。算淒涼。耐得到春闌。便
月地和梅。花天伴雪。合稱清寒。收將十分春恨。做一天、愁影繞雲山。看取青青池畔。
淚痕點點凝斑。

水調歌頭五首 春日賦示楊生子掞

東風無一事。裝出萬重花。閒來閱遍花影。惟有月鉤斜。我有江南鐵笛。要倚一枝香
雪。吹澈玉城霞。清影渺難卽。飛絮滿天涯。飄然去。吾與汝。泛雲槎。東皇一笑相語。
芳意在誰家。難道春花開落。更是春風來去。便了卻韶華。花外春來路。芳草不曾遮。

百年復幾許。慷慨一何多。子當爲我擊筑。我爲子高歌。招手海邊鷗鳥。看我胸中雲
夢。薜芥近如何。楚越等閒耳。肝膽有風波。生平事。天付與。且婆娑。幾人塵外相視。
一笑醉顏酡。看到浮雲過了。又恐堂堂歲月。一擲去如梭。勸子且秉燭。爲駐好春過。
疏簾捲春曉。胡蝶忽飛來。游絲飛絮無緒。點點碧雲釵。腸斷江南春思。黏着天涯殘
夢。賸有首重回。銀算且深押。疏影任徘徊。羅帷卷。明月入。似人開。一尊屬月起舞。
流影入誰懷。迎得一鉤月到。送得三更月去。鶯燕不相猜。但莫憑闌久。重露溼蒼苔。
今日非昨日。明日復何如。謁來眞悔何事。不讀十年書。爲問東風吹老。幾度楓江蘭
徑。千里轉平蕪。寂寞斜陽外。渺渺正愁予。千古意。君知否。只斯須。名山料理身後。
也算古人愚。一夜庭前綠遍。三月雨中紅透。天地入吾廬。容易衆芳歇。莫聽子規呼。
長鑱白木柄。劖破一庭寒。三枝二枝生綠。位置小窗前。要使花顏四面。和着草心千
朵。向我十分妍。何必蘭與菊。生意總欣然。曉來風。夜來雨。晚來烟。是他釀就春色。
又斷送流年。便欲誅茅江上。只恐空林衰草。憔悴不堪憐。歌罷且更酌。與子遶花間。

江城子 填張春溪西湖竹枝詞

碧雲無渡碧天沈。是湖心。是儂心。心底湖頭。路斷到如今。郎到斷橋須有路。儂住處。柳如金。南高峯上望郎登。郎愁深。妾愁深。郎若愁時。好向北峯尋。相對峯頭俱化石。雙影在。照清潄。

菩薩蠻

鷓鴣飛上羅襦繡。銀屏春向鴛鴦透。香裊鬢花風。玉釵胡蝶紅。柳絲千種碧。窈窕吳山色。山色正如眉。銷殘春不知。

花非花

花非花。月非月。難得開。容易缺。眉痕鎖夢壓花情。心影當春看月出。

水龍吟 荷花爲子揆賦

西洲一夜溫香。隨風和夢。枝頭住。紅衣翠袖。何人知道。橫塘日暮。一水盈盈。千情脈脈。回頭頻誤。向天涯遠道。相思萬里。便採得。遺誰去。直是尋蓮等蕩。好三春。過卻

佳期無數。多少纏綿。而今看取。苦心如許。煙學愁容。雨偷淚色。芳塵何處。只月明一片。依然省識。淩波微步。

摸魚兒

過天香樓憶同崔格卿舊遊感而賦此

鎮三年看花一度。人生幾回朝暮。歡情容易愁中過。偏是愁人記取。花深處。是往日分紅。瞥翠曾游路。舊時鷗鷺。若問我淒涼。酒徒一散。寂寞委黃土。百年事。休說重來非故。當時感慨何許。尊前萬柄新妝擁。明日亂紅無數。天也誤。怎不許清秋一例。萎風雨。問花無語。但倚盡危闌。斜陽漠漠。獨自下樓去。

相見歡四首

年年負卻花期。過春時。只合安排愁緒送春歸。梅花雪。梨花月。總相思。自是春來不覺去。偏知。

重簾護了窗紗。玉鉤斜。燕子成巢長時趁飛花。秋千倦。銀箏亂。莫看他。簾外游絲落絮。是天涯。

枝頭覓遍殘紅。更無蹤。春在斜陽荒草野花中。溪邊樹。堤間路。幾時逢。昨夜夢魂

飛過小橋東。

新鶯啼過清明。有誰聽。何況朝風夜月杜鵑聲。留春住。催春去。若爲情。擬化一雙

胡蝶抱花醒。

醜奴兒慢二首 見榴花作

柳綿吹盡。樓外舊愁如夢。又鎮日門隨雨閉。簾借烟籠。卻怕凭闌。相思無字問殘紅。新陰綠處。幾時輕逗。芳意千重。玉勒俊遊。從他幽獨。不到山中。況滿地、浮英浪蕊。

還做春容。只有斜陽。年年識得換熏風。春餘心事。憑將杜宇。深訴花工。

綠雲初破。濃點幾枝紅暈。是萬疊相思簇就。深捲愁痕。試問東風。吹來還有舊春魂。杜鵑啼罷。征鴻去盡。芳意誰論。長記那時。美人初見。一樣湘裙。便消受、朱幡深護。已耐南熏。不恨淒涼。爲君幽獨。又傷神。黃梅時候。半天風雨。自倚孤村。

滿庭芳 五月五日泛豐溪

雲暗還開。雨疏才歇。急水新漲潺潺。竹篙輕快。隨意度平灘。樹裏幾家村舍。壺觴暖
笑語闌珊。溪聲外、斜陽一片。無數是青山。鄉關回首處。青繞翠羽。玉管紅檀。悵天
涯十載。舊夢都刪。卻道年華似水。將歸思、又逐驚湍。渾無耐、豐溪千折。不到白雲灣。

木蘭花慢 遊絲同舍弟翰風作

是春魂一縷。銷不盡。又輕飛。看曲曲迴腸。愁儂未了。又待憐伊。東風幾回暗翦。儘纏
綿。未忍斷相思。除有沈煙細裊。閒來情緒還知。家山何處爲春工。容易到天涯。但
牽得春來。何曾繫住。依舊春歸。殘紅更無消息。便從今、休要上花枝。待祝梁間燕子。
銜他深度簾絲。

玉樓春

一春長放秋千靜。風雨和愁都未醒。裙邊餘翠掩重簾。釵上落紅傷晚鏡。朝雲捲
盡雕闌暝。明月還來照孤凭。東風飛過悄無蹤。卻被楊柳送微影。

賀新郎

柳絮飛無力。問東風、天涯吹送。幾時纔歇。一片嬌紅辭花去。看有千番欹側。知多少、
臙脂暗泣。只有愁雲凝不散。做絲絲、淚點還長絕。春到此、亦輕別。去年團扇長相
憶。料新來、尊前難問。舊時明月。溝水東西流到海。便有相逢時節。又只恐、蓬萊路隔。
欲向東君深深訴。怕春歸、從此無消息。屬燕燕、莫頻說。

六醜 薔薇謝後作

便風風雨雨。看眼底、韶光都歇。道春竟歸。春來多少恨。無限凝積。長記尋春早。一枝
紅粉。壓心頭千疊。東君不管春狼籍。落盡桃顚。雕殘杏纈。回頭已無蹤跡。只新叢細
蕊。還賸芳澤。花工拋擲。爲羣芳暗泣。試問春何在。難重憶。東風也解珍惜。向蒼苔
扶起。幾番欹側。低回久、更休相憶。便留得一柔嬌紅獨自。奈他深碧。飄零處、芳意難
滅。有暗香、遶過春前去。梅花識得。

八六子

曲闌東。蕩花一朵。嫣然開向愁中。正淚溼五更寒雨。傭欹一地溫風。可憐似儂。曾

憑幽夢相通。夜月梅邊舊恨。朝雲蘭外輕蹤。但遠徧天涯。有誰寄與西洲春遠。洞庭秋晚。耐他芳意。千絲宛轉。柔情一點玲瓏。況匆匆。蘋波又摧斷紅。

南鄉子

身與白雲輕。飛過千山路未平。窗裏燈光窗外月。微明。遠夢模糊易得醒。已有亂蛩鳴。聽到西風又暗驚。遶屋青荷三萬柄。三更。都作芭蕉送雨聲。

浣溪紗

朝看雲橫暮雨斜。東風一例送年華。舊愁新恨滿天涯。胡蝶一春隨落絮。燕兒終日說飛花。此情何處不堪嗟。

滿庭芳

題方湛厓春堤試馬圖

豐樂溪邊。潛虯山畔。幾年春色留人。玉驄初到。長記撥紅雲。便與桃花曾約。花開處。來定千巡。都相識。一花一態。一日一番春。良辰如夢裏。又教瞥見。玉轡瓊茵。相輕隨暖霧。嬌逐芳塵。只我天涯倦客。故鄉杳。往事難論。空惆悵。西風不管。一夜老江蓠。

青玉案 題蘆溝折柳圖

新安江上山無數。正催送、春帆度。沙市垂楊長記取。荒煙歛岸，斜陽滿樹，箇是逢君處。青門衰柳垂垂暮。折得長條送君去。可憶豐溪堤畔路。波光似雪，花容入霧，三月飛輕絮。

破陣子 擬辛幼安壯士送同年張子白之官甘肅

路到陽關天盡。馬過青海風輕。夜泛蒲萄酬壯士。曉撥琵琶唱徵聲。散衙新句成。畫角聲中秋社。雕旂影裏春耕。高坐春煙三月靜。歸臥淞波半翦清。休論身後名。

浣溪紗 永平道中作

風柳疏疏颭酒旂。夕陽下盡月來時。一般情緒少人知。夢裏鎮長無覓處。曉來何苦又相思。人間天上兩空期。

風流子 出關見桃花

海風吹瘦骨。單衣冷、四月出榆關。看地盡塞垣。驚沙北走。山侵溟渤。疊障東還。人何

在柳柔搖不定。草短綠應難。一樹桃花。向人獨笑。頽垣短短。曲水彎彎。東風知多少。帝城三月暮。芳思都刪。不爲尋春較遠。辜負春闌。念玉容寂寞。更無人處。經他風雨。能幾多番。欲附西來驛使。寄與春看。

水龍吟 夜聞海濤聲

夢魂快趁天風。琅然飛上三山頂。何人喚起。魚龍叫破。一泓杯影。玉府清虛。瓊樓寂歷。高寒誰省。倩浮槎萬里。尋儂歸路。波聲壯。侵山枕。便有成連佳趣。理瑤絲。寫他清冷。夜長無奈。愁深夢淺。不堪重聽。料得明朝。山頭應見。雪昏雲醒。待扶桑淨洗。冲融立馬。看風帆穩。

浣溪紗二首

山氣清人遠。夢蘇海天搖。白轉空虛。馬蹄不礙嶺雲孤。楊柳官橋通碧水。桃花小市賣黃魚。東風未起早陰初。

王氣東來百戰艱。行人指點土花斑。杏山過了又松山。邊馬百年思塞草。征夫雙

淚唱刀鐙。何人回首戰場間。

念奴嬌 贈劉松嵐刺史

東方之美者。有醫巫閭之珣玕琪焉。今錦川文石殆是也。劉松嵐刺史見贈一枚。周圓肉好。作水雲漾月之文。瑩澈可愛。賦此酬之。

海雲一朵。是何人。招入醫閭山骨。千古驚波流不盡。洗出海山明滅。入手秋空。當心夜炯。見此明明月。蓬萊何處。一泓如許澄澈。此地宜着神仙。小山高賦罷。瓊枝親折。我是江東飛來鶴。豈與閒雲相識。出岫無心。平波好住。攬佩還重結。且歌徵角。尊前試扣清越。

高陽臺三首 庚申五月五日作

吾鄉五月競渡。爲江南勝事。不得見者十六年矣。丁巳端午。寓居歙縣。與舍弟翰風及金子彥兄弟泛豐溪。至覆舟山。賦滿庭芳一闋。戊午則在武林。游觀西子湖。己未在京師。看荷花于天香樓。亡生江安甫皆從焉。今年索居遼

海風雨如晦。懷人撫序。悵然感之。

紅杏橋邊。白雲渡口。畫船簫鼓端陽。十六年來。故園事事堪傷。前年此日偏相憶。有沙鷗、招得成行。向豐溪、掠過波聲。划破山光。當時但覺離情遠。倩蠻箋緘恨。苦說他鄉。誰道而今。回頭一樣茫茫。客來都問江南好。問江南、可是瀟湘。怎憑闌、一縷西風。一寸迴腸。

聽雨湖頭。看花日下。兩年多少閒情。一卷離騷。有人和我吟聲。而今往事難追省。淚如絲、不透重扃。把深杯、酬向遺編。易傳玄經。仙人聞說遼東鶴。問歸來、丁令可識。湘靈海闊山高。千年幾許冤魂。傷心欲奏招魂賦。怕夜臺、猿狖還驚。請看他、怨雨悲風。鎖住愁城。

齊天樂 六月聞蛩

西風幸未來庭院。秋心便勞深訴。石井苔深。銅鋪草淺。別有淒涼情緒。流年暗數。甚蛙嘿蟬瘖。任他風雨。多謝殷勤。尊前特與說遲暮。庾郎愁絕如此。便從今夜夜。相

和悲語。吟穩還驚。聲孤易斷。消受一秋涼露。江南夢苦。記雕籠攜來。畫堂門去。快聽
雄鳴。爲君拂衣舞。



激

運



波

調

錢枚（乾隆二六——嘉慶八）

字枚叔。一字實庭。號謝盦。浙江仁和人。嘉慶四年進士。官吏部文選司主事。工詞。以清麗稱。縱酒成疾。卒。年僅四十三。有心齊草堂集。

序

湘江淚竹。滴滴圓紅。洛浦情瀾。鱗鱗皴碧。回腸盪氣。弔夢歌離。爲此辭者。其古之傷
心人歟。卒之急景凋顏。沈憂損壽。梅信明湖。空懷故國。鶻聲孤館。易近斜陽。醉歸一
詞。竟成絕調。少遊已矣。百身何贖哉。嗚呼謝奩。燕市逢君。元亭訪我。共耽慧業。遂託
心盟。長宵把酒。嚼蕊吹華。小閣圍鑪。引商刻羽。唱烏鹽之古調。和黃澹之新聲。笳嘯
遏雲。歌脣銜雨。自謂極題襟之樂。擅倚曲之場。何圖瑤札尙新。而玉棺遽掩。知音長
逝。才子無年。鍛赤水之珠。碎紫山之璧。天高難問。誰能不憤悒者哉。微波一卷。片羽
僅存。品貴陽春。名齊蘭畹。峽雲舊夢。江月前身。繁華乍零。淒涼遠目。疏樹早落。根觸
離襟。調逸千秋。情深一往。世有解人。斯足傳矣。寒燈欲燼。雪影如波。搦管無悰。紙窮
墨燥。洵瀾者久之。嘉慶九年二月二日。金匱愚弟楊芳燦書於夫容山館。

自序

僕雖非察士。頗以思慮爲勞。未到中年。已多哀樂之感。承閒筵乏。援筆卽書。每覽詞

曲諸家聲調迭起。輒謂情之所鍾。言各有當。服姑蓂之草。自然生媚。約九拜之珥。亦足寫哀。是以西崑一集。妙擅無題。南唐諸作。偏工小令。蓋有用意尙巧。以少爲貴者焉。每一閒寫。卽效其格。抑揚其調。浩唐其心。侘僚所託。蓋可知矣。嗟乎。一身之內。曠有迴腸。頻年以來。居然落魄。酒人已去。空留舊日衫痕。春夢能來。未到黃昏時候。思夫君兮不見。託微波以通辭。好儷壽之音者。將毋以詭赴爲譏。嗜哈喇之肉者。或不以味少見棄乎。謝盍自識。

微波詞

仁和錢枚謝盒

憶王孫

短長亭子短長橋。橋外垂楊一萬條。那回臨別兩魂銷。恨迢迢。雙槳春風打暮潮。

望江南

侵曉起。莫過畫廊西。牆角未開花一桁。梁閒卻有燕雙棲。生怕浣春泥。殘夢怯。月下枕函低。花影一窗無覓處。東風吹過翠簾西。已唱汝南雞。愁望遠。清淚溼羅衣。春事催完蝴蝶懶。楊花開瘦鯉魚肥。游子未成歸。深院裏。獨自坐縫衣。舊夢易迷三里霧。新愁分付九張機。眉語認依稀。

更漏子

夜寒時。人倦後。閣裏重新溫酒。屏風上。畫成行。一雙金鳳凰。拋紅豆。捎羅袖。鎮有閒情消受。何須記。自難忘。多燒心字香。

浣谿沙

年時畏見好時光。疏雨催開花半牆。許多蝴蝶下迴廊。人又不來春又去。凭欄獨自著思量。料誰說與但回腸。

蝶戀花 詠藕

一握彎環西子臂。暖玉玲瓏。薄切春冰碎。人在碧闌干畔倚。教儂親手風前遞。記上蓮舟浮淥水。郎面蓮花。妾意蓮蓬子。誰解纏絲心上事。個中別有柔絲繫。

臨江仙 嘲楊花

和雨和煙飛不定。送迎常在郵亭。何緣看得別離輕。人間多此恨。花裏最無情。一陣棟花風起處。曝衣人最心驚。問伊何苦化浮萍。幾多輕薄意。飄泊到來生。

風蝶令 促織

夜簟涼初起。秋衾夢未成。不堪聽得兩三聲。何況淒淒切切。到天明。暖閣人團坐。金盆門有名。愁人一個自關情。若問華堂風月。那心驚。

望江南

來去處。相近碧窗紗。淺撥風爐溫卯酒。半開羅幔遞春茶。香沁碧桃花。
臨別去。無語淚空流。一寸縷金裙帶子。替卿能寫幾多愁。心事太悠悠。

風蝶令

好夢難重作。春愁又一年。東風吹起夜窗眠。依舊初三月子、不曾圓。
曉霧凝香溼。游絲惹恨牽。桃花開近翠簾前。花外一重涼雨、一重煙。

浣谿沙

寄內

征鴻南下水東流。早晚行人過兗州。客中難得寄書郵。一枕輕寒千里夢。兩邊明月十分愁。不眠同在五更頭。
慵妝倭髻不勝釵。自嫁黔婁白事乖。閒愁好是強安排。鶯最有心驚別夢。風偏無力卷春懷。莫將病眼盼天涯。

蝶戀花

題家筠友春風憶舊圖

萬條金縷和煙種。似起如眠。綠到春無縫。可奈長條迎又送。天涯誰繫青絲鞵。他鄉聽斷江城弄。人似楊花。愁比楊花重。一種晚風吹不動。淒涼十五年前夢。

清平樂

斜風細雨。總是銷魂處。儂自留人留不住。好夢幾時重作。天涯芳草悠悠。垂楊影裏登樓。望盡去帆千片。更無一個歸舟。

浣谿沙

記夢

春風吹夢引閒情。夢裏從他過一生。最無能耐是雞聲。人爲傷心纔學佛。花如解語定憐卿。一番閒話記分明。

采桑子

尋思花月追歡地。枉自心驚。數遍深更。閒步中亭看曉星。佛前悄地拈香祝。懺悔來生。不要聰明。到底情癡懺不成。

浪淘沙

香霧溼花枝。月上遲遲。籠燈說與醉人知。酒後須教添半臂。怕有風吹。好夢不多時。花事迷離。春陰閣住海棠絲。一陣淒涼心上過。獨自尋思。月影上紅樓。挂起簾鉤。尊前重唱小梁州。叵耐三更銀燭淚。先替人流。往事夢悠悠。獨自凝眸。肯來相伴是春愁。別有一般消遣處。閣在心頭。往事夢悠

柳梢青

半醉情腸。懊儂天氣。獨坐西樓。往事空尋。人間天上。眼底心頭。黃昏放下簾鉤。又微雨、聲聲送秋。荷葉芭蕉。兩邊憔悴。一樣清愁。

鵲橋仙

酸風漸緊。月輪微直。記得那回元夜。小鬟低語勸深杯。拚醉倒、玉梅花下。十年前事。最關心處。重到舊時亭榭。空留卍字曲欄干。祇少個、凭欄人也。

洞仙歌 病中聞梅花開到九分

春陰五日。最關心花事。花信知他欲開未。奈一重紙帳。先逗輕寒。人病了、鎮日懨懨

濃睡。侍兒私語處。聽說南枝。瘦影玲瓏不禁倚。惆悵祝東風。著意輕憐。須喚取、蝶蜂迴避。第一是、留他一分兒也。莫爲春愁似儂蕉萃。

青玉案

無端想著銷魂處。挑逗起、閒情緒。心字香曾燒一炷。意中人遠，酒邊愁近。天上春風去。城頭已打紉如鼓。病眼惺忪倦如許。斷夢原來留不住。半牀涼月。一階涼葉。滿地涼蟲語。

洞仙歌

題袁大蘭邨通南園春夢圖

困人天氣。又落紅成片。不是東風不留戀。奈子規聲緊。抵死催春。春年了、花也被他啼倦。最難排解處。花落春歸。好盼明年再相見。偏是夢無憑。夢裏相逢。還不是、舊時人面。悔不學、楊花化浮萍。看點點圓波。不曾分散。

鵲橋仙

七夕出門將至上谷

雁聲何處。遂聲何處。攪得愁心難歇。雙星心事太怱怱。原不管、世閒離別。辭家也

慣長行也慣。只有依人難說。西風瘦馬佛狸城。可許我自家憐惜。

醉春風 江上

無限江山興。杯酒無人贈。一雙倦眼看金焦。醒醒飯也無味。茶也無味。睡也知難穩。獨自扁舟悶。獨自深宵冷。西風老雁叫荒江。聽聽聽。二更潮長。五更潮落。侵曉開船定。

水調歌頭 寄題叔美七弟騎象百蠻圖

壯思忽而動。騎象入羣蠻。瘴雲衣上如墨。細點鷓鴣班。聊復科頭赤脚。且喫檳榔蒟醬。快活勝麤官。歸興卻難遣。夜夜唱刀環。悵年來君絕徼。我邊關。西風朔雪千里。瘦馬自衝寒。飄泊天涯書劍。回首故園兄弟。清淚各潺湲。何日共攜手。穩臥越中山。

臺城路 贈軍臺戍客

征人各樣思家夢。虧他秋月來照。綠鬢華年。白頭病骨。都是淒涼同調。霜天漸曉。又哀角催眠。酸風敲帽。冷清清。一羣人影帳前繞。繁華過來草草。悵親朋都散。僮

僕先飽。眼淚成冰。料難洗面。纔信在家貧好。君休懊惱。判歸骨家園也。還易到。那更酸心。玉關人已老。

鵲橋仙 自白下回武林舟中寄蘭邨

見時無語。別時無語。過後思量千徧。人生若不苦相思。又何用、天生魚雁。青山向暮。白雲無盡。卻好激江如練。阿誰喚起石尤風。驀地、把峭帆吹轉。

臨江仙 寄懷嚴六小秋雋生

九十日春將盡。一千里路相思。江南客到落花時。殷勤開短札。懊惱寫新詞。聞說故鄉難住。更添愁緒如絲。一番惆悵一番癡。行期還未定。先要問歸期。

江南憶 寄懷蘭邨

江南憶。最憶好園扉。船趁風前行。客到蓮花橋畔。酒人歸。情話兩依依。江南憶。翦燭坐更闌。捉搦偷開金了鳥。更衣共凭玉欄干。臨睡又盤桓。江南憶。歡喜結同盟。近水花枝評甲乙。罵人酒令賭聰明。團坐笑顏生。

江南憶。頻夕置深杯。酒熟巧催生客去。魚跳卻上小船來。顛笑忽如雷。
江南憶。丁字水簾前。孫楚樓開頻喚酒。謝孃家近嬾迴船。情思各纏綿。
江南憶。蕉萃望天涯。游興淺於缸面酒。春愁濃過雨前茶。夢卽到君家。

望梅 婁江市上糖梅味極甘脆名風雨梅亡室最善作之今夏有以此梅見
寄者感賦此闕

江城夏五。正梅肥時候。風風雨雨。記窗前。一樹青青。早分付園丁。傾筐摘取。親手搓
挲。更方法。從頭說與。青錢細簸。白蜜生醃。紅菱封貯。追思十年前事。悵綠幺絃斷。
翠籛香炷。又江南。節物登盤。問舊時滋味。何嘗如許。春夢銷沈。訪嫩綠。池塘何處。賸
微酸一點。常在心頭留住。

百字令

皖城吳茶坪云。前明嘉靖時。吳某家素豪富。所居果園。廣營聲伎。有瑣瑣孃
者。色藝冠絕一時。旣病夭。主人痛惜之。卽葬於園中牡丹臺畔。園後歸於茶

坪令祖客有寓園中者。猶於月夜髣髴見瑣瑣微步花下。賦此紀異。
百年池館。問舞衫歌扇。飄零何處。只有春愁銷不盡。分付牡丹留住。燕子重來。雕欄已換。寂寞尋黃土。料應紫玉香魂不化煙縷。聞道翠袖翩躚。雲鬢倭髻。時作珊珊步。天上涼蟾明似鏡。仍照舊時眉嫵。絕勝秋孃。釵橫鬢亂。夜唱墳頭雨。一番憑弔。東風搖曳如許。

菩薩蠻 秋閨

溶溶一片桐陰碎。淩波微露驚鴻態。秋影卻平分。眉痕與鬢痕。欄干閒倚徧。小立知他倦。簾卷早涼天。蝶眠人未眠。

瑣窗寒

粵中白蘋花大如盃。何丈春渚自揚州。小玲瓏山館攜歸賦。詞索和

澹影羞煙。低枝怯水。娉婷如許。欲開還未。須待日高亭午。漫催他惺忪倦眼。曉涼難得芳心吐。比蓮花還瘦三分。爭禁一天風露。記到茗谿路。祇瘦蟹蘆汀。冷漚菱浦。柳暉工吟。渾未見者番風趣。羨騷人耐得清愁。綰將一把蠻煙住。怕揚州花。月繁華

合伴半灣枯樹

清平樂 餅梅

銅餅一尺。注水春冰裂。不管三更簾外黑。翦取半枝殘雪。夜闌夢醒空幃。紙窗書本依稀。較量月斜時候。影兒略比花肥。

湘月 嘉興潘湘雲國初名伎也屬意於梁谿潘讓候後竟歸廝養卒悒鬱死

有崑山女史陸芝僊摹其遺像久之零落市中胡秀才眉峯購得之屬賦

玉梅花下有亭亭翠袖。天寒徒倚。命似飛花身似葉。一寸柔腸先死。眉語微傳。臉波欲溼。瘦得春如此。留伊風貌。定煩寫韻仙史。卻遇吳質工愁。畫圖省識。鎮有相憐意。粉斷香銷。渾似夢。笑問干卿何事。名士青衫。美人黃土。各自傷蕉萃。芳魂休悵。逢君已是知己。

柳梢青 題邵四蘭風 廣詮長相思圖

杜牧風懷。崔徽心事。分付春痕。豆蔻梢頭。櫻桃花底。何處重門。天涯獨自黃昏。賸

夢裏香溫酒溫。紅粉飄零。青衫落拓。一樣銷魂。

畫裏真真。風前扣扣。爭奈情何。除自當初。不曾相識。來去由他。

春深夢也成婆。撇

幾處。簾波酒波。六六鴛鴦。雙雙蝴蝶。總是愁魔。

彈指流光。關心舊事。我亦憐卿。無計留人。居然作客。太不聰明。

春風枉自留情。吹

幾處。長亭短亭。一個情儂。今生如此。何況來生。

天上桃花。人間流水。本是參差。裙帶留仙。心香懺佛。春夢醒時。

才人畢竟情癡。似

楊柳。千絲萬絲。浪打浮萍。風扶飛絮。未必相思。

金縷曲 題秦良玉小象

明季西川禍。自秦中飛來天狗。毒流兵火。石砧天生奇女子。賊膽聞風先墮。早料理。巫夔平安。爭奈軍門無將略。念家山。只怕荆襄破。妄男耳。妾之可。蠻中遺象誰傳。播。想沙場。弓刀列隊。指麾高座。一領錦袍。殷戰血。襯得雲鬟婀娜。更飛馬。桃花一朵。展卷英風生颯爽。問題名。愧煞寧南左。軍國恨。尙眉鎖。

又 題黃仲則先生悔存齋詞藁卽用集中贈汪劍潭原韻

太白才奔放。記扁舟、洞庭吹簫。高樓秋望。讀罷金荃新樂府。又見蘇辛身量。細領略、一生惆悵。今日先生埋骨矣。祇春秋、難付秋墳葬。一縷縷、夜飄蕩。才名合在孫淵如、洪稚存上。儘銷磨、閒中滋味。客中情況。書劍飄零、朋舊散、賸得靈光無恙。肯擲向、蓬蒿窮巷。高臥玉樓仙夢穩。有明霞、作枕雲爲帳。天風送、佩聲響。

天仙子 題林小谿繞屋梅花圖

花南雪北訪詩人。未到門時香暗聞。門前翠羽一羣羣。一隻鶴。一窩雲。瘦煞揚州月二分。

賣花聲 從友人乞秋海棠

微雨暗西樓。花事句留。從君分取半庭秋。屬付園丁輕著力。牢護根頭。花韻便盈眸。無限溫柔。問花真個斷腸不。儂做斷腸人已慣。翻替花愁。

湘月 題汪紫珊世泰碧梧山館圖

紙窗棐几。愛秋陰盈寸。隨風飄落。瀟灑閒緜。高士傳。消受神仙清福。滿砌蟲吟。一丸月小。幾片涼雲綠。送來半臂。有人偷覷銀燭。還記去歲扁舟。秣陵江上。悔未尋幽躅。歸向空山愁寂處。料理長鑱黃獨。何日閒身。洗空塵鏡。遠訪雲林屋。琴絲酒棧。樹根把卷同讀。

摸魚兒

芸暉書屋銷寒第一集。招同楊蓉裳。芳燦吳蘭園。自求許八兼。廷誥

袁蘭邨。通楊浣薌。夔生及兒子。廷煊。送邵四蘭風之河閒。盛太守幕。

正長安。酒人歡聚。怱怱離緒。偏起圍爐不厭。更深語。明日留君無計。君去矣。訝纔說銷寒。便惹銷魂意。夜長如此。且拋卻愁心。暫同諧笑。頭沒酒盃裏。河閒地。凍合滹沱千里。酸風獵獵吹耳。悲歌慷慨真無益。莫唱清商變徵。君解未。悵從古。依人誰吐元龍氣。月華如水。算夜夜江南。夢魂歸去。明夜又燕市。

小重山

題李虎觀邦燮梅梁漁隱圖

卜築漁莊寄此生。谿山隨處好。一竿輕。乍攜橫篴上湘船。滄波外。吹裂夜山青。展

卷最關情。自憐人海夢。幾時醒。故鄉也有好漁汀。西谿路。孤負舊漚盟。

水龍吟 綠迦柵精舍銷寒弟二集分賦得玉河橋詠明季魏宮人等二百餘

人殉難事

溶溶一片明波。也曾照見滄桑換。甲申舊事。飛來烽火。六宮星散。無數蛾眉。同甘魚腹。粉齏香亂。羨溝中紅葉。無情飄蕩。渾不解。興亡怨。更有費家嬌伴。閃刀光。虎頭生斷。一般報主。水流花謝。淒涼歌管。料得芳魂。依然奉侍。玉魚金盃。勝荒燐夜哭。清冷冷。玉鉤斜畔。

醉蓬萊 夫容山館銷寒弟三集題仇十洲王母醉歸圖


乍傳言玉女。蕊殿開筵。春回一笑。水瑟雲璈。奏泠泠新調。月姊行觴。麻姑進罍。祝與天齊老。斜盼銀河。吸乾碧海。乾坤都小。宴罷歸來。瓊霞暈頰。珠斗敲肩。看侍兒扶好。倦眼惺忪。怕天雞催曉。料得雙成。聰明絕世。向仙丁傳報。好護園門。生防今夜。歲星偷到。

笏

船

詞

運



劉嗣綰（乾隆二七——道光一）

字芙初。江蘇陽湖人。嘉慶十三年會元。廷試改翰林院庶吉士。散館授編修。丁母憂。以毀卒。爲人和平安雅。詩詞駢文。以沈博排奡勝。晚更清適駿邁。以快厲之筆。達幽隱之思。有尙絅堂集。

箏船詞

陽湖劉嗣綰醇甫

臨江仙

團扇不隨煙霧去。有人鶴背相招。銀河清淺夜迢迢。一痕新月。還似古時嬌。記得元壇攜手日。仙姝多半垂髫。碧城回首夢無聊。嫩涼如水。吹斷紫雲簫。

桃源憶故人

春人占了鶯花命。春也似人心性。約略東君初聘。柳色青於鬢。明日陰晴還未定。待燕子、歸來相訂。欲問天涯芳訊。門外天涯近。

謁金門

簾幙底。風信廿番深矣。恰恰鶯聲如夢裏。花神呼不起。望斷曉雲千里。宿雨一林初洗。彈指春光能有幾。看看成蕉尾。

邁陂塘

怪風姨、落紅成陣。催他鶯燕都老。東君著意留花住。無奈護花鈴小。窗窅窕。可可是梨雲、深處茶煙裊。幾番清曉。歎紫玉銷來。綠珠墮去。一碧倩魂遠。春深矣。記取前時懷抱。鬢絲吹冷多少。瑤壇儘有仙人帚。祇分玉階閒掃。花懊惱。算除了蓉城、底處埋愁好。倚闌吟悄。待喚起啼鶻。聲聲血淚。商略送春早。

減字木蘭花

殘燈一點。曉夢歸來窗半掩。紙帳相思。又是梅花獨笑時。春愁如此。絮盡空梁雙燕子。問訊鸚哥。簾外輕寒睡得麼。

臨江仙 竹簾

翡翠雙雙鳴不斷。湘天翦取吟窩。此君瀟灑定如何。春情三月雨。殘夢一重波。依約玉人亭院冷。如今只長煙莎。夜明空說卷秋河。舊時風骨減。著處淚絲多。

蜨戀花 佳人雪藕絲卷子

華井船來應到岸。倩影亭亭。度出污泥幹。誰是浣紗谿上伴。一彎玉臂平分半。就

裏蓮儂何處喚。心曲玲瓏。雪與蕭郎看。到底藕絲容易斷。如何錯怪風吹亂。

風馬兒

一枝煙櫓雁迢迢。是風一聲搖。雨一聲搖。直到門前、不斷小紅橋。條條。那回一別最魂銷。便山一重遙。水一重遙。安得郎身、來往似春潮。朝朝。

菩薩蠻 送彥佐兄之楚中

秋來唱盡銷魂句。送君又宿離亭去。去去向潯陽。四絃空斷腸。江頭雲樹黑。一片傷心色。行不得哥哥。鷓鴣聲奈何。

酷相思 七夕立秋

橫斷明河天未曙。金井露、銀塘雨。向蟋蟀、聲中閒聽取。秋來也、愁如許。愁來也、秋如許。苦憶穿鍼樓上侶。卻笑癡牛女。便瓜果、筵開空覓句。人盡也、燈無語。燈盡也、人無語。

卜算子

風露下秦樓。一逕花陰滑。回首梧桐月又西。小刻香階襪。鸞鏡傍妝臺。自理青絲髮。驀地相逢無一言。留作相思札。

菩薩蠻 迴文

落花愁擁新寒薄。薄寒新擁愁花落。春好惜歸人。人歸惜好春。去帆催細雨。雨細催帆去。屏曲幾峯青。青峯幾曲屏。

臺城路 畫眉

東君愛仿閒情賦。隔花乍聞嬌鳥。夢殢梨雲。魂驚絮雪。啼破一天清曉。卷簾未了。訝張敞風流。淡痕誰掃。歷歷輕圓。數聲容易綠窗遶。傳言不須步障。有鸚哥學語。相對嬌小。選葉安黃。依枝貼翠。新樣十番爭巧。羽毛多少。向屋角飛來。遠山偏好。遲爾雕籠。富春春尙早。

摸魚子 翡翠

愛園亭玲瓏竹桁。文禽真箇如畫。隔溪初試春衣影。風裏闌干低亞。垂釣暇。看戲遍

芳塘一色蘭苕借。雙飛高下。便翠鬣紅鱗。都無猜忌。相對並閒冶。頻惆悵。解帶風流深夜。鄂君繡被初卸。碧城消息經年斷。青鳥甚時來也。桐樹罅。約幾點。釵頭鳳子。輕盈迓。花開花謝。教隔了。簾櫳閒。陪女伴。同絮綠窗話。

沁園春 鷓鴣

暝色池塘。翦翦輕寒。鷓鴣之。正教他吳語。開籠喚早。爲誰楚舞。脫幘來遲。聞說歐陽。綠陰滿院。榆莢香中立幾時。雕闌近。伴東鄰鸚鵡。饒舌如斯。晴皋刷羽參差。聽小字爭呼八八兒。訝似曾相識。風前柳絮。不如歸去。雨後桑枝。攜向齋頭。一泓硯水。青眼相看知不知。閒偎著。對煙波浴罷。半晌尋思。

望江南

江南好。生小住清谿。陸子泉爭揚子水。黃公澗比白公隄。揀得小園棲。江南好。眞作畫圖傳。梅里愛尋高士宅。蓉湖閒數麗人船。濃淡總天然。江南好。春思許平分。翠麓亭前紅葉屐。香花橋畔綠蘿裙。飛夢碧天雲。

江南好。遊興倚清酣。學士溪山茶夢閣。舍人詩畫竹鑪庵。此景占江南。

水龍吟 題亦齋丈環影祠樂府

廣寒吹下霓裳。曲中再識春風面。馬嵬坡下。香消人去。襪塵猶戀。白髮梨園。紅牙菊部。一般哀豔。倩雪衣學舞。金衣學語。重繙出。長生殿。當日清平應制。問宮中。幾回歡宴。海棠睡足。荔支笑後。梨花泣徧。雨歇零鈴。風高羯鼓。舊愁成片。向旗亭喚取。銀尊檀板。夜深相見。

雙雙燕 杏花

紅樓十里。正春雨江南。笛家初譜。賣花聲遠。喚起一天香霧。好是畫中眉嫵。早溼上。鬢煙無數。只愁鬧過枝頭。冷了鴛簫粥鼓。悽楚。曲江歸路。便回首蓬萊。隔年音阻。盧家梁上。燕子幾番低訴。昨夜薄寒偏苦。問沽酒。客來何處。眼看宋玉牆邊。吹送絳雲塵土。

壺中天 牡丹

霞天錦障。看翩翩鹿女。踢花來矣。昨夜東皇親結束。堆出鏡中新髻。藍尾空長。綠腰太瘦。合是君家婢。紛紛姚魏。阿誰小字親記。最憶亭北風流。清平草罷。聲許青蓮倚。今日貧家池館冷。買得一壺春未。霧眼慵看。風魂欲墮。愁絕闌干地。朝雲夢遠。不知綵筆誰寄。

江神子

薔薇

輕綃帳子卷霏微。向誰移。爲誰移。買斷娉婷。一笑是耶非。直待牆東煙月上。牽翠帶。脫紅衣。斷無人處惜芳菲。莫分飛。又分飛。七十二行。吹下鳳皇機。分取瓊漿和露灑。煩說與。散花妃。

昭君怨

桐花

一樹刺桐休折。金井曉寒親切。釵朵向人開。鳳飛回。淡月朦朧如雪。夢到惺忪時節。梧子不歸來。落蒼苔。

醉花陰

秋海棠

銀燭燒春春睡醒。風雨空階冷。和淚種情根。滿地愁紅。生到燕支井。翠袖憑闌斜。復整蛩語無人省。腸斷又昏黃。一翦秋紗。綠透西窗影。

南鄉子 蕙花

豔絕北堂幽。一院黃金散未收。花意不知兒女苦。風流。笑看鄰姬插上頭。結佩最宜秋。只怪蕭郎愛遠遊。記得常言名字好。忘憂。可要生兒似莫愁。

沁園春 金錢花

黯淡籬花。疑是牽牛。貫來聘錢。正枝頭飛去。青蚨小小。草閒灑落。黃蝶翩翩。待雨攤開。因風簸轉。只在蒼苔碧蘚邊。開心處。爲秋光無價。特地流連。自來和癖誰憐。算折得羣芳勝得仙。悵夢回潤筆。紅裳旖旎。歌成買笑。翠袖蹁躚。昨夜佳人。燈前暗卜。數過歸期又一年。憑收拾。付妝臺選罷。留伴香鈿。

鳳皇臺上憶吹簫 鳳仙

窗近談雞。闌圍鬪鴨。花叢染出深秋。正滿天風露。人下秦樓。生小女兒心性。拋清淚。

都上釵頭。低徊處。宮紗繫臂。一樣綢繆。風流是誰彈指。悵紅雨飄零。絃上難收。問
麻姑仙爪。得幾生脩。莫便丹砂空擲。還須待、羽客來遊。殷勤記、求凰曲好。別譜閒愁。

南鄉子

踢葉愛疏林。學得寒蟬斷續吟。眼見黃花都是淚。休簪。綠鬢如儂也不禁。湖水隔
傷心。背卻西風。忍獨尋。欲把一杯遙酌與休斟。今日霜楓醉得深。

三臺令

紅豆。紅豆。知否別來人瘦。月明何處秦聲。腸斷牆頭雁。箏。箏。箏。雁。箏。雁。記得那回相見。
無語。無語。門掩一庭春雨。峭寒簾幙沈沈。銀燭燒時夜深。深夜。深夜。又是海棠花謝。

燭影搖紅

病損東陽。朝來獨擁青綾被。一番輕暖。一番寒。總是愁滋味。好在翠簾烏几。只片片、
冷雲如洗。閒斟竹葉。細嚼梅花。遣懷而已。猛憶從前。玉笙樓角重吹起。一聲清吹
滿園亭。銷盡春魂矣。韻字挑來曾幾。早舊恨、千絲難理。綠窗殘夢。幾度尋看。有頭無

尾。

金縷曲 得彥佐兄粵東札卻寄

雁信天邊繞。是珠江、幾行密字，隔年封好。書易浮沈何況客，卻說歸來期早。也只算、海中仙島。路入羅浮煙更雨。怕天涯、有夢都顛倒。嶺外嶺，互昏曉。阿連詩句空生草。苦思量、青燈影裏，昔年吟抱。一自舊家池館闕，賸有落花風掃。驀地把、瑣窗寒了。新綠幾重紅作陣。破工夫、打出傷春藁。聽樹樹，杜鵑老。

菩薩蠻

秋江白地肝腸斷。風衣水珮都零亂。一曲想夫憐。當門落翠鈿。鴛鴦三十六。箇箇煙中宿。愁殺退紅多。浣紗人奈何。

邁陂塘 蕉扇

碧叢叢、芳心一卷。蒲葵不要人寄。露華煙翠分明在，帶得幾絲涼氣。殘夢裏，聽葉葉聲聲、舊雨都拋棄。懷中袖底。是沈約彈來，王維畫出，風骨冷無際。西窗畔，一片綠

天猶記。有人臨過書未。圓期總似團團月。知否缺時容易。秋至矣。試問訊秋娘。可憐秋滋味。金飆吹起。賸白紵單衫。青羅小簞。准作斷腸例。

點絳脣

風雨離亭。青衫溼盡無人管。相思長短。孤櫂江天遠。瘦絕東陽。衣帶今番緩。腸應轉。一聲河滿。夢逐春波卷。

賀新涼 京口舟中送虞旭岡北上

十五回重九。恰今朝。滿城風雨送君京口。數到江天紅樹影。秋在短長亭堠。戀半霎。蓬窗坐守。露白峯青圖畫好。聽雙雙。檣燕留人又。恨一片。寒濤走。眼看菱角成雞豆。更那堪。外家梨栗。舊情同剖。七里橋邊重繫纜。此景也思量否。記不起。兒時分手。後夜尋君惟有夢。倚西風。攀斷蕭蕭柳。且莫負。茱萸酒。

減字木蘭花 水仙

蒜山葱嶺。種出根苗宜玉井。姑射前身。羅襪生來絕點塵。如何湘浦。一卷離騷忘

卻補。移伴逋仙。清比梅妻更可憐。

滿庭芳 天竹

鳳尾拖煙。鶴頭點露。天然竹影檀鬪。圓期到了。和淚走鮫盤。卻似拋來紅豆。相思處、翠袖蕭寒。天涯遠。者回霜信。解與報平安。當年金谷樹。珊瑚七尺。敲向誰看。怕有人低折。蹋凍聲乾。一任昏鴉數遍。雙棲約。准待青鸞。銀燈底。搖枝冷碧。清夢壓闌干。

浣谿紗

翠暖紅香。帶雨天。春陰如水蕩秋千。惜花人合受花憐。不道獨眠還有夢。如何相見轉無言。倩魂銷盡畫樓前。

水調歌頭 寄彥佐兄粵東

憶昔送君去。春草謝池隈。歸心今夜何處。一十八灘來。說與羅浮夢裏。縱使江南路遠。翠羽好徘徊。驛使幾時到。寄我一枝梅。蠻瘴地。行不得。莫相催。嶺雲千里。萬里。懷抱向誰開。見說離宮煙樹。只有鷓鴣飛去。問訊可曾回。我欲飲君酒。同上越王臺。

半幅湘漪翦。鎮垂垂、更無人處。碧雲寒淺。窄地妓衣扶不定。飛動隔花釵釧。便抵得、小重山遠。剛是梳頭看未了。恁風前、晶押偏吹轉。任蛛網、等閒罨。舊家庭院追尋遍。到如今、有誰料理。杏梁歸燕。一桁綠陰依舊好。遮斷翠樓人面。只看取、淚斑千點。中有橫波曾入畫。向秋江、悔不尋常卷。茶煙裊。落花軟。

又 簾

小字桃笙好。最蕭閒、空庭一夢。水晶眠倒。八尺風漪誰打疊。織幅吳淞圖稿。消幾許、煙飄月抱。賸有相思涼入骨。伴玉壺、夜夜冰魂悄。燈影墮。篆文裊。藕花衾被鴛鴦惱。遶芳塘、白雲留住。是鄉人老。不分疏簾同看弈。空對楚天清曉。借仙枕、合遊三島。欲拂塵時秋又至。儘波紋、卷入瀟湘早。看落葉、半牀掃。

又 扇

魂與秋搖蕩。是誰家、玲瓏玉手。製成圓相。翦得白蘋洲一幅。添與掌中波浪。儘風骨、

幾絲飄颺。還恐人間煙霧重。畫秦娥、簫鳳來天上。誰爲我、卷綃帳。齊紈皎潔渾無恙。檢空箱、和衣疊在。舊情難忘。半面迴廊人似月。記得團團初障。能幾日、渡頭低唱。從此西風憔悴甚。怕芳姿、不是當時樣。碧檻外、起惆悵。

又香

宿火偎金獸。愛閒庭、博山深處。儘消清晝。認取吳家心字好。釵腳篆痕紅透。只少箇、紫羅囊繡。無分真真薰小像。枉教人、坐到鑪煙瘦。松影落、翠濤走。蘅蕪夢裏曾盈袖。記年時、階前伴月。幾番消受。今日荀郎縱顛顛。衣上餘薰還有。怕說是、返魂時候。七尺重簾留未得。任西風、蕩起雲波皺。又繞遍、棗花登。

點絳脣

酒醒風前。斷腸人去關山曉。昨宵草草。一曲江南好。不爲秋娘。豈便傷心早。何時了。舊愁多少。啼得宮鶯老。

一翦梅

過盡長隄更短隄。柳外鶯啼。花外鶻啼。玉鞭笑指路仍迷。攜手樓西。分手橋西。九
十春光醉似泥。唱到清谿。夢到梁谿。天涯心事不堪題。明日歸期。今日行期。

江城子

箏船酒幔鬪嬌憨。柳毵毵。燕喃喃。好是綠窗如夢倚清酣。多少倦遊心緒在。眠又起。
似吳蠶。尊前惟有舊何戡。味誰諳。恨誰堪。教唱杏花春雨望江南。回首畫屏山六
曲。一半是。舊雲嵐。

虞美人

燕昏鶯曉空留戀。夢遶江南徧。春花只自去年紅。十二闌干瘦了亞枝風。怱怱走
馬章臺畔。側帽無人看。幾時消息到冬郎。長向畫檐鈴語怨郎當。

滿江紅 新綠

十里湖天。把一桁翠樓遮卻。賸幾樹、疏疏梅雨。畫中商略。乳燕飛來風色淺。雛雅藏
得烟痕弱。正碧窗、深處打流鶯。閒偎著。山眉掃。新梳掠。波面染。重斟酌。待東君嫁

了。盡情相謔。送我紅兒花下曲。赴他青子枝頭約。問鄰家、春好幾時歸。秋千腳。

薄倖 韓景圖話女郎絮絮題壁事爲填此詞

謝家人杏訝壁上香名誰掃。記細語、一星星絮。小立夕陽魂悄。恁因緣、賸粉零煙。年
年留伴花風裊。早千疊柔腸。十分癡夢。鎖斷畫廊春曉。重喚起、楊枝恨。想白傅、清
歌多少。悵紅情綠意。閒悵無分。鬢絲幾日吹殘了。湖山縹緲。便同心、結就西陵。何處
逢蘇小。愁他歸路。一碧芳塘萍繞。

點絳脣

掩上重門。杜鵑聲裏人何處。亂紅休舞。識得東風苦。準備春遊。爲了春城阻。愁無
數。夕陽今古。黃歇墳頭土。

蝶戀花

江上平蕪樓上綠。一派連天。卻恨天天各。悶掩畫屏山六曲。夢魂兀自無拘束。長
日懨懨春睡足。做盡淒涼。只在闌干角。胡蝶不來花自落。斜陽紅上秋千索。

沁園春 脂

小小香奩。買得燕支。天然畫中。訝南朝井底。千年化碧。西家匯畔。一夜流紅。櫻口稱嬌。檀心號聖。暈入春潮便不同。輕綿溼。怕圓冰澱灩。色退成空。桃花雪水溶溶。忘不了兒時。醜面風。更稱他郎意。猩唇絕豔。輸他女手。獺髓爭工。的的塗朱。盈盈點絳。韻事平分到守宮。閒風月。待染成指甲。彈曲霜鴻。

又 唾

環珮聲遲。寶唾遙聽。驚逢彩鸞。恰石華袖上。層層碧透。靈芸壺裏。顆顆紅乾。鮫帕難承。龍巾好拭。也當黃金逐彈丸。仙人笑道。遺來尺鯉。不用冰盤。湔裙昨夜春寒。借綠淨湖波。一點看。想漱餘吐出。蓮花舌豔。渴時嚙取。梅子心酸。繡罷絨留。吟殘筆退。口嚼明霞別作團。天風起。怕零珠碎玉。吹下闌干。

又 汗

暖玉成窩。粉澤初勻。溫柔是鄉。認峽雲濺處。還沈宿酒。洛波溼後。待洗殘妝。翠袖輕

擡紅兜小抹。猜道華清昨夜湯。無人識。正花陰嬌喘。捉了迷藏。等閒卻笑何郎。問粉面闌干界幾行。映桃花扇底。三分肉豔。藕絲裳裏。一種肌香。篔簹滑痕濃。綃輕色褪。看取春深暈海棠。青奴好。伴珊瑚玉骨。依舊清涼。

長亭怨慢 黃蝶

甚金谷春風吹轉。鳳子來時。一枝香軟。尋徧花鬚。芳魂栩栩付誰管。無多點染。也只戀江南岸。隨意上閒階。便簇得宮裙泥滿。遊倦儘菜畦如繡。幾點兔葵平展。舊家門巷。憑問訊者。番寒暖。縱滕王畫裏重逢。早十二珠簾空卷。天外夢歸來。還恐夕陽山遠。

浪淘沙 舟過楓橋

風影酒旗飄。水閣燈搖。滿船紅葉出楓橋。柔櫓一聲秋去遠。暮雨瀟瀟。濁酒幾曾消。夢也無聊。桃笙如水夜迢迢。三尺短篷聽不得。誤了芭蕉。

河亭消受夜深寒。只似水精盤。露蛩未寢，風螢未定，人在闌干。阿誰識得秋來意，襟袖自貪看。青羅扇子，和他月影，一樣團圓。

浣谿沙

一夜秋深翠被池。風風雨雨太參差。芭蕉和夢說相思。紅蠟滴殘無限淚，青蟲吐得幾多絲。爲秋蕉萃怕秋知。

一萼紅 燈花

坐燈邊。正一花如豆，人意劇堪憐。風幔搖青，雨窗罨碧，絳紗影裏遊仙。約略認、葡萄小髻，怕深更、愁擁不成眠。料得今番，敲殘玉局，擲到金錢。最是謝娘簾閣，記籠燈雙笑，恰照齊肩。心字濃熏，眉圖澹掃，風光可似從前。便多少、紅圍綠暈，悵隔重、春夢夜如年。索向斷無人處，伴過鑪煙。

念奴嬌 人日

湘屏獨擁，爲春人、憶著去年今日。最是梅花丰格瘦，伴我寒窗親切。綠雪研茶，紅冰

滴硯冷沁題詩筆。淚痕結就玉壺一夜吹裂。誰道雞塞魂飛。雁坡信斷。真個傷離別。何況茂陵秋病後。非復酒壚風月。心字香沈。鬢絲煙起。愁對維摩室。許多幽怨。十三絃上低說。

臺城路

薛素素牡丹畫扇

牡丹只買燕支恨。裝成斷腸宮譜。小疊齊紈。平鋪蜀錦。慵向懽場歌舞。兒家心苦。有七孔鍼新。十眉圖古。欲寄朝雲。夢中花葉倩誰補。金釵幾行姊妹。但聽商女。曲各自淒楚。蘭草埋香。桃花染血。淚滴蘼蕪無數。芳魂何處。只賸粉零煙。一丸黃土。喚起秋風。班姬相對訴。

浣谿紗

陌上尋春只二分。泥他草色上羅裙。斷腸鬢影似文君。郎意不離三里霧。妾身還隔一重雲。門前皺盡綠波紋。

百尺紅牆界眼前。蓬山回首恨緜緜。不成風月奈何天。未許蘼蕪通半夢。空教楊柳

試三眠。一番惆悵五留連。

於中好 芭蕉

扇仙風骨玲瓏玉。誰移近、小屏山曲。一封書好無人讀。鎮日裏、秋心束。風風雨雨聽應足。怪低語、夜窗相續。綠章奏了天都綠。莫也是、彈脩竹。

滿江紅 登雨花臺

擲拂空中笑。當日天花多少。我到也、臺城十里。冷煙殘照。有客尙尋瓊樹譜。無人更上瑤壇掃。問饑鴉、終古爲誰啼。天應老。碑碣斷、牆垣倒。鐘磬寂、樓臺杳。歎蕭家事業。劫灰飛了。一夜長干餘落葉。三秋短笛橫衰草。向西風、喚起庾蘭成。銜杯好。

河傳

江館。天遠。月如煙。隔院聽歌未眠。雁行零落晚風前。纏絲。十三箏柱絃。知否冬郎容易瘦。相思透。一曲雙紅豆。恨迢迢。又歸潮。魂銷。夜深長板橋。

鳳凰臺上憶吹簫 題余淡心板橋雜記後

北里空談。東華倦錄。金陵十六重樓。數一編舊話。裙屐風流。寂寞幽蘭居士。消磨了、
幾許閒愁。教珍重。斷縑零素。簫譜重脩。休休。板橋西去。看早晚。棲鴉催送殘秋。恨
梅根渚畔。桃葉灣頭。今夜孤燈翦罷。青箱卷。屬付誰收。拚癡坐。繁霜羅幕。自擘笙篔。

羅敷媚

今宵明月無情甚。一片清光。祇照鄰牆。淒斷盧家玳瑁梁。隔江誰唱安公子。偷得
霓裳。卻立回廊。斷盡青谿曲曲腸。不如掩卻屏山睡。路繞瀟湘。只苦更長。喚起沙汀雁幾行。風前簷鐵聲聲語。徹夜

丁當。迸做新涼。孤負秋衾夢一場。花天月地思量著。只當尋常。生住柔鄉。慣醉佳人錦瑟旁。誰憐衣帶如今緩。瘦損

東陽。依舊清狂。側帽還看薄倖郎。分明星月前頭誓。百劫茫茫。轉綠迴黃。絲比春蠶一倍長。海天不信無憑準。天樣

紅牆。海樣瞿塘。多恐麻姑鬢也霜。

不堪更聽思歸引。鳳笛淒涼。說向秋娘。蓮子心頭各自嘗。明朝又傍空江宿。多少鴛鴦。泊粉漂香。那得雙魚到謝塘。

從今勘破鶯花劫。離恨天長。沒箇商量。打疊吳兒木石腸。何當慧業消除盡。畫裏蕭郎。卷裏崔娘。繡佛前頭一炷香。

浪淘沙

落葉下重樓。暮雨颼颼。病來和影說綢繆。不是芭蕉窗外語。忘了深秋。料理舊時愁。藥碗茶甌。無聊獨自倚香篝。二十五聲今夜點。點點心頭。

百字令

蟋蟀

清商吹到。正聲聲寫入。琴絲悽戾。一片牢騷聽不得。中有悲哉秋氣。金鎖愁深。玉階怨古。斷雨零煙地。年年燈火。借人籬下空寄。看汝捷足先登。雄心易動。突過螳螂臂。畢竟草閒偷活在。薄伎爭鳴何意。蠅虎場中。蝸牛角上。千古同兒戲。平章事業。至今圖譜誰記。

臨江仙 貓

繡倦春閨誰伴取。紅氍日暖成堆。鑑邊叉手任相猜。金猊從喚住。玉虎罷牽迴。剛是牡丹開到午。亭陰儘好徘徊。幾番移夢下妝臺。買魚穿柳去。戲蝶踏花來。

南浦 詠煙草

湘天濃暖。問何年、玉杵擣瓊霜。翦取翠茸千縷。分與紫羅囊。別是泥人風味。甚溫柔、偏在白雲鄉。借蓮花舌底。春愁一點。著意醉檀郎。回首藥欄依舊。恨風前、不度返魂香。約略當初茶夢。留住九迴腸。松戶竹窗何處。伴清微、詩思裊空廊。待桐君錄罷。芭蕉小字付青箱。

二郎神

絲風絲雨。更堆上、一天絲柳。認門巷條條。玉人何處。閒殺落花如繡。卷起梨雲無重數。剗地裏、怕和春瘦。試驗取春衫。紅都退了。淚痕淹透。分手孤舟去也。見時難又。怪楚夢飛來。昨夜峯頭。偏與眉間添皺。燕燕掌中。蟲蟲心上。容得幾多傷憊。怕量盡。

天際春江載去離愁難覓。

高陽臺

夢尾燈紅。情邊水綠。斷腸又是蘭舟。消幾帆風。離人吹下西洲。春波依舊鴛鴦路。甚孤眠、占斷閒鷗。慢回頭、翠被天涯。冷了香篝。銷魂不是長亭怨。是深盟玉鏡。款語銀鈎。小疊吟箋。恁恁著得多愁。闌干膩雨還應在。怕朝來、梨苑成秋。等閒休。團扇圓時。何處秦樓。

山花子

看盡屏間畫折枝。茶煙癡坐鬢成絲。愁聽隔林雙彈響。打鶯兒。風雨白楊三太息。煙花紅豆兩相思。取次闌干閒憶著。立多時。冷到樓頭碧玉簫。春魂一夜不堪招。載得春人同去也。恨蘭橈。但覺別情深似海。何當歸夢信如潮。一點離心流得到。小紅橋。

闌干萬里心

桃花小塢閣重登。記得年時坐雨曾。籠上紅雲一點燈。思瞢騰。春夢模糊隔幾層。

夏初臨 青豆

桑熟蠶初。筍生燕後。豆畦纔見連枝。小字青青。何如梅子圓時。筠藍喚賣吳娘。愛春蔥、一束親持。芳心的的。比他紅豔。別樣相思。涼棚回首。燈火叢中。清霜翦翦。莫雨絲絲。山南采得。尋常風味參差。除是秋知。配雞頭、膩滑流匙。儘然其釜中。休泣重賦新詩。

惜紅衣 藕粉

玉井閒評。冰盤細譜。飲香誰數。爲擣瑤霜。秋來借仙杵。粉郎身世。全不近、個人眉嫵。淒楚待約西家。說空房心苦。輕調翠釜。勝似芙蓉。濃分小釵股。紅甕綠盃。準擬領茶部。素手者番擎出。猶帶滿汀風露。問青蓮舌上。一瓣冷雲誰吐。

翦湘雲 蓮蓬人

翠蓋扶頭。紅心徹底。訝獨立斜陽。解散羅髻。香粉空來。渾似夢。鏡裏天然梳洗。向秋

江脫卻藕絲裳。換綠衣黃裏。誰念的的圓期。亭亭竟體。有碧玉迴身。掌上堪比一
夜飛蓬搔首恨。隔浦西風吹起。待空房。重與結同心。配井梧連理。

賀新涼 送黃山歸試金陵

水閣盈盈敞。記年時、酒波卷碧。幾重煙幌。一面桃花梳洗處。著個驚鴻來往。正鴨綠、
平鋪如掌。亞字闌干丁字箔。映斜陽、脈脈堪凝想。能幾日。冒蛛網。枇杷門掩休重
訪。恁風煙、擁來翠被。也無人賞。從此春江花月冷。閒殺桃家雙槳。更那得、東船西舫。
空借孤篷眠夜雨。一聲聲、做盡芭蕉響。又說是、暮潮長。

釣船笛

隔院罷秋千。斷了玉人弓印。花外二分落照。做一分輕冷。空階銷凝又昏黃。此恨
阿誰省。胡蝶不知春去。上闌干弄影。

蝶戀花

一架酴醿垂絡索。沈水煙高。裊過雲屏角。蝶蝶和風隨意逐。渠儂也似郎難捉。斗

帳流蘇。看不足。翠被池中。消個紅鴛浴。怪底夢來無約束。楊花引得春魂熟。

高陽臺

柳髮晞煙。花鬚隱霧。小窗殘夢惺忪。送得春歸。春人也爲春慵。紅樓一角無多路。到愁來。又隔多重。忒怱怱。閒了歌鶯。冷了游蜂。舊家庭院簾垂遍。賸吹殘薄絮。唾罷輕絨。雲沍鑪香。除非畫裏相逢。湖山可是無情思。甚朝來。不上眉峯。誤芳蹤。綠樹愔愔。盼斷青驄。

一翦梅

七尺風簾漾水紋。畫裏湘君。鏡裏文君。朝來怕看石榴裙。酒溼三分。淚溼三分。盡眼征帆挂夕曛。雁也離羣。人也離羣。瀟瀟暮雨過江聞。郎是行雲。妾是停雲。

浣谿沙 晚泊京口

水簾風燈晚放舟。飛來鷗夢冷如秋。碧雲一點是瓜洲。仙侶江頭初送別。美人天際獨登樓。鐘聲相對莫山愁。

菩薩蠻

楊枝一曲秋情苦。天涯心事從誰數。艇子隔花招。白門江上潮。潮頭三五里。日落城雅起。獨自上西樓。滿天風雨愁。

鵲橋仙 贈妓葛三

冶袖驚鸞。仙裙留燕。青鳥忽傳芳使。無人知道葛三來。是子美詩中黃四。心已琴挑。耳還笛洗。記曲不須娘子。十三絃上夜烏啼。聽喚你雅兒名字。葛雅兒南曲中小名

沁園春

問訊蕭娘。託上下潮。付離合風。憶裙邊袖角。邀歌扇小。尊前燭底。記事珠工。立近闌干。花枝向背。宋態張濃各不同。閒評泊。許小名翻遍。雜珮丁冬。江頭依舊簾櫳。悵芳樹相思夢欲空。任秋衾況味。全銷冷翠。春衫顏色。半褪深紅。料得高樓。有人扶手。只在垂楊卷幔中。南雲便。把數行清淚。彈與征鴻。

南歌子 蜘蛛

繡幙牽愁早。珠櫳送喜遲。畫簷留住幾多時。好待落花風裏、網西施。密意嫌蠶巧，機心笑蝶癡。泥他織女訴相思。乞取玉釵低買、一絲絲。

青玉案 題韓景圖紅冰詞

清詞一卷冰心貯。喚幾許、春愁住。風月年來無箇主。玉谿才調，玉樵韻格，歌板閒分付。情多我亦翻成誤。待攜酒、花閒爲君譜。字字欲拈紅豆數。三條燭下，四條絃上，有淚無聲處。

念奴嬌

畫船如鏡，伴離愁、只有一重湘簟。十幅眉圖都疊起，早又遠山相見。說硯雲寒，品茶月小，沒計堪排遣。鬢絲珍重，蘆花吹去成片。知否此夜蕭郎，風漂雨泊，也似秋邊雁。妾夢不離江上水，容易斷帆如箭。蓼岸霜紅，楓亭月黑，特地思量徧。幾時歸櫂，五湖多少依戀。

浪淘沙

帆影暮江寬。占斷漁竿。幾行疏柳挂蕭寒。要與荆關留畫本，添尺筇看。夕磬下雲端。門掩重巒。空山無地著蒲團。一夜西風黃葉夢，吹上長干。

清平樂 舟宿水仙墩

燈涼如畫。繫纜叢祠下。水佩風裳魂欲化。碧月迢迢殘夜。曉來零落明璫。鏡中生怕思量。手把一絲煙柳，不知秋恨多長。

步蟾宮 蛙

池塘雨冷青蕪國。有兩部、新聲消得。愁人不耐一更更。直坐到、曉天孤碧。水精宮是神仙宅。怪雲裏、爬沙還隔。前生識字誤來多。笑科斗、半牀空覓。

卜算子

疊就碧雲箋。小立閒階。淡綠春山一段眉。窄地風吹皺。不見舊檀奴。水墨空盈袖。繡箇如來供榻旁。消受鑪煙瘦。

滿江紅

幾葉芭蕉使翦破。小窗風色。闌干外、半庭寒綠。爲誰團得。望眼昏時雅點礙。愁腸曲處蟲聲織。更飛來、片月是離顏。添悽惻。夢一帶、楓林黑。恨一派、蘆花白。怕門前立盡斷無消息。春水曾從天上坐。秋河祇向人閒隔。任年年、流盡好鉛華。無人惜。

臨江仙 秋盡日泛湖

湖水不知花片恨。和雲流夢迢迢。紅泥亭子赤闌橋。碧山如畫。一曲一停橈。憶著年時曾被酒。座中吹暖瓊簫。秋邊欲與破無聊。人如秋遠。秋去更誰招。

木蘭花慢

插天湖柳碧。渾不管、曉鶯愁。早紅被香消。翠簾燭散。人下西洲。怱怱幾聲絮語。怕風吹不到。謝橋頭。輸與瓜皮艇子。綠波雙翦江流。休休。眉史記同脩。小閣最清幽。便鈴語禁花杵。盟負月。悔了綢繆。芳心縱窺團扇。爲秦娥、簫譜又傷秋。欲倩行雲一片。替儂遮斷層樓。

少年遊

棲雅只在莫江頭。點點做成秋。白蘋吹起，綠荷折盡，消得客魂愁。一聲雁櫓蕩煙柔。搖夢下汀洲。眼底天長，眉閒地窄，心上幾重樓。

四字令

蕉窗碧箋。苔階綠錢。夢來曾抱秋煙。是今年去年。秋雲掃天。秋河卷簾。有誰同話秋邊。算秋蟲可憐。

翠樓吟

西日留雅。南雲送雁。秦樓十二天際。綠波纔幾點。做弄盡、風蒲沙尾。秋痕搖曳。只脈脈闌干，和愁間倚。愁飄起。畫檐箏響，佩聲同細。歸未。江上王孫，正萋萋芳草，斷煙千里。酒旗青不了。待領略、天涯滋味。鎮嘗騰地。想裏鴨池邊，調鸚簾底。秋山霽。長亭無數。定凝芳睇。

鷓鴣天

魚鑰沈沈獨掩門。無聊時節是黃昏。寒來恨葉梨花路。種出愁苗蕙草根。纔入夢。又銷魂。薄衾誰更與溫存。相思一夜知多少。手撥鑪香看淚痕。

湘月

燒燈節近。問誰家鬧取、華堂絲竹。春到故園春倍好。夢遶梅花書屋。料得今宵。屏風開處。胡蝶深深宿。澹黃月額。有人偷畫蛾綠。回首天半西樓。翠簾十二。亂卷真珠軸。幾日飛瓊飛去也。吹斷一枝橫玉。風影更衣。水聲解珮。總是淒涼曲。鄂君被冷。客窗誰伴幽獨。

鵲橋仙 別江懋茲昆仲

濃雲擁樹。溼煙堆柳。離恨一天低鎖。桃花潭水夜來深。更著個汪倫送我。被池翠薄。鑪山紅冷。負了五湖單舸。明朝愁殺落燈風。對幾點春江漁火。

菩薩蠻

江樓一霎帆如箭。東風無計留人便。落月在吳船。隔江春夢圓。三更潮又長。人語

空灘響。那許不悽迷。白門烏亂啼。

蹋莎美人 小姑山

雁影猶橫。烏啼未了。峭帆挂破江天曉。淡雲微雨夢飛還。恰好推篷。看見小姑山。神女荒唐。水仙縹緲。珮聲不信人閒杳。東風吹綠上煙鬟。分送離愁一點到吳關。

荷葉杯 夜泊琵琶亭

潮落潯陽江冷。孤影敲枕不成眠。一行楚雁下江天。啼上四條絃。愁殺青衫行客。亭側。獨自聽成秋。蘆花笑我早漂流。風雪在扁舟。

幔卷紉 舟中望廬山作

絲煙飄盡。絮雲擁到。誤了江南岸。正舵尾垂楊。添幅春帆消得幾程。離情早判。仙侶同誰。美人獨自。渺渺成河漢。卻隔著屏風。有個匡君。招手天半。船窗卷幔。名山好在香鑪畔。放一縷茶煙。碧空篆徧晴雲。又被東風吹斷。畫裏餐霞。吟邊翦水。總是閒愁亂。待笑指秋期。谿上蓮開。繫纜重看。

減字木蘭花

楚山一帶。點點傷心低似黛。細雨孤篷。春是愁中是夢中。雲波忽捲。卻望江南天樣遠。折得梅花。人在瀟湘水上家。

青玉案 吳大帝廟

泊船燈火沙洲市。弔遺廟、荒江址。一夜短篷聲入耳。風聲如許。濤聲如許。不信英雄死。江流洗盡吞吳恥。尙霸業、江東照鄉里。三國幾家真父子。鷹臺何處。雀臺何處。生子當如此。

清平樂

江天僂僂。小極風前酒。手把武昌門外柳。細雨獨吟樊口。回看西塞濛濛。移家合住圖中。辦得一蓑一笠。明朝去作漁翁。

浪淘沙

鏡裏怨韶華。滿鬢風沙。春人春日到天涯。溼透青衫衫上淚。不爲琵琶。惱殺楚天

雅掩上窗紗。斷無人處夢還家。一點相思紅豆小。落了燈花。

南浦 題吳枚庵曼香詞

金荃舊譜有新聲。一卷疊瓏玲。界出烏絲小字。隨意寫雲屏。擬把紅牙低唱。向筵前、拍了又重停。借名香炷就。碧窗影裏。消受客燈青。回首吟壇銷歇。臘年時、春恨記星星。直待千帆過盡。細數舊旗亭。殘月曉風何處。甚天涯、詞客各飄零。怕高樓一帶。瀟湘歸雁有人聽。一帶高樓都在雁聲中。君詞中句也。

長相思

客他鄉。怨他鄉。盡日春愁不自量。春江如許長。戀風光。惜風光。暮雨瀟瀟馬上郎。竹枝聲斷腸。

婆羅門令

朝來認、是瀟湘色。暮來認、不是瀟湘色。報道潮生。重添纜、江亭側。鴉幾點。流水空蕭瑟。天寒者般惻惻。做春陰、一帶昏於墨。楚人門巷條條記。回首處、早水隔山隔。高

樓天半。離恨千尺。盡眼風波。此際誰管江南客。立斷垂陽陌。

木蘭花慢

輕烟纔禁過。隄上路。又清明。訝屐齒紅稀。裙腰綠斷。負了新晴。山亭。亂堆溼翠。甚朝來、無處著啼鶯。賸有幾絲風柳。日前也懶逢迎。湖汀正好麗人行。畫裏憶傾城。記金粉陽臺。深眠淺醉。若個才名。三生自知分薄。忍淒涼、聽到楚江情。欲把紅紅譜記。屏風不暖鵝笙。

蝶戀花

啼鳥朦朧忘卻曙。六扇屏山。好夢全難據。幾日客愁無意緒。絲絲化作垂楊縷。郎
蹋歌來儂又去。燕子相逢。只絮傷春語。送斷春人春幾許。門前一尺桃花雨。

八聲甘州 題姜松泉春水圖

捲湘簾、如畫正梅天。細雨罨江城。是紅泥亭下。尺書烹鯉。斗酒聽鶯。說與圖中仙侶。此景最分明。拖出一灣綠。柔櫓微行。指點吳淞江上。想君家門外。春水初生。問碧

雲鄉裏甚日是歸程。怕歸來重尋白石負年時。二十四鷗盟。安排與松陵社好。添箇詩名。

高陽臺 憶梅子有作

綠已成陰。黃將做雨。朝來閣住輕寒。不道梅天。誤人憑遍闌干。舊家櫻筍風光在。料今番、數足清歡。最難忘、雪樣精鹽。水樣晶盤。江南幾許閒滋味。記玉纖新摘。一點心酸。渴甚春來。爲伊茗盃都捐。思量小字青青好。問圓期、到幾時看。又教他、覓句方回。消瘦先拌。

菩薩蠻

十三箏雁秦樓立。酒邊舊事尋常憶。金粉小屏山。淚痕深淺彈。江頭風更雨。吹送離人語。莫倚曉寒天。烏啼正可憐。

離亭燕 題顧橫波畫蘭

春鎖眉樓圖畫。一碧湘魂真化。翦得橫波成小影。也當雨昏煙嫁。露葉尙如啼。愁絕

墨娥今夜。南部煙花餘話。只看蘼蕪山下。金粉無情都退了。減盡六朝聲價。笑問卷中人。素素元元誰亞。

南浦 鷓鴣

黃陵廟口。記圖中、挂席醉秋光。不道曲闌相對。煙暝小池塘。付與翠眉低唱。莫喚他、名字惱迴腸。正幽齋如夢。數聲啼過。裊斷鴨鑪香。憶著越王臺畔。便燕山、嫁了怕思量。又是瀟瀟暮雨。愁絕竹枝腔。聽說行還不得。恨相逢、只話楚天長。看江頭飛去。夜來卵色破瀟湘。

菩薩蠻 晚霽江上泛舟

簾櫳隱隱煙江面。遠天如墨愁成片。淚雨一時晴。南雲無數橫。闌干長十里。紅入斜陽尾。直到鷺絲堆。地名藕花開未開。

水調歌頭 爲田小村催妝

江上好風月。秋色在蘭房。紅雲三十六幅。幅幅繡鴛鴦。妾住燕支匯畔。郎宿燕支山

下各自占柔鄉。爾汝曲能否。窗外問吳娘。薛家紙。石家黛。宋家香。溫家玉鏡新製。準備賦催妝。贏得章臺人說。明日畫眉翻案。京兆是田郎。早晚大歡喜。夫婿入長楊。

風蝶令

雨點收闌暑。風絲逗晚涼。家家屏上有瀟湘。看見水蕙花影。憶江鄉。鶴骨盈盈扇。蟬紗薄薄裳。愁他明月墮銀塘。分得青荷鏡子。照鴛鴦。

浣溪紗 過黃州

幾點蘆花一葉秋。短篷風急雨脩脩。夜來清夢落吳頭。烏鵲南飛何限恨。大江東去幾多愁。臥聽鼓角到黃州。

夜行船

風帆翦破江流碧。界長空、一條飛白。月色猶新。灘聲依舊。斷岸客愁千尺。柔櫓啣啞誰聽得。高歌小坐危檣側。鶴過江來。雁橫天去。不見羽衣吹笛。

花自落

江岸冷。隔浦落帆風緊。天外蓼花愁弄影。夕陽紅破暝。望裏碧雲千頃。秋夢幾番牽醒。漁父不來閒釣艇。夜涼生鷺頂。

秋霽 舟中望峴山

紅峴秋高。見一派疏林、幾點殘照。柁尾餐霞。槎頭煮水。晝裏獨來吟眺。晉人風調。清江如帶。天然妙。只少箇、偕隱人家相對。鹿門嘯。當日說甚、陸弟周郎。銅雀前頭。枉鎖昏曉。到而今、荒臺無限。呼鷹誰復笑。劉表回首西風吹不了。山外天外。待招孤鶴同來。灑行酸淚。把羊公弔。

四字令 題吳湘人望湘圖

湘山暮蒼。湘波夕涼。湘帆面面衡陽。有湘人望湘。湘禽幾雙。湘花幾行。湘煙湘雨歸航。怨湘天路長。

湘蘭正芳。湘荷又香。湘夫人是同鄉。對湘亭晚妝。湘簾畫廊。湘屏曲房。添他湘管

牀牀。寫湘中九章。

鷓鴣天

病榻閒參棗葉禪。客愁了了識前緣。屏間暮色橫新雁。枕上行雲送晚蟬。風嫋嫋，月娟娟。女郎山下盼歸船。一聲柔櫓搖秋去。夢落煙江不肯圓。

邁陂塘 題陳靜涵蒹葭秋水圖

展生綃。雲林短幅。遙山低抹成黛。分明咫尺蒼葭景。中有伊人宛在。吟眺最好。拉個漁師。橫笛來天外。夕陽鷗背。約略似江南。蘆花遠處。秋影半汀碎。晴川畔。公子丰標堪繪。一雙白鷺相對。眼前別佇煙波賞。不爲天涯蝦菜。君且待。問一夜西風。可要扁舟載。高情誰會。儘鶯脰湖邊。鱸香亭下。三絕許君配。

點絳脣

疏柳門前。一絲絲是江南影。夕陽煙艇。立破沙鷗暝。兩岸秋光。草草愁難整。無人省。楚天淒緊。雁雁西風冷。

玲瓏四犯 雁字

雁背霜濃。正平展秋林。殘照空闊。驚入平沙。波磔幾痕斜沒。安排水墨微雲。早又怕、亂雅塗抹。直蘸破、蘆花白曉。飛向楚天蕭瑟。關河一帶西風緊。便丹楓、四山都脫。依舊是玫瑰砧杵。只恨空城隔。打盡人人圖稿。寄不到、箇人天末。待夜深吹上。銀箏點點。行行輕撥。

荷葉杯

簾捲夕陽樓上。凝望。點點是歸舟。分明秋字上心頭。那許不成愁。說甚丹楓烏桕。消瘦。不似舊江干。晚雅聲苦雁聲酸。一派做荒寒。

臺城路

楚樓遮斷行雲晚。江空欲離秋影。情盡橋頭。夢來水尾。紅入一燈煙暝。湘屏斜整。算徹骨涼宵。幾家分領。只隔重山。冷猿啼上綠蘿頂。思量舊時庭院。賸年來華髮。此恨應省。雁雁箏前。烏烏笛裏。況是角聲孤引。霜天偏迴。問今夜關河。爲誰淒緊。莫更憑闌。酒風吹易醒。

點絳脣

睡破梅花。江南好夢重重掩。一枝誰翦。昨夜春痕淺。茅屋空山。舊約何時踐。愁難遣。楚波點點。也礙離人眼。

擣練子

煙漠漠。雨瀟瀟。江柳江花出野橋。水驛不知何處宿。東風人日又明朝。

采桑子

一燈做盡黃昏雨。似說相思。秋夢圓遲。只有芭蕉葉子知。無聊立徧迴廊也。風影參差。秋鬢如絲。不爲秋娘綠少時。

滿江紅 帆

打疊輕蒲。儘領略、楚天平遠。恰翦出、瀟湘一幅。朝飛暮卷。細雨好留檣燕住。斜陽又送竿鳥轉。問名山、千里可曾逢。圖中展。挂不了。煙痕暖。織不了。波紋軟。向天涯數遍。客程長短。水驛三更霜角掩。江樓一夜風燈閃。識孤鴻、盡處是歸舟。離心滿。

又 鞭

芳草萋迷。直盼到、玉驄樓畔。君不見、斷腸春色。幾番重換。雲路著來渾未穩。江流投
去何曾斷。趁綠楊、陰裏縮輕絲。平分半。驢背雪。橋邊看。牛背笛。村頭喚。也何須更
約。五陵遊伴。歷歷鈴聲隨。夢繞。怱怱帽影和愁亂。恰曉風、殘月好思量。江南岸。

陽關曲

一聲欸乃出前川。水路斜斜望眼穿。立盡風波郎不見。三叉路口兩來船。
前帆已入白雲堆。水尾山腰更不回。蕩得春江長幾許。搖枝柔櫓便歸來。

齊天樂 醉蟹

鹿盧夜轉槽牀響。分明蟹筐纔脫。苦甚將糖。甘成久釀。芒角詫伊都出。滿盤瑩徹。便
築箇糟邱。也應清絕。信手持來。那知郭索與彭越。沈沈但眠畢。有酒人相對。塊
壘同說。愁已無腸。怨偏多口。可是獨醒時節。醉鄉風月。勝翦得蝦鬚。水晶宮闕。夢落
空江。一燈涼透骨。

采桑子

桃花廟口兒家住。只恨蘭舟。催散清遊。葉葉春衣水畫樓。柳邊新月飛來也。恰上梢頭。依舊如鉤。祇隔簾櫳不隔愁。

百字令

楚天屏障。被暮煙堆上。一重重紫。短景催人渾似箭。那更峭帆風駛。驛路疏鐘。漁家遠笛。幾點沙洲市。水仙祠下。離心吹滿蘭芷。誰念青翰舟中。瀟湘夜色。月冷嬋娟子。縱有塵緣。忘未了。怕檢豔詞香史。倚酒推愁。拋燈約夢。客枕寒如此。春江千頃。琅琊當爲情死。

長相思

繫蘭舟。送蘭舟。一派離心各自流。春江天盡頭。風絲柔。雨絲柔。點點春山隔畫樓。春人愁不愁。

菩薩蠻 舊縣道中

醉雲醒雨離亭宿。殢人楚夢屏山曲。細馬夜深馱。籠燈看殺他。楊枝長復短。妾意隨郎轉。郎自要銷魂。曉風吹出門。

浣溪沙 抵商邱

歷盡山程又水程。五更時節一鞭行。自扶殘醉到蒙城。灑灑桃花村店馬。濛濛柳色寺門鶯。好春如夢過清明。

南鄉子

春事已闌珊。一兩青鞋倦往還。記得故園風景好。憑闌。薺菜花兒單布衫。兀自掩柴關。芳草無多忍再刪。卻借一鞭樓上指君看。綠遍江南岸岸山。

金縷曲 送錢黃山之金陵

野店賒春酒。送君行。離觴草草醉中同剖。我輩浮名漂泊慣。只算桃人土偶。君去也。那堪回首。自愧家山歸未得。但一鞭、夢遶江南走。看帆影挂京口。遊梁入洛飄零久。歎年來、風懷減盡。鬢絲都醜。此去清淮淮上月。曾照玉人攜手。也未必、彩雲還有。

問訊桃家雙姊妹。道舊時團扇銷魂否。唱不了白門柳。

青玉案 聞蟬

無情碧到天涯樹。都付與、蟬聲去。小曳孤筇門外拄。柳陰天半。絲兒挂著。一寸斜陽住。蕭疏鬢影看看暮。只向人閒飽清露。記得停琴涼共佇。畫樓倚徧。曲廊立盡。腸斷無尋處。

聲聲慢 題陳最齋讀書秋樹圖

據梧舒嘯。選石彈棋。蕭閒好箇山莊。昨夜秋聲。是誰寫出歐陽。安排筆牀書卷。儘今番、消受輕涼。憑問訊。有幾多佳句。分付寒螿。惆悵故園千里。向青燈、孤館各自思量。畫裏相逢。細看不似西堂。牆陰願分一角。但朝朝、掃地焚香。吟坐久。任吹來、風葉半牀。

瑤花 詠美人走索

花梢霧重。柳腳煙垂。壓秋千晴晝。輕輕扶上。看驚鴻、來往襪塵生透。紅牆西畔。便悄

把、弓鞋量穀。不防他裙底留仙。天半瀟湘綠縵。有時沙鷺翹來。怕隔著秋江。眼波先溜。細腰如許。佩聲裏、愁殺伊家消瘦。銀河一線。等風定、月斜時候。問秦樓可有人歸。團扇招將鸞袖。

綺羅香 牽牛花

鹿韭庭空。兔葵砌滿。繡出秋容小圃。引蔓無多。竹尾亭亭初吐。掩芳景、花塢全荒。添韻事、藥闌重補。總輸與、爛漫春工。滿山躑躅夕陽舞。階前風露清絕。隔盈盈一水。又看河鼓。淚滴人間。籬落綴來無數。早架上、昨夜黃時。正牆頭、昔年紅處。除非約、天上匏瓜。曉涼同訴苦。

南浦 題秦端崖先生寒梅著花未畫幅

遠天如夢。恁荒寒、點出碧蕪村。依約江南歸路。昨夜逗春痕。報與枝頭消息。問窗前、小立幾黃昏。料空山孤鶴。月明無主。獨自守柴門。數遍旗亭長短。向天涯、我亦悵離尊。直待東風人日。清怨與同論。紙帳朝來依舊。怪石腸、不似舊溫存。莫圖中回首。

關山容易笛銷魂。

金縷曲

月轉華燈午。照條條、玉人門巷。圓期三五。春夢也多新樣子。綠暈紅圈無數。有走馬、章臺眉嫵。人影如雲催易散。六街塵、遮斷東華路。城頭角、忽悽楚。誰家院落傳簫鼓。更番番、楊枝新曲。柘枝妙舞。有客憑闌腸斷盡。一種閒愁誰訴也。枉殺、東風圖譜。料得寒梅應笑我。道今宵、不醉君何苦。蠟淚盡、筆花吐。

東風第一枝 詠醉楊梅

魯酒香濃。吳鹽色豔。爲他紅友傾倒。解醒獨夜心情。消渴幾生懷抱。君家味好。只病齒、人來應曉。倩楊妃、笑語梅妃。一騎荔枝休惱。記舊日、湖天放櫂。堆鶴頂、船頭多少。愁他肌粟生寒。累我脣朱看飽。柔鄉何處。且辦取、醉鄉同老。待明朝、分配黃柑。領袖洞庭春早。

八聲甘州 題繡像浣紗圖幅

織鮫綃一幅怪針神。奪過夜來工。是西家村上。天然圖畫。出水當風。洗罷茜裙歸去。人影亂流中。惆悵凌波襪。只似驚鴻。依舊春衫白苧。想當初妙舞。冠絕娃宮。恨蘇臺沼後。網得五湖空。待丁寧。越溪兒女。更買絲。繡出小蓮紅。憑乞與。裁成花骨。別倩紗籠。

金縷曲 題李未菴梅窩圖

誰翦鵝谿幅。是江南、一堆疏影。繭窩新築。比侶何郎官閣好。家在玉山之麓。愛檻外、亂峯斜矗。祖笏滿牀書滿架。坐萬枝、香雪中閒讀。只此事、羨君足。年來我亦思茆屋。最憐他、莫寒時節。幾竿修竹。依舊綠蘿奩裏月。不分縞衣同宿。有夢也、碧天成各。此夜定知花憶我。背東風、獨自吹橫玉。春正在、畫屏曲。

沁園春 冰條

漏斷瑤天。甚短長條。丁丁不休。詫十三雁柱。參差隔院。一行鴛瓦。隱約當樓。借水同膠。和雲並櫛。粉淚闌干界未收。斜陽外。又雨淋鈴曲。訴出閒愁。紅牆隔幾番遊。有

無數珍珠不上鉤。記朝寒護處。卸銀絡索。晚妝洗罷。敲玉搔頭。遶屋重看。巡檐忽笑。尙憶劉叉舊句不。超超著。只尋常酒債。借汝來籌。

又 冰花

小樣壺冰。顆顆勻圓。天花散纔。卻分菱四照。明波作骨。爭梅五出。豔雪成胎。刺水文輕。鏤雲瓣薄。也費天公幾許才。憑彈指。是浮漚世界。點化重來。年時翦綵樓臺。每背卻東風憶幾回。有玉琴面古。七條痕裂。銅瓶膽小。一片紋迴。畫只宜脂。唾曾化碧。除是春人出手裁。闌干底。訝江妃微笑。頃刻都開。

又 冰蠶

小小冰壺。我愛先生。生來水鄉。恰蜀薑點上。齒尖耐冷。吳橙擣罷。爪甲留香。醯味輸雞。鹽形笑虎。腐盡書生寸寸腸。清涼界。只酸鹹風韻。世外難忘。年來清供山房。早熟過黃梁。夢幾場。憶畦邊買贖。庾園冷落。堂前劃斷。蕭寺悽涼。辛白誰知。卯醺亦得。且嚼梅花與共嘗。登盤薦。配寒宵覓句。咀出宮商。

又 冰鮮

冰上叉來。此樂如何。魚兮自知。訝壺天舊約。跳將玉尺。看山後夜。膾出銀絲。盤擬辛
開。穴原丙向。風味平分雪色。鮓頭銜好。笑一條冰上。留得相思。天寒誰網西施。向
玉水河邊。問釣師。勝桃花潭上。鱖初肥日。吳淞江畔。鱸正香時。斗酒沽來。尺書剖未。
分付郇廚。好護持。閒題品。傲郎官。仙鱸賜宴蓬池。

少年遊

題朱少仙天寒有鶴守梅花照

柴門流水占清幽。家在小橋頭。翠袖風前。縞衣月下。同夢到羅浮。如今畫裏相逢
處。指點舊林邱。鶴影疑君。花身似我。枉了幾生修。

水調歌頭

我愛徐騎省。歌曲換中書。世閒萬事戲耳。請看上場餘。三日居然僕射。五日居然京
兆。過眼幻乘車。呼我且爲馬。知子乃非魚。書咄咄。號左左。悟如如。清風明月無價。
此外不關渠。一石淳于也得。一枕淳于也好。其樂總于于。與我周旋久。吾自愛吾廬。

醉花陰 題吳蘭雪新田十憶圖 花院奉觴

花霧盈盈風豔豔。滿院宜春面。春也愛春暉。一寸斜陽。紅上春衣線。年來同是離巢燕。借畫圖看徧。甚日故園歸。天上桃花。吹落杯中片。

探春令 草堂索句

夢香庭院。是誰寫出。洗妝風露。恰殢雲無影。禁煙有約。管得詩魂住。尋春不道天涯莫。莫春歸又誤。恁闌干一角。冥冥澹月。照斷愁來路。

蹋莎行 柘塘春步

拾翠天低。蹋青路遠。橫塘日日春人滿。紅泥四面水中亭。綠陰三尺門前纜。午夢愁長。花風鬢短。春遊輸與春歸晚。當時塘上笑行雲。如今更比行雲嬾。

茶瓶兒 蕉陰茗話

簾閣春陰如釀。箇雲煙。有人供養。雲藍袖寫新詩唱。記得在。綠天天上。別來莫寒無恙。聽茶聲。易成惆悵。風前只看薰香像。早瘦到。篆煙模樣。

更漏子 桐陰讀書

整雲輕。檐雨細。一碧洗桐天氣。攤竹几。坐茶坪。嫩涼衣上生。蛩吟院。烏啼館。秋夢比秋更遠。聽漏點。和砧聲。背燈愁到明。

風中柳 蘇山秋望

小小香蘇。占得幾分紅旭。便秋林也如新沐。蘇臺山麓。蘇隄湖曲。更蘇門、嘯聲堪續。舊盟還在。指點數閒茆屋。到而今、倦遊應足。蘇僊清福。蘇卿高躅。倩蘇娘、織成圖幅。

漁家傲 石溪鷗伴

天外鷺絲涼到頂。碧玻璃色成千頃。仙侶不來湖夢醒。搖秋影。斜陽紅破蓮衣暝。二十四鷗煙水迴。一灣舊雨堆箬箸。明日落潮歸定準。西風緊。蘆中人上漁家艇。

芳草渡 牛坳吹笛

煙嫋嫋。雨絲絲。敲笠晚。挂鞭遲。笛家風韻讓吳兒。君聽取。牛背上兩三枝。垂楊陌。

芳草側。著點牡丹深黑。憑入畫。更尋詩。孤村遠。斜日暮。立多時。

鬲溪梅令 煙隴探梅

一重春水一重扉。思依依。好在東風庭院。見梅妃。綠苔生臥衣。隴頭人去是耶非。

夢稀微。夢到和煙和月。小疏籬。翠禽三兩飛。

臨江仙 稻田聽水

萬綠平畦堆罷亞。門前看飲吳牛。煙橫雨直不曾休。水田涼處。人影澹於鷗。泉韻

泠泠高枕好。當時我記清遊。思量多半恨扁舟。五湖歸夢。飛破稻香秋。

金縷曲 題陳迦陵洗桐圖

卷裏秋聲送。好蕭閒、梧宮如水。碧天初凍。潔到倪迂須是癖。髯也風流伯仲。此意只、

雲郎相共。圖中洗桐人。即係雲郎。偷汲井華三兩尺。正庭前、抱出先生甕。疏雨滴。玉

階縫。百年彈指槐南夢。猛思量、迦陵仙鳥。幾場吟諷。墨魄騷魂淪落盡。賸有雲煙

堪供。底處覓、胡牀三弄。喚起王桐花一曲。圖有漁洋題句。問清聲、可似當時鳳。歌已

闕。飲須痛。

水調歌頭 寒食過北蘭寺

一百五寒食。七十二長亭。他鄉今日何日。踢遍亂山青。指點北蘭蘭若。驀入影堂深處。畫壁畫冥冥。竹外石泉響。中有冷煙停。桑梓憶。松楸恨。恁飄零。孤兒淚灑何許。衰草沒遙汀。極目斜陽欲盡。又是晚鴉飛去。點點古愁經。一路紙錢起。鬼火散寒星。

清平樂

萋萋春碧。踢破青鞋色。客裏欲歸歸不得。一路雨斜煙直。東風挑菜誰家。酒壺且醉天涯。不見春人家。上年年紅煞桃花。

望湘人 櫻桃

借噓霜壓樹。蜀豔登盤。櫻厨風景堪補。襪鞮堆殘。珊瑚敲罷。零落絳珠無數。拈不勝圓。寫還愁破。三三五五。倚東風、莫打雛鶯。留飼小窗鸚鵡。四月江南朝暮。正綠陰青子。有人低訴。算水國相思。紅豆拋來應苦。待攜翠袖。更停銀甲。翻出魏宮新譜。喚

白家。樊素重來。一點歌唇輕吐。

闌干萬里心。南徐道中

月落天涯長短亭。兩三家店帶春星。殘夢模糊酒未醒。一鞭停。山在江南樹上青。

菩薩蠻

秋衾不暖鴛鴦睡。離亭坐擁如花醉。含淚背燈彈。畫屏愁遠山。恁恁成惜別。冷了關山月。金雁驛邊書。鴈奴將得無。

又 金手山園林春盡圖寫悼亡意爲填此詞

留春不住看春盡。東風只寫春人影。人去在春前。那知春可憐。園林依舊好。一幅傷春稿。春去儘徘徊。落花和淚堆。

又 春曉

鹿盧井上銀瓶轉。東風卷地紅雲滿。深樹月微明。夢回聞曉鶯。苔痕青十步。總是經行路。莫近碧窗紗。有人愁落花。

天仙子 米樓自楚中歸屬題蓮衣卷

落盡蓮衣紅十里。鴛鴦夢冷秋煙裏。有人天際蕩舟來。愁不已。西風起。月明夜弄瀟湘水。

清平樂

烏啼人悄。清淚知多少。殘夜鬢絲飄不了。一百八聲鐘曉。鈿釵誤盡塵緣。瑣窗空泣嬋娟。落得燈花都碎。如何秋夢能圓。

一萼紅 蔡浣霞湖樓煙雨圖卷

倚樓窗。甚迢迢波影。綠到舊湖鄉。界白成煙。飄青作雨。抵他半幅瀟湘。知耐了、多番吟眺。只留雙、冷眼付鴛鴦。十二真珠捲來天際。應怕思量。我亦夢魂飛去。便山腰水尾。都是迴腸。鷺頂千絲。鷗心一點。等閒逗起淒涼。擬準備、風前蓑笠。問故人、幾箇在漁莊。空對桃花潭色。憶著汪郎。卷有汪竹素填詞

沁園春 畫叉

讀書人來。是耶非耶。簾。界空。恰秋屏閣上。斜連。丫烏。春山樓角。誤響丁東。小字呼
鴉。輕身比燕。隔院秋千上。幾重。爐煙畔。配八叉敲句。一倍玲瓏。依然禪榻絲風。悵
當日真真不再逢。便拓殘鵝絹。旋昏古綠。懸來蛛網。只冒輕紅。隱霧猶花。連雲似夢。
放入荆關一幀中。休吟眺。怕江南到眼。關上房櫳。

子夜歌

枇杷樹底留春住。櫻桃花底催春去。去住不勝愁。可憐春盡頭。清遊渾未省。直到
春城冷。絲雨畫樓垂。玉郎歸未歸。

桃源憶故人

春衣一桁閒庭院。簾底秋波橫滿。少箇箇人來卷。隔了蓬山遠。梁塵封處歌聲斷。
歸燕雙雙誰管。欲借玉笙長短。吹得東風暖。

邁陂塘 陶鳧薌秋舫圖

怪空江。蘆花飛斷。白鷗還弄秋影。秋來一幅悲秋譜。都付水天消領。三尺艇。更添段

斜陽紅破離亭暝。客愁誰省。正高臥滄浪。幾家漁唱。聲在釣竿頂。憑招隱。指點楓橋煙景。吳波隔了千頃。輕眠淺醉。年年慣。風笛可能吹醒。風又緊。怕小住鱸鄉。歸信都難準。峭帆孤引。早新鴈橫空。兩三行字。箏柱落淒冷。

清平樂 吳白庵蒔菜園

蹋青隄畔。兒女平分半。挑菜歸來香不斷。黃蝶滿頭飛亂。園丁何苦天涯。風風雨雨橫斜。買得一鋤春去。還山且種梅花。

江城子 繡鳳圖爲蓮裳題

春閨線影日初長。莫思量。儘思量。拆得雙雙紫鳳。甚心腸。鍼又欲拈拈又放。須不是。睡鴛鴦。年年苦說嫁衣裳。沒猜詳。試猜詳。要向誰家笛裏聽求凰。添段迴文能織否。封錦字。問蘇娘。

翠樓吟 胡城東六安舟次得絕句四章風格清絕友人爲寫其意余賦此詞

鴈外雲濃。鶉邊墨淡。秋光橫抹林表。長淮來短艇。消受得、白蘋風飽。共誰吟眺。只一

兩三家。水迴煙遶。柴門悄。打魚人去。釣絲空裊。誰料。畫裏相尋。有荒汀斷岸。寫儂行藁。舊遊渾不是。早放鴨。船都歸了。夕陽多少。便紅殺離亭。不成霜曉。傷懷抱。憑君細看。鬢先君老。

揚州慢 答董琴南寄懷

酒薄催冰。燈深釀雪。空庭惱亂荒雅。恰故人書到。一笑破梅花。記橋下、春波別後。橋都斷了。煙柳空斜。待思量、影事回頭。隔幾重紗。書幃琴南齋名何許道。藥爐伴過年華。便茂苑迴黃。蕪城慘綠。各自天涯。還恐寒江凍合。今宵夢、流不歸家。問曉風、隄畔何人替拍紅牙。

風蝶令

鏡水生新月。簾波蕩遠天。思量只在晚風前。多恐楊枝、入抱便成煙。替我扶殘醉。從他笑獨眠。分明心事寄三絃。難道不曾、雙得不纏綿。

風馬兒

園亭雪月夜溶溶。正花也惺忪。人也惺忪。宰地簾鉤只當夢兒逢。重重絃上春鶯語未終。便鈴也丁東。珮也丁東。疊得紅箋親把小名封。冬冬。

浪淘沙 天寒倚竹圖卷爲王鐵舟題

湘雨一枝枝。若箇風姿。看他袖薄費禁持。眉到秋來容易鎖。莫放秋知。兀自爲誰癡。小立多時。碧雲無路寄相思。應有離心天外落。吹斷參差。

醉花陰 舟過南塘煙水合 沓江南春影如在夢中樂子蓮裳爲話昔年繫櫂

事惘惘兮余懷也

天外層湖湖外渡。渡口南塘路。塘水太無情。流過門前。不許鴛鴦住。岸柳荒寒三兩樹。沒箇尋春處。懊惱是紅船。不載春來。載了春人去。

減字木蘭花 過高郵

酒旗風色。寫出秦郵天似墨。一樣湖波。過得江來綠幾多。春寒如許。鴈櫓聲聲空外語。響斷漁榔。今夜吟魂宿水鄉。

百字令

旗亭燭短。向清尊照破，離愁千疊。泥樣心腸收拾盡。苦爲閒雲相憶。柳絮誰家。桃花無主。不似春時節。篆灰易冷。玉釵一夜敲折。當日扇角題名。圖中寫豔。抵死禁離別。應有東風知我恨。吹得鬢絲成雪。隄月尋歌。橋霜約夢。溝水空消息。鈿箏何許。鴈行三兩難覓。

又 河閒道中和蓮裳韻

南雲停徧。伴離程只分。月殘風曉。已是蹋青時節。近可有野花能笑。破寺猶鐘。頽樓罷角。啼得荒雅老。憑高休望。亂愁積似煙草。底事壚畔琴心。窗前箏手。幻影都收了。畫壁人來頭漸白。蠟淚那堪重掃。冷酒燒春。殘灰撥夜。腸逐車輪繞。玉鞭搖斷。柳絲牽恨多少。

又 趙北口疊前韻

十三橋畔。似江南新水。蕩來春曉。添上軟紅塵一路。總被白雲閒笑。柳髮全髡。槐心

半死。斷送行人老。羨他漁舍。短蓑眠夢芳草。卻憶南渡倉黃。北征慷慨。往蹟煙銷了。今日堠兵無箇事。臥看酒旗低掃。塞鴈衝寒。昏鴉接影。落日河聲繞。蒼茫立馬。古愁飛下多少。

昭君怨

爲李白樓題鴛湖並載圖時客揚州

打槳碧湖心裏。煙雨滿樓飄起。鴛夢一時雙。嫁文鴛。

三十六陂秋淺。七十五亭天

遠。嘉興至揚州七十五驛無奈又西風。憶殘紅。

醉花陰

邗江郭外感舊作

細馬春衫風色冷。煙雨催成暝。約略幾重門。那日聽歌。有箇黃鸝請。吟鞭半繹斜還整。喚不春愁醒。愁外是春山。山外桃花。寫箇春人影。

摸魚兒

花朝偕青士藕船泛舟西湖

甚東風湖心亭下。綠波日日吹縐。冷煙疏雨模糊甚。釀出心情如酒。尋渡口。是雙槳飛來。恰恰鶯啼又。替春僂僂。有一道裙腰。踢青歸去。草色總成繡。花生日記。天

涯攜手。落花閒趁衫袖。樓頭不獨春人老。只看春山都瘦。惆悵久。賸一樹桃鬢紅到。斜陽後。客魂斷否。更天際闌干。斷無人處。搭住幾絲柳。

高陽臺 秋日重過補蘿山房

蕉格臨書。苔文讀書。閒門最好深深。空谷人家。殢他翠袖寒侵。商量多少營巢燕。占東風、只有紅襟。替沈吟、花未闌珊。竹未蕭森。五湖憶著閒生計。怨鉛華流斷。芳訊都沈。一綠鴛波。等閒圓到鷗心。闌干只合蒼鶻倚。怕他時、煙夢來尋。病恹恹。無限清愁。譜入瑤琴。

金縷曲 春莫偶步天橋歸途作此

吹上春蕪暖。是東風、替春料理。玉鞭長短。聽過錫簫芳思歇。枉殺六街絃管。問草際、蝶魂誰款。碧簾新鋪三兩尺。怪波紋、不似江南軟。流水外、馬蹄緩。桃花飄出宮牆。怨儘低徊、舊曾遊處。酒旗輕展。煙柳不由春作主。牽得一絲絲斷。有無數、曉鶯啼倦。人影如雲催易散。賸西山、簾額尋常卷。燕夢繞、楚天遠。

湘月 己巳三月八日夜集計夢室湘巖將之大梁離情惘惘爲詠遊仙客有

填湘月半闕者余次其韻得一解

冷冥冥地有仙雲一葉寄將芳思照見離人花下淚蠟影能傳心事寶篆蟠香清詞
鏤雪解得連環意吟成小立青鸞應矯雙翅問訊他日珠宮盟星咒月許我同遊
未只恐飛瓊飛去後寒甚玉樓難倚唐韻書空秦簫咽別嚼到紅霞碎天雞亂叫海
風吹夢無際

臺城路 用蓮裳韻爲周子春賦

相逢約略山南北定情爭說繁簿義甲彈銀芳庚刻玉月底曾修簫譜驚鴻飛度有
湖上人來一雙雙數半面垂楊曉鶯都怨卷簾暮周郎那時私語早鸞漂鳳泊準
備羈旅弓印橋頭爪痕闌角消過幾篷春雨者番圖取便喚起眞眞不堪重顧心字
香殘夜深熏得否

水調歌頭 爲王海村題湖樓秋思卷

是墨是煙水。人說是西泠。不分峯影南北。兩扇綠蘿屏。驀見故人題字。都作斷霞飛去。鴉點散零星。無數倚樓客。衫上酒風生。湖一面。山一角。儘消停。微雲中有佳婿。底事早飄零。二十四堆青冷。三十六灣紅退。七十五郵亭。飛雨不知處。龍笛晝冥冥。能聽越吟否。請賦浙江潮。平添幾許離恨。淚灑舊蘭橈。損了西施眉黛。瘦了東陽腰帶。紅樹也魂消。秋鬢已如此。愁照碧迢迢。僧樓磬。酒樓板。畫樓簫。借君圖裏尋徧。煙月太無聊。問訊同盟鷗鷺。亦有相思猿鶴。歸夢可能招。依約一聲鴈。搖櫓出三橋。

羅敷媚

爲屠琴塢題碧梧女士畫幅

無多粉墨蕭閒甚。花爲誰容。柳爲誰濃。照影分明落鏡中。秋風不管人憔悴。秋太疏慵。人太惺忪。綠怨紅啼似箇儂。

年時我亦飄零慣。唱盡江隄。夢盡湖西。風露生生怨別離。卷中一霎秋魂斷。墨也離披。粉也淒迷。坐掩孤燈不忍題。

綠意 爲吳蘭雪題蓮花博士卷

碧天娟淨。正玉蓮世界。畫闌閒憑。底事鴛鴦。和夢和煙。翻把水晶眠冷。尋秋不是春江路。瞥照見、浣紗人影。許鬧紅、時節歸來。飛入五湖雙艇。塵海風光閒省。算甚日換了。荷衣消領。鷺頂涼多。問訊西風。可似年時青鏡。郎心容易珠搖蕩。好分付、露盤擎定。怕橫圖、亂卷波紋。樓閣幾重催暝。

金縷曲

春莫偕樂蓮裳。湯雨生崇效寺看花和雨生韻

春恨銷何許。寺門深、綠陰陰地。撲來飛絮。牆角梨雲低徊遍。賸有殿鈴私語。吹一霎、冷冥冥雨。十里高樓天如墨。怎寒鴉、不帶愁歸去。驢背客。枉敲句。年時記。蹋瓊花土。最難忘、兩三吟伴。曉鶯啼苦。隄柳新來都折盡。何況白家蠻舞。飄不斷、酒痕酸楚。今日郵亭昏騰夢。怕征衫、淚也無紅處。空灑上、小桃樹。

湘月

爲黃花耘題三十六灣草堂圖卷

楚天如夢。冷清清、飛入半灣斜照。枉渚迴汀三十六。一曲一波腸繞。水約裙拖。風催簾卷。遣盡閒懷抱。騷魂何許。愁根種滿香草。聽說江上樓臺。湘娥倚處。淚雨無昏

曉。一點君山青礙眼。幾葉征帆歸了。斑竹飄煙。綠華乘霧。坐掩孤屏悄。鷓鴣啼過。爲君譜出吟稿。

聲聲慢

題胡夢湘夢遊圖圖記秋影樓舊游事也

橋霜斷白。溝水餘紅。分明影到秋邊。脈脈闌干。碧城十二遙連。湘娥倚殘清曉。問人閒、昨夢何年。從頭認、說黃絕入道。翠帔遊仙。記得宮鶯啼處。儘垂楊、世界抱月飄煙。山綠如眉。等閒吹墮樓前。三生縱尋簫譜。怕東風、不暖瑤天。重喚起、白門烏、飛上四絃。

邁陂塘

白秋海棠便面

恁秋來、闌干憑處。爲他白地腸斷。梨花落盡雲無影。誤了那回庭院。簾不捲。問春睡深深、甚日風吹轉。十分清怨。便玉唾壺中。舊時紅淚。難得一絲染。尋秋路。依約秋江人遠。曉妝如許零亂。銀牆西角冥濛月。無數冷煙低冑。秋不管。任踢徧閒階、石髮蕭蕭滿。露珠成串。算只有班姬。夜深還見。團綠畫秋扇。

清平樂 題改七香團扇小影

畫屏斜整。添幅輕紈影。是蝶是周渾未醒。一握雨昏煙暝。前身月樣團團。泥他四百秦鸞。便面相逢半晌。也應秋綠生寒。

邁陂塘 七香又屬題采菱圖

甚芳塘。圓波如畫。秋來偏可人意。荷花吹老蒹絲嫩。飄上半灣涼氣。煙艇繫。喚菱角同來。好與添雙髻。一箇幽思。好鏡畔尋香。壺中買醉。采采碧無際。年時事。拋盡明珠十里。吳歌才歇重起。鬧紅艇子歸來後。葉葉櫓聲搖曳。晚也未。早牽斷衫痕。夢冷鷗心裏。開圖料理。乞著片鱸香。補行蟹火。拾翠晚天霽。

一萼紅 爲手山題殿春詞冊

甚園池。一叢豔影。烘出冶遊時。藍尾杯深。綠腰拍緩。泥他青鬢絲絲。彈與幾痕清淚。怪輕紅。不上舊花枝。卻怨豐臺。將離時節。夢也參差。雨葉煙條何許。忽從君畫裏。棖觸相思。秋眼都慵。冬心獨抱。傷春空憶微之。依約當初庭院。問寒雲。樓角傍誰癡。

只合玉盤盛露。洗盡燕支。

金縷曲 爲吳思亭題復園紅板橋詩冊冊爲樊榭堇浦諸老題詠

眼冷平泉路。儘低徊、舊家庭院。昔年風露。新綠半篙紅一板。占斷水亭煙渡。算前輩、風流無數。五字詩成同脫手。讓山僧、提挈盟鷗鷺。珠唾落、碧紗護。吳郎領略閒細素。說前遊、雪泥猶印。劫灰都誤。衰柳斷橋何限好。換了蟹汀魚步。賸一卷、傷心詞賦。六十年來耆舊傳。怕磨人、墨也從頭蠹。伴歸櫂、水雲暮。

壺中天 吳香竺自粵東轉餉南來相遇邗江屬題春帆細雨圖卽送其由浙旋粵

海天淥處。被生綃翦到、一帆雲氣。分得清淮襟帶色。誰識箇中仙吏。滄月裝書。江風載酒。小占閒滋味。竹西歌吹。虹橋遲爾同倚。絕憶鶯脰吟紅。鴛心浴碧。亭長金風記。今雨乍濃。天外墨堆上。故山雙鬢。柳驛人疏。梅關鴈杳。客興方搖曳。夜來涼夢。不知流過灘未。

江城子 補題彥佐兄十八歲時杏花疏影小照

杏花城郭影冥濛。畫圖中。隔千重。留得笛聲，穿破小玲瓏。依約鬢絲禪榻畔，吹過了，卅年風。謝池一碧倩塵封。夢無蹤。太怱怱。我亦觀河面，皺怕相逢。彈與曲闌干外，淚渾不是，舊時紅。

高陽臺 題鄒茗香小照

柳髮堆雲。桃鬢照水。江城一碧吳天。卷幔看來，分明茶磨山前。筆牀硯匣閒生計，儘安排、桑苧當年。笑文君、鬢影隨風，吹落琴絃。畫圖絕憶平泉路，有湖陰斜抱，高樹樓邊。拋卻春山，空思淺醉閒眠。竹爐餘篆清愁在，訝峯頭、瘦了朝煙。寄吟窩，竹影蕭蕭，官舍如仙。

賣花聲 爲翁星原書美人鏡影

風色怨飛花。鏡裏盤雅。曲闌干角路斜斜。莫向影娥池上立，流去鉛華。花底豔朝霞。唱出雙丫。風光約略孟珠家。曾是別來三里霧，隔幾重紗。

邁陂塘 夜來香

悄闌干。曲池銷夏。碧窗洗盡凡豔。叢叢雅入羣芳譜。恰傍晚妝人倦。看不見。怪簾底
花花、葉葉渾難辨。夜來尋徧。正綠意生香。素姿抹麗。釵朵綴成串。閒庭宇。最好單
衫小扇。蘭畦不數新箭。更無玉唾壺中淚。小字靈芸爭羨。風一線。剛逗著秋心。不稱
宜春面。枕函壓扁。待魚子雙開。犀梳半掠。扶上曉雲顫。

百字令

唐陶山齋中有連理木瓜一本繪圖以紀余賦此闕

黃磁石畔。問瓊琚誰報。一枝連理。葉葉相當情正軟。硬語盤空無幾。並蒂花開。同心
梔結。大有檀鬪意。齒牙沁冷。瓦盆清供如洗。最憶矮几疏香。幽窗小雪。有箇人雙
倚。依約敬亭山下坐。酸甚客齋滋味。薄苦研茶。餘甜釀酒。且遣閒生計。海棠梢重。燕
中有海棠木瓜。添他風致搖曳。

臺城路

數聲秋鴈搖空櫓。江湖者番歸矣。梧葉風初。蓼花露晚。此處不堪凝睇。曲闌閒倚。只

舊夢重尋。軟紅塵裏。如此霜天。蕭蕭鶴背甚行李。湖鄉別來逾遠。算山腰水角。清興誰理。榆社炊荒。秫田酒薄。依舊客愁千里。補蘿屋底。問衰柳經秋。可勝眠起。漫數歸期。鵲聲簷外喜。

江城梅花引

最閒庭院有苔陰。畫中尋。夢中尋。不道小闌干角已秋深。曾是畫簾垂翠地。簾畔路。裊爐香。伴獨吟。獨吟。獨吟。思沈沈。故鄉心。故園心。盼也盼也。盼不到。石屋橫琴。枉了水如環。珮月如襟。只索挂帆江路遠。籬落下。宴重陽。菊一簪。

菩薩蠻

秋空一月中庭白。竹梢不定搖吟魄。繞樹忽驚鴉。捲簾河影斜。欲尋歸夢語。夢也涼於雨。莫唱定風波。風波將奈何。

齊天樂 寓齋七夕

銀灣流斷鉛華色。星期夜闌空渡。水淺橋橫。樓高幔卷。不記新秋來路。闌干迴顧。問

乞巧庭中。更誰調護。卻下簾波。不堪消受此風露。天街清景何限。賸閒情脈脈。蛛網黏住。笙約雲中。譜修月底。只恐緱山仍誤。匏瓜無數。算天上人間。客愁休賦。獨掩湘屏。珮聲悽竹戶。

杏花天影 唐栗生棗斐軒有駢杏一株余爲賦此

牆東閒畫相思影。正春到、文君舊井。一株連理。倩何人管領。只盧家、雙燕省。桃根艇。是誰嫁杏。笑此日、東風薄倖。笛聲飛過。向紅紅破暝。怕江南、酒未醒。

醉太平

栖香滿林。流鶯亂吟。泥他絮語窗深。是春風小心。空庭綠陰。低枝翠禽。怪來三逕。惜惜。有前時夢尋。

清平樂 簡女校書杜季蘭

疏屏曲几。人面來花底。依約隔花人可意。一翦橫波千里。偷聲小按玲瓏。簾鉤也自丁冬。欲譜杜紅兒曲。除非背寫東風。

湘月 追題阮山兄秋院填詞圖

金荃譜上。被詞人吹出。一痕湘月。風外鬢絲禪榻冷。唱入梁園殘雪。桐尾音空。蕉心響破。松鬣增盤屈。朝天夢裏。蓬萊何處瑤闕。賸有麝帕閒情。鵝笙活計。一種離愁鬱。秋院那知秋隔世。贏得秋懷超忽。簫譜誰修。笛家自按。悽斷關山缺。江南不見。聲聲檀板飛越。

高陽臺

題綠梅影樓填詞爲羽素女士賦

春影飄青。冬心束素。高樓只隔仙鄉。依約闌干。有人消受昏黃。翠禽啼破羅浮夢。問誰家、苔徑蒼蒼。數南枝、水驛書來。畫裏瀟湘。碧城十二閒拋卻。記年時老鶴。冷守丹房。背卻東風。圖中不省疏香。天涯一笛吹愁墮。讓詞仙、嚼出宮商。伴清吟、流水聲中。細咽寒簧。

又 題汪均之玉帶樓圖

鴈外雲淒。鴉邊日澹。不知何許吟秋。天際思量。有人倚遍高樓。分明海國漁家唱。雲

時閒譜入蕢洲。借松風、一片宮商。驚起閒鷗。華年似水，銀河夕數明星幾度。手卷簾鉤。欲炙鵝笙。如今綺語都休。天涯亦有門前路。恨旗亭、按到涼州。向圖中、添尺孤筇。結箇清遊。

邁陂塘 題戴竹友銀藤花館填詞圖

憶園亭、銀藤如畫。訪君曾向圖裏。年時簾戶惜惜綠。夏淺春深聊憩。花也未。約略是雙聲、疊韻初吹起。者般滋味。有菱角鬢嬌。柳枝妓儻。點綴此天氣。憑商略。麝帕鵝笙活計。箇人恰擁羅髻。笛中正唱紅紅曲。合趁秦樓閒倚。紈扇底。好借取後堂、絲竹分明記。秋風至矣。想海屋黃封。油窗碧暗。對鏡可人意。

念奴嬌 汪均之屬題荔支圖冊內按楊妃生日事

圖中微笑似當年。扶荔宮開時候。唐禁也知人病齒。未必楊妃依舊。鼓近催花。車遙擲果。記得長生又。沈香閒倚。添觴恰好深侑。聽說萬里楓亭。擘箋譜出。芳氣霑襟袖。十八娘來風韻好。只是白肥紅瘦。南海方甘。東風正苦。一樹容消受。萋迷望斷。天

涯草色誰繡。

翠樓吟 殘菊

籬落難支，簾櫳易卸。西風冷侵懷抱。黃花知更淡，正逕裏、霜痕濃掃。爲誰枯槁。想故里柴桑，不如前好。闌干繞。略同人瘦，夕餐偏飽。懊惱。菊枕詩名，有晉時明月，寫成行稿。細看禪榻畔，早一樣、鬢絲將老。晚香多少。待老圃尋來，秋都草草。何曾了。閒階泥醉，酒瓶顛倒。

兩同心 冬蕉

送瀟瀟雨，留得冬心。閣外響，借來春夢，砌旁路，滴碎秋陰。難忘處，一卷芳筒，綠字情愔。天際何處歸簪。敲過疏砧。歎扇影空將風拆，問書信，只分更深。窗前意，拚箇無聊，對雪沈吟。

珍珠簾 雪影

沍寒小閣留香住。拓窗紗、認取天涯來路。松頂正微茫，定幾番煙霧。十二闌干空際

迴忽飄到。化人仙步。延佇。正羅襪。凌波立。殘翹鷺。想見折簡當初。有梁園賓客。舊時詞賦。小坐佛堂深。恁一燈紅炷。聽說碧城千萬曲。又無數。風姨迴護。吹度待補入。織毫。卽成紈素。

玲瓏玉 雪聲

碎踢瑤瑤。想門巷一徑深深。竹梢漸折。墜來清響難任。莫管階前凹凸。任袁安臥處。傾耳希音。誰侵笑陶家。茶沸不禁。料得寒江罷釣。有漁翁一笠。儘意孤斟。冰箸參差。誤人閒。宮漏沈沈。還疑灞橋驢背。恰無數。尋詩客到。斷續高吟。且閒坐。入空堂。遲彈玉琴。

婆羅門引 菩提紗經冊

佛龕月影。坐來只隔一重紗。不知鷺嶺天涯。分得貝多葉葉。彈指與拈花。正聲聞幾許。細字橫斜。非耶是耶。笑彼岸。望曇華。照到圓燈夢破。異樣袈裟。方空何限。卽此是禪悅小名家。依樹底。當數恆沙。

邁陂塘 用稚圭冬至夜憶舊與琴南及綰銷寒衍石齋中同作

翦銀燈。銷寒清夜。閉關慵覓佳句。年時同選連牀話。一霎飄零成雨。愁幾許。正冷巷閒門。雪影渾如絮。聲聲柝語。更酒不勝杯。吟難向硯。那得舊情趣。真飄泊。回憶曩時伴侶。鴛湖鶴市歸去。南中儘有尋詩興。祇奈天涯無緒。書寄與。道三兩晨星。以下多楓樹。夢無重數。只汾雁高飛。藕耕衡帆遠挂。向亭猶是望煙霧。

菩薩蠻

玉笙吹處高樓遠。經旬不放遊絲展。柳外喚新鶯。捲簾春一聲。妝成聊對鏡。鏡裏窺端正。且莫倚闌干。闌干正暮寒。東家姊妹過三五。相邀陌上喧簫鼓。生怕踢春陽。恐他春斷腸。雙雙新燕宿。絮語泥初築。坐久拓窗紗。未應愁落花。

年來春鴈書難定。王昌消息渾無訊。近井莫窺妝。東鄰正隔牆。爪痕深劃竹。遠步尋空谷。且自颺春衣。等閒蝴蝶飛。

春旛綵勝門前颺。紙鳶忽起從風上。不信已天涯。小樓無數鴉。空階閒鬪草。怕得傷春稿。歸去夕陽斜。柳絲底處家。

燈花一笑金錢擲。陰晴已卜春堪識。明日曉光晴。簷前聽鶉聲。春魂如酒漾。獨坐梅花帳。特地下重幃。春人和夢歸。

秋霽 借申受姪過趙象齋年丈晚香亭訪菊

山徑秋高正香晚。亭邊護菊猶影。綠意迴闌。紅情點砌。步到這般閒冷。筍鞋斜整。壁閒畫古真堪隱。只怕是、簾卷黃花風信。夜來緊。當日便見、一二園丁。汲水煎茶。牽夢初醒。到而今、攜將禪榻。繡囊慵倚更消領。想殺東籬斜照暝。煙外雲外。待招遠客歸來。折花尋索。借遊絲引。

摸魚兒 衍石同年將遷居於西城根宅中有小齋名之曰鴈影齋余爲先填

此詞

望潭心峯峯回雁。天涯吹落清影。門前櫓語搖空響。恰見幾行斜整。雲外引。正字字

憑虛鴻爪飛還緊。雪泥誰省。是漢帛封來。秦箏彈斷。處處更孤迴。長安住。題塔年來漸冷。不知仙掌曾準。近聞戶口都流蕩。城畔者番消領。歸思醒。記江上銜蘆。伴侶方悽警。嶺旁看嶺。想目送天邊。心牽塞外。獨立到昏暝。

慶春宮

去臘衍石贈稚圭水仙數本。花事既畢。緘置牆角。久且忘之。雪窗偶一檢視。抽葉已寸許矣。用碧山水仙詞韻成闋。余亦和之。

銀蒜簾垂。玉蔥檻亞。隔年曾見微雪。牆角塵多。籬邊石冷。香心寸許堪捻。水僊祠下。想羅襪凌波話別。空餘粉本。一望亭亭。佩影都徹。花房小劫。怱怱根葉多生者。番清絕。黃淡將吟。綠肥入畫。佇待風前成結。移來磁斗。莫便放。簪頭易折。春泥擁去。留伴窗紗。歲寒停月。

邁陂塘

題水繪園金姬人畫幅中寫繡毬詞一解

甚江心湘中閣畔。年年水繪如畫。春來已是漫天絮。不道拋毬新罷。衣正挂。恰想見當初。圓玉魂應化。定情纔話。待喚紫雲來。唱楊枝去。樹底繡還暇。休園事。來鶴閒

亭會迓。蛟門舊日聲價。謂汪蛟門贈詩事。分明小宛重評過。值得扶來裙袂。深柳罅。聽幾處鶯喉。轉向東風罵。與誰來也。只翠蝶疼癡。紅蜻惜退。不許粉先謝。

浪淘沙 秋蟬

門外易斜陽。一片清商。殘聲還向別枝長。任是行雲留不住。繫了秋光。倚樹罷思量。扇底新涼。高槐古柳憶江鄉。薄鬢蕭蕭無定處。風爲誰忙。



立



調

張琦（乾隆二九——道光一三）

字翰風。江蘇陽湖人。嘉慶十八年舉人。歷署鄒平章丘館陶知縣。所至有循聲。案無留牘。善醫。民有病者。設局自診之。工詩詞古文。與兄惠言齊名。著有戰國策釋地素問釋義及詩文集。

立山詞

陽湖張琦翰風

鳳凰臺上憶吹簫

才起還眠。才眠還起。風簾靜押鑪香。恁別愁千斛。都付羅裳。舊日懽情多少。剛換得、今日淒涼。多情月。爲誰消瘦。減了容光。茫茫。幾番好夢。儘倩徧東風。不到伊行。想天涯雖遠。恁敵愁長。怪得影兒不去。偏只是、守著寒釭。人歸否。梨花謝了。立盡迴廊。

鷓鴣天

小玉殷勤爲舉觴。十年風月舊橫塘。尊前流水桃花色。扇底春洲杜若香。歡易盡。意難忘。空餘幽恨繫人腸。高樓望斷天涯路。催得黃昏是夕陽。

暗香 梅

數枝清絕。曾幾番蹋徧。溪頭殘雪。照水淡妝。日暮佳人倚空碧。應怪東陽憔悴。新換了、星星華髮。念此夜、江北江南。都照舊時月。相憶。正默默。歎雁去路遙。望中鄉國。

瘦來玉骨。點點相思淚痕溼。剛是銷魂夢好。誰喚起、一聲長笛。再莫教、吹落也。有人細覓。

琵琶仙

漫駐雕鞍。那堪到、舊日尋春香陌。恰有多少相思。梅花正狼藉。誰爲譜、玉龍怨曲。攪散了一庭香雪。料得人人多應還是望斷消息。也不是、真個天涯。恁夢裏恁恁竟難識。分付一天愁影。與落花飛蝶。除是那、青春楊柳。應未知、淚點時滴。多管滴到明年。也驚紅溼。

洞仙歌 梨花和黃山

殘紅嫩綠。正牽愁無數。明月絲絲擁香絮。是耶非、髣髴照水盈盈。人不見、獨自一天風露。有誰憐、素質苔繡花茵。夢裏幽魂自來去。千萬點相思。一徑飛來。清淚溼、幾經風雨。要不識、儂心苦和酸。待細嚼花兒。較儂多許。

粉蝶兒 春雨和茗柯

已廉纖聽。昨宵枕兒上滴。一聲聲、替儂愁絕。是東風、生怕者、春魂飛越。卻由他、檐底共心頭咽。又廉纖看、今日簾兒外滴。一絲絲、做儂愁絕。是東風、更怕那、春人濃覓。卻由他、芳草、餽桃花泣。

水龍吟 瓶中桃花次茗柯韻

一枝休怨崔郎。從教留得紅雲在。依稀前度。笑痕嬌靨。天姿未改。寂寞黃昏。幾多情緒。看儂憔悴。儘東風陣陣。飄香吹絮。管不到、重簾外。恨煞歸期難數。借花枝、一腔清淚。絲絲斜月。儂心似汝。影兒都碎。殘醉扶來。花猶解語。伴人無寐。算明朝、點點飛紅。儂也、覷看他墜。

又 寒食次茗柯韻

燕兒昨夜飛來。偏他花信番番記。一番過了。一番憐惜。欲留無計。春爲花來。也應爲我。伴將殘醉。趁江南芳草。幽魂一片。又拋在、殘春外。只者柳絲花絮。是愁人、幾多清淚。東風多事。吹花開也。不將花繫。怕說蹋青。花兒見我。十分嬌媚。更蕭蕭暮雨飛。

紅。拚盡醒離人寐。

木蘭花慢 楊花次茗柯韻

正紅樓春寂。飛點點。鏡中看。恰慵避風簾。困黏香幙。嬌惹雲幡。依稀似曾相識。記昨宵、曾到夢魂閒。可爲天涯芳草。隨風卻又飛還。游絲千尺任飄零。偏不與遮闌。使謝了紅塵。依將流水。一樣單寒。空留十分春色。倚危欄。愁對夕陽山。賸有蜂兒蝶子。依依覓盡苔斑。

菩薩蠻

沈沈漏箭催銀燭。相思立盡闌干曲。門外木蘭橈。月明煙水遙。欲留應未許。爭忍相看去。清夜兩人長。休教錯怨郎。

賀新涼

亭午槐陰悄。鎮無聊、曲屏人倦。博山煙裊。爲憶桃花相思甚。恁又石榴開了。也不管、惜春人老。濃綠年年如帷幙。只愁儂、不是青青草。空向汝。淚痕繞。朝來望斷橫江。

表。最憐他、珊瑚瘦骨。天然嬌好。聞道紅樓愁還病。無復年時巧笑。又況是、秋風驚早。消卻天涯笙歌夢。更傷心、煙柳懸殘照。但極目、暮雲杳。

風流子

碧雲飛不起。房櫳靜、明月滿迴廊。想團扇頻攜。恰扶新浴。欹鬢不整。初卸殘妝。人微倦。一簾花影瘦。半枕玉痕香。曲曲屏山。誰憐夢杳。絲絲沈水。空惜煙長。銷魂惟是別。便榴房蓮蓋也。共淒涼。不信天涯倦客。只是相忘。待歸來何日。良辰三五。同扶虛幌。細說思量。捲起水精簾額。雙照流光。

江城子

一庭花月弄清姿。是相思。是相知。記否階前。對影折新枝。一樣精簾抵映處。空留得。月如規。開奩看取定情詞。不分飛。又分飛。儂已無眠。那有夢尋伊。最苦伊家今夜夢。尋不到。小樓西。

六醜 見芙蓉花作

悵秋光漸老。看點點、霜花飄足。庾郎正愁。愁來無處著。漫遶籬落。是處秋容好。岸邊深巷。見數枝幽獨。雕闌深護珍珠絡。困倚香雲。斜欹暖玉。相看更燒銀燭。恰清尊半醉。前事根觸。蘭舟初泊。記雙紅梳掠。坐對名花晚。情莫莫。燈前細語蛾綠。但回頭無奈。別離成各。西風緊。更催叢萼。料得是一樣心頭滋味。減來還惡。凝愁處。莫倚闌角。看一痕澹月微雲裏。依然是昨。

蘭陵王 看菊和黃山祁生

暮煙碧。秋在斜陽巷陌。雲屏護、小立新妝。淡淡濃濃。可憐色。年來似記得。曾識陶家舊宅。花重見、一樣淚痕。人瘦西風又今夕。蒹葭水雲白。歎歲暮誰憐。露重霜積。桃花只在春時節。縱恨攪香絮。怨黏芳草。三秋憔悴未慣歷。峭寒獨消得。幽咽。更追惜。算玉骨娉婷。恁耐岑寂。孤鴻嘹唳催行客。念一夜零落。幾人悽惻。頻來不厭趁綺萼。醉素液。

臨江仙

一枕西江江上路。起來消息茫然。秋風躑躅畫樓前。斷橋殘照。紅浸一溪煙。池上芙蓉籬畔菊。一般憔悴容顏。去時曾與算歸船。分明記得人共月華圓。

長亭怨慢 莫愁湖

恰愁與、寒潮並起。底事還尋翠。殘香膩。暢好清秋。天涯冷落，向誰是。一般風月，有多少、人愁思。獨自暮憑欄。空悵望、斜陽影裏。天際想佳人何處。可憶那時歌吹。啼痕染就。都付與、湖光山翠。縱寫盡、紅豆烏絲。怎傳得、儂心憔悴。看一片殘荷。零亂煙波雲外。

高陽臺 芙蓉花同人分賦

玉靨凝香。雲顰弄影。雕闌嬌倚娉婷。能幾時開。殷勤好護金鈴。春風自逐朝雲散。到而今、好夢頻驚。最憐他、一翦霞紅。一抹煙青。相思只憶江南好。奈塵封綺陌。草暗遙汀。多少清愁。憑誰與訴雙成。霜花夜夜飄芳徑。掩重門、卻下簾旌。怕明朝、滿樹飛花。滿地殘英。

滿江紅

明月飛來寒窗外。暮天凝碧。多謝得、黃花如故。伴人岑寂。醉裏不知紅葉落。醒來乍覺霜花白。歎人生、那得許多愁。長如織。人已去。情空結。雁已杳。函空設。者殘英點點。是儂魂魄。綠樹慣看今古恨。青山尙有鴻濛雪。問者番、濁酒向誰澆。悲歌徹。

洞仙歌

尋芳夢斷。乍相逢、蟬鬢。一翦湘波隔紅影。正春殘、無奈柳困花慵。人獨自、深鎖一庭香冷。有誰窺繡戶。斜月三更。依約春痕印芳性。何處說相思。燕子飛來。雙雙宿、輕魂未醒。拚一向、儂心隔天涯。莫容易教人認將鸞鏡。

摸魚兒

漸黃昏、楚魂愁斷。啼鶻早又相喚。芳心欲寄天涯路。無奈水遙山遠。春過半。看絲影花痕、冑盡青苔院。好春一片。只付與輕狂。蜂兒蝶子。吹送午塵暗。關山客。漫說歸期易算。知他多少淒怨。不曾真個東風妒。已是燕殘鶯嬾。春畹晚。怕花雨朝來。一霎

芳塘滿。嫣紅誰伴。儘倚徧回闌。暮雲過盡。空有淚如霰。

南浦

驚回殘夢。又起來、清夜正三更。花影一枝枝瘦。明月滿中庭。道是江南綺陌。卻依然、小閣倚銀屏。悵海棠已老。心期難問。何處望高城。忍記當年懽聚。到花時、長此託春醒。別恨而今誰訴。梁燕不曾醒。簾外依依香絮。算東風、吹到幾時停。向鴛鴦無奈。啼鶻又作斷腸聲。

醜奴兒慢

乍晴又雨。消得幾番風信。正一片、新苔似繡。細草如茵。胡蝶飛飛。不曾認得綠羅裙。淒涼庭院。海棠一樹。個是殘春。多少冶遊。鶯歌燕舞。吹暗芳塵。儘賸得、斷紅零粉。付與愁魂。相對天涯。輕寒漠漠。又斜曛。憑誰知道。鷓鴣啼罷。獨自黃昏。

菩薩蠻

橫塘日日風吹雨。隔簾卻望江南路。胡蝶慣輕盈。風前魂屢驚。闌干人似玉。黛影

分窗綠。斜日照屏山。相思羅袖寒。

銅壺滴盡流蘇月。紫騮嘶過垂楊陌。何處繫香車。海棠三兩花。開前波似鏡。門裏

參差影。照眼綠羅裙。畫橈開白蘋。

江花玉面嬌相逐。香風乍送凌波曲。瞥見鬢鬢低。棹迴情轉迷。釵頭雙鳳翅。照水

胭脂淚。碧藕折連絲。夢輕君未知。

風流子 別內

素波涼半魄。寥天迴。嗚咽上寒潮。正金榼酒空。燈殘花市。銅壺漏盡。霜滑溪橋。從茲
去。客愁江水闊。閨夢洛川遙。萊氏逸妻。傷情黯黯。左家嬌女。別淚滔滔。衝寒憑瘦
骨。儘西風獵獵。吹透征袍。我是江南倦客。豪氣都消。看煙江寂歷。蒲帆斜挂。沙洲低
暗。蘆葉全凋。離別頻年。經慣。莫問歸橈。

水龍吟 寒食

東風捲上疏簾。飛來雙燕呢喃語。依稀似說。禁煙時候。柳街桃戶。怕是蹋青。等閒黏

了。一身花絮。看長隄芳草。盈盈女伴。錯認作江南路。回首青山重疊。碧雲深。故園何處。可堪腸斷。昨宵曾到。夢中煙樹。又待消他。幾番憔悴。粉殘花妒。只憑教銀蒜低垂。休更見斜陽暮。

高陽臺 上巳

燕掠平莎。鶯捎細柳。煙痕點畫春工。贈藥人歸。長隄玉轡玲瓏。年時多少看花意。到花時、長自怱怱。又禁他、一樹飄香。一院飛紅。纖纖新月江南影。記迴廊綠徧。曲沼波融。此日浮觴。多應絮說萍蹤。天涯何處尋芳草。掩重簾、獨對蘭叢。有誰憐、幾曲屏山。幾疊眉峯。

湘春夜月 題畫扇有贈

最消魂。幾番俊賞成塵。只是細草青苔。獨自對斜曛。難道一絲香霧。和一分夢影。便了殘春。恰憑他彩筆。招將豔魄。好伴芳辰。脂痕欲滴。粉光還膩。一樣憐人。花若有情。應念我、淚珠盈把。搵盡羅巾。愁深別淺。算何曾、與說殷勤。也只願、者花顏常好。依

來懷袖。莫怨離分。

暗香 作平自南來任城將往泰安予既賦五言一章季旭填暗香疏影贈之

嘉其辭意斐然卽和二調予與作平十年來蹤迹離合略具矣

舊遊記得。對雙峯熊耳。一窗雲色。寶馬春郊。歷亂風花媚行客。蕭寺山泉試茗。嬌鳥喚、叢篁搖碧。正攜得、空翠歸來。還蹋洛川月。陳迹。空歎息。更趙北燕南。獨自愁寂。上東門側。攜手西風振歸策。衰柳斜陽古道。相伴汝、淒涼吟魄。待盼到、鄉國也。菊花似昔。

疏影

歸鞍乍卸。早蕭蕭落葉。催我行路。客裏關河。又是三年。蘭成空有愁賦。幽居正羨團圓樂。貧亦好、尊前兒女。卻怎生、輕狎風波。拋卻故園鷗鷺。十日爲君沽飲。唾壺儘碎擊。幽恨難訴。寥泚霜天。征雁還飛。試問住將何處。天門積雪山谿滿。可能見、蓬瀛珠樹。只何時、慰我離愁。共樂醉鄉朝暮。

燕山亭 題洛神畫幀

冰雪肌膚。綽約風標。姑射仙人如許。掩抑精光。含睇凝愁。牽惹柔情無數。天與娉婷。還更與、淒涼情緒。延佇。恰洛浦鉛波。一般傾注。不信當日江皋。解玉佩相要。遇他交甫。微波渺渺。獨自愁余。含情待將誰訴。如此年華。更消得、傷心幾度。知否。空目斷、桂旗翠羽。

水龍吟

題落花人獨立微雨燕雙飛小照

隔花人去迢迢。佳期悵望。知何許。重門掩卻。淒涼獨自。空階凝竚。燕子歸來。偏他忍看。一天飛絮。算春光九十。誰曾消受。都付與、風和雨。一掬傷春鉛水。對花前、幾回傾注。柳絲恨短。榆錢恨小。縮春不住。最是多情。如茵芳草。青青如故。只一枝素手拈來。也慰得花遲暮。

疏影 畫芙蓉

淒清露井。恰幾叢豔粉。波面嬌映。誤了春人。碎了秋心。孤芳獨倚清迥。臨風已分傷

搖落。又況是、霜花飄逕。好趁他、笑靨盈盈。描取一痕雲影。容易良辰懽聚。小窗共細語。低並妝鏡。半晌殷勤。便也難消。拚作一生愁病。等閒花也如人別。有誰問、舊時情性。只憑教、三尺冰綃。伴得庾郎淒冷。

八聲甘州 秋海棠

又珊珊、弄影晚秋天。一般颭西風。看牆根池畔。輕含玉蕊。低亞芳叢。迎著三更斜月。細步出珠櫳。嗚咽尊前恨。難話離悰。忍記年時惜別。倚朱闌一曲。綠鬢惺忪。恁階前行跡。都與碧苔封。悄霜花、飄來香逕。料有人、簾外泣殘紅。還應憶、沈郎腰瘦。獨自愁儂。

祝英臺近 和曾容有寄

意惺忪。情顛倒。醒醉幾時了。儂替花愁。花也應知道。怪來好夢連宵。都無憑準。又還是、惹將花惱。沈鑪裊。看他一氣雙煙。絲絲向縈抱。待結同心。畢竟同心少。恁能兩下柔腸。如香百和。便拚得、相思到老。

滿庭芳 羅浮蝶

粉暈脂痕。衣翻霞彩。一逕花下翩然。偶來遊戲。標格本如仙。占盡海天香靄。瑯嬛裏、自度芳年。憑攜去、玉臺金谷。隨趁碧雲還。塵寰。迴望處。笑他伴侶。惹絮捎煙。儘戀著三春花事。酣眠。一樣踟躕舞影。春過了。零落堪憐。爭似我、三更清夢。不復落人間。

虞美人

沈沈漏箭催香夢。和淚還珍重。曉來一逕亂瓊深。恨煞階前苔印已難尋。呼童掃取來時路。休遣湘裙污。昨宵佳約記分明。莫是河橋馬滑少人行。

菩薩蠻

年年蹋徧長安路。香車寶馬紛無數。老去懶看花。一窗紅日斜。清樽閒自酌。青鳥飛還掠。消息透春期。惜花人去遲。朱樓歌舞分嬌面。胭脂歷亂黏花片。飛絮最無因。濛濛亂著人。舊遊渾不見。惆悵前期遠。何處是歡場。午塵和夢香。

游絲不罨飛花住。東風又逐飛花去。滿眼落紅多。日長人奈何。笙歌喧隔院。忍聽流鶯囀。獨立夕陽時。問花花不知。

九華帳裏藍田玉。六萌車上鴛鴦褥。結束最宜人。誰憐別樣春。佳期渾未許。輕把

流年度。忍記海棠陰。誤他頭上簪。

雲裳掩斂凝嬌坐。千重自結菱蕤鎖。無語倚疏櫺。千回喚不應。清愁消未盡。顧影

憐青鬢。只合背人啼。此心誰與期。

仙姿合是神仙侶。何因偏向風塵住。淚眼問天公。憐儂是惱儂。相期花下醉。花也

同憔悴。約住玉連環。未妨雙臂寒。

南浦 和曾容

寶篆炷金猊。午晴初、靜押深深簾幙。幾日費相思。剛能殼、肯許來尋佳約。牆頭花影。漸移上兩重闌角。過盡香車多不是。難道未離妝閣。空階望斷斜陽。到黃昏獨自。漫傾杯酌。何處好句留。枉教我、冷卻半牀絃索。三更涼月。還相照此時寥落。禁得心

頭滋味苦。一遞一番嘗著。

又

鴛枕夢扶頭。睡醒來、猶是夜長難曉。心事正懨懨。疏窗外、來去亂鴉多少。趁將斜日。西冷獨自尋蘇小。前度簾櫳雙坐處。惟有博山煙裊。問誰解道。看花有溫香密意。偎人不了。衣上淚痕多。還只怕、句起傷春懷抱。相思難訴。又教添著愁心悄。料得玉人今夜裏。一樣爲情顛倒。

又

卽事感懷

冰雪冷關河。又驚心、到了歲寒時節。魚雁信沈沈。還是望斷天涯消息。千重離恨。不會細與征鴻說。窗外梅花應笑我。誤卻舊時華髮。殷勤惟有何郎。向琵琶絃上。訴將幽咽。淪落又堪嗟。分明似、庾信平生蕭瑟。鶯花燕市。卅年春夢成陳迹。眼底榮枯都莫問。且醉尊前明月。

永遇樂

寒鴉

一夜霜花。又教催老。多少豪傑。冷落關河。哀笳聲動。腸斷江南客。征鴻過盡。驚他雲外。陣陣寒鴉啼徹。歎飄零、天涯倦羽。一般寄旅蹤跡。西風淒緊。問朝朝暮暮。吹到幾時方歇。最是銷魂。斜陽漠漠。近黃昏時節。縱教盼到。東風晴軟。已是白頭如雪。還堪聽、鄰家思婦。鳴機軋軋。

摸魚兒 同曾容作

駐芳塵、斜陽庭院。到來猶抱幽咽。目成幸結同心侶。翻益愁懷千疊。凝望切。念繡被空牀、獨夜成悽惻。不堪細說。只除是窗前。碧天圓鏡。還共我孤潔。千行淚。莫向人前偷滴。王孫一樣騷屑。等閒富貴如塵土。百歲光陰駒隙。都磨滅。便身後浮名、何補當前缺。良辰難得。休遣酒杯空。玉筍銀筓。且與樂今夕。

又 有感

最魂銷、夜烏啼盡。角聲吹落殘月。參橫屋角霜天冷。北斗闌干欲沒。雙鬢白。歎荏苒、年華容易成衰歇。愁心似結。只踢徧隋隄。都無芳草。空自怨啼鴉。防身劍。漫飾千

金玉玦。如虹寶氣誰識。錦屏香暖人如夢。一醉屠蘇千日。情切切。算欲寄琅玕無奈。音塵絕。悲笳更咽。莫吹向沙洲。哀鴻宿處。驚起倦飛翮。

揚州慢 梅花

山外煙沈。溪頭雪霽。小橋竹屋人家。發垂垂一樹。向籬落橫斜。正昨夜、孤山夢醒。一層紙帳。隔了春華。恁幽香沁骨。天寒卻倚青霞。孤情自潔。算盈盈、素靨誰誇。是多少愁魂。迸將清淚。灑作冰花。還憶西洲鬢影。殷勤折、寄與天涯。只雲間明月。三更來照窗紗。

燭影搖紅 題劬起羣芳集豔圖

多事東風。無端綴就三春景。一番勝賞。一番愁惱。亂春情性。幾度酒濃香凝。最難消、絲痕絮影。玉人去也。那剎光陰。等閒拋勝。三尺生綃。輸他豔福都全領。海棠如夢。不曾醒。又踢芙蓉逕。老去心情自警。更日日、西風吹冷。爭教綵筆。貯得春光。十分妝靚。

永遇樂 和金近園送曾容之官雲南時余將出都故次章云云

斗酒十千及時行樂。今夕何夕。有客悲秋。臨風清嘯。滿座添騷屑。京華遊倦。煙痕夢影。搵盡羅巾淚溼。更者番、故人薄宦。忍將萬里輕別。平生意氣。儘消磨未了。還贖唾壺堪擊。溝水東西。分流到海。況有相逢日。何能更效。燈前兒女。坐向牀頭嗚咽。從今但、平原痛飲。把愁澆徹。

秋夜溟濛。橫斜北斗。殘月西沒。颯颯驚飆。披帷入戶。庭樹聲蕭槭。頭顱已老。年華過盡。心事不堪重說。總輸他、畫梁棲燕。一般酣夢清適。當歌對酒。待尊前起舞。壯志幾經消歇。如此天涯。何須更戀。燕市鶯花窟。不如歸去。吟鞭遙指。趁著江南紅葉。這次第、素心念我。又添淒切。

疏影 題照和慎伯

芙蓉十月。江波渺渺。添我愁寂。隴首雲飛。又是衡陽。三年望斷消息。長安懶向花叢顧。渾不是、夢中傾國。乍驚他、環佩歸來。一樣小時顏色。幾度酒闌燈燧。帶人半

醉裏私語幽咽。最是無情。畫轂雙輪。做弄人間離別。生綃妙筆。傳阿堵。看細步。珊珊如活。是耶非。待喚卿卿。翻令看朱成碧。

高陽臺 署齋藝菊數十本。雖無南中極佳之品。而璀璨可觀。遺世獨立之概。與秋爲宜。不以淒冷爲嫌也。兒女輩有作欣然和之。

姹紫含英。嬌黃吐豔。烘來十丈晴霞。絕世瓊姿。羞隨時樣鉛華。秋心自合秋容好看。枝枝弄影橫斜。最消他。一縷西風。數點霜花。當年陶宅曾相見。記樓前曲巷。水畔人家。坐對芳叢。心情絕憶天涯。百年幾度花前醉。勸深杯。樂事頻誇。更殷勤。幃倚雕闌。窗護輕紗。

靈

四

芬

種

館

詞



蓮



郭

磨

(乾隆三二)

— | — | 道光一一)

字祥伯。號頻迦。江蘇吳江人。諸生。少有神童之目。家貧。客遊。無所遇合。故鬱憤無聊。時寓於歌詠。所作詩詞古文。皆清婉穎異。有古人法度。著有靈芬館集。

序

昔楓江漁父爲詞苑叢談一書。余覽之而惑焉。夫流品別則文體衰。摘句圖而詩學蔽。花庵淫緝。爭價一字之奇。草堂唯殺。矜惜片言之巧。乖道繆典。鮮能通圓。是以耆卿騫翻于津門。邦彥厲響于照碧。詞至北宋而一變。石帚玉田理定而摘藻。梅谿竹山情密而引辭。詞至南宋而又一變。若夫吹律風騷。調鐘韶濩。寫纏緜于香草。寄哀豔于紅牙。則又遙原溶波。酌而不竭。婁斤般墨。高下在心。吾友郭子頻伽少習倚聲。長嫺詩教。走馬礮碣塞上。沽酒烏丸城邊。回腸盪氣。搖曳情靈。旣而端憂多暇。雜以變徵。蓋蓄隱而意愉。實懷愁而慕思也。頻伽本吳產。年來僑寓魏塘。魏塘爲昔賢歌觴之地。醋坊橋畔。腸斷東山。水磨頭前。情緣白石。近乃取所爲蘅夢浮眉兩詞。刊而行之。余讀之旣作而靳之曰。東澤綺語。家世番陽。草窗笛譜。淵源歷下。鳩以翦而語慧。杏必嫁而實繁。豈薄虹亭而心折。小長蘆釣師耶。頻伽笑而不答。遂書之以弁其端。錢唐友弟陳鴻壽。

自序一

余少喜爲側豔之辭。以花閒爲宗。然未暇工也。中年以往。憂患尠懽。則益討沿詞家之源流。藉以陶寫阨塞。寄託清微。遂有會于南宋諸家之旨。爲之稍多。其於此事。不可謂不涉其藩籬者已。春鳥之啾啁。秋蟲之流喝。自人世之觀。似無足以說耳目者。而蟲鳥之懷。亦自其胸臆閒出。未易輕棄也。爰鈔丙辰以前爲蘅夢詞。丙辰迄今曰浮眉樓詞。各二卷。序而存之。自此以往。息心學道。以治幽憂之疾。其無作可也。嘉慶八年癸亥。頻伽居士郭麐敍。

自序二

余自存蘅夢浮眉二集。意不復更作。而數年以來。學道未深。幻情妄想。投閒紛然。加以友朋牽率。多體物補題之作。共得如干首。不忍棄去。過而存之。鐵秀之呵。固所不免。休文之懺。竊或庶幾。亦自恨結習之難除。悔過之不勇也。嘉慶丁卯長至日。鉛山舟中。頻伽居士自序。

靈芬館詞

吳江郭 廖祥伯

蘅夢詞

風蝶令

礎入尖風響。燈留短燄紅。一衾幽夢斷孤鴻。正是可憐時候、可憐儂。鏡約眉痕外，琴聲鬢影中。王昌不合住牆東。贏得傷春傷別、恨重重。

一翦梅

莫愁生小鬱金堂。鬢點飛黃。機織流黃。曼聲一曲轉清商。塵繞歌梁。花顫釵梁。洞房對靄頓書倉。一丈紅蕖。只隔紅牆。題成錦字少人將。月自迴廊。人自迴腸。

菩薩蠻

垂簾柙放雙金蒜。卷簾腕露雙金釧。細雨溼芭蕉。綠窗人寂寥。好從簾外走。湘影橫波溜。珠子護雙鴉。兩鬢抹麗花。

花幡不禁封姨惱。碧紗窗裏春寒峭。雛燕落風前。嗔人不卷簾。 蹋青南陌路。又把佳期誤。寒食杏花天。魂銷似去年。

賣花聲

深院鎖葳蕤。青鳥飛遲。閒將寸紙寫相思。小研墨香銅雀瓦。自畫烏絲。 窗扇耀琉璃。月影迷離。也曾刻燭倚新詞。到得海棠新月上。便憶當時。

天仙子

小亭開宴梨花白。釵痕衫影湘屏隔。衆中欲避暗中來。仍小立。眼波瞥。有人見了紅雙頰。

一痕沙

落了梨花香雪。過了荒村寒食。負了去年期。可憐伊。 三月已將三十。記得去年今日。今日是何時。沒人知。

菩薩蠻 寒夜

熏鑪鷓鴣寒無力。清冰一片紅蕤溼。抱影就燈眠。雁聲寒一天。霜華催曉角。殘夢如煙薄。莫道夢無憑。夢兒還不成。

如夢令

漏水沈沈欲凍。煙鎖玉樓雙鳳。喚起小窗前。窗外花枝搖動。休送。休送。今夜月寒霜重。

疏簾澹月 寒月

澄澄寒水。漸浸入玉階。冷清清地。一個愁人獨自。披衣夜起。小窗瘦影初斜矣。怕難禁。清寒如此。梅花閣下。蘆花簾外。那人睡未。此際遣懷無計。況殘碁鄰篴。一時俱至。獨立閒庭。惹起幾番心事。孤鴻弔影霜天裏。驀回頭。月明千里。今宵酒醒。一聲霜角。清愁而已。

欽頭鳳 簷鐵

屏山曲。春眠足。丁冬驚起鴛鴦宿。重簾靜。重闌凭。月明如水。梨花無影。認認認。珍

珠箔。秋千索。瑤瑤攪碎簷前玉。呼人問。春來信。鸚哥報道。東風猶緊。聽聽聽。

荷葉杯

兩扇綠窗開了。含笑獨憑闌。羅衫花影兩相照。知道月華寒。

好事近

深院斷無人。拆徧秋千紅索。一桁畫簾開處。在曉涼池閣。潛行行過曲闌干。往事正思著。猶認墮釵聲響。卻梧桐葉落。

天仙子

難得一春常是雨。東皇也解留人住。芻尼何苦報新晴。簾卷處。橫波語。回身且過秋千去。

憶少年 寄徐江庵

黃花開了。兔花寒峭。霜華滿地。酒徒已星散。況酒邊羅髻。燕去鴻歸人病矣。也無人會此時意。蘆花徧煙水。作雪花飛起。

一痕沙 夢

雖是無憑無據。還勝不情不緒。萬一得相尋。且兜衾。尋到年時庭院。又被何人驚斷。鼠觸小屏風。也欺儂。

卜算子

簾外雨如煙。柳外花如雪。已是懨懨薄病天。又作清明節。昔日結如心。今日心如結。心裏重重疊疊愁。愁裏山重疊。

鷓鴣天

蚪箭丁丁有所思。纔眠重起故遲遲。燈花如夢人先懶。霜片無聲衣自知。寒料峭。病支離。闕簾明月一絲絲。小鬟不敢前頭說。又到闌干立盡時。

洞仙歌 贈女冠四九

綠瓊轉上。識雲英仙眷。六六屏風障三面。正黃花開處。青豆房深。重九會。算了又還重算。妝臺試偷戲。寒玉簪煙。十八雙鬟直千萬。真個肯移家。畫舸五湖。占七十二

峯一半。奈三度巫山夢都迷。央充使魚鱗寄書蓬苑。

南樓令 憶箭

銀漢一邊流。珊瑚四寸鉤。小紅簾卷起清幽。貪彈嬌鬢風露下。忘溜了。玉搔頭。纖
手弄輕柔。新聲曲譜修。笑檀郎欲顧無由。腸斷纖纖今夜月。照兩地。兩人愁。

珍珠簾 憶竹簾

愛他橫影參差滿。無人處。月地雲階輕轉。非雨復非煙。心字香一翦。挂起瀟湘天。接
水隔眇眇。橫波不斷。人懶任歸來。雙燕也還不管。絕憶晚涼池閣。那人剛梳洗。黛
眉猶淺。自起軸。駝鈎露一雙金釧。還似曲闌干畔。見夢多少。雨絲風片。人遠。想夜來
皓月也還不卷。

鳳凰臺上憶吹簫

香獸銷煙。雲魚卷彩。空庭簾影深深。正高窗不掩。驚起棲禽。窗外露華如雨。休小立。
滴透羅襟。最好是。新涼今夜。教疊香衾。惜惜者。遭瘦也。多病最文園。負了琴心。記

碧梧桐院。紅藕花陰。冰骨玉肌無汗。天如水。人墮瑤簪。年時事。沈吟至今。今又沈吟。
醉太平
風淒露清。參斜斗橫。兔華如水回縈。到簾紋自平。三更四更。無情有情。枕函殘夢
初醒。有金釵墮聲。

清平樂

水文廣簟。傍墮雙釵燕。花映枕函紅兩靨。羞被小鬟看見。何人驚起蘅蕪。起來手
弄荷珠。得伴片時香夢。翻教人羨青奴。

醉太平

竹風韻長。荷風氣香。待他月上迴廊。再圍棋不妨。竹風一窗。荷風半牀。憑肩笑問
檀郎。是今涼。昨涼。

一落索 荷葉

三十六陂煙霧。迷藏無數。采蓮人到不驚他。是睡著、鴛鴦處。等得紅衣脫去。無風

自舞。西窗窗外有芭蕉。似商略、今宵雨。

如夢令

行過重重樓柱。隨意低低窗戶。一樹碧梧桐。垂在小簾深處。小簾深處。簾外數聲殘雨。

清平樂

流鶯聲巧。春事江南早。心上愁如池上草。不覺不知生了。江南芳草先生。江南行客先行。歲歲年年遊子。風風雨雨清明。

好事近

一月不曾晴。早晚鶉鴉啼急。剛是緜衣換了。卻輕寒惻惻。年年羈旅送生涯。遮莫又寒食。試向雨聲多處。問杏花消息。

蝶戀花 垂絲海棠

山桃落盡酴醿早。積雨初晴。紅入紗窗曉。睡起美人潮暈小。笑渠一樣鬢欹倒。病

酒心情寒料峭。醒眼看人醉。眼看花好。人不茗芋花定笑。試然絳蠟花間照。

念奴嬌

晝長人悄。正深深、一桁棗花齊揭。甲煎沈香手自熨。心字欲燒先結。十里春風。一聲杜宇。三月楊枝雪。酒邊人遠。酒邊事向誰說。誰念作客天涯。寒氈茸帽。又落花時節。金盡牀頭酒價少。卻恨莫寒猶力。燕子飛來。斜陽何限。江上山重疊。蠟花情重。夜來遞淚如昔。

風蝶令

疏雨重簾卷。生香斗帳熏。夜涼長簟易相親。只有水精、曾枕墮釵人。籠鳥多羈思。驚猿易感羣。當年聽雨未銷魂。贏得而今、各自夜深聞。

浣溪沙

兩葉眉兒晚黛低。兩頭月子畫樓西。兩重心字小蘋衣。永夜雙星人獨立。半年小別夢單棲。斷無人處學含啼。

點絳脣 用夢窗韻

雀舫青簾。放船最好葑門路。藕花香處。涼露多如雨。既是吳儂。只合吳城住。君休誤。玉環人去。錦瑟華年暮。

鳳凰臺上憶吹簫

題姚棲霞女史翦愁吟同朱鐵門作

銀燭筵前。鐵簫庵裏。酒闌客正繁憂。出一編相示。絲格銀鈎。真是閒愁萬斛。問恁地、翦得卿愁。分明是芳心灰盡。紅淚還流。仙遊。一聲鶴唳。恐玉宇高寒。露冷風秋。悵不逢簫史。空怨秦樓。便是殘香賸粉。人間世、不合長留。宵深也。吹寒角聲。又滿城頭。棲霞游仙詩卻笑樓頭秦弄玉肯攜簫史共乘鸞臨終詩冷夢未成燈自滅疏鐘畫角

一聲聲

菩薩蠻 花朝飲袁湘湄秋水池堂

薄寒細雨城南陌。去年今日花朝節。楊柳一絲絲。河橋人去時。去年春在否。今日花朝酒。楊柳又依依。河橋未別離。

惜分釵

芙蓉衩。青驄馬。明蟬秀鬢人如畫。傍香奩。頓書籤。樓上新眉。樓外新蟾。纖纖。綵鸞跨。蘭香嫁。重來人到重樓下。淚痕添。粉痕漸。滿院楊花。一桁疏簾。慙慙。絲鸞

憶蘿月

雨斜風細。沈坐春寒裏。一樹小梅花謝矣。又是落燈天氣。閒中獨自支頤。暗中苦自尋思。驀地有人看見。低頭兜上鞋兒。

酷相思

乍是新正春未透。早門外、絲絲柳。奈脈脈、深情渾未逗。人見也、回頭走。儂見也、回頭走。有分逡巡雙勸酒。小語更闌後。問別後、蘭橈何日又。人去也、書來否。書到也、人來否。

菩薩蠻 自題小影

銀河隔得紅牆住。生綃留得紅顏駐。仰首問嫦娥。年年秋奈何。闌干十二曲。弱水

三千綠。獨自莫思量。思量人斷腸。

蝶戀花 花宮小院得斷縑。於壁月鬢風鬢髻未損。上書愛月夜眠遲。某月

日清環寫字跡妍媚。可念爰作詞以紀之

青豆房中花似露。圖畫春風零落。蝸涎蛀。不是深閨留絹素。調鉛肯把芳名注。相逢亦有前緣否。花不知名也。合殷勤護。鵲尾金鑪香一炷。夜深蘅夢樓深處。相

沁園春 唾

金屋阿嬌。霧沫九天。明珠颺風。記越梅如豆。華池先嘵。石華成紺。廣袖偏工。慢臉輕
偎。香痕偶著。欲拭還愁惱個儂。幽懽遂。又何須銀液。始鎮心忪。私書寫就。怱怱愛
猶帶脂香。著意封。正瓊簫吹徹。印留一縷。玉杯餘潤。飲過三鍾。巧溼文窗。戲塗粉蝶。
易褪櫻桃小。注紅重。簾下惹檀郎。驚認笑。是殘絨。

金縷曲 鴛鴦湖秋感

曉起西風冷。挂輕帆。孩兒橋下。謝孃門徑。落日鴛鴦湖上過。衰柳條條牽恨。問何不

當初折盡。岸草汀蒲都不見。但蘆花、蕭瑟風淒緊。橫一葉、釣魚艇。春人只把春愁省。誰管他、荒荒落照、疏疏雁影。去是春初來秋九。兩袖啼痕重印。只湖水、清流如鏡。鏡裏妝樓金翠換。況樓中、桂葉明蟬鬢。除漚鷺、沒人問。

清平樂

小桃如綺。命短東風裏。薄薄輕寒人半臂。且把簾兒垂地。春人如許年華。春閨幾幅窗紗。又是一番寒食。不知多少飛花。

賣花聲

十二玉闌干。六曲屏山。留春不住送春還。昨夜梨花今夜雨。多分闌珊。春夢太無端。到好先殘。袂衣初換又添絲。只是別來珍重意。不爲春寒。

壽樓春

看簾紋波橫。又日華花影。移上簾旌。正是連宵絲雨。曉來新晴。誰喚我、柔魂驚。是隔窗、春風流鶯。奈繡被香溫。羅幃寒峭。推道殢春醒。當時在、芙蓉城。有芳年小小。低

語卿卿。無奈朝雲如夢。落花無聲。容易別。難爲情。只淚痕、依然分明。問碧海青天。銀河有誰吹玉笙。

高陽臺 過流虹橋感葉元禮事

兩岸緋桃。一灣淥水。斷橋猶說流虹。舊事無端。牽人舊恨重重。多情只合相思死。更何須、眉語會通。太匆匆。春盡飛花。淚盡啼紅。高樓當日知何處。想房櫳宛轉。窗戶玲瓏。天遠瑤姬。彩雲去也無蹤。人間我亦傷心史。似流鶯、只哭春風。小橋東、新月天邊。依舊如弓。

卜算子 題王朗亭半舫齋

蠶殼短窗兒。斑竹疏簾子。絕似春江桃葉舟。細雨溟濛裏。安把木蘭橈。便好浮家去。少個低低小舵樓。少個人雙髻。

柳梢青

被冷香溫。自攜銀燭。掩上重門。隔院啼雅。上簾斜月。又是黃昏。羅襟別淚猶存。有

一半香痕酒痕。心字叢殘。酒人零落。直得銷魂。

祝英臺近 和龍劍庵韻

小屏山。雙畫燭。寂寞舊時事。過盡春光。尺素未曾寄。試看樓外垂楊。飛花飛絮。憔悴甚。樹猶如此。輕相棄。惟有六扇樓窗。曾同那人倚。煙鎖重樓。人更可知矣。料應一點寒燈。一鉤斜月。今夜裏。照伊無睡。

玉樓春

重重簾幙誰家院。東去伯勞西去燕。卻教相別一相逢。只許相思不相見。青絲絡馬香羅薦。別後音書和夢斷。黃昏怪底不勝寒。零落梨花如雪片。

金縷曲 題史赤霞翡翠巢詞卽用集中論宋詞韻

戲馬臺邊柳。送征人、滿城風雨。歸來重九。除卻新詞無長物。贏得千金享帚。問辛柳、一錢直不。尙有梅谿真同調也。十年空費屠龍手。長只是征鞍驟。閒滋九畹。三秀。度新腔。偷聲入破。嚴分細剖。天與豔情無豔福。那得笛牀歌袖。但伴我、秋燈如豆。

先向朋箋書左券。到相逢。一笑休開口。歌一闋。一杯酒。

清平樂 秦淮感舊

露臺水榭。天與初涼夜。霧鬢風鬢人去也。面面疏簾都下。去來苦恨匆匆。相思那得相逢。變盡舊時楊柳。秦淮一夜秋風。

如夢令

衣上微霜淅淅。門外輕寒側側。和淚出門時。又是月高時節。小立。小立。聽得一聲將息。

蝶戀花

鹿城半繭園有女郎以簪畫壁作一絕云月底纖纖扶婢來梨花如

雪點蒼苔紅蠶辛苦愁絲盡誰把同功繭擘開後書一毗字意欲題名而未及者作詞其後亦無使其無傳焉

青粉牆頭苔沒砌。誰拔金釵。畫破春痕細。羅襪纖纖來月底。有心人識相思字。天遠彩雲飛去矣。卿自何來。有個芳名未。料得欲題還又止。當時直恁懨懨地。

喝火令 題許校書清露瑤臺圖

鶴背吹笙下。橋頭步履通。雲鬟霧鬢太玲瓏。只恐五銖衣薄，曉起不禁風。好夢渾難覓。重遊未易逢。鬱金堂北畫樓東。記得樓頭一樹碧梧桐。記得碧梧桐外，兩度月如弓。

鵲橋仙

杏花風裏。梧桐鄉外。七尺燕梢齊播。玉人春病幾多時。直似此、鬢偏髻妥。員冰輕響。寶釵暗墮。知是曉來梳裹。有緣也算比肩人。只隔箇、船兒同坐。

清平樂

河橋楊柳。待我開帆久。三疊歌聲將進酒。忘了明朝分手。書窗六幅輕紗。東風一樹梨花。只有去年春到。去年人到天涯。

鎖窗寒

用片玉詞韻

蛛網黏花。蝸涎篆榻。那人窗戶。輕紗六幅。閉了一春風雨。記當時、欲行未行。夜闌呢

昵聞私語。又誰知此度。殘衫茸帽。重來羈旅。薄莫繫船處。正楊柳腰身。女兒十五。三眠三起。送盡燕儔鶯侶。問別來、如許長條飄零。似我還記不。傍東偏、一樹梨雲。見舊時尊俎。

清平樂 秦淮後感舊

燕兒傳語。人在西湖住。蘇小墳前芳草路。日日輕寒輕雨。秦淮望斷香車。誰知又到天涯。總是東風無定。如何只怨飛花。

夢芙蓉 題延嘯厓姬人小照

秋江江上樹。向芳塘移種。最深深處。並蒂連枝。雙影照秋水。石家渾漫與。仙城元有人主。六曲闌干。是屨廊香徑。非是浣紗路。誰滴湘江清露。殺粉調鉛。寫出名花譜。紅橋流水。初過夜來雨。畫屏深幾許。想應簾幙無數。珍重輕綃。有小脣秀靨。當面看題句。

清平樂 紅袖添香夜讀書圖

丁丁蓮漏。篆縷銷香獸。心字漸微蟲蠟瘦。催得冬郎詩就。人間良夜迢迢。勸郎書卷須拋。只有一枝紅燭。休教負了春宵。

暗香 水仙花

娟娟楚楚。正春人小極。芳心初吐。斐几紙窗。不受人間好風露。除是梅兄礬弟。還配得。汜人漢女。又那得。如此清寒。明媚又如許。庭宇最深處。有十二畫屏。曲曲低護。舊時記取。到此花開送人去。花信今年太晚。風又雨。輕寒重作。過了落燈節候。有人怨不。

清平樂 題金陵女子柳花詞卷

紅絲小研。小試齊紈扇。第一休嫌才地軟。人與柳枝同倦。謝家最擅才華。如何只詠楊花。怪底兒家夫婿。年年漂泊天涯。

浣溪沙 馬湘蘭蘭竹便面

澹墨傾欹落扇頭。紅蘭葉葉竹脩脩。紅妝季布儘風流。今日誰憐王伯毅。後來尙

有顧眉樓。爲伊惆悵寫銀鈎。

南樓令 盧竹圃小影

秋鬢也蕭蕭。秋庭夜寂寥。異鄉秋景最無憀。誰畫可憐人獨自。又畫出。可憐宵。何處作生朝。揚州紅板橋。有當年、公子風標。惜少吹簫人並坐。判我見。又魂銷。

蝶戀花 高竹筠小影

黃昏不下葳蕤鎖。簾幙中間。沈水微微火。銀鴨傍人人傍我。迢迢良夜銷磨過。聽我狂言君計左。有個人兒。切莫攤書坐。明月漸西花漸妥。燈殘香炮如何可。

菩薩蠻

窗外秋蟲飛不去。窗前秋色留將住。庭院是誰家。滿庭洗手花。露光團作雨。總是秋深處。可惜玉簪開。沒人斜戴來。

滿江紅 晚泊秦郵默禱露筋祠下倘乞順風當以平韻滿江紅爲壽如白石

生故事遲明解纜旗脚已轉敬酬一闋

十度秦郵。曾未展。叢祠瓣香。剛又是。水楊柳下。輕船繫將。盡日靈風。人不見。開門白
水本無郎。是誰家。燈火送迎神。歌九章。東方動。驚曙光。篙師起。理楫忙。見相風烏
轉。將飛未翔。去得順風來。順水聰明元是舊心腸。想冷然。一路響珊珊。明月璫。

清平樂

春陰如霧。又著重簾護。夢到當時郎別處。隱隱數聲柔艣。起來滿院斜陽。倚闌一
倍悵悵。走撲一雙蝴蝶。知他直甚心腸。

點絳脣

月函女史爲作草蟲扇頭

殺粉調鉛。病中寫出秋來意。一絲風裏。紅蓼花扶起。草草花花。添個蟲蟲媚。天如
水。露華珠綴。又溼當風袂。

滿江紅

呈座客用湘湄風雨對牀圖韻

雪白燈紅。當酒半。忽跳而起。不痛飲。有如此酒。有如此水。留客酒難頻。夜滿。分湖水
送離人幾。算人生。不合作同心。同鄉里。浮螳淥。釭花喜。朋與舊。兄和弟。便沈沈春

酌不能已已。病起尙存兒女態。醉來稍有英雄氣。得故人、滿眼酒盈尊。吾狂矣。

菩薩蠻

輕陰漠漠昏如霧。入春便有廉纖雨。遮莫試燈前。雪花飛一天。疏梅三四點。莫是春猶淺。走近小闌干。問他寒不寒。

買陂塘

題黃小松秋影庵圖用江玉屏韻

問詞人、馬塍遺跡。可餘花木深秀。小紅嫁後青春老。賸有蕭疏秋柳。宮一畝。讓黃九風流。開拓蜂房牖。歸田若後。怕老去悲秋。重來照影。水面似人皺。武林路。約賃梁鴻杵。白野航三兩能受。他時定遂移家願。莫遣白雲封守。都似舊。只鴨脚黃邊、添縛香茅否。來居客右。當集古編成。秋聲賦就。斗酒也須有。

卜算子

寒食出遊

一隻小瓜皮。兩岸垂楊樹。指點停船宛轉橋。曲曲彎彎處。定不留春住。那不愁春去。過了今年三月三。又幾點清明雨。

醜奴兒令

五三六點微微雨。開了梨花。謝了梅花。纔拓濛濛一面紗。玉階獨立思閒事。花在鄰家。吹落儂家。今日東風較大些。

月華清 詠丁香花

碎翦鮫綃。輕含雞舌。繁英枝綴如霰。百結芳心。慣向春風凌亂。算江南、花信更番。誰似此、香生色淺。幽怨。共芭蕉卷處。一齊斜颭。可惜雨香雲澹。少月影半窗。照伊清婉。丁字簾前。有個丁娘。淒斷。想春衫、繡上重重。怕寬了、舊時腰襻。簾卷。又惺忪碎影。小庭篩滿。

行香子

薄遊袁江同人爲設伊蒲供於青龍菴菴主爲其女孫名霞者乞字於余呼令出見曇花一見妙香四聞迦陵其音舍利始弗未足方斯相好也爰舉明如爲贈并貽以詞

青豆房邊。紅豆庭前。仙人子、生小嬋娟。問伊名字。合在瑤天。是花非花。霧非霧。亦非

煙。綺樣芳年。佩結飛仙。佛頭青、雲葉披肩。似聞我佛，爲說因緣。要十年心，雙鴉髻。
五湖船。

菩薩蠻

水田百衲雲如葉。薄羅翦出重重疊。生小不知愁。眼波先自秋。雨過雲不定。小語
防人聽。燒了夜香麼。昨宵涼露多。

醉太平 憚月仙夫人桃花扇面

深紅一林淺紅一簪。枝枝淺淺深深。是春風小心。寒漿細斟。清溪獨吟。憑他如墨
春陰。有前時路尋。

十二時 湘湄爲周校書畫桐屋夜寒扇面同賦一詞

秋宵燈火。秋衾魂夢。秋孃庭院。旁人那知得。說秋風團扇。流水小橋清且淺。比銀
河。算來還遠。思量一年事。只張星曾見。謂張校書繡

又 同湘湄夜坐

疏窗四面。秋霖一陣。愁人兩個。天涯已腸斷。況離情無那。桐葉初肥蕉葉大。說淒涼也無人和。今宵尙相對。怕來宵燈火。

菩薩蠻 湘湄索詞繡帕爲賦

鵝黃淺色揉蘭膩。唾尖絨舌愁滋味。破體作游絲。墨花如折枝。當年春雨句。和淚歸何處。但解說歸來。杏花春自開。

水龍吟 詠霞用張蛻巖賦倩雲詞韻

生來不學行雲。依稀似散。依然聚。分明瞥見。赤城初起。又還飛去。野鷺孤時。澄江靜處。天寒日暮。望高城不見。丹樓漸隱。又何況。彩鸞駐。說與仙人子道。要留他。罡風相護。不知天上。者般顏色。曾經幾度。秀便思餐散。還成綺。非花非霧。怕朝來一縷。出門難覓。作廉纖雨。

齊天樂 荻莊秋荷

翠匳一境平如拭。數枝點綴秋意。衣褪輕紅。佩翻重碧。又是一番梳洗。涼蟾初起。怕

炤見盈盈。玉壺清淚。風急雲輕。露華漸重。瀉鉛水。鬧紅舊事誰省。有斜陽一舸。雲葉雙髻。螢火光寒。蜻蜒翼斷。催老鴛鴦身世。煙波無際。且凍釀頻傾。曲闌峭倚。寄語閒鷗。奈厭厭宿醉。

河傳

春早。將曉。夢魂驚。落月殷勤。早鶯綠窗曙。光愁欲明。輕輕枕函釵一聲。一段綠雲扶未起。香不已。轉側隨郎臂。莫投懷。且兜鞋。慵來。斷紅紅上顚。

南樓令 題春人縮髻圖

春夢暈潮霞。春風褪臂紗。緩春愁、盤好雙雅。溜了金釵。佯不省。問開否。碧桃花。鏡檻者般斜。新妝略似他。只脩眉、人在天涯。尙著薄羅衫一件。簾又卷。太寒些。

菩薩蠻

一燈紅貼氍毹地。諸郎蠟鳳中堂戲。獨自下階來。玉梅開未開。誰移紅燭照。聽見人雙笑。直得小迴身。影兒如一人。

新桐院落。落惜惜地。斷無人到。陰天氣。手切綠沈瓜。一重方空紗。藕花開一半紅影。搖人面。只解遶闌行。隔簾聞笑聲。

惜分釵 有見

雙枝槩分流響。一江春水如天上。最風流。最嬌柔。貪看鴛鴦。忘了回頭。羞羞。花惆悵。人模樣。個儂未必全無恙。說前游。莫閑愁。山外青山。樓外高樓。休休。

菩薩蠻

金蟾齧鎖金梯滑。一重門外銀河闊。猶恐未魂銷。夜深聞剪刀。朝來妝未就。見了伴回首。回首莫嫣然。鏡中雙靨圓。

夜深一口紅霞膩。唾尖甜舌殘絨細。不肯繡鴛鴦。枝枝秋海棠。吳縣裝袖複。卻繡

鴛鴦宿。荷葉小於錢。要郎知可憐。

清霜微白黃花瓦。全家上冢逢秋社。特地教人知。紗窗燈上時。蘭姨智瓊姊。略識

人間事。送與蹙羅裳。一雙金鳳凰。

五湖船小才如葉。團圓並坐翻敲側。愁水又愁風。袖邊香唾紅。如何還倚醉。壓著儂裙睡。當面且由他。阿孃顏色和。

嫩晴天氣春陽動。鶯喉微澀歌珠痛。蹙損小眉痕。羹湯未入唇。刀圭分一裹。莫點

吳鹽可。只說是梅花。賺伊肯嚙他。

獼兒撼得人人起。枕函一片朝雲墜。慢臉笑投懷。夜來難出來。迷藏何處捉。人語

闌干角。莫道沒人知。被痕紅半池。

杜蘭四歲來人世。飛瓊不肯留名字。略說與排行。雪花薺蔔香。近來海水淺。尙有

樓三面。煙雨莫登樓。樓頭無限愁。

生查子

金雁畫橋南。碧玉人家小。種得碧桃花。昨夜先開了。不恨不知愁。只恨無人曉。念

得阿郎詩。句句能顛倒。

庭院轉光風。不省簾前開幾叢。只向謝娘頭上見。一翦。攏鬢玉釵顏色淺。

梅花引 虎山尋夢圖爲陳竹士作

岫如螺。水如羅。曾共驚鴻照影過。步淩波。步淩波。只問梅花別來相見麼。此中或有魂來去。茫茫不辨梨雲路。落花多。落花多。一路荒山月明寒奈何。

洞仙歌 有紀

華燈弄影照華堂如水。羅襪雙鉤見纖麗。傍中門低處。半曳霓裳聽佩響。又轉曲屏風底。星橋元不隔。一寸銀河眼底。千金露深意。便算比肩人。香逼春衣。渾未省、衆中迴避也。忒倚嬌憨阿娘憐。想全不周防。個儂年紀。

菩薩蠻

雲階月地春寒淺。迴廊曲徑穿行徧。微雨乍晴時。小桃三兩枝。東風吹不定。小颺雲鬢影。掩斂越羅裳。禁他特地香。

嬉春女伴嫌春早。乍晴時候游人少。喜未坼輕絲。晚風一陣寒。玉梅花下立。點得

春衣白。小妹笑人癡。滿身蝴蝶兒。

清平樂

小山窠石。徑窄衣香接。穿過長廊無氣力。坐定雲鬢微側。
重來不走長廊。花間難
捉迷藏。驀地一雙蝴蝶。等閒飛上羅裳。

河傳

香徑。人影。驀來前。桃葉桃根並肩。秋波欲流低髻偏。仙仙。一雙人可憐。
窵地鵝黃
裙色淺。尋不見。小立花枝顫。晚來風。忒匆匆。行蹤。落花埋一重。

百字令

幢幢燈影。是曾經、照過幾番元夜。火樹銀花剛一瞥。已是暗風飄地。翦紙心情。鬧蛾
身世。過了今生也。人間天上。柳梢蘭月初挂。難忘中酒時光。燒燈院落。有個人如
畫。衣上峭寒簾外雪。小坐早梅花下。碧海星沈。紅心草宿。說甚淒涼話。春衫依舊。淚

痕重疊盈把。

點絳脣

酒綠燈紅。座中有箇飛瓊許。弦將手語。幾陣梨花雨。長定相逢。還解相思否。臨當去。橫波一注。也直三年住。

齊天樂 金銀花

亂紅都逐流波卷。庭院翠陰成幄。麝眼籬方。鷺絲藤細。低冑曉涼池閣。薔薇花落。做夏首心情。春餘題目。裊裊柔條。又牽香夢到簾角。朝來風露猶重。有人初睡起。羅袖寒薄。葉底心知。花頭眼見。小摘冷香疏萼。熱嫌魚玉。又滿把蒸成。露珠如粟。配點雲龍。竹鑪湯正熟。

賣花聲 題畫扇

小鳳颺釵梁。皓腕先攘。是誰驚起曉來妝。問取木芙蓉上露。何日成霜。舊夢莫思量。滿鏡眉長。水精簾下有微涼。喚作春人渾不似。莫是秋娘。

乳燕飛 和湘湄作寄伯生

誰賦銷魂句。向天涯、吹花嚼蕊。偃風倦雨。我是江南賀梅子。莫問閒愁幾許。空記得、別離情緒。人自漂零天不管。但昏昏、薄霧惜惜絮。肯爲我、寄愁去。征車同出春明路。有當時、風懷酒膽。未諳別苦。細馬馱來人二八。醉裏憑肩低語。笑判取、千金贖汝。一別故人難見面。況鶯鶯、燕燕知何處。只此意向誰訴。

洞仙歌 爲吳珊瑚夫人題扇

繡襦甲帳。有當年珍偶。跨虎重來事依舊。向櫻桃湖上。寫韻軒開。平視慣、也爲洛神低首。人間與天上。何限佳人。脩竹蕭蕭倚寒袖。福慧此應無。螢火詩成。定小試、畫羅纖手。問何不、當初畫乘鸞。想霧鬢風鬟。見時還又。夫人詠螢云。月黑移來星一點。

風高扶上閣三層

高陽臺

鈴索判花。遊絲罥絮。送春淚滿輕綃。不見春歸。流波一夜迢迢。明珠十斛何人手。向

章臺折取柔條。可憐宵蠟照紅啼。明鏡紅潮。傳來語最魂銷。自說天桃命短。怕落花朝。重囀春鶯。知他何處樓高。三生杜牧關何事。爲曾經、掌拓纖腰。好無聊。四月時光雨。又瀟瀟。

賣花聲

秋水淡盈盈。秋雨初晴。月華洗出太分明。照見舊時人立處。曲曲圍屏。風露浩無聲。衣薄涼生。與誰人說此時情。簾幙幾重窗幾扇。說也零星。

菩薩蠻 北固題壁

青天欲放江流去。青山欲截江流住。儂也替江愁。山山不斷頭。片帆如鳥落。江住儂船泊。畢竟笑山孤。能留儂住無。

唐多令 題畫仕女

深院玉梅天。春風錦瑟年。似驚鴻、留影翩然。手擘薛濤箋一幅。怕遺墨、澹如煙。一枕小遊仙。三生小比肩。有揚州、舊夢誰圓。問是夢中曾見麼。笑已是、十年前。

疏影 題素娟錄事畫扇

春愁滿紙。看微雲澹月。夜寒如水。記得前宵。葉葉輕衫。同在曲闌干底。素娥要鬥嬋娟影。笑一樹、海棠濃睡。得知他、畫作乘鸞。直恁冷清清地。料想閒宵弄筆。怕紛紅駭綠。無此幽致。朱鳥窗前。殺粉調鉛。自滴方諸清淚。懷中一墮三生夢。又碧海、青天無際。能禁他、幾徧團圓。老卻畫中人矣。

漁父詞 有紀

四角紅羅窄地垂。銀鉤不動篆煙微。燈澹澹。月絲絲。笑問郎來是幾時。

好事近 題何夢華西湖買春卷

何處好尋春。春在段家橋側。試看門前流水。有桃花顏色。鏡中照出四圍山。眉黛一時碧。笑指槳牙相趁。盡鴛鴦鷓鴣。

百字令 書戴竹友綠花詞後

雁飛汾水。只人間、李嶠是真才子。解作江南腸斷句。一卷烏絲闌紙。野草花開。池蓮

粉墜宛轉能含思。集中野花白蓮二詞尤工。從君貰酒旗亭應有人記。最難俊侶如雲。風懷如月。更華年如綺。同學少年皆匿笑。春水干卿何事。兩指聲微。么弦調苦。作者今無幾。他時按曲。花間更喚延己。謂馮生玉如。

女冠子

贈雙脩庵女尼韻香一號清微

清宵更永。微月度雲無影。踢蒼苔。試問三生事。誰脩雙笑來。房深香似霧。人澹韻如梅。記取闌干外。玉簪開。

浮眉樓詞

天香 花露

炊玉成煙。揉春作水。落紅滿地如掃。百末香濃。三霄夜冷。無數花魂招到。仙人掌上。迸鉛水。銅槃多少。空惹蠶王惆悵。未輸蜜脾風調。謝娘理妝趁曉。面初勻。粉光融了。試手擘箋重盟。薔薇尤好。卻笑文園病渴。似飲露秋蟬。便能飽待鬪新茶。聽湯未老。

齊天樂 塔鈴

四禪天上天風小。偶然吹墮仙響。翠堵波高。金銀鐺動。雨歇寶繩微漾。雲思霞想。在謾謾松閒。星星鐘上。驚起栖禽。飛來還向相輪傍。三更歌管都罷。只郎當九子。似話惆悵。步屨廊空。吹簫客去。自發人天高唱。舊遊無恙。認放鴿庭陰。護花窗網。小立斜陽。隔牆聞梵放。

摸魚兒 盪湖船

一篷兒花天酒地。消磨風月如許。吳娃生長吳船上。只共鴛鴦爲侶。船六柱。從不識。愁風愁水天涯路。輕橈容與。問兩寺東西。半塘前後。商略泊何處。江南好。不在中流簫鼓。牽人好夢無數。十年水驛風燈夜。負了畫船聽雨。臨別語。怕紙醉金迷。忘卻秋孃渡。重來記取。有澹澹窗紗。疏疏簾影。隱隱數聲鶻。

水龍吟 吳歌

摩訶池上歌殘。一聲何處悠揚起。將連忽斷。似無還有。月明風細。月子彎彎。花開緩

緩。一般情思。算。遂家不是。漁家不是。問。莫是。劉三妹。子夜四時堪。礙。變新聲。我儂
歡喜。扁舟夜泊。人家兩岸。聽風聽水。白葛單衣。蒲葵小扇。新涼天氣。又前溪柔艣。嘔
啞。說是釣船歸矣。

桂枝香 蕉扇

誰裁花骨。怕新裂齊紈。無此圓潔。想見黃昏雨足。綠天雲割。憐他不入人懷袖。卻生
成也。無員闕。紫蕉衫底。白荷花下。晚風香辣。話昔日。山塘土物。同菡席湘筠。一樣
清絕。七寶修成。不是舊時明月。舊時舊事。何人記。有冷螢。空階明滅。最難忘處。羅帷
雙笑。一燈初殺。山塘賣扇。以選葉爲工。近皆飾以金繡。失當時之意矣。

臺城路 同嚴丈歷亭游舒氏園作

薄陰不散。霜飛早。園林深貯秋意。水木清蒼。陂陀高下。澹與暮雲無際。紅泥亭子。占
一角孤城。七分煙水。最愛疏疏。竹竿萬个。滴寒翠。年來俊侶都散。便登山臨水。只
恁顛顛。倦柳攀條。清流照鬢。暗老悲秋身世。荒寒如此。又畫角聲中。夕陽垂地。樹樹

西風暮雅寒不起。

翠樓吟 山行幽絕臨水數家門外木芙蓉正花爛漫無次殊愜幽情紀以此

詞

溼翠霑衣暗苔黏屐。幽尋最愛清曉。峯回剛路轉。恰對面、數峯清峭。似儂曾到。只三
兩人家。看來都好。柴門小。芙蓉無數。一時紅了。誰料。隨意閒行。有芳塘花鳥。徐熙
畫稿。水邊同照影。定見我、風前側帽。也應含笑。怕青鳥丁寧。玉容易老。尋芳早。向人
山色。一眉新掃。

望湘人 用穀人先生韻

漸蕭蕭瑟瑟。冷冷清清。客懷如許。淒戀衰柳翻鴉。枯荷鬧雨。子夜怨歌先變。鏡裏霜
寒。燈前人瘦。眉邊山遠。儘哀弦、一曲思歸。飛起十三箏雁。數盡更更點點。把孤衾
斷夢。一宵尋徧。只文鴛繡枕。記得舊時曾薦。酒痕濃澹。淚痕重疊。溼了小蠻鍼綫。問
何日、纖手親攜。笑勸芳尊須滿。

柳色黃 西湖秋柳用穀人先生秋柳詞韻

西子湖頭歸路繫船。暮色催霽。疏疏漏出斜陽。便做秋來詩意。春人老去。想見油壁車歸。銷磨裙帶同心字。有一陣西風。添一分顛顛。還擬東風舊院。北苑新圖。南朝蕭寺。幾點昏雅。小坐蒼煙叢裏。荷花桂子。分將一鏡新愁。照他鬢影清無底。縱有浣紗人。挽纖腰不起。

江城梅花引

一重方空一重紗。采蓮花。采菱花。愛住吳船生小號。吳娃。牆內紅樓樓外水。有明月。照鴛鴦。宿那家。那家。那家。在天涯。雨又斜。雲又遮。聽也聽也。聽不到。一曲琵琶。漸漸西風秋柳不藏雅。欲倩西風吹夢去。還只恐。夢魂中。太遠些。

滿庭芳

扇月投懷。衣香分袂。箇儂道是無愁。采蓮歸去。佯醉臥箜篌。攜取屏山六六。繩河外。殘雨初收。良期近。一天風露。無睡待牽牛。句留。能幾日。有門前流水。催上蘭舟。漸

蘭舟不見。野水空流。欲寄銀鈎小字。趁征鴻、飛過樓頭。沈吟徧。又愁別後。不上小紅樓。

天香 粉

擣麝成塵。調鉛作雪。秦樓一轉初試。露下芙蓉。雨餘篁竹。滿鏡六朝春思。仙人掌上。先染了、葱根纖指。繡領乍溼。餘香金盆。緩傾殘水。侵晨宿妝紅膩。拂湖絛、掃眉還未。殘夢關心。蝴蝶欲乾雙翅。不信比來。下淚問玉頰。成痕爲何事。索寫丹青。臙來有幾。

摸魚兒 茨菇

買陂塘、兩邊添種。高荷大芋相似。生成葉葉雙歧樣。合傍谿流燕尾。江上水。記送別西灣。話到年時事。故人歸未。正軟柄欹風。低枝鬧雨。一碧亂無次。江鄉好。隨意蒔絲菰米。食單多在水際。雞頭菱角堆槃後。草草田園風味。渾不記。合付與廚孃。略下些鹽豉。旗亭小市。共山栗燂餘。村醪熟後。閒買夜來醉。

水龍吟 蘋花

菱歌唱斷前溪。青山影裏秋江老。晚風乍起，涼煙不散，數花開早。去鳥明邊，閒鷗眠處，采香人少。便翠禽一點，愁他難立，除非是、蜻蜓小。有客谿頭垂釣。又句留、一年過了。楊花身世，蘆花伴侶，嫩寒清曉。隨意停舟，偶然照眼，添枝紅蓼。向水仙祠下，登蘋搴藻，共寒泉、茝。

齊天樂 果羸

蟲蟲生就腰支細，孤懸長自幽怨。小尾雄蠶，畫衣穉蝶，未許尋常相見。案頭筠管，想小寄全家，一丸泥滿。暖日窗櫺，蛛絲捎徧畫檐短。餅筮相和淒切，聽哀音微細，似續還斷。負坂身勞，顛當門守，也結蟲天仙眷。休言善幻，笑人世兒曹，骨凡難換。戢戢螽斯，一宵如雨點。

桂枝香 黃蜺

春潮長處，正隔浦聲喧，檝頭船聚。似甯春泥不用，答答漁具。從來論斗平量慣，叩舷

呼。龜錢拋與。有時亥日。漁娃白足。筠籃提取。俊味江鄉堪數。比青鮒白蝦。羹湯同煮。合口椒辛。薄醉想伊風趣。兒童不識螺名扁。笑且食。蛤蜊知許。湯溫甲卸。配他早韭。翦來新雨。

滿江紅 九日同鐵門登鳳皇山頂尋女教場望江用倦圃竹垞錢唐觀潮韻
四面青山。放江水、適當其闕。流不盡、南朝遺恨。中原如髮。更殺一圍傾國笑。誰橫萬弩迎潮發。只茱萸、醉裏詫漂零。人吳越。花欲笑。簪邊雪。雲欲擁。巖前月。巖名問男兒何用。置身高絕。百感茫茫隨處有。大江滾滾何時歇。恨觀濤、僕病未能來。中秋節。

買陂塘 題胡維君廬山識面圖

插清江、成峯成嶺。湖山如此明秀。何人小坐槃陀上。高挹匡君衣袖。開笑口。道蓮社羣賢、待爾相尋久。扁舟落手。問何不乘風。開帆振柁。數徧翠屏九。平生事。布襪青鞋都有。游蹤尙欠江右。五峯一一雲中間。與老人期何後。牛馬走。恐待我歸來。頭白成衰醜。觀河面皺。想意外奇逢。圖中人到。相識定如舊。

金縷曲 閩僮黃姓汀產也。湘湄名之曰汀鷗。爰紀以詞。

欲問伊鄉里。有詞人、小名錄就。當筵須記。萬里家山誰馴得。漂泊黃童年紀。夢不到、汀洲蘅芷。道我主盟三十六。肯相從、浩蕩江湖底。僮約在、煙波裏。可能便逐漁兄弟。買陂塘、綠蓑青笠。船頭沙觜。配箇樵青都不惡。婉婉阜羅鴉髻。應不羨、風標公子。莫度荔枝香一曲。怕回腸、容易鄉思起。謂不信、如春水。

酷相思 苦雨

屋角鶉鴣催不去。和簾外、流鶯語。問裏湖、外湖曾到否。朝來也、瀟瀟雨。晚來也、瀟瀟雨。溼了清明寒食路。把杏花期誤。只孤負、討春人此度。春去也、留難住。人去也、留難住。

菩薩蠻 何夢華半塘春泛圖

青絲纜細蘭橈艤。濛濛人立垂楊裏。三十六鴛鴦。一堤春水香。半塘春好處。總是藏鴉樹。樹下記兒家。出牆姊妹花。

太常行 夢華以葉小鸞疏香閣眉子研銘拓本見示屬爲賦之

掃眉人倚袖羅寒。月子對彎彎。笙鶴去瑤天。算只有、蟾蜍淚漣。琉璃匣啓，櫻桃雨潤，長定試麋丸。小字讀迴環。又想見、當時遠山。

臺城路 梅華帳額

珊瑚海底枝枝軟。玲瓏翦碎寒月。羅帳如煙。銀鉤不動。小積半牀香雪。移燈掛壁。怕骨冷魂清。玉龍吹徹。漠漠梨雲。江南路向此中覓。年來何遜蕉萃。記東閣詩篇。西磧遊屐。鬢點吳霜。夢殘舊雨。髣髴屋梁顏色。翠禽低說。正人倚高樓。袖羅寒絕。待訴相思。玉參橫永夕。

疏影 花影吹笙圖

空庭潑水。正玲瓏澹月。簾影垂地。悵望銀河。閒弄參差。箇儂知是誰思。橫枝清瘦疏花活。漸篩滿、薄羅衫子。只枝頭、翠羽雙栖。闕見那時情事。難忘黃昏院落。畫闌十二曲。曲曲同倚。半攏春纖。半度脂香。炙暖一行銀字。年來白石風情減。有自作、新詞

誰記。但每逢、花月嬋娟，便想畫中雙髻。

百字令

阮雲臺閣學重葺曝書亭命工摹竹垞圖白和竹垞元詞二闕余亦

繼聲

鴛鴦湖上。記櫂歌來往，扁舟曾泊。載酒江湖人在眼，渺渺微波難託。八萬卷書，兩三竿竹，閒想歸田樂。百年如夢，暮雲幾葉零落。當日雨裏芭蕉，水中菡萏，位置煩樹酌。舊觀頓還圖畫好，依約黃簾綠幕。詞客有靈，先生應笑，此子宜邱壑。他時重到，炙笙須喚菱角。

摸魚子

題李武曾徵君藝蘭圖用竹垞集中灌園圖韻

問先生灌園老矣，尙餘幾稜青畝。平生述作騷苗裔，小寄外孫齋白。歸隱後，渾不記，上林花木春明柳。遂初賦就，想堂北春濃，陔南人健，一笑且開口。堂前樹，秋錦勝如錦畫。西風幾度搔首。天涯芳草行吟徧，荃蕙化茅都有。交耐久，算只有，南鄰朱老長攜手。別無恙否。約雜佩紉秋，寒泉薦菊，來訪橘中叟。

國香慢 媚蘭小影爲夢華題

眞色生香。有小名試錄。雅稱孤芳。幽居自憐空谷。未嫁王昌。定記宮牆留字。聽鐘聲、催月斜廊。用明宮女媚蘭仙子詩。無言但凝睇。一寸愁心。多少思量。彩雲天遠處。想明眸秀鬢。霧閣雲窗。玉梅花下。誰念蕉萃何郎。尙有三生舊約。怕錦瑟、今似人長。還應只如此。楚楚眉痕。澹澹明妝。

紅娘子 古祕戲錢

金鑄鴛鴦牒。土蝕相思骨。姹女風流。沈郎輕薄。秦宮偷活。看雙飛、蝴蝶正團圓。任漫天榆莢。覆雨翻雲狹。地久天長恰。蠟視橫陳。神傳阿堵。夢殘金穴。笑人間、駭女與癡兒。買春風時節。

金縷曲 題雲臺閣學修書圖

上苑春如綺。護重重、琅嬛祕笈。花光雲氣。東馬才名終賈歲。朝罷橫陳圖史。早位置、筆牀研几。天上愚懵仙儘有。讓宮中、元九呼才子。紉萬卷、倩雙髻。使星重指錢江。

水看紛綸、珠填笙典，赤文綠字。椽燭兩行官吏散，學士又修書矣。問福慧、如公能幾。應念書生寒骨相，短燈檠、昏對牛毛細。旁匿笑，玉川婢。

清平樂 題張淥卿花陰填詞圖

花陰漸轉。衣上春痕淺。圓月一規人半面。好箇深深庭院。玉簫金管都宜。儉聲減字休遲。知否露寒風峭，紅兒小立多時。

洞仙歌 題蕊宮花史圖圖十有二人

碧城深處。有闌干幾曲。幾疊屏風護羣玉。正巫雲滿峽。霄露承盤。三面海。看浴鴛鴦卅六。一年春好處。風信番番。兩兩仙人小名錄。隔座辨釵光。下九初三。算佳約、閨年須續。試屈指、花朝是幾時。怕歲歲月員時。時花落。

摸魚兒 送淥卿入都

甚恁恁驪歌催發。江天雲物淒緊。西湖鴉舅初黃候。做出別離風景。江上艇。早載著、曉風殘月和愁等。哀鴻成陣。向越角吳根。燕南趙北。相對一繩整。長安道。十丈紅

塵埋軫。五侯八貴朝請。書生馬狗衣鶉結。料爾爲郎無分。堪一哂。道我已無家、隨處
漂零肯。酒徒歸盡。問壚畔燕姬。車前騶卒。何處醉眠穩。

又 淥卿自都門歸復遊山左作此贈行并寄黃小松司馬陳曼生上舍

有征鴻南來北去。道逢旅雁相語。差池短翼三千里。爲是栖栖何苦。嘗險阻。又破帽
殘衫。重蹋西陵路。搖雲散雨。總難忘當時。西園賓客。梧竹對衡宇。人生事。銷魂最
是羈旅。今人管鮑如土。一錢不直張三影。怨曲旗亭空度。休見妒。道老矣。蛾眉金綫
無心作。事何知許。且問訊陳三。寄聲黃九。慷慨爲君舞。

又 寄淥卿

聽烏烏城頭畫角。馬頭風色催暮。重來人已漂零慣。衫上淚痕難數。來又去。恰子野
兜孃。都在吳城住。酒邊傳語。道有箇吳儂。夜闌沈醉。羅帕喚題句。青樓夢。三生杜
牧還作。而今絲鬢千縷。雛鶯乳燕曾相識。想在綠陰深處。風吹雨。問秋色。鶻華。可似
江南否。羈懷最苦。但卻扇風情。題襟心事。都付倦飛羽。

水龍吟 湖心亭夜泛追憶舊游俯仰身世渺渺兮余懷也

月痕都化涼煙。雙堤沈在涼煙裏。藕華露溼。菰根風戰。瓜皮船艤。一寸秋心。三分是月。七分是水。看湖心點點。山山不斷。渾只露依微髻。忽憶去年此日。伴故人、叩舷同醉。笑橫長笛。倚歌小海。有魚龍氣。游倦成悲。離多易老。居然千里。但回船夜半。圓沙拍拍。喚眠鷗起。

又 人日寄故園諸子

草堂人日梅花。可憐又向天涯度。華前思發。雁邊書遠。道衡空賦。風颭燈初。雪消寒未。春愁如許。算一般客裏。阻風中酒。還不及、西湖住。料得故人傳語。欲題詩、故鄉何處。也應難忘。盟鷗池館。黏雞窗戶。子夜歌休。辛槃春老。丁年人去。但柳條弄色。年年仍作。舊時眉嫵。

齊天樂 童佛菴有素冊爲蝨魚所蝕其鑿空處皆肖蜨形殆天巧也詞以寫之

近來不食人間字。滿腔都是春恨。青簡生涯。白蟬身世。幻作漆園夢影。羽陵困損。算不似花閒。栖香差穩。莫羨神仙。蛻餘且就此中隱。有人曝來永晝。比夾雪新籤。白描副本。栩栩蘧蘧。魚魚雅雅。兩翅尙黏殘粉。滕王休哂。是癡絕書生。香奩吟吻。展向春風。半窗芸葉冷。

菩薩蠻

金釭釵粟紅如許。爲誰擁髻淒無語。一夜雨潺潺。春風樓上寒。玉鞭斜墮馬。知在垂楊下。低語祝梅花。上元須到家。

暮雲重疊山如織。一痕淺黛依微碧。此際有人愁。夕陽山外樓。春燈初試了。寒到春衣峭。莫是不歸來。玉梅開未開。

月痕移到梅花澹。畫樓人立春寒淺。殘雪未消時。一枝還一枝。銀屏雙鷓鴣。香篆和煙碧。相見便嫣然。問郎恣意憐。

東風皺得春痕重。香羅深護梨雲夢。道是太淒迷。隔簾殘雪飛。蕭郎歸又晚。春勝

如花淺。何事有閒愁。玉簫吹兩頭。
吳儂何必吳中住。五湖便是三生路。船小慣藏春。千絲網越人。三年留一笑。底事
催歸早。一路遠山多。畫眉人奈何。

買陂塘 自題山陰歸權圖

問年年阻風中酒。江湖人竟歸未。居然一權衝風雪。妝點蕭蕭行李。圖畫裏。有萬壑
千巖。送箇人雙髻。剡谿休擬。且霜破黃柑。燈挑紅粟。晚飯柁樓底。移家好。莫認鴟
夷西子。鏡湖他日須賜。千絲細網。三生石。兩槳劃開春水。歸去矣。算泛宅浮家。儘可
稱鄉里。權歌聲起。試擁檝。煩卿扣舷和汝。此曲定能記。

又 穀人先生題淥卿露華詞末有見及之語依韻奉酬并寄都下諸故人
算年來此中日夕。淚痕被面如洗。鶯鶯燕燕張公子。空皺一池春水。誰得髓。便白石
玉田。都付旗亭裏。酒闌人起。想紅燭筵前。烏絲闌底。儘做別離味。知音少。前輩愛
才會幾。當時沈范堪擬。春風傳唱揚州路。齊卷珠簾十里。我倦矣。似漂轉飛花。未許

游絲繫。舊遊應記。但寄語燕臺。酒人相見。有口且深閉。

河傳 題夢華絙雲圖

小字。須記。喚爲雲。暮暮朝朝見君。送君南浦。愁復深。千金酬他一笑心。阻風中酒。年年過。誰伴我。且賦風懷左。謝芳姿。網千絲。他時。蠶雄粉蝶雌。夢華屬意一婢故及。

探春慢 淶卿自山左來杭。合并西湖。未及十日。卽爲東阿之行。酒邊索贈書。

以爲別

慢水搖堤。飛花撲帽。相逢又是春半。俊侶疏時。鈿車歸後。小結嬉春閒伴。誰記重來客。算只有、垂楊青眼。問伊昔日風流。鬢絲何事零亂。卻笑一年一度。渾不似定巢。王謝雙燕。寒食光陰。天涯情味。消得幾回相見。還共西湖約。怕尙有、輕風吹轉。莫滯游蹤。高樓人正凝盼。

洞仙歌 寄素君

綺窗臨水。挂一重簾子。簾外垂楊畫船繫。道春風正好。催放輕橈。全不管。先把箇儂

催起。嘔啞聲未遠。轉箇灣頭。眼底居然便千里。不見一重簾。簾外垂楊。又何況、隔簾雙髻。算臨別、無言忒忽忽。有曲曲谿流。是伊清淚。小桃落盡。又春寒側側。過了今年小寒食。便鶯簧怨雨。蛛網黏花。歸去也。春已三分之一。昨宵淺夢裏。夢也無憑。夢裏人人更無力。軟語任憑肩。低髻愁眉。是燈下、舊時顏色。只忘卻、歸期約何時。猶自說高樓杏華消息。

買陂塘

蘭泉先生招集瑪瑙寺看牡丹分韻得更字述以此詞

又惜惜滿湖香絮。一年春已將盡。東風收拾閒紅紫。并作者番芳信。風乍定。有臥穩狸奴。日午花陰正。鉤簾試問。問花底年年。看花伴侶。得似此時俊。佳招踐。連日陰晴難準。能來須是乘興。沈香應詔關何事。薄醉被人呼醒。文字飲。看白髮、嬉春一老紅闌憑。擘箋賦韻。儘雀舫移頻。鈿車歸了。後約試尋更。

又方臺山屬題冰壺夫人桃源春泛圖

看浮槎坐來天上。一篙春水初暖。川原遠近都如綺。十里明霞新翦。紅一段。向鏡裏、

盈盈同照春風面。阿誰曾見。算只有紅襟。掠波雙燕。隔水定偷眼。仙源好。已熟胡麻仙飯。休歌水遠。人遠。當年便笑天台侶。不解人閒何戀。歸緩緩。愛輕浪魚鱗。容與中流半。流年暗換。但黃竹箱開。縷金衣試。紅雨尙應滿。

水龍吟 語兒道中萬綠如水澹日微陰時漏疏雨扁舟搖兀其間爲賦此調是晴還是微陰濛濛好箇江南路。桑陰兩岸竹梯橫閣。最深深處。去鳥孤明。連山積翠。夕陽界住。正扁舟有客。微吟淺醉。譜腸斷。方回句。又是一年羈旅。一年春。又隨人去。換他幾點。漚邊鷺外。疏疏殘雨。圓鏡冰寒。生綃紅潤。也應淒楚。待歸時細問。香銷夢斷。定思量否。

清平樂 春湖吟社扇面爲夢華作

兩湖如鏡。雙照桃鬢影。花外夕陽紅不定。又是畫船歸近。去年煙雨溟濛。今年花月惺忪。斷送一生顛顛。只消便面春風。

國香慢 袁壽階屬賦紅蕙

乍轉光風。自三閭去後。九畹滋同。孤芳肯隨荃化。忽訝春容。莫是獨醒良苦。倦行吟、薄酒微中。幽懷與誰語。寫入朱弦。怨曲纔終。湘江江上水。便覺來淚滴。勻染難工。荷衣顛顛。未應綬帶垂紅。回首金閨樓外。記薛家。小妹初逢。香魂便能返。澹粉輕脂。終恨惺忪。

疏影 舒衫受落花圖

春陰似墨。正輕衫乍試。何處橫笛。應是高樓。不管清愁。便訴江南消息。玉人未醒梨雲夢。想獨步、冰苔猶溼。恁禁他、翠袖天寒。無數落英如積。苦憶西園清夜。酒邊出素手。曾共攀摘。漸老何郎。便約重來。不是舊時月色。東風衣袂。憑誰問。怕只有、淚痕留得。判一生、消受春愁。點點唾花凝碧。

水龍吟 厭勝鏡徑二寸有奇背列祕戲者四女裝絕似武梁祠像六朝物也
分明一片新荷。團團照見鴛鴦睡。秦時明月。漢宮春色。唐家遺事。影裏鸞孤。盤時龍寡。物猶如此。笑何妨注就。蟲蟲燕燕。添四角中央字。長定循環纖指。暈紅潮。背人

偷視。宿妝慵整。長眉未畫。慳慳情思。三閣綺羅。六朝金粉。而今何似。看土花淺碧。爛
熳多分。是銅仙淚。

紅情 題二娛鷗夢圓圖用玉田韻

生香活色。有水天閒話。憑肩語密。除卻鴛鴦。只有眠鷗似相識。三十六陂舊夢。明鏡
裏、低徊潛憶。問微步、一餉凌波。羅襪可曾溼。小立。髻鬢側。想明月那時。流水今日。
春風靈液。澹盪其間。浪痕碧。自恨采香太晚。重到也、紅衣非昔。又況畫船艤處。船中
玉笛。

沁園春 二娛爲余題螽蟴卷子比物象形裁雲縫月後有作者未能或之先
矣酒酣以往逸氣盈涌閒爲變調以摠鬱塞之懷并示二娛

鑽紙蠅癡。伏案螢乾。男兒可憐。笑吾其魚矣。人言善幻。遽然螽也。或羨成仙。五蠹書
成。一生花活。遊戲其間。然不然。君休問。看此中有鬼。蟲亦能天。爲君試質前賢。更
有箇、吾家博物傳。是蒙莊闢達。未離文字。謝郎輕薄。多爲詩篇。磊落景純。蟲魚詮釋。

鳳子春駒有闕焉。亡應補。任叢殘科斗。零落蝸涎。

齊天樂 北山旅館圖用穀人先生韻爲華秋槎司馬作

十年載酒江湖徧。不歸如此湖水。小艇鳴榔。低檐結網。穩住一家深翠。畫圖寫意。問選箇江鄉。西湖有幾。鴨脚黃邊。幾人同此夕陽醉。當歸故鄉應寄。笑薛宣東閣。眞欲相吏。篷裏伊涼。胸中雲夢。暗老英雄身世。壯心不已。道種菜閉門。漸諳斯味。何況鱸薺。秋風斜日裏。

洞仙歌 書素琴校書扇

當年桃葉。向渡頭曾見。問姓分明掌中燕。把舊時衣袂。與說相思。東風裏。可記淚痕曾染。厭厭三爵後。素女琴心。忽發狂言有誰管。教寫折枝梅。翠羽啾啾。定闕見。玉人清怨。肯等到、闌干月明時。便幾箇黃昏。也都情願。

又 題錢叔美爲疏香女子畫梅用袁蘭邨韻

東風著力。恰雪痕微逗。略解春情便應瘦。似那回曾見。隔箇窗紗。修竹裏。翠袖暮寒

時候。江南二三月。豔紫妖紅。兒女十枝五枝繡。誰得比孤清。一斛珠量。除聘取、海棠消受。擬待到、昏黃月微明。倩玉笛橫吹。看珠簾秀。

風蟬令 秋影樓圖

雁齒紅橋近。烏衣曲巷斜。水天閒話記些些。六扇冰紋榻子。慣藏他。春燕雙栖地。秋風八月槎。重來那不感年華。猶傍水楊柳樹。問伊家。

百字令 題蘭村南園春夢圖

東風何苦。只送將春到。難留春住。落絮游絲無氣力。還自飛來飛去。白水橋梁。紅泥亭榭。人說南園路。畫圖省識。看來已是前度。莫倚錦瑟筵前。楚腰掌上。年少能才語。記得些些惆悵事。便費蠻箋無數。玉局彈棋。銅槃遞淚。此夢儂曾作。去年今日。桃花華亂落如雨。

喝火令 莫愁小像爲汪紫珊姬人綠玉作

文杏裁梁柱。流黃織畫紗。春風留住六朝花。願作紅襟雙燕。飛去入伊家。有箇人

如玉。看來略似他。重幃初卷繡裙斜。只少耳邊朱暈一些些。只少阿侯膝上小語學
嘔啞。

高陽臺 隨園席上贈別疏香

暗水通潮。癡嵐閣雨。微陰不散重城。留得枯荷。奈他先作離聲。清歌欲遏行雲住。露
春纖、並坐調笙。莫多情、第一難忘。席上輕輕。天涯我是漂零慣。恁飛花無定。相送
人行。見說蘭舟。明朝也泊長亭。門前記取垂楊樹。只藏他、三兩秋鶯。一程程、愁水愁
風。不要人聽。

買陂塘 信宿隨園頗極文燕之樂將歸之夕蘭村以秋夢樓圖索題黯然賦

此

小紅樓。居然百尺。文窗了鳥深閉。豈知中有悲秋客。夢與碧雲無際。湖海氣。只打疊、
柔情不斷如春水。偷聲減字。問白石玉田。金荃蘭畹。多少可憐子。浮名好。低唱淺
斟何似。爲誰此景輕棄。六朝山色雙眉嫵。換了青衫從事。我醉矣。想葛屐西華。那有

桃花米。能謀酒未。怕江上荻聲。階前蛩語。漸漸有秋意。時蘭村將入都謁選。

祝英臺近 題梅卿女史倚竹圖

玉釵長。金釧瘦。濃綠翦雙袖。刻徧琅玕。又是一詩就。問他翠羽三更。擗龍半夜。可窺見、繡鞋冰透。算佳偶。鳳觜天外尋難。得似舊人否。磨鏡劉楨。平視也低首。同君一樣西家。牽蘿補屋。定念我、暮寒時候。

柳梢青 贈琵琶伎

直得魂銷。髻簪寒玉。袖卷輕綃。半面猶遮。四弦入破。涼月初高。天涯淪落相遭。酒醒處、天風海濤。翠被秋深。烏篷露冷。一樣今宵。

長相思

荻花殘。蓼花般。一樣秋風有兩般。紅紅白白看。笛聲乾。角聲酸。行盡江南無數山。征衣漸漸寒。

好事近 效朱希真體

瓜步晚潮生。一峭布帆百里。酒醒鐘聲何處。出金山寺裏。金山對面是焦山。睡著
兩鬢髻。只有半鉤殘月。照船中。篋起。

又 歸舟同竹士作

何處是儂家。歷歷青山無數。青到一重樓上。對箇儂眉嫵。朝朝江上望歸船。江住
見山住。指點片帆飛過。在青山斷處。

闌干萬里心 自題浮眉樓圖

濛濛絲柳不藏秋。隱隱疏簾半上鉤。見說年年愛遠游。一重樓。兩點眉山相對愁。

高陽臺 錄別

玉局中心。金釭照眼。悲秋人又長征。擁髻淒然。背燈直是愁生。三杯兩盞將離酒。怎
禁他、和淚同傾。太淒清。蛩語聲聲。雁語聲聲。銅籤屈指無多路。說當時歸櫂。一半
曾經。後夜明朝。爲儂細算郵程。鴛鴦湖上條條柳。望前頭、有座旗亭。肯消停。風也須
行。雨也須行。

貂裘換酒。十月一日偕鐵門倪米樓同游冷泉亭至白衲盦下山經蕭九孃酒壚泥飲而歸屬湘湄作寒壚買醉卷子紀以此詞湘湄曾與余雪夜同宿酒樓持火入山題詩石壁上此圖亦不可無詞也

雅舅紅如此。正千山萬山夕照。不知幾里。忽見青旗高樓外。其上有翩翩字。有隨分、橙黃筍紫。我是酒徒元無賴。索銀餅、莫笑麤豪氣。鷓霜解。可容貫。四山積雪危闌倚。話當時、風懷酒膽。故人老矣。不向冷泉亭下醉。負此松風兩耳。況落葉紛紛而至。寫作畫圖傳也得。要壚頭、貌箇雙丫髻。渠能記。十年事。

疏影 帆影和米樓韻

爲誰送到。恁斜斜整整。驀地來悄。暮雨初收。疊鼓猶催。殷勤澹月留照。支筇愛喚秋江渡。問波底、去來多少。只兩邊、純浸遙山。一霎半湖遮了。記得離筵江上。舉杯尙未勸。聽說風好。猶自憑闌。不覺回頭。已亂一行飛鳥。知他寂歷斜陽外。消幾度、醉眠欹倒。怕有人、腸斷登樓。誤認黏天衰草。

金縷曲 題米樓夢隱詞卽用其集中紅豆詞韻

燭地更闌矣。怪今宵、聲聲落葉，都來窗裏。細字蠶眠無多幅，不信愁人至此。看眼底、詞流有幾。偶作天風海濤曲。又吹花、嚼出紅霞蕊。翩然跨琴高鯉。天涯別緒紛難理。漫沈吟、舊歡如夢。流年如水。說著江南腸斷句。中有淚痕隱起。只合付、薛家車子。張緒漂零尤袤遠。謂淥鄉二媿儘時人、笑把周秦比。莫寒了、調箏指。

又 題汪飲泉秋隱庵填詞圖

十里春風路。有伊人、裁雲縫月。移宮換羽。身是三生狂杜牧。今日鬢絲如許。只逢著、秋孃能賦。問訊汪倫情何似。也桃花、亂落如紅雨。君莫怪、作癡語。竹西歌吹依然否。但年年、吳公臺畔。鬥雞兒女。腰鼓儘消三百副。誰唱康郎樂府。況白石、揚州詞句。何必紅紅方能記。倩笛家、吹入鬢洲譜。蜀井水、在何處。

賣花聲 姜怡亭葬女郎于西湖作瘞花圖乞題一詞

小雨夜悒悒。寒戀重衾。朝來香徑怯相尋。不信東風魂不斷。葬得深深。舊事暗沈

吟。顛。頽。而。今。長。堤。宿。草。有。紅。心。翻。羨。當。時。狂。杜。牧。來。便。成。陰。

祝英臺近 怡亭秋晴訪碑圖

石排衙。窗列岫。往事記重九。閃閃寒雅。如墨點雙袖。看君走上層顛。摩挲斷碣。全不怕。藤纏雨溜。試搔首。要問一片韓陵。共語尙堪否。近日磨厓。山骨斲應瘦。年來愛注蟲魚。肯分金石。笑茶覆。懷中人有。

夢芙蓉 蘭村寓大佛寺僧樓同人畢集湘湄爲作湖上雲萍圖紀以此詞

北風江上冷。正湖天黯黯。客懷淒緊。凍雲幾葉。流出片颿影。故人期尙準。楓林休負霜信。佛屋蕭然。有兩三倦侶。吟到夜燈暈。同調相逢一哂。中酒悲秋。已是三生病。畫中眉嫵。不似舊時靚。雁飛渾未定。夕陽猶戀寒陣。如此江山。又怱怱別去。十日醉應肯。

清平樂 徐山民吳姍姍夫婦柳陰雙槳合冊屬題

鵝兒搓就。小試調酥手。眉葉腰身誰比瘦。春水生來先皺。芳草一路芊眠。江南春

盡如天。不信別家樓上，陌頭柳色年年。

醉太平 蘭村移居玉華樓

煙雲一牀。煙波一囊。移家仍住僧房。可青山一窗。平林夕陽。長橋夜榔。只多十里湖光。見南屏曉妝。

暗香 宋西樵爲其妹作梅花于扇湘湄徵君屬賦之

萬花開落。怪東風最早。吹醒寒玉。只有廣平一賦。千秋擅幽獨。憐取山礬是弟。想雷岸、書回應索。便說是、便面春多。香冷不盈握。茅屋翠袖薄。正日莫天寒。絕代空谷。怨蛾自綠。愁點當時額。黃角高臥袁郎記否。曾小小、珍禽同宿。算合喚、楊妹子。爲題滿幅。

疏影 湘湄有所恨畫青梅子一枝以寄意霜辛露酸別有寄託非牧之詩意

也以余有元白之好知拂面花故事屬倚聲以紀

玉梅未落。有枝頭點點。酸意先著。齒冷吳娘。不管春寒。臨風自弄霜角。高樓也有人

橫笛。但樓外、翠禽偷覺。試問伊、葉底清圓，莫認綠陰成幄。記否年年此際，櫻桃已結子，蠶豆初熟。山店燒春，寒食時光，陌上草痕新綠。消他幾度沈沈雨，已過了，杏花餽粥。又教人、腸斷江南，只恐方回難讀。

金縷曲

山民出示國初諸公寄吳漢槎塞外尺牘，輒題其後

幾幅叢殘紙，是當年、冰天雪窖，眼穿而至。萬里風沙寧古塔，那有塞鴻接翅。更緘寄、烏絲彈指。二集名，一代奇才，千秋恨，換故人和墨。三升淚，生還遂，偶然耳。諸公衰，衰京華裏，只斯人、投荒絕徼，非生非死。徐邈顧榮皆舊識，立齋梁汾難得相門才子。容若歎，不憐才而已。感慨何須生同世，看人間、尙寶瑤華字。只此道，幾曾棄。

生查子

階前一片苔，青到牆陰住。羅襪是何人，小印香痕去。愁隨鑪篆長，影共燈花語。關了碧紗窗，各自聽春雨。

買陂塘 二月十四日坐江山船行諸暨道中山水清妍雜花生樹傷春傷別

情見乎詞

放輕船、青山影裏。欹斜帆葉低挂。溶溶漾漾平堤水。誰把越羅新砑。花事乍已過了。花朝、春月圓今夜。柁樓飯罷。有新柳泥人。閒鷗窺客。愁重酒難把。當年事。想見鷗夷妍雅。扁舟容與其下。一峯最遠眉痕澹。絕似苧蘿初嫁。誰共話。算如此江山、少箇人如畫。先生歸也。問春雨樓頭。杏花賣未。和淚寄羅帕。

金縷曲

得淶卿山左書并見懷之作走筆寄答

好在張公子。正經年、思君不見。飛來片紙。不過相思加餐飯。難禁淚痕如洗。更一一、新詞同寄。宛轉漂流都不訴。但略言、青鬢今如此。抱玉泣。且休矣。檳榔滿斛渾閒事。算天涯、相攜花下。不如歸耳。若得江鄉比鄰住。隨意孤村小市。有舍北、舍南春水。鵝鴨往來菱芡賤。種湖田、薑蔗供租稅。只此願。幾時遂。

沁園春

寄伯生

一別三年不見蔣生。可憐酒徒。記長安市上。狂歌痛飲。盧溝歸路。駿馬名姝。牧豕公

卿爛羊都尉。笑爾盈盈公府趨。因君問。怕汾南士少。歷下亭孤。年來豪氣銷除。使載酒江湖失故吾。有白頭老母。是兒可念。紅妝少婦。夫壻言殊。歲歲依人。年年下第。領底鬢鬢漸有鬚。都休矣。看抱關吏賤。處士聲虛。

百字令

春盡夜酒醒有作

沈沈細雨。又一番春事。一宵將盡。判與憎騰扶醉過。酒到無膠偏醒。再爇餘香。重燒紅燭。惜此須臾景。教添半臂。薄寒今夜猶賸。絕似有客天涯。年年此度。先在河梁等。刻意欲裁腸斷句。筆底落紅成陣。謝女檀郎。濃香淺夢。那有閒心性。中年哀樂。淒然自看雙鬢。

水龍吟

題陶鳧鄉客舫填詞圖

欹斜幾扇烏篷。消磨詞客江湖老。阿誰畫出。微茫煙樹。翩翩沙鳥。茗雪往來。當時相見。中仙風調。儘船頭獨酌。船舷獨斂。除漚鷺。無人曉。欲放扁舟何處。路彎環。牽絲風裊。東禪寺畔。相思樹底。小紅猶小。我若相逢。阻風中酒。年年都好。笑恁恁回首。煙

波已過。卻松陵道。

新雁過妝樓。漢宮雁足鐙。

別苑離宮。傳遺製、分明燭影搖紅。一行低照，三十六處秋風。料得調箏孤影裏，伴他促柱月明中。最惺忪。暮傳蠻蠟，昏綴釵蟲。誰憐長門永夜，正恁時燈暗，聽徧征鴻。寒鴉雖冷，猶帶曉日曛曛。羈臣帛書難寄，但悵望、甘泉遙舉烽。朝來看，有成堆紅淚，先滿金銅。

月華清 蜀王衍停空鏡

秋老蟾蜍。春迴鸞鵲。故宮鉛水猶冷。蜀道青天，鑄出一丸孤影。想當日、媚臉傳紅，定照見、醉妝初醒。誰省。向麗情集裏，芳名細認。記否良工質瑩。正繡幌低懸，綺窗幽靚。尖裏羅巾，有箇如花人並。算儘隨、金盃漂零。問可似、玉奴長恨。堪哂。怕後來花蕊，宮詞難詠。

瑞鶴仙 白玉麻姑像

白雲飛一片。是吹來、鶴背風鬟凌亂。方平舊曾見。述庵司寇認少年狡獪。當時人面。良工誰碾。定偷闕、蔡經宅畔。問翩然何處。凌波東海。近來深淺。堪念一杯春露。一擲丹砂。年華都換。游仙夢斷。垂玉筍。淚痕滿。想瑤臺月下。冰綃帳底。妒殺雙成女伴。記有人、手爪相如。比伊較暖。

水龍吟 蒼龍嘯月琴

刺船海上歸來。枯桐蛻骨寒雲裏。大魚出聽。瘦蛟潛舞。誰吟波底。萬竅皆暗。一丸初上。四山如洗。有老漁夜半。拋來鐵網。珊瑚樹。收齊起。欲把冰絲偷寫。怕滄江、百靈騰沸。蘇門人杳。廣陵散絕。世無此耳。黯黯龍文。惜惜楚籟。匣塵滿矣。但好天良夜。魂清骨冷。抱金徽睡。

臺城路 題徐縵雲今宵酒醒圖

阿誰抵死催人去。樓頭五更鐘動。玉筍痕垂。銀荷灰燼。消得幾番潛送。如塵似夢。有萬疊山低。一篷愁重。月曉風殘。離情別恨此時種。江郎賦情漸減。送君南浦路。若

箇曾共。白雁橫天。秋河絡角。江上夜潮初涌。薄衾孤擁。想隔著高城。水精簾控。吟到銷魂。瘦肩山字聳。

高陽臺 重逢素琴較書

斷夢牽雲。微波怨雨。重逢故國深秋。只隔經年。玉簫已訴離愁。梁塵漠漠飛難盡。爲雙栖、巢印猶留。下簾鉤。掌上迴身。鏡畔迴眸。思量處處堪惆悵。有蘭釭影事。桂檝前游。當日絲楊。而今解拂人頭。江東才思隨年減。怕雲英、見也先羞。一齊休。銀甲彈箏。且合伊州。

憶舊遊 題彭甘亭淮陰鴻爪圖

記相逢市上。偶語橋邊。共識狂奴。斗大山城裏。看無雙國士。多在窮塗。高臺釣絲飄處。淮水正舒舒。問照影征鴻。而今可認。舊日頭顱。愁余。此重聚。又白下秋深。木末亭孤。回首當年事。話王孫老矣。乞食游吳。羞他少年問訊。長劍佩能無。更有箇官人。蠻雲蜚雨。啼鷓鴣。謂二娛。

又 辛酉秋重過得月樓美人已遠流水無際卽事悽眷殊不勝懷屬湘湄作
山塘感舊圖因題此解

又秋船疊鼓珠箔飄燈隔水樓高。試認雙栖處。看文紗六扇。舊綠都銷。隔窗玉鉤閒
挂。簾影黑周遭。歎水遠山重。春歸不信。直恁迢迢。無慘。此重省。記子夜休歌。午枕
回潮。欲話吹簫事。問二分明月。何處今宵。只有應門楊柳。還學沈郎腰。賸當日船孃
斜陽喚渡。掛酌橋。

清平樂 惜花仕女卷

獨兒撼起。日影闕簾未。屈指春光今賸幾。架上茶蘼開矣。褪來袖復胸前。耳璫一
半猶懸。除卻橫陳時節。者回模樣堪憐。

聲聲慢 西湖寒夜懷淥卿山左

酒波暖處。燈暈寒初。客愁最苦消凝。鏡裏年光。誰念暮景飛騰。西湖月荒沙白。剩南
山、尙見高稜。定笑我向危樓獨上。曲檻孤憑。忽憶故人千里。欲舉杯相屬。喚恐難

響雁字回時。須寄一幅吳綾。齊州暮煙九點。怕柔魂、飛夢無憑。待見也、問今宵、成夢未曾。

滿庭芳

風颭窗燈。霜沈街柝。客懷鄉思相撩。一眉寒月。淺澹畫無慆。隔巷不知何樹。到更殘、轉自蕭蕭。難忘處。高樓此際。心字正香燒。也應人倦矣。下帷小玉。滅燭輕綃。有雲屏幾曲。圍住春嬌。嘗記寒宵呼酒。愛看伊、登頰紅潮。還能否。只愁酒醒。依舊是寒宵。

臺城路

索張墨池畫僧廬聽雨圖

生平不分江湖老。而今鬢絲如許。羅帳燈昏。孤篷浪白。何似僧寮且住。憑君畫取。也未要荒寒。十分淒楚。山色湖光。濛濛更著幾株樹。當年俊遊伴侶。有沈雄騷賦。激烈雞舞。一半飛騰。青雲自致。一半已埋黃土。壯懷漫與。只掃地燒香。佛前燈炷。歸到西窗。泥他深夜語。

又 題米樓高山流水圖

世間無事無三昧。惟愁會心人少。半死桐枯。七條絲細。未識此中何好。有人絕倒。正水遠山長。獨移孤棹。寂寞千秋。也應直得絕弦了。知君一襟幽抱。問悵悵琴趣。幾箇同調。夢裏庵荒。蘆中士賤。容易國工先老。君有蘆中秋瑟詞夢憲庵君所居也波平風小。聽門外挈音。是儂尋到。若訪成連。刺舩歸及早。

醉太平 蓮衣詞爲米樓作

紅衣帶。按紅顏酒醅。休翻驟雨新荷。怕鴛鴦夢多。前溪緩歌。中流素波。夕陽一舸重過。又西風奈何。

又 題黃退庵友漁齋圖

庭中碧梧。窗中素書。看君便老江湖。有沙鷗笑無。東家酒壚。西家狗屠。客來高坐誰與。是煙波釣徒。

又 馮玉如月夜聽簫圖

宵寒更清。簫聲獨聞。碧桃花落紛紛。又人間暮春。而今鄂君。名香細薰。只他涼月

殷勤照秦樓夜深。

壽樓春 夢華屬題壽華樓圖

高樓浮雲齊。見交疏綺戶。飛級唐梯。最好肩扶同凭。手纖偷攜。看畫取雙蛾眉。是曉來、春風吹低。問淺笑妝成。閒情定後。前事可重提。天台路。桃花谿。記量珠未穩。尋夢多迷。漫恨親分釵鳳。暗通靈犀。詞有託。詩無題。分此生。銀河東西。算人欲天從。披圖有人應妒伊。

柳梢青

窗戶誰敲。分明花外。竹影微搖。卯酒醒初。丁簾下了。閒到無憀。別離魂夢偏勞。似八月、朝潮暮潮。守到黃昏。上來紅燭。又是今宵。

買陂塘 題陳雪樵留春小舫圖

記曾經、千巖萬壑。中流小舫容與。越孃纖手青絲絳。揀繫垂楊多處。來又去。總負了、鶯鶯燕燕匆匆語。知君小住。便挈榼三升。掠波兩槳。敲響水窗戶。人間世。莫道春

光難駐。任君青鬢如故。黃皮袴褶從軍樂。已換綠蓑煙雨。儂也誤。算略有、三楹草閣分湖路。頻年羈旅。儘竹外花開。江頭水暖。閒殺舊鷗鷺。

洞仙歌 題張晴厓聽香圖

蟾蜍寒玉。滴露珠清曉。擣麝成塵暗香繞。怪靈犀一點。鼻觀先通。人微笑。莫是遠山須掃。書生病風手。側盾橫磨底。用微揜袖羅小。要見玉纖纖。報墮金釵。難得露、麻姑長爪。算我若、當筵索新題。便背上神鞭也都判了。

懺餘綺語

月華清 古銅一器如環背隆然有夔文雲臺中丞證以漢書外戚傳班固何

晏賦定爲金釭屬賦此詞

根失倉琅。關飛牡鑰。漢宮遺事誰省。幸舍椒塗。猶賸辱金如餅。看團團、環轉無端。見
涎涎、燕飛留影。試問。是落帶連錢。此焉二等。想得溫柔鄉近。映月滿方諸。日闕員
蜃。流落千年。但有土花苔暈。笑從渠。禍水痕侵。應不比、銅山淚滲。此恨。只淒然通德。

背燈還認

疏影 黃葉邨圖

已秋未老。正西風幾樹。畫出斜照。如此江南。著箇扁舟。看來煙水都好。漲痕初落。籬根露。添屋角。數峯清峭。想前邨。定有人尋。樹下小門開了。自笑吾家同在。半邨半郭裏。歸計難料。輸與谿翁。三脚鐺邊。滿地霜華新掃。馬塍西去。秋盃冷。只近日。竹林遊少。謂小松。怕蕭蕭。撼撼淒淒。點點暮雅寒早。

柳梢青 惜花圖爲默齋作

斷送春光。花開花落。老卻潘郎。白白朱朱。紛紛點點。惜惜悵悵。青苔生徧長廊。是埋玉。深深土香。燕子歸時。畫簾垂處。一段斜陽。

一枝花 默齋將有閩海之行以丁巳歲方君蘭坻所作西湖餞別行看屬題
歎逝傷離輒成此解

溼翠濃如許。過了朝來涼雨。野航三兩客。舊漚鷺。且緩驪歌。小著尊前句。圖畫憑留

取。老去方干。經營慘澹心苦。往事休重訴。又早送君南浦。天涯端可惜。酒人去。天末閩山。如薺圍榕樹。橫海樓船渡。問手掣長鯨。更憶釣魚師不。

柳色黃

六扇窗紗。斜掩微寒。梅雨初過。香篝潤逼紅綃。笑覆畫衣文袴。良宵正永。那信春醪。遙山漸澹。眉痕妥。若是不相憐。肯佯佯偷臥。真箇入懷明月。碧海青天。半霄輕墮。花影參差。可恨烏龍閒鎖。自來小膽。況經此度。怔忡勝常。道罷回身。可道是不相憐。又遙遙同坐。

柳梢青

題斜倚熏籠坐。到明仕女

皺玉誰溫。熏籠倚徧。難熨啼痕。蠟鳳猶明。檐鴉未起。還算黃昏。有人曾隔中門。只許見。朝來面勻。簾柙垂時。剪刀放了。各自銷魂。

齊天樂

查梅史琴媵軒屬賦

吳蠶愛作同功繭。冰絲打來千縷。軫玉分田。徽金鑄礦。久矣心心心許。三星在戶。伴

謝女檀郎。最深深處。百福香籤。鱗鱗魚婢笑看汝。長卿可惜遊倦。鷓鴣裘典了。誰買詞賦。錦瑟人長。茂陵草綠。暗老舊時芳侶。何時酒取。怕鬢影春風。天寒日暮。一曲思歸。惜惜深夜語。

買陂塘 查丙塘補屋圖

笑年年、塗泥束版。寓公真似梁燕。尋常不待秋風破。已是三重茅卷。空谷晚。儘帶荔披蘿。楚客工幽怨。阿稽阿段。等刈稻歸來。水筒修了。商略手初斷。書生志。廣廈胸中千萬。漂搖先自難免。妻孥不怪牀牀漏。頗怪屋梁仰面。君不見。有碌碡場邊、苦草新如翦。紙糊窗暖。坐曝背鄰翁。驅雞稚子。旭日照檐滿。

南鄉子

夜永細聞香。坐近金鑪鵲尾旁。好是問人眠得未。空牀。白月微微印一方。端的沒商量。臨去殷勤一盼郎。聽得中門雙扇闔。倉琅。彼此生生暗斷腸。嬌極卻愁他。未綰頰雲兩髻鴉。便問昨宵應酒渴。薑芽。玉椀攜來雀舌茶。何計報

伊家說著先教粉淚斜。只願年年相對坐。窗紗。君似菱花妾似花。

點絳脣 詠小

叢桂山邊。那年早識愁滋味。羅衣心字。憐取橫陳未。一點脣朱。兩點顰眉翠。紅兒比。畫橋第四。添箇人人你。

鵲橋仙 詠五

梅花春早。雪花春好。色色迷離都有。問年剛是月團圓。想初二、初三時候。丁丁漏急。瑟瑟鼓絕。教擘藏鉤纖手。移家船上肯同吾。算只少、箇儂一口。

南樓令

了鳥鎖黃金。交疏隱碧岑。一重樓、一段春心。欲寄閒愁無著處。人定後、月微陰。舊夢苦侵尋。花枝瘦不禁。傍闌干、驚起栖禽。燭影幢幢燈上了。想又是、疊重衾。

滿庭芳 題沈秋卿夢綠庵

過雨霑沙。流雲學水。庭院又是微寒。梧陰竹影。深處著蕉團。幾番怱怱花信。換淒迷、

一曲闌干。無人到。香鑪茗盃。欹枕睡初安。前賢思北郭。羈臣老去。易雜悲歡。夢江南。萬綠見也都難。年少東陽何事。卻尋常。腰帶圍寬。他時去。圓莎分我。吟就刻琅玕。

綠意 娜嬛仙館蕉花畫卷

新涼雨足。正乍回曉夢。天影都綠。半拓吟窗。忽見低垂。重重芳意如蹙。煮茶煙澹。秋痕瘦。牆角一枝寒玉。笑美人。別逞妖妍。小露紅情猶俗。想爲著書人倦。墨花棊几淨。相伴幽獨。史稿焚餘。點筆圖成。仙掌露珠凝粟。詩人愛寫蕭寒景。恨未入、雪中橫幅。更待他、鳳實成時。留配故園修竹。

采桑子

碧紗窗外風吹雨。密密疏疏。似有如無。薄醉消時燭暈初。醒來呼婦閒商略。載酒江湖。息影菰蘆。還作征夫作釣徒。

探春慢 陳子玉鄧尉尋春詩意

烏榜衝烟。魚鱗動境。俊遊肯待春晚。雨水才交。雪花初霽。人在虎山橋畔。吟到荒寒

處。卻早有、翠禽啼徧。笑他歌舫。恁恁只向山塘塘半。記共阿連徐孺。載畫榼。瘦瓢。三宿猶戀。風帽欹檐。冰苔印屐。似爾少年清婉。回首昔年夢。已兩鬢。吳霜輕點。倘覓留題。石樓應有詩版。

醉太平

春花白紅。春山澹濃。春波才著春風。疊春羅幾重。春晴意慵。春陰懊儂。待他春月溶溶。約春人載同。

賣花聲 飲泉自畫芳草以寄望廬之思爲賦此調

一片好莓苔。綠了空階。葳蕤深鎖舊池臺。除卻斜陽和燕子。還有誰來。風約畫簾開。獨自徘徊。春痕如夢滿天涯。泥上襪羅泉下玉。都被伊埋。

高陽臺 醉雲樓爲康山主人江文叔賦

十里珠簾。二分明月。仙人原好樓居。別起閒房。上頭青鳥飛初。多情合爲瓊漿醉。早氤氳。結就流蘇。掩銅鋪。萬綠陰中。好箇青廬。鴛鴦待闕先開社。問何時。西曲。駕六

萌車雜體江淹。要伊小字親書。外人那識高唐賦。見行雲、紅上交疏。笑狂奴、他日重來。平視容無。

菩薩蠻 紅橋宴集代錢錢作

楊花薄處春雲厚。紅橋微雨愁時候。初試袂羅衣。問人宜不宜。坐中皆俊侶。更喜能吳語。千二百輕鸞。何人沈下賢。

釵頭鳳 鳳兒詞為文叔作

丹山麓。屏山曲。桐花倒挂珍禽綠。調琴等。吹簫引。初三下九。月明風定。肯肯肯。香車促。明珠斛。何人墮此懷中玉。文窗冷。文園病。一簾秋雨。滿階花影。認認認。

一枝花 嚴九能姬人張秋月故外家青衣也字以香修為繪秋江載月圖寄

題其卷

月色兼秋色。江上白蘋風急。張星剛一箇。月邊出。除是君平。還認支機石。應見天孫說。僥倖梁清。明河影裏迎接。相憶重相惜。崇讓宅中曾識。問卿緣底事。淚痕溼。從

此雙修。儘安穩。雙栖得。心香憑更爇。沈水博山鑪。看伊隨意綰結。張愛誦唐人但見
淚痕溼。不知心恨誰之句。

鳳凰臺上憶吹簫。題九能畫扇齋秋怨詞。用漱玉韻。原詞重一休字。今易之。
石闕碑銜。金缸淚滿。彈棋局在心頭。把一襟幽恨。寫上銀鈎。已是今生憐眷。便他生、
未卜還休。如何更。星星記夢。瑟瑟驚秋。香修。幾生到此。書縫列芳名。指印同留。屬
春人秋士。好在紅樓。夜夜牀前明月。爲故鄉。溼了雙眸。君多事。人方欲愁。卻又言愁。

疏影

上元夜退庵招飲梅花下。越日壽生自分湖來復會于此。用白石韻記

之

玲瓏碎玉。是舊時月色。招我同宿。隔歲相思。第一回員。休教便弄橫竹。微雲澹澹疏
燈小。只解照、枝南枝北。儘夜深、閒與徘徊。不管倚樓人獨。佳約逾期肯踐。夜潮放
一舸。來趁酒淥。側帽吟寒也。勝豪家。爛醉雲屏金屋。江城試譜偷聲句。怕略犯、龜茲
新曲。算不如、留影文窗。看取畫羅十幅。

探春慢 題汪芝亭桃花潭水圖

浪暖魚鱗。霞蒸鴨脚。川原遠近紅徧。白舫猶閒。青山如笑。已有酒旗風颭。遙認前邨路。問潭水、近來深淺。尋芳想未歸來。文窗一半斜掩。難忘人生知己。聽岸上蹋歌。密意先感。采石磯頭。沈香亭畔。何似水邨山店。商略從君住。算我亦、宮袍游倦。新釀成時。高歌爛醉誰管。

霓裳中序第一

陳秋堂蕉林學書卷題詞

閒來補爾雅。別院梧桐微雨灑。剛是園林首夏。正葦影天低。蠟痕風熨。香姜古瓦。又麥光、烏几鋪乍。憑吟賞、蛛絲拂徧。蝸迹篆文寫。窗下水天閒話。賸修竹、數竿低亞。人閒噩夢可怕。看老去王維。前生曾畫。鐵生作金壺隨意瀉。定一百、砵礫比價。還應笑、冷抱殘編。甚日殺青也。

雙雙燕

燕來笄

春晚客中憶故園風物得以下四闋

幾番潑火。聽昨夜輕雷。隔籬先響。參差迸土。穿破碧苔如掌。那忍堆槃獨享。正社饗、

乍開鄰釀。少年最惜芳華。淺醉烏衣深巷。比似春蔥纖樣。勝貓臥駢頭。兒繻脫襪。香泥愁洗。上有芹芽新長。苦憶園林勝賞。已稍拓、當風窗網。得知今歲。櫻筵樓上人無恙。

清波引 楊花銀魚

柳吹成絮。渾未見、綠萍礙艣。昨宵涼雨。波心櫂頭聚。網定千絲否。一寸天然如許。是誰憐錫芳名。算白小、應輸汝。回潮枉渚。記當日、孤艇小住。不如歸去。鶯脰作漁父。菽乳香同煮。篷背炊烟幾縷。繫纜一帶垂楊。最惜惜處。

夏初臨 麥人 吳鄉立夏以新麥微炙掌搓令熟謂之麥人以佐酒

白袷衫裁。黃雲隴割。麥秋將雨還晴。立夏時光。青梅白筍。朱櫻登筵。莫訝猶生。費曉寒、玉手搓成。年年風景。鮑魚網出。確筵茸鳴。兒童失喜。翁媪開顏。預知餅大。合用羅輕。冬前三白。去年曾見瓊英。顆顆勻圓。算除非、瑟瑟盤盛。念何時、江湖得歸。相就魚羹。

惜紅衣 紫荷花草

菜甲黃攙。麥畦翠剡。半塍初繡。紫豔紅天。平鋪地衣厚。芳名最好。算合襯、踢青鞋瘦。知否。陌上泥香。乍清明時候。風前雨後。一簇衣香。何人此攜酒。春痕研妥。想定坐來久。記取往時沈醉。守到夕陽紅皺。看牧童歸晚。丫角一雙簪又。

雪獅兒

杭俗清明以粉餌作狗貯至立夏食之云可祛夏疫呼爲清明狗月

璘屬余詠之

搓酥滴粉。誰把烏龍。青黃偷塑。寒食無烟。搖尾知渠何處。綵絲縛住。應不吠、桃花月午。怕待到、石泉榆火。論功烹汝。長夏困人良苦。想文園病久。爲伊釀取。上冢歸來。黃胖泥孩同貯。嬉遊伴侶。小膽怯、柳邨花隴。青春暮。試問寄書能否。

揚州慢

寄康山諸友

水木清華。亭臺窈窕。此中況著吟朋。有雜花如錦。有酒又如澠。正吹雪、鱗魚上後。藥闌紅處。翠袖同憑。屬嬉春新句。醉中寫上吳綾。江湖載酒。料狀元、此樂何曾。也十

面琵琶。百番腰鼓。換了滂膺。說與史半袁方子雲。張子貞顧。芝山想登臨。憶我還能。夢飛帆來也。隔江山色稜稜。

琵琶仙 寄懷文叔

淺醉微吟。句留處。正是春光婪尾。窗外時有春風。來吹一池水。況俊侶。風情未減。看賓主。才華齊綺。側帽聽鶯。回波擫箏。總在花底。江郎賦。輕別怱怱。對紅藥沈吟。一年矣。書記縱然無恙。只離情難寄。還試問。雲窗霧閣。定有人。薄擁雙髻。更念宿雨晴時。海桐開未。

柳梢青 河東君小像

施粉施朱。幅巾闊袖。雅合稱儒。柳亦號儒士。白足逃禪。黃絕入道。老卻尙書。百年彈指須臾。更省識。春風畫圖。紅豆花殘。紅羊劫小。恨滿蘼蕪。

摸魚子

汪蛟門先生少壯三好圖藏。秦敦夫太史家太史屬題。

是何人。持杯踞坐。圖書粉黛叢裏。舍人才地。鴻臚筆。大有六朝風味。聊快意。看當日。

羣公一一爭題字。蕭郎差礙。怕百尺梧桐。而今愁換。繞屋白楊矣。平生好。何止區區三事。可憐少壯。能幾酒闌歌罷。蛾眉散。老共蠹魚生死。秦學士。想山抹微雲。此曲人能記。二分月底。且屏當籤廚。安排鐺杓。容我坐中醉。

西子妝 題壽生西湖訪秋詩冊

卵色浮青。魚雲疊碧。過了幾番涼雨。柳痕烟態已疏疏。記年年、看秋來處。長隄延佇。有多少、鷺儔瀕侶。讓吳儂、買蜻蛉一個。任風吹去。君休誤。此段清遊。天合教領取。裙腰草綠。馬蹄香。是當時、少年情緒。病懷漫與。伴低唱、淺斟應許。屬尊前、休賦悲秋秀句。

水調歌頭 望湖樓

其上天如水。其下水如天。天容水色。淥淨樓閣鏡中懸。面面玲瓏窗戶。更著疏疏簾子。湖影澹于煙。白雨忽吹散。涼到白鷗邊。酌寒泉。薦秋菊。問坡仙。問君何事。一去七百有餘年。又問瓊樓玉宇。能否羽衣吹簫。乘醉賦長篇。一笑我狂矣。且放總宜船。

清平樂

酒醒人起。竹影篩窗紙。薄薄羅衾涼似水。第一天涯滋味。柔魂不隔嚴城。啼妝見也分明。欲續枕函殘夢。奈他一陣鴉聲。

浪淘沙 西陵晚歸

積雨淨谿沙。魚尾明霞。缺瓜小小趁風撻。幾個畫船歸去也。閒殺蘋花。烟靄半橫斜。樹杪周遮。酒旗樓角是誰家。一面駝鉤都不下。人影涼些。

國香慢 爲吳子修題顧橫波畫蘭扇面同壽生賦分眉生二字爲韻

似畫修眉。看不多幾筆。葉葉離披。秦淮煙輕粉澹。自寫幽姿。想見眼波橫處。便紅妝、季布輸伊。多情只執扇。辛苦流連。露蕊風枝。傾城惟一顧。記當年雅謔。仙也須迷。同心句好。白家蠻柳同時。底事欲傾落墨。怕夕陽、紅染胭脂。還應足惆悵。老去香嚴。不與題詞。

賣花聲

低髻約釵梁。病不成妝。啼痕已拭尙成行。指點畫樓文杏好，歸燕淒涼。漸遠漸蒼。茫。燈火漁榔。暮寒想透薄羅裳。只得一鉤微月影，多少思量。

霜華腴 續樂府補題五首 柏子

暮林黯澹映晚江。離離一樹初圓。紅脫楓衣，白欺梅蕊，十分綻了霜天。可憐翠鈿。記當時、樹下門前。問何人、曲唱西洲，荻花蘆葉共清寒。隨意水邨山郭，任漁娃打取，雀豹爭喧。曉色推篷，斜陽倚櫂，還驚積雪留殘。綺羅畫筵。化光明、一霎銅槃。只愁伊、易近風簾，淚痕渾未乾。

秋霽 澹竹葉

荒徑尋秋。有一種叢篁，自弄寒碧。个字低分，鈿花涼戰，寸寸嫩寒如滴。一枝一葉，傍池漫帖玲瓏石。更記得、池外亂飛，無數小黃蝶。除是雨過，淨掃浮雲，暮天蒼然，如此顏色。笑長條、牽牛翠浥，朝來先怕日痕炙。那似此君疏野格。試覓籬畔，正好藥錄收時，藥籠攜采，露華尙溼。

瑣窗寒 蠹蠹

絡緯啼殘涼秋已到。豆棚瓜架。聲聲慢訴。似訴夜來寒乍。挂筠籠。晚風一絲。水天兒女同閒話。算未應輸與。金盆蟋蟀。枕函清夜。窗罅見低亞。簇幾葉瓜華。露亭水榭。胡盧樣小。若個探懷堪訝。笑蟲蟲。自解呼名。物微不用添爾雅。便蛇醫。分與丹砂。總露蟬同啞。京師人以胡盧貯之。製極精好。藏懷中。飲以丹砂。可養至十月。

傾杯樂 沙裏狗

沙岸潮回。水邨漁聚。腥風幾日催發。看伊瑣細。何處斷港。聽爬沙響別。酒人能說未應誤。讀愁他彭越。深杯試呷。春酒暖。雙眼一時波活。高陽舊游星散。阿誰憑寄。須糝吳糟壓。定笑指尊前。膽娘難擘。也無腸愁絕。最憶松江。鱸鱸鮮雀。一樣瓶泥圻。

國香慢 煙草花

小朵娟娟。簇微黃澹白。點綴畦邊。呼龍種來。瑤草疑是藍田。昔日遊。遙稚蜨。幾曾見。如此芳妍。無人解頰采。薑稜芋陂。一抹秋烟。相思名字在。算移根海島。已幾多年。

花花縱好。葉葉更動人憐。無分湘筠玉指。倚熏鑪。噓暖吹寒。風前自開落。陌上時時。誤認花鈿。

高陽臺 寒竹同陸祁生作

石罅苔黏。池心冰膠。此君尙倚高寒。一片瀟湘。凍雲留護琅玕。三更急霰才微響。已枝枝壓近紅闌。小檀爨。花戶油窗。密坐聽殘。回思上番移栽後。迸春雷幾處。膩粉初乾。燒筍年光。怱怱又近椒槃。蘆簾紙閣朝噉暖。惹檐前雀啅爭喧。翦冰紈。玉茗黃梅。畫與君看。

探春 次韻曹種水見贈卽題其擬古諸集

飛雪羣山。翦江十幅。天涯寒羽先倦。萬貫纏輕。二分月冷。笑殺文章錦片。除是同心侶。解說與、多愁多感。彈來促柱危弦。是誰呼起箏雁。子建華年。晚晚算甲子雌雄。眞合愁伴。烏窳低篷。蠟釘刻燭。短棹何時同返。閒擬江淹體。更試看、柔豪頻染。到及春前。寒梅無數開亂。

清平樂 繡鳳仕女

低鬟斜簪。淺研吳綾。喚作針神應也可。一口紅霞濃唾。秦樓煙月微茫。當年有個蕭郎。到底神仙堪羨。等閒不繡鴛鴦。

洞仙歌 曹種水水南邨舍圖

谿雲罨畫。住人家三兩。時見當門曬漁網。聽漁歌唱罷。有讀書聲。臨水處。面面軒窗齊敞。儂家魏塘屋。水竹之間。占取茆堂一分廣。支港曲通船。乘興能來。儘緩打、樵青雙槳。奈一笑、相逢各天涯。總讓與閒鷗。作煙波長。

祝英臺近 題孫華海惜花春起早卷子

繡簾垂。瑤戶悄。幽夢爲誰覺。不裹頭巾。幾徧曲闌繞。趁他人柳猶眠。海棠未醒。儘消受。月殘風曉。問啼鳥。昨夜風雨何曾。已有落紅了。莫是紅閨。偷折數枝好。試看香徑蒼苔。露華濃處。怕先印、襪羅痕小。

菩薩蠻 顧升山畫蔬果十五種

東風欲破苔痕綠。輕雷一夜驚蒼玉。時節近櫻厨。何人餉老夫。
新譜滄玉訣。小點
吳鹽白。又是焙茶天。山家處處烟。筍

廢畦荒圃流泉泫。一檐斜日鄰翁灌。頓頓食花豬。還須略配渠。
五湖煙水好。可惜

英雄老。回首換生華。春風雪白花。蘿蔔

當筵脫手金丸小。蜂黃易著麻姑爪。斜日洞庭帆。也應喚橘官。
重來門巷改。一樹

垂垂在。記得雪成團。枝頭黃雀寒。枇杷

清霜初點黃花瓦。兔豪圓瓊檀雲藉。香遠坐來微。量沙淺護伊。
形容殊魁壘。卻笑

豐肌膩。小盎載根株。誰傳種樹書。香櫟

一繩界破秋痕澹。荒荒野蕩波流漫。坐個小漁娃。船身如缺瓜。
水天閒話處。隱語

相爾汝。要見玉玲瓏。紅衣褪一重。水紅菱

粉痕不掩梨雲凍。金盤素手投來重。薄汗拭輕容。有人雙頰紅。
甜香午枕透。卯酒

初醒後。酒醒夢揚州。揚州舊酒樓。木瓜

蝸牛廬外連畦紫。擔頭壓處喧朝市。一笑謝廚孃。飽嘗風露香。當時花滿地。色與輕衫似。轉眼又秋光。悠揚小蝶黃。茄

平生不負然糠火。園收山榘同珍果。隔岸有高荷。秋來涼雨多。岷峨殊遠在。那不陂塘買。生計更疏蕪。今年飯豆無。芋

紅衣落盡星星見。刺菱圓芡看都賤。最好晚涼天。賣時搖近船。西湖秋老處。唱徹雙鬢女。莫道苦心多。空房還奈何。蓮房

森森鶴頂愁輕觸。臂支起粟皴紅玉。結夏記山房。微風深隴涼。指痕留一捻。怕向

鮫綃浥。越女雪肌膚。問郎曾見無。楊梅

青房已拆珍珠罅。金鑲臺榭忒初夏。冰齒瓠犀寒。芳名原帶酸。檀郎閒調笑。多子

憐渠好。低首入房櫳。一方裙袂紅。石榴

平疇子母迎朝日。東陵別見新標格。破處幾沈吟。可憐碧玉名。水天同夜話。逆鼻

香無價。插竹看登筵。星期又一年。香瓜

紛紛誰見紅鹽墮。春槃常伴蘋婆果。吹氣本如蘭。非關一蕊含。酒醒添病渴。記取投時節。纖核教還他。夜燈看作花。橄欖

顛痕一抹紅霞暈。吳孃小擘春纖嫩。結子太怱怱。關心昨夜風。瑤池開落後。海底

仙人瘦。青雀倘飛還。因緣見阿環。桃子

短籬瘦竹欹斜拄。一棚慣響疏疏雨。低戰數枝花。秋來絡緯家。其湯煎太急。飽嚼

珠明月。小坐晚風涼。盲翁正作場。扁豆

賣花聲 題思未酒醒聽詩小照

桐葉碧惜惜。小院輕陰。月痕澹照第三廳。貪卷疏簾風露下。不點秋燈。樓閣對高稜。招手還嚮。夜涼乘興我來能。酒半詩成慵不寫。念與君聽。

又 題孫碧梧女士湘筠館樂府

小院碧雲停。花又深深。舊時珍伴共閒庭。誰記迷藏花下事。蛺蝶蜻蜓。斑管費沈吟。哀怨湘靈。一弦一柱最惜惜。彈盡明光三十段。知有誰聽。

喝火令 許玉年有黃門之悼賦情悽戾自寫遺像屬題秀芬女士一詞最工

輒同其調

鶴舞吳門市。鶻啼湖上墳。小桃生命短三春。腸斷蕭郎詩句。三月十三辰。墮馬鬢猶擁。回鸞鏡易分。殷勤留取卷中人。且與題詞。且與爇香熏。且與夜深人靜。醺酒喚眞眞。

暗香 魂

玉妃喚月。怕等閒忘卻。前生瑤闕。鶴背夜寒。此際千山萬山雪。誰覓胡香四兩。空留得香桃如骨。試問與、舊日孤山。疏影一時活。嗚咽。古訣絕。便碎翦紙花。記得時節。故鄉一髮。江水茫茫恁飛越。判使巫咸不下。央素女、低徊潛說。但只恐、相見也。黯然又別。

疏影 夢

今生已矣。又見來脈脈。燈背屏底。道是相逢。卻又無言。惜惜自搵清淚。茫茫昧昧。恁

忽極尙病裏。厭厭情味。算向時。怨緒歡情。歷歷只還如此。只是吳根越角。一千二
百里。芳草無際。澹月微茫。萬瓦參差。那認荒荒園子。真教不隔人天路。也勝似。一生
顛顛說與伊。休返蓬山。洞戶悄然雙閉。

高陽臺 題樂元淑烟夢詞

荷露圓珠。蘭風回雪。空留名字堪憐。才刻茗華。不知玉已如烟。方塘無數田田葉。問
青泥、何苦生蓮。擘吟箋、有客西江。愁滿歸船。年來同抱司勳感。算傷春刻意。不似
今年。芳草西陵。爲誰澆酒花前。人間只有三分月。恨二分、多照重泉。又淒然、一個流
鶯。相伴啼鵲。

又 丙寅七夕

纖月藏鉤。羅雲學水。夜涼又是星期。竹插瓜分。當年一味嬌癡。笑他地久天長意。換
絲絲、此恨無時。又誰知。天上人間。薄命如斯。星沈海底繩河遠。話穿鍼心痛。擘鈿
眉低。點點流螢。飛來還坐人衣。想應低度紅牆過。見妝樓、網徧蛛絲。可憐伊、未卜他

生。不算相思。

卜算子

微雨溼苔痕。階下秋花滿。有箇階前顛顛人。病起和伊看。又是一番秋。只是無腸斷。留得當年顛顛人。也不恨天涯遠。

臺城路 爲江子屏題蟬柳畫扇

世閒何限秋風客。哀吟爾偏淒緊。灞岸魂銷。齊宮夢斷。點入輕羅小景。纖纖瘦影。照病葉殘枝。抱來難定。寂寞羈人。平蕪千里故園冷。乘鸞秦女底處。網蟲從徧了。空認雙鬢。蛻後仙衣。妝餘寶鈿。一例漂零誰省。啼雅露井。只落葉聲中。獨欹孤枕。欲訴琴心。暗塵埋廢軫。

夜合花 見玉簪花有作

雨浥茗英。風彫荔佩。感秋秋思頻添。牆陰瞥見。枝枝小玉排籤。露痕滋。日痕暹。只多情低照涼蟾。更無人肯。苔階溼徧。來搯春纖。尋常粉印先霑。付與冰甃淺貯。素手

輕拈薄寒漸緊些。時尙未開簾。雲鬢重，蜜犀嫌。記當時，一味慳慳。最難忘是，通頭過了。驀到前檐。

摸魚子

樗園客感

任惓惓、竹陰滿院。苔痕長自疑雨。回廊小徑無人到，坐過一番闌暑。秋又暮。便早有、寒螿四壁催機杼。羈懷何苦。付破研深杯，微吟淺醉。玄髮變衰素。江湖約，負了銅駝俊侶。燕城枉說能賦。文章信美，功名薄，已誤昔年小杜。休再誤。問買取扁舟，一棹歸何處。滄洲紅樹。認小小柴門，門前秋水，幾箇舊漚鷺。

浪淘沙

歸燕已差參。何處疏砧。天涯蕉萃旅人心。開到芙蓉無限好，只是秋深。推枕起沈吟。小簟輕衾。楓根可奈薄寒侵。又是一宵檐外雨，到曉沈沈。

點絳脣

病酒心情亂。愁壓夢濃於酒。曉雅聲驟。一晌歡情勾。枕上啼痕，覺後依然有。還知

否。蚊幃如舊。少箇拏幃手。

高陽臺

水盼凝秋。烟眉鎖恨。披圖那不神傷。水精簾卷。犀梳猶帶餘香。畫工縱識春風面。任調鉛、寫出愁腸。記年時、錦瑟桃鬟。都似伊長。尋常一晌閒言語。到如今、總費幾徧思量。百就千攔。自家暗減容光。潮痕兩頰生朝暈。恨當初、薄有疏狂。祝秋墳、休長蘼蕪。怕上牛羊。

金縷曲 席上贈阿許

燭暈華筵半。怪琵琶、抱來不正。聲聲悽怨。座上飛瓊傳姓字。曾識舊家仙眷。量十斛、珍珠偷換。過眼穠華昏似夢。賸流鶯、老去啼秋苑。垂玉筍。淚痕滿。天涯有客停杯歎。算人閒、古來多少。桃笙團扇。失路才人孤憤客。一例青衫淪賤。只哀樂、中年難遣。試琢新詞能譜否。怕一聲、裂帛鴟弦斷。將進酒。莫辭勸。

祝葦臺近

髻堆鴉眉學字。未滿十三四。綽約春風。先解折花戲。不妨樓下迷藏。尊前捉搦。總同在曲屏風底。夜來起。不知誰殺殘燈。小膽破濃睡。嬌極鸚哥。偏管隔簾事。奈他淡月縈窗。暗螢穿戶。又悄地。逗人懷裏。

溯繩河。遵枉渚。別擢理南浦。挑盡蘭釭。夜夜夜深語。分明月魄沈輝。霜華催曉。坐一對素娥青女。送人去。還要芳草長隄。同印小蓮步。蹙繡香輿。淚隔碧紗雨。記否寶石山腰。亭亭白塔。是第一度分攜處。

玉鞭迴。鈿尺近。幽蟲逼香潤。作意生疏。比似舊時省。只憐已隔紅牆。牆東月上。都不。是那般花影。曉妝竟。閒來還伴繡書。喚坐喜邊肯。出匣冰圓。認是內家鏡。偷看荷背翩翩。鴛情顛倒。又無語。頰潮紅暈。

楚妃愁。湘女怨。深巷舊巢換。玳瑁梁閒。海燕占來半。生憎一片簾衣。不風不雨。但鎮日。周遮人面。有時見也。只倦繡停鍼。妝罷響金釧。多謝好風。夜靜送刀翦。如何葉葉花花。相當相對。只遣隔中門雙扇。

鬱琴心。寬帶眼。薄病得伊感。銀鹿青猿。那肯夜深伴。難忘窗網將明。瓶笙猶響。燈影裏、翠眉微倦。五更短。暗祝海水添他。玉漏一宵緩。此後關心私語。有時敢。不防六幅仙裙。留他未穩。早已是、皺痕都滿。玉壺迎金犢。駕催赴紫鴛社。瓊姊蘭姨。遽別詎能捨。料他月榭修眉。雪衾擁背。全不記、夢殘香燧。報歸也。聽說多病文園。玉骨不盈把。一笑憑肩。青鳥信音假。可應翦燭溫存。圍鑪暖熱。且償我、鄉來長夜。檢香篝。攜畫燭。衣潤怕梅溽。初試生綃。無力出新浴。殷勤半瓊春醪。祝花長命。渾不料、霎時積玉。忍輕觸。爲怕窗隙風尖。容易颭裙幅。斜掩金鋪。小犬吠花獨。可憐從此心忪。斷無人處。誤幾徧、拂簾蝙蝠。腕闌鬆。眉黛結。幽恨幾曾泄。冰雪心腸。肯怕隴鸚舌。更煩小玉眠時。輕綃去後。留一點、闕人明月。太癡絕。假饒長夜如年。曉色慘將別。守定熏鑪。坐到滿鑪雪。尙憎阿母朝來。梳頭喚起。已亭角、夕陽紅抹。

月圓初。燈落後。佳約敢輕負。笑拂征衫。春雪點衣厚。儘教女伴猜疑。小眉秀鬢。都不似向時儂憊。定來否。人生如月華年。一缺那能又。千徧沈吟。三字莫須有。請看束竹回腸。香桃瘦骨。換幾點。袖邊紅豆。斷魂驚。殘夢惡。花事到紅藥。中酒傷春。比似去年弱。無端半幅蒲帆。一聲杜宇。又催去。水邨山郭。笑騎鶴。明月原只三分。都應照離索。小杜年來。何忍更輕薄。惟餘叩叩香囊。藏來肘後。待相見。替伊親絡。雁飛遲。人病早。幾度促征棹。誰料長卿。石井掩秋草。負他密字蠶眠。芝泥鴻印。空望徧。片帆煙杪。鴉媒巧。肯信不嫁娉婷。已分十年了。何用錢刀。刻意媚翁媪。還虧百斛量珠。一雙種玉。也博得。傾城微笑。遶香臺。移鏡檻。六扇小屏展。研匣鍼箱。分半貯來滿。那時賣賦金多。壚頭價貴。也未要。鸚鵡頻典。意深淺。試將酒卜郎心。寒宵倩伊暖。夜冷杯殘。一霎近人散。而今淒絕天涯。醒然無寐。便有酒。也無人勸。

倩風姨。憐月上。珠露記承掌。認取前因。此意料無恙。驚心子夜歡聞。同聲婉轉。已變了。回波詞唱。漫惆悵。人閒幾箇尹邢。蛾眉肯相讓。畫裏櫻桃愁裏小蠻樣。尙憐鏡鵲同開。釵蟲對剔。還略似舊時情況。藥鑪煙相對。裊深院。晚風峭。塵滿菱華。一月幾曾照。愁他鞦韆香雲。釵扶不起。又何論。遠山蛾掃。夢顛倒。尋常銀液犀株。不鎮暗魔嬈。雛樣青衣。所事被花惱。關心嬌喘沈時。暗眸迴處。怕莫又喚江郎覺。掩啼珠。扶瘦玉。喚渡曲江曲。縞袂纖褂。腰細不勝束。枉教疑作江妃。淩波解佩。誰信有。亂愁千斛。在空谷。無奈日暮天寒。零落去華屋。江鬼西陵。夜雨杜鵑哭。傷心逝水滔滔。當時同渡。卻雙槳歸來人獨。事三生。魂一縷。此錯幾州鑄。肯放扁舟。若箇勸無渡。倘教玉在懷投。香和心爇。萬一把遊仙留住。恁來去。爲甚清映聲中。都無片言語。尋到荒山。風急又兼雨。斷腸點點青苔。方方黃土。又埋了。一家嬌女。

短檠昏。深院閉。簾影黑垂地。小擘吟箋。暗記夢中事。可憐放筆聲中。挑燈影裏。還認有箇人無睡。應難記。縱饒記得星星。有頭也無尾。自恨從前。恩怨總輕視。判將一寸絲腸。一宵霜鬢。報幾番。唾壺紅淚。

采桑子

尋常侍寢更衣處。燈影紗籠。羅幕重重。略近前時面發紅。月明雨落無人覺。侍婢都慵。裙褶惺忪。香棗何勞問石崇。

卜算子

階下綠薔薇。架上紅鸚鵡。忘卻窺簾尙有人。攜手潛來去。輕試踏青鞋。暗躡凌波步。不道回頭別有人。信口相儂汝。

意難忘

箏語琴言。約羊燈照影。鳳紙傳箋。天穿逢令節。月滿記芳年。人定後。夢來前。難道玉如煙。正峭寒。春風催曉。紅淚涓涓。輕綃製就中單。認蠶黃。蜨粉。花落先黏。鶻啼留。

恨血。癩髓助香瘢。金篦鎖。鈿筐絨。珍重一春殘。肯並他。綠羅裙帶。水上同瀟。

更漏子

杜蘭香。羸弄玉。一例仙家眷屬。錦瑟短。玉簫長。何曾作髻忙。月嬾嬾。花醅醅。時節近來重五。沈醉後。錯相呼。畫簾聞鷓鴣。

洞仙歌

初三下七。愛共蘭姨戲。二八華年滿除四。拜鍼神。修笛譜。步步教隨。婉婉甚。也算齊心耦意。揚蛾憎衆女。謠詠紛紛。池水干卿定何事。聯臂舊時歌。變了歡聞。重來後。贏得大家顛顛。若不是。當年見猶憐。肯繡被分教。伴鴛鴦睡。

河傳

花顫。燈淺。移來屈戍。小屏深掩。屏閒鷓鴣。一雙栖。東西兩頭蓮葉齊。麝熏未肯開。孤鳳。梨雲凍。好做同牀夢。夢恁恁。帳重重。芙蓉深紅和淺紅。

沁園春

無分今生。何似當初相逢漠然。卻雛鶯乳燕。見伊小日。飛花落絮。送我中年。玉淚珠啼。紅愁綠慘。便是無情亦可憐。誰知是。有心頭暗恨。記也難全。那回款語燈前。似密意深情。略爲傳。道枝名連理。種原無地。禽名共命。修到生天。三素雲輕。六銖衣薄。定在寒簧瘦影邊。還能否。撥齊煙九點。來照孤眠。

行香子

子貞月夜登小香雪亭作畫屬賦

孤榜清遊。烏帽籠頭。問招來、幾箇閒漚。沿洄撥棹。窈窕尋邱。有三分水。二分月。一分秋。平生最憶。探梅踏雪。虎山橋、塔影香浮。而今重到。怕減風流。少舊時人。舊時月。舊時愁。

霜天曉角

題吟香女子小影

綠萼開些。拓當風畫紗。窈地退紅衫薄。恐小立、冷於花。鴉叉新掛他。問姍姍是邪。說與吾家窗下。有竹外、一枝斜。

湘月

題子屏填詞圖

石牀。斐几。正蕉陰綠暗。雨過如沐。漸入涼秋。合料理。舊日哀絲。豪竹。鬢影琴邊。箭修
月底。試與同聲讀。江郎宮體。譜來總是新曲。憶否小住名園。偷聲減字。刻尊前紅
燭。協律微茫。怕誤了。多少詞流。毫禿。滑笏箋長。翻香令小。薄有花開福。何時歸去。記
歌念取人獨。

桂枝香 中秋有感

姮娥不嫁。問終古淒涼。可記長夜。未必青天碧海。便無情者。一年十二回員闕。恁今
宵、淚痕盈把。那堪遠又。歡闌人散。夢殘燈炮。想妝閣、夜香燒罷。看珠斗闌干。檐角
低掛。有日雲鬢霧鬢。照伊清話。人閒小別。何須恨。恨沈沈、青楓根下。步虛聲斷。霓裳
曲破。此生休也。

玲瓏四犯 玉年以元人雁宿蘆花雅宿樹各分一半夕陽歸句爲圖極蕭寒

清遠之致爲題此解

樹老易風。蘆荒疑雪。江村物候初冷。夕陽無限好。又是黃昏近。昏昏四山做暝。但催

他亂雅成陣。更著蒼茫。一行征雁。嘹唳助淒緊。天涯孤客閒省。記菱根、捩柁沙鷺。維艇小奴驚欲起。點墨濃初定。江湖有夢何曾熟。算還是、眠鷗差穩。笑指檣頭船。問載歸定肯。

綺羅香 姑嫂餅

屑麵輕勻。搓酥滑潤。傳自香閨新製。樣學桃花。小印脂痕紅膩。想曉趁、夏釜時光。正嬌伴、扶牀年紀。全不防、腸斷行人。垂涎先在下風矣。橋梁臨水堪認。道是蔣家妹小。食單親試。作罷羹湯。纖手入廚重洗。笑曲譙、畫地虛名。愛齧脣、頰椒風味。莫教恁說與彭郎。況寧王宅裏。

桂枝香 屠墳秋鳥

荒林落照。認宰樹蒼茫。一羣驚噪。纖繳鳴弦。已有弋人尋到。陶邨馬瞳披絲好。算總輸、酒邊風調。蜀薑鳴釜。吳鹽點雪。櫛瓶開了。問何事、輕離海嶠。有淥衣同戲。紅椒堪飽。萬里頭顱。來博尊前人笑。雲羅滿地。西風早。想江湖、羈雌多少。料應夢斷蠻天。

一角暮煙孤島。

雪獅兒。茗玉女士輯銜蟬錄。隸事極博。高邁庵爲作子母銜蟬圖。索題此解。妝樓記就知。是無聊。深沈院宇。側輟橫眠。亭畔花陰剛午。繡塹小住。誰教見。花奴戲舞。更貌出薄荷酣後。雙睛圓處。門外珊瑚鞭。休去。儘香溫茶熟。小名錄取。箬裏青鹽。差有殘書煩護。癡兒駭女笑。一例蟲魚箋注。應知否。合伴畫檐鸚鵡。

長亭怨慢 瞿花農分司相見西湖出王蓬心太守漢皋贈別圖見示有二娛

題詞輒依韻倚聲

笑又是閒雲離岫。西子湖邊相逢杯酒。漢上襟題。回頭已是廿年舊。漫郎渾漫。應未要稱聲叟。對畫裏江山話。昔日回帆風候。還試問吳根越角。可似武昌樊口。扁舟容與。且消遣。雨霽風憇。趁嬉春。老鐵能狂。煩鑪畔。諸公屯守。指點傍。西泠一帶。青青新柳。

柳色黃 於越中買新鵝一雙戲爲詠之

曇曠邨邊。春水方生。短襪初逼。書生家具無多。隨意一籠攜得。滄波亂眼。送人千里歸來。門前新柳。嬌黃極。還怕惱比鄰。浴那家池側。無力鷗羣閒趁。曬翅魚梁。伴他鷓鴣。老矣傭書。不羨東堂行肉。小樓臨水。難忘雙髻樓頭。排成玉管參差立。彷彿凭闌干。見袖羅顏色。

乳燕飛 送蔣淥初之臨川

一例天涯客。怪相逢、推襟送抱。似曾相識。西子湖頭長安道。十載恍同遊跡。偏勞燕、差池雙翼。不信將軍門下見。有此君、蠻語余長揖。同握手。章江側。齊年四十初過。一看紛紛。當時同學。輕肥顏色。雁鴛行中紙尾署也。勝白頭射策。便詞列、三王何益。玉茗堂前煩問訊。屬海雲、留取通仙笛。曲有誤。顧應得。

水龍吟 江右旅館喜雨

疏疏幾陣涼颼。颯然便送敲窗雨。樹梢流響。草頭顫影。霎時無暑。一片濃陰。多應來自西山南浦。料天公也厭。炎官火織。怕困損人羈旅。惜少高荷大芋。展桃笙。醉眠

聽取。紅綃初浴，碧簪斜墜。枕痕留午。小扇輕衫，知他此際。倚闌何處。向畫屏十幅，瀟湘天遠。夢尋伊去。

浣溪紗 寄內

一別無端半載強。輕船三版整歸裝。可憐篷背已微霜。月榭鎖魚鰈，永夜風簾蠟鳳淚。雙行不成還道不思量。

疏影 燭淚

珠啼玉泣。向畫筵深夜，相對愁絕。今世紅紅，宿世蟲蟲，生平最惜離別。風簾露席隨升降，判滴滿、爛銀荷葉。算芳心、未是灰時，肯怕界殘紅頰。便與籠紗護取，也應護不到，將地時節。苦憶高樓，網戶曠曠，照見粉痕明滅。羅襦低解，聞薌澤，有誰問、階前堆積。只淒然、擁髻人人，愁澹石榴裙褶。

憶舊遊 酒帘

記絲楊漸暗，文杏初明。一見關心。似與東風約，看斜斜颭颭，先得春情。隨意水邨山

郭倦旅爲伊停。正解佩人來。提壺鳥喚。好箇旗亭。阻風原不恨。恨俊侶高陽。多半
漂零。還向壚頭去。認低窻高柳。是處曾經。只是風前半幅。不似舊時青。試閒立平橋。
前谿煙雨深未深。

聲聲慢 闌干

苔階恨淺。竹逕嫌深。虧伊屈曲周遮。背手微行。湘痕紅出明霞。沈吟碧城十二。問那
邊、庭院誰家。閒付與、玲瓏澹月。低亞疏花。嘗恨當時夢裏。枉等閒敲徧。沒處尋他。
歸去恁恁。斷腸一角天涯。幾番畫廊癡立。認有人、鞞袖來耶。渾不見。但文窻深掩絳
紗。

如此江山 香篆

何人斜掩屏山六。簾衣又深深下。小炷微紅。輕絲漸裊。靜看縈窻尋罅。尖風易惹。恨
剛結心同。又吹烟地。一縷柔腸。分明宛轉爲伊畫。湔裙水上猶記。博山鑪俱過。前
約都謝。羅帶輕分。銀槃愁寄。難翦夢雲盈把。熏籠倚罷。對燈影離離。悄無言者。手撥

餘灰。隔窗梅雨灑。

小樓連苑 簾波用蘭村韻

後堂前閣空明。最深深處溶溶地。龜紋半蹙。駝鉤不上。一絲風細。月地雲搖。苔階潮轉。欲垂還起。怪驕獮睡醒。雛鬟行到。都驚道。花枝碎。隔著樓頭廊底。幾曾隔。粉香脂膩。只是陳王。通辭難託。湘雲湘水。便有時開。見伊窈窕。畫裙斜曳。總生憐。俊眼將流。流不出。相思字。

風蝶令 和湘霞韻三首

煙視雙行近。蘭情一見稀。入懷嬌鳥向人依。只覺愁多意重。語言微。手裏題詩筆。牀前織錦機。蘇娘謝女是耶非。難忘一燈明處。兩眉飛。

漂泊年華小。周防用意深。鴛鴦翡翠定珍禽。誰信單棲無侶。到而今。湘影重簾認。

霞光斷臉尋。兩頭裙帶盡同心。知否一尊相屬。意千金。

誓恐旁人聽。情原我輩鍾。別時莫恨太怱怱。肯許名花移入別家紅。病定春來較。

人終月下逢。祝他二十四番風。取次送將帆葉，五湖東。

買陂塘 十二月五日三衢道中

怪吳船、看來葉小。載人愁重如許。阻風聽水年年慣，不似者番淒楚。臨別語。約消夏筵開，定不過闌暑。歸期屢誤。又二九時光，一千里客，未半到家路。閒情賦。更惹新來怨緒。故鄉鶯燕相遇。遠山不作怱怱別，肯作鏡中眉嫵語。更苦。怕病蕊嬌花，難待春風主。亂帆無數。誰信有中閒，烏篷一扇，兩地夢來去。

夜合花 燈花寄湘霞

善恨蟲孃，含情蠻女，多生半是啼痕。相思一寸，灰心，又長情根。玉釵冷，玉荷溫。囑雛鬟，掩上重門。只愁無睡，對伊絮語，銷盡癡魂。江湖孤冷，誰親，多謝一尊酒。淥相伴，溫存。殷勤低祝，並頭開出蘭蓀。有何事，報伊聞。道歸人，已近家邨。不知今後，照他擁髻，幾箇黃昏。

一枝春 王清閣女史畫簪花仕女用草窗韻

一鏡春痕。誰喚起、多分敲窗微雨。心期細數。殘夢恨無頭緒。幽蘭空谷。渾不省、杏憨梅嫵。但折來、認取同心。又惹兩眉愁聚。年時送人行處。記新梳叢鬢。嬌歌金縷。眉山漸遠。十樣畫圖誰譜。菱花側背。料怕有、箇中人妒。還怕有、雛鳳釵頭。聽人小語。

醉太平 石敦夫曉風殘月行看子

曉山欲青。曉煙未橫。一帆早挂郵亭。問何人曉行。蓉城曼卿。屯田柳生。一生幾箇黃昏。又今宵酒醒。

疏影 惺泉浮香樓圖余舊爲作序并詩今相見於吳門正當梅花時欲歸未得復爲倚聲作此不知有慨於中也

生香活色。記舊曾相約。短棹遊歷。認是西溪。千樹梅花。無人管領煙月。故家臺榭。知何處。有野鶴。暫歸能說。見當時、二老風流。閒倚畫欄清絕。同向江湖流浪。欲歸那便肯。如此蹤跡。江北江南。銅井銅坑。過了試花時節。人生但有。三間屋。便無地。種梅也得。問何時。深閉柴門。臥穩故山風雪。

買陂塘 爲莊棫堂題其尊甫遺照同一娛調

好煙波憑誰買斷。魚陂千石。澹泱四先生。望家園在。隨意卜居無恙。濠濮想便不載。竿簪也。號谿翁長。綸竿一丈。已付與兒郎。釣鼈身手。老子任疏放。人間世。齊物養生都妄。騎鯨人又長往。披圖不見南華叟。秋水拍天新漲。添悵惘。恨惠子來遲。無與微言賞。孫枝競爽。看石上珊瑚。掌中海月。次第出絲網。

瑣窗寒 寓齋窗間見金絲花架一股知爲閨中物先是此閒彩雲曾駐凝想

芳澤雜以遐思邀楊浣薌同作

花落辭枝。珠空賸匣。是誰留取。粉褪香銷。轉更帶人淒楚。想當時。曉涼妝罷。小鬟纖手穿無數。有紅絨替約。素馨分配。鏡臺斜覷。人去。彩雲駐。向花戶油窗。拾來愁緒。金絲幾縷。也還勝、同心釵股。得知他又側著髻兒。明珠翠羽遊何處。鎮無慘。細撚閒吟。背燈深夜語。

唐多令 卷簾仕女

鈿盒掩香斂。金軀露玉纖。想妝成、初到前檐。驀地回頭思舊夢，渾不似、昨矜嚴。小
院曉風尖。羅衣卸又添。記當時、總恁慳慳。留得小唇和秀鬢，判長隔、一重簾。

憶舊遊

題澣薌與鷗爲客圖用夢窗體

此生何所似。似鳧雁、啞啞水爲家。江湖夢偏穩。青山斷處。一片圓沙。著箇風標公子。
海客肯來耶。問如此、陂塘定應相識。莫又天涯。芙蓉好湖水。儘烏榜、涸沿白裕欹
斜。欲逐鷓鴣去。有雲羅萬里。界住明霞。松陵舊盟寒未。雙鬢已鬢。且與醉西湖水。
仙廟外、開蓼花。

高陽臺

文孝坊偏。百弓地小。舊家容易遷流。叢桂山邊。淮南雞犬曾留。營門細柳如絲碧。記
攀條、才拂人頭。更移舟、黃胖泥孩。閒話春遊。前塵如夢都難忘。況驚殘、楚雨。想到
秦樓。去燕空梁。此中無限春秋。而今零落知何處。對孤山、夜月香浮。肯歸休、一幅生
綃。環佩聞不。

月華清 靈芬館前晚桂一株已蕊未華夕露晨飄傾佇良久念將遠遊恐不能待詞以催之

簾卷涼天。葉明月地。當時試花曾賦。偃蹇淹留。略與小山爲主。數年來、幾度中秋。已半付、天涯羈旅。容與待寒金粟綴。嫩黃蜂注。爲底銀屏深悄。費似水尖風。似珠涼露。寂寞姮娥。愁損葉兒眉嫵。想夜來、碧海青天。定見我、舊叢延佇。知否。便能簪鬢髮。鏡霜如許。

洞仙歌

題高穎樓孫秀芬額粉庵聯吟卷

有情天上。住一雙珍偶。才膠冰絲玉琴奏。看琉璃匣啓。玳瑁簾開。新妝竟。更費侍兒纖手。芙渠當霧夕。得意何郎。卻扇詩篇在人口。並坐擘蠻箋。如鏡湘湖。照夢裏、筆花開又。怕額上、粉痕未曾乾。早羅襪花陰。一詞先就。

買陂塘

富陽道中見烏柏新霜青紅相閒山水映發帆檣洄沿斷岸野屋皆

入圖繪竟日賞翫不足詞以寫之

繞清江一重一掩。高低總入明鏡。青要小試嬋娟手。點得疏林妝靚。紅不定。襯初日明霞。斜日餘霞映。風帆煙艇。儘悶拓窗櫺。斜欹巾帽。相對醉顏冷。桐江道、兩度沿緣能認。者回剛及霜訊。蕭閒鷗侶風標鷺。笑我鬢絲飄影。風一陣。怕落葉漫空、埋卻尋幽徑。歸來重省。有萬木號風。千山積雪。物候更淒緊。

憶舊遊

嚴瀨道中偕壽生同坐船頭倚聲歌此幾欲令四山皆響也

正風開帆葉。雲擁山根。又溯奔瀧。合沓羣峯出。似千屯冀馬。高步臨江。江水彎環碧玉。流影去淙淙。算如此江山。舊曾相識。者箇吳艘。船窗喜同眺。問畸士東京。遺老南邦。突兀高臺外。賸紅衣一樹。楓臥空腔。晞髮披裘都往。斜日下漁疇。但極目寒煙。滄波白鳥飛一雙。

菩薩蠻

鄰舟有見

衫痕翦取秋江碧。袖羅紅繡雙鷓鴣。山遠澹微茫。蛾眉滿鏡長。爲誰同作客。愁水愁風極。野泊不勝寒。錦衾斑斑。斑。

行香子 安仁道中

灘緩波柔。雲薄風收。小春天、客卸征裘。叩舷一曲，聽我吳謳。正雁南飛，山北折，水西流。白鷺汀洲。黃葉沙頭。比江鄉、一樣清幽。他時歸老，若此何求。只要山田，要水碓，要漁舟。

洞仙歌 爲弢園題女郎三喜小影

毗藍風緊。墮諸天花蕊。三界人天共歡喜。正華年月滿，薄命雲輕，珠一顆，剛照弄珠樓底。東湖流不盡，香草相思，有箇離騷舊苗裔。佳約踐難期，一幅生綃，倩留取、畫蟬雙髻。記桃葉、儂曾渡頭逢。要寄與東風，那時衣袂。

月華清 題蘭邨倉山話月圖

水閣燈殘。地樓鈴語。一丸涼月初滿。幾箇秋人，坐得六朝山澹。只消他、隨分琴尊，且話取、露濃風軟。三歎。記昔年裙屐，風流雲散。尚有彭宣老去，蓉裳指是處，亭臺那。時弦管重譜霓裳，也恐羽移宮換。料素娥不解窺人，定未識、少年清婉。歸晚。怕故山

猿鶴。恁啼幽怨。

賣花聲 莫愁湖秋泛圖

遠水淨員沙。樓隱紅霞。石城艇子小能撻。閒向六朝山影裏。去采蘋花。衰柳幾絲。斜風帽低遮。舊時俊侶各天涯。何似鬱金堂上燕。長傍盧家。

紅情 蘭雪蓮花博士圖爲淥春女史作

花爲四壁。看水雲砌就。琉璃宮闕。有箇玉人。顏色與花略無別。吹皺平池萬淥。教先向春波偷立。笑隔浦。卅六鴛鴦。癡妒定愁絕。鄉國去未決。且小住橫塘。並蒂雙折。鷺漚伴侶。半面頻闕。也應得。何似南園老去。認照影。驚鴻都隔。待樂府。題補了。聽伊擲笛。

麤餘詞

河傳 荼蘼 題碧梧女士畫扇六首

春晚。人倦。起來遲。額角輕黃退時。二十四番風信吹。絲絲。枕函殘夢知。入骨甜香。

濃似酒。簾卷後。小試折枝手。步池塘。過回廊。恁忙。鈎他宮袖長。

清平樂 紫丁香

團香蹙繡。一翦春風皺。十索新詞渾未就。贏得丁娘消瘦。芭蕉不展微陰。含豪幾度沈吟。付與閒愁百結。不成沒箇同心。

南鄉子 茉莉

小玉雪肌膚。道是珠孃道是吳。一種卻教儂豔羨。花奴得叩船舷。見彼姝。綺夢半銷除。根觸閒情尙爲渠。記得夜涼人睡醒。紗幮愛問雲鬢墮也無。

憶秦娥 秋海棠

秋如水。露涼風細添顛顛。添顛顛。何曾得似。那時濃睡。一番薄病扶初起。爲伊立向空階裏。空階裏。亂蛩殘月。冷清清地。

洞仙歌 落梅

人閒無地。著春愁千斛。一夜東風與埋玉。算玲瓏鎖骨。葬向空山。也勝似。蚤蚤安排

金屋。招魂來紙上。斷粉零香。猶是眉閒舊時綠。莫道不相思。點點啼痕。已漬滿、輕綃十幅。待夢到、西泠去尋伊。怕別院樓頭。又吹橫竹。

浣溪沙 蘭花

髣髴銅餅見露苗。疏花嫩蕊澹含嬌。湘江清淚滴春潮。豈有心心同婉變。并無葉葉助風標。斷腸一集是離騷。

臺城路 和蔚堂題楊白花詩意卷子韻

不勝淒黯江南夢。濛濛慣隨春去。水驛波寒。山亭風緊。身世有誰爲主。迷離如許。記曾向長隄。那邊呼渡。一帶絲楊。滿裙不是舊時路。紗窗才拓幾扇。只捲簾人起。初見飛度。燕子關心。伯勞偷眼。尙有流鶯相訴。東風辛苦。問吹皺池塘。送伊何所。打槳蘋洲。和儂漁篋譜。

憶舊遊 滄嶼園故址

見蘆芽抽碧。菜甲攙青。柳綫搓黃。路轉荒城角。曠彎環漫水。圍住陂塘。著意融融冶。

冶分綠上魚缸。想盪槳船歸。湔裙人去。留下波光。中央儼孤嶼。是平遠江山。鷗鷺家鄉。小立斜陽裏。指斷霞明處。昔日紅牆。塵世幾堪俛仰。隨地有滄桑。待菡萏花時。還招野客乘晚涼。

行香子 題小迂畫扇送老薑返揚州

蠶老柔桑。鶯老垂楊。又怱怱送盡春光。送春送客。同在他鄉。乍月朧朧。雲澹澹。雨浪浪。豆莢初嘗。芍藥能香。有人人正夢維揚。勸伊小住。弭棹橫塘。待櫻桃爛。梅子熟。枇杷黃。

齊天樂 眞州見杏花盛開

江南何處無煙雨。先生者回歸未。淮浦颿收。揚州夢破。墮入紅雲隊裏。烏篷搖曳。早樸樹灣頭。一旗酒貫。卅里天桃。愁春未醒尙濃睡。江湖載酒無端。笑梅花開過。猶自留滯。今日重三。明朝百五。又見老烏銜紙。樹猶如此。銷燕燕鶯鶯。幾番身世。賣到樓前。曉妝人定起。

柳梢青 子貞招遊湖上題酒家壁

如畫春城。乍寒暫暖。似雨還晴。梅萼將飛。桃枝欲放。柳色才青。良時令序難并。算者度韶華有情。昨夜初三。今朝寒食。來日清明。

瑤華慢 小金山梅花欲殘香雪猶浮動山水閒

煙痕乍禁。禊事初修。尙薄寒時節。雙槳掠波。已喜得橋外水光先活。香南雪北。牘一片冷雲明滅。想妙高臺最高寒。未有玉人橫笛。獨歛烏帽來尋。認月觀風亭。步步幽絕。清遊較晚。早滿磴。落英如積。斜陽澹處。又鉤起二分新月。任隔牆梵放催歸。未許翠禽啼歇。

憶舊遊 過揚州未得尋樗園悵然作此

又煙花三月。浩盪扁舟。來問隋宮。不待珠簾捲。向管絃聲裏。別去怱怱。記得舊巢痕在。禪榻占春風。有竹影便娟。茗花妍媚。桂樹丰茸。於中多好事。曾歌邀子夜。曲懊吳儂。酒人兼狹客。愛翻香令小。減字聲重。一點綠毛么。鳳容易傍梧桐。問今度桃花。

何如昔日人面紅。

夢橫塘 糧艘浣衣女郎婉頓可念感而賦之

文魚銜尾。綵鷁排頭。移來一痕波軟。小小窗櫺。正雨過、筠簾齊捲。越紵裁前。吳棉坼後。停鍼人倦。趁洗頭盆好。蘸碧按藍。猶憐取、餘香染。知伊住近橫塘。有機中素織。石上紗澣。髻綰拋家。便一任、絮萍漂轉。算直北、風埃撲鬢。只恐羅衣暗中換。弄暝天光。柁樓晚飯。想心情都嬾。

一翦梅 贈荻君

夾轂相逢問狹斜。樓上琵琶。門外枇杷。風吹多少肯來耶。臣里東家。吳苑西家。澹澹藤蘿映月華。好片圓沙。好浣溪紗。鴛鴦頭白記些些。不是楊花。不是蘆花。

貂裘換酒 題小農停杯顧曲圖

宛轉提壺喚。泛觥船。百分一棹。花滿酒滿。絲竹中年須陶寫。隨分玉簫金管。有兩兩、蟲蟲燕燕。薄醉不消判茗芋。已研羅裙畔春寒淺。綽板促。急觴緩。廿年前事韶華。

換。又相逢。甕邊捉臥。依然酒伴。後院綺筵休著我。杜牧狂言原慣。早猜出、護花人面。嚼蕊吹香了無誤。問檀郎、何事頻回看。浮大白、莫辭勸。

買陂塘 雲臺先生寓京邸時有小園太常寺仙蝶嘗一再見之花前舊藏董文敏詩筆有蝶夢之句因取以名園且繪爲圖而裝詩筆於前摹仙蝶於後

屬賦

算王城萬人如海。惟餘傲吏能隱。阜城門內岡南畔。尺五去天差近。花成陣。仗廿四番風、次第催芳信。廊腰井吻。有芍藥亭欵。荼蘼架重。容易落紅槿。容臺叟、便面銀鉤猶印。墨痕如此芳潤。漆園有道羲皇上。那屑六朝金粉。頻問訊。識此客、人閒不羨朱衣引。圖書經造。好平地歸來。小園賦罷。黑蝶繞雙鬢。

高陽臺 病酒

似夢還醒。將眠又起。今朝直恁無聊。未展屏山。帳紋時動冰綃。數聲啼鳥驚人覺。已慙慙、紅日花梢。喚茶甌、眼倦微搓。舌強須澆。天涯沒箇閒消遣。況故人重見。俊侶

都招。雪白花紅。那禁物色相撩。元龍豪氣隨年減。算而今、祇讀離騷。計行程、私祝江風莫阻歸橈。

鵲橋仙 留別荻君

鷗侶同波。秋心比潔。野水荒灣愁別。多應石上有前期。又墮我、一九蘿月。莫是潯陽夜來送客。醉貌略如楓葉。天寒日暮定相思。判畫到、爐灰成雪。

水調歌頭 曼生屬題其大父魯齋先生釣鼈圖

陳登湖海士。李白地行仙。置身只合蓬島。九點渺齊煙。截得孤生之竹。綴以一九明月。引手六鼈連。最好不貪寶。閒任老龍眠。螭坳立。熊軾畫。賦歸田。騎鯨一笑。天上披髮去翩然。今日繫舟山下。尙有讀書孫子。小割試烹鮮。待爾政成後。同放五湖船。

買陂塘 題種水圖用原韻

笑村農何曾學稼。釣徒或者堪擬。隨身但有閒漁具。那用鶴頭鴉觜。如此水。便都變良田。盡種長腰米。也能餘幾。要秫釀春醪。糧分瘦鶴。花插百弓地。揚州夢中酒阻。

風聊爾。灌夫曾畜爲弟。君與余齊年月小耳。封侯老矣知無分。亭長新銜魚計。浮世事。恨漁父湘纍。不得同時醉。掃除家累。約一舸相從。五湖許泛。分取畫中意。

風蝶令 題伯生香嬰室圖

館是童初築。山仍羣玉居。神仙何事最關渠。聞說三千玉女。盡知書。傳得嬋娟影。憑將樓閣圖。新宮一記待儂無。還要蠶眠細字。倩麻姑。

菩薩蠻 題雙紅豆圖

東風在手靈苗活。南園紅豆春來發。接葉更交枝。一雙兩小時。長真高閣好。閣裏人難老。記曲喚紅紅。芳名也愛重。

買陂塘 題改七香少年聽雨圖

最銷魂。蕭蕭暮雨。吳娘舊曲曾聽。畫船權轉花兜外。六扇窗紗紅近。眠未肯。任翠地香羅。垂下流蘇等。九枝燈檠。照人影。憧憧。屏風曲曲。容易卸妝竟。歡場好。只倚少年豪橫。花前醉倒休醒。星星一點來頭上。便與歌樓無分。君也省。要招此無家。同住

清涼境香燈清磬儘蝙蝠拂簾芭蕉繞屋欹枕睡來穩時有破山寺結夏之約

滿庭芳 題呂卿香蘅館圖

蘿帶飄煙荔裳寒雨高館儘好吟秋。楚詞課罷容易畔牢愁。是處疏簾不捲盪瀟湘。一片雲浮閒行徧。芷畦蕙圃隨意小勾留。前修。思屈宋美人香草寄託深幽。便微詞多有也足風流。好在桐花萬里肯同他。顛顛江頭只憐我。王孫游倦歸思滿芳洲。

水龍吟 題曼生石門聽瀑圖

青天何處龍吟濛濛吹出漫空雪。松濤萬壑冰絲千縷。琴心三疊洞口雲荒山中鶴老何來此客。想謝公去後石門深鎖留好景與誰說。海上歸來時節儘雍容閒尋風月。簫笳聲斷箏琶耳洗一時清絕。木葉羣飛四山皆響蒼然寒色。認跳珠濺玉銀河垂處有仙人謫。

聲聲慢 和慈仲坐雨之作

蓬蓬尙遠淅淅將闌。惜騰不辨朝昏。汝南雞好。虧他猶記蕭晨。硯池一泓殘墨爲昨

宵。留住愁痕。還題句。要裁雲翦月。逗一分春。差喜歸來相對。正燈花粲粲。杯竹傳
根。才卸征衫。又煩洗卻征塵。微吟淺醉。休輕視。勝他時。遠道懷人。判醉也。便取次。書
徧練裙。

買陂塘 稼庭以藕香來歸繪圖紀事余題種藕成蓮四字於首頁并系以詞
買陂塘。玻璃十頃。請看綠淨難唾。東西南北皆蓮葉。除是江南才可。開一朵。認妙法
華鬢。不受青泥澆。移根帖妥。儘曲檻低憑。畫欄閒倚。月曉未愁墮。臺城路。聞說莫
愁曾過。沈吟佳約能果。鷺猜鷗妒。更番事。直得銷魂真箇。浮一軻也。勝似秦淮漆板
紅船播。修眉休鎖。笑桡桡波迴。鴛鴦夢穩。雙調唱還和。

齊天樂 單藹臣司馬夢回圖用穀人祭酒韻

盡銷一枕遊仙意。繩牀木榻堪掃。栩栩回初。惺惺斷後。只有靈光孤照。綠天遮了。任
雨覆雲翻。不將公惱。影事前塵。黑甜鄉裏最幽悄。人間世事都幻。付漁篷滄浪。睡
起成笑。石鼎茶香。瓦鐺飯熟。誤卻浮生多少。醒來也好。奈白日黃雞。一齊催曉。我亦

揚州十年留贖稿

買陂塘 題琴隴邨溪漁隱第二圖用飲泉韻

記年時青鞋布襪。沿緣尋徧煙水。樵青打槳漁童唱。驚得浣紗人起。重到未。悔如此。溪山不。把扁舟繫。住為佳耳。看劍外官人。湖邊老監。鄉夢畫圖裏。男兒事。出處要。非無意。再三想見高寄。三千六百璜溪釣。何似一竿風細。儂試擬。怕比似。鴟夷太早。五湖計。鱸魚雖美。又驛吏催人。街亭排馬。風雪促征騎。

賣花聲 題李子木煙泉蘿壁看子

青玉削嵯峨。秋影羅羅。坐來寒翠溼衣多。領取風泉歸一壑。彈入雲和。卜築傍岩阿。老子婆娑。郎君撰杖侍行窩。肯信有人空谷裏。日暮牽蘿。

臺城路 宣窰蟋蟀盆

秋風吹換人間世。此中貯秋聲者。似鏡能圓。比甌無缺。還勝香姜殘瓦。提攜羅帕。慣阿監青蛾。聽來長夜。剔盡苔痕。棘鍼花草極妍雅。一行小款誰寫。怕銅仙漢苑。鉛

淚如瀉。金鼎香熏。錦堂詞麗。都付冷攤評價。宣德銅槃多刻錦堂春詞。千金注也。笑
蟲達侯封。論功此亞。譜入唐風。水天兒女話。

綺羅香

同人集文藪山房酒閒爲柳東題朱竹翁瑞蓮詞冊卽用竹翁第一

首韻

別院燈紅照檐梅白。夜酌正開春甕。閒話詞仙。杯底酒波如涌。新聲倚、羅綺香餘。遺
墨在、文章緣重。應笑他、頭白曹侯。買來一水也思種。種水有和作菱池槐泚。鄒廢
那有紅衣翠蓋。水風涼送。邃譜蘆洲。吹醒老漁殘夢。積廡外、臥柳將青。斷約下、員紋
欲動。問何時、更擢蓮舟。藕絲同雪孔。

如此江山

西齋七十二賢峯草堂圖用琴隲韻

十年蹋徧西湖路。西谿獨遲搜討。晚港尋煙。秋華帶雪。可許蘆中人到。山阿窈窕。似
羅列成行。曲眉齊掃。者箇茆堂。分明指點出林表。余懷天際渺渺。風塵都倦矣。陳
跡還蹈。兩鬢先絲。一椽未卜。慚愧白鷗吾導。眼中了了。只東野詩工。有山難抱。邃譜

籟洲聽歌應絕倒。

浪淘沙 己丑除夕閱種水削縷詞中有和周晉仙明日新年一闋輒和其韻

未免見獵之喜也

驄馬鐵連錢。芳草芊眠。載來金雁與鈿蟬。箏柱十三釵十二。一櫂觥船。舊夢阿誰邊。說甚因緣。只今禪榻坐蕭然。佛火爐香清到曉。明日新年。

壬午十二月廿二日。所假館之樓火。僅跳而免。所著皆燼。友朋掇拾。閒以鈔寄。不復次第。得卽存之。頻伽記。




小詩

謨餘

觴

館



軍彰

彭兆蓀（乾隆三三——道光一）

字湘涵。江蘇鎮洋人。貢生。道光元年薦舉孝廉方正。未就而卒。自少爲閱覽博物之學。覃精訓詁。爲文鴻博沈麗。著有潘瀾筆記懺摩錄文選考異小謨觴館集等。

序

填詞至近日。幾於家祝姜張。戶戶朱厲。予方心沓舌。無志與諸子爭長。而瀏覽所及。頗不欲囿於時論。少作壯悔。久付冥蟪。掇拾之餘。僅得十一。強顏存之。所謂遂非文過也。甘亭居士識。



小謨觴館詩餘

鎮洋彭兆蓀湘涵

賣花聲 雁門道中

石氣冷斜暉。關路依稀。西風尖似弩牙機。吹過紫厓松一片。卷出紅旗。何處好巖扉。門掩薔薇。雁門山上雁初飛。十五小叢歌略略。緩了征衣。

臺城路

柳條邊口桃花徑。修廊架來厓广。鞦韆屏開。兜渠爐炷。催把八分羹點。驚鴻冉冉。看襪印香痕。蒼苔路軟。一握飛雲。春波橫上酒邊臉。神雞放教枕倚。儘偎燈鬪腕。坐月嘗芡。半角青山。週遭翠箔。不許塞風偷颭。紅蕤宵掩。只預怕來朝。送人眉斂。六曲瓊疏。日光釵焰閃。

清平樂 調鳳兒

紅樓一角。髻影當風弱。月底吹簫曾有約。紙尾親書署諾。丹山身宿兒家。將雛好

夢真耶。消受綠幺風味。今生修到桐花。

浪淘沙

屈戌兩鉤纖。繡戶深嚴。薰籠小響夜厭厭。似說浣紗歸略晚。溼了鞋尖。何處望雕
奩。數盡銅籤。耐他風露立重檐。今夜二更明月上。萬一鉤簾。

鳳凰臺上憶吹簫

朔州沈別駕席上出家伎侑酒

雞塞風停。羊燈光豔。卸鞍人坐蘭叢。恰舞娟小隊。笑靨春融。排就箏牀。盃曲流雲聚。
點點眉峯。釵梁顫。山香一按。飄下殘紅。冬冬。此番見也。記前度窺人。曾在牆東。看
霜濃馬滑。索耍留儂。生怕無情樂句。催短拍。丸月庭空。春魂裊。隨他佩聲。穿過屏風。

虞美人

雪花簾護桃花影。寒悄珠櫳靜。一年幾度粉牆西。生累阿儂。口業到泥犁。豐貂壓
鬢驚鴻杳。朱鳥窗關了。暫時分隔好商量。等得鞦韆。時節再形相。

行香子 鬢

盤後鴉濃。掠後雲鬆。壓邊沙、烏帕斜籠。纖髻何處，領略從容。向揭簾時，兜鞋裏，溜釵中。不着游蜂。不放飛蓬。貼珠璫、越樣玲瓏。行雲歸後，明月堂東。有一層香，一層霧，一層風。

百字令

春燕一道，引鞭絲送到，枇杷花底。綉幔沈沈寒不捲，時被悄風吹起。碧玉梳奩，泥金簫譜，屯字沈檀几。都梁薰處，房櫳清似秋水。試問小市長陵，誰家姊妹，擅新聲北里。頗解國風哀怨事，生愛鳳窠門閉。小話蘭因，微聞蕙歎，弱絮東風裏。夕陽如此，傷心杜牧歸矣。

高陽臺 悼秀英

絡秀聲名，雲英標格，六時看慣翩翩。話薜摠箏，碧紗傍晚如煙。粉痕彈落餘香膩，領徐娘、情味中年。最相憐、月底銖衣，風約雙肩。驚心紫玉成煙去，賸白花飛蝶，青草埋阡。笙鶴蓬山，知他何處因緣。花梢小小梳頭屋，掩春風、永斷珊瑚鞭。讖淒然，小極前

頭。一曲遊仙。

如夢令

一霎金箏調柱。一霎銀釭低語。如夢忒怱怱。也把盟香說與。無緒。無緒。落月馬蹄郎去。

鵲橋仙

燈長鳳脰。人長錦瑟。敵住玉關風力。柔鄉酒國。夢溫摩。聽縹緲穿簾一笛。霜華漸緊。角聲低咽。斜月出門時節。高樓已在數峯西。又何況樓頭消息。

金縷曲 大同道中

煙冪豺山樹。馬郎當、西風茸帽。桑乾呼渡。一隊飛狐峯上雁。倒把玉鞭遙數。問何處、李陵臺路。半統殘碑敲石火。剔蒼苔、難辨朱邪墓。今古事、草頭露。年年腸斷西征賦。話叢殘、漢家飛將。唐家都護。最有蕭家妝閣好。俊煞卓羅花吐。也只賸、香詞魚蠹。急唱伊涼。假阿軟。借鯤弦、鐵撥憑他訴。填臆恨、且分付。

滿江紅 寄湘蘅女弟

搔首箋天。悔不作、織兒駭女。圖半世、居安夢穩。釵荆裙苧。訴憤中心棋子局。量愁一掬。梨花雨。誠看他、侍婢賣珠迴。寒如許。彩鸞筆。書韻語。雲錦段。停機杼。喜咒桃猶有。劉綱仙侶。翠袖誰同空谷倚。碧雲分付蘭香佇。祝他年、飽飯武陵源。胡麻煮。

又 客中寄張子白八首

拓戟悲吟。問海內、金蘭幾譜。撐白眼、罵人劉四。笑人鄭五。六合詞華憐疥駱。三都才筆真傖父。論英雄、誰識急裝人。桓宣武。茸城客。詞壇虎。狂態作新詩賭。似大兒文舉。小兒德祖。酒國掀翻歡伯壘。春場亂打蠻奴鼓。笑一雙、風漢兩花顛。甘陵部。月地花天。狂敝盡、青鞋幾兩。數不了、酒前彩筆。春前蘭漿。雄劍一雙牛斗閃。大刀八尺縱橫盪。儘少年、才氣壓三河。關西將。團沙跡。心空快蒿莪。恨頭應搶。又綠楊杜宇。催予掉鞅。灑血扶將狸首木。遊山拋卻龍鬚杖。感挽歌、和淚送歸驂。哀音響。素鞵東歸。渾不飽、庾郎葱薤。嘆家似、西風黃葉。霎時吹敗。奴婢更無千匹絹。機雲難

保三間廡。但一樽。臨去酌庭花。卿休怪。焦先屋。拋菅蒯。博士券。書銀蠶。笑立錐。尙
賸大千塵界。雁稅魚租。償盡了。飄蓬再理江湖債。檢細囊。滿束馬。卿文從頭賣。
秋冷花殷。打包去。黃皮絳縛。看多少。魚龍起。蟄騰霄。鷓鴣。白月團團。貽笑句。鶴聲一
一偷人作。恰泥金。帖子亂飛來。從天落。北平將。無侯爵。子雲字。終投閣。奈菅騰常
醉。張家白雀。腐鼠任誇滋味好。鵝鷓不受林鷗謔。問故人。招隱有書不。予應諾。
放溜秋濤。嘆索米。王門纔踏。早滿目。哀螢蔓草。荒隄古塔。黃歇浦。深波穀遠。呂蒙城
場。檣風颯。笑覓枝。烏也學行人。飛三匝。休輕掃。平津閣。且只下。陳蕃榻。把名心鏟
卻。但嘗蜊蛤。枚叔里從淮海訪。阮孚屐向金焦蠟。儘新詩。高唱和。天風聲鏗鞳。
顛到黃輿。誰辨別。神麀跛馬。儘聽慣。陳隋蟬噪。雷鳴釜瓦。面壁未成龍象果。談經空
建。鴛摩社。縱登壇。豎拂有誰聽。喉先啞。雞缸酒。斟盈罌。牛腰束。詩盈把。算知音誰
似。安昌侯者。意氣殊羞絳灌伍。淚痕且學姮娥寡。只數行。佳傳尙需君。他年也。
客裏梁鴻。曾語我。孟光有婦。鎮病髻。東風時擁藥爐煙瘦。常把爛銀盤掩卻。防地奔

月姮娥走。果書來、報落女媧星。天風驟。且莫嘆。王生曰也。莫鼓。莊生缶。想空花開
落。幾會長久。只悔十年容易別。勞渠半世空牀守。問歸來、蛛網胃流黃。傷心否。
僕本癡人。干甚事。淚花撲簌。平歷徧。中年悲樂。哀絲苦竹。最薄斷推才子命。難消第
一團團福。怪年來、騎省鬢星星。何其速。 蓼莪什。我廢讀。渴鳳句。君應續。算兩番人
事。一般根觸。開閣遲君拏艇至。埋愁共把糟邱築。放悲歌、和爾七哀詩。同聲哭。

蝶戀花 漁舟圖

浪絮浮萍湖海氣。羨煞漁夫。守定蘆花裏。妾自織蓑郎鼓柁。鯉魚風弄春裙細。 鏡
面荷花三十里。茜色單衫。藕色雙彎臂。棹入南湖眉月起。迢迢天半餘霞麗。

送入我門來 寓館題壁

錦鏤文櫬。花攢曲榭。瓊窗一片晶鹽。聚香迎旭。不怕峭風尖。銀鉤了鳥層層密。更紫
棧銅鳧縷縷織。說起天涯遊子。也有三間草舍。紙閣蘆簾。賣珠閨裏。新把屋茅添。
一枝紅萼無人主。想碧玉抽條。又過檐。

七娘子 雨

敲窗銀竹泠泠碎。惱離情、二等金釭背。碧甃聲淒。紅蕉韻脆。天公那許如鉛淚。枕頭放處真無謂。甚冰蠶、織就今宵被。剔了燈醒。照來花醉。無言且掩重門睡。

蝶戀花 花朝三首

姹紫嫣紅開滿砌。長晝愔愔。春到消魂未。天早安排將息計。七分陰只三分霽。花似珠娘初墮地。酥雨如絲。洗出蘭湯膩。院是蘼蕪牆牡蠣。東風一翦千金意。人與尋香蜂一隊。八寶蘭邊。做箇金錢會。天賦芳根紈質脆。護持先要花鈴備。十五吳姬初約翠。冑彩梢頭。也當穿犀佩。一一替他排行輩。李娘阿姊桃根妹。種玉居然煩富媪。誰記庚寅。誰把高禰禱。我欲書成閩史稿。小名合向蓉成考。杏嫁梅娘看尙早。試問東君。持底催妝好。十萬榆錢齊撒了。一天紅雨鶯啼曉。

賣花聲 半開花蕊

芳意坼微馨。春色星星。塗妝縮髻小娉婷。政好年華剛豆蔻。十四三零。紅玉易飄

萍。莫放杯停。待他開到越梅青。總有櫻桃能結子。不算韶齡。

臺城路

賣錫天氣游絲颺。春風又撩人面。阜茨橋頭。寶釵樓上。多少鈿箏歌扇。花憐柳眷。惜金叵羅深。玉檀槽軟。燕乳鶯雛。舊情提起也應倦。天涯黯然羈緒。守半弓齋屋。長是孤掩。絡角車兒。平頭鞋子。何處茜裙歸緩。簾波旬線。只可惜消魂。梨花庭院。負了窺人紅襟飛一翦。

浣溪紗 月

不要雲衣護淺深。晶簾了了夜沈沈。露華涼到薄羅襟。玉宇瓊樓千古淚。青天碧海兩人心。商量爭抵一春陰。

水龍吟

花冠喔喔三聲。曉風吹到梅花帳。鐘兒纔罷。鴉兒未醒。沈沈交網。象篋犀梳。年時猶記。靈蛇妝樣。倩晶盤低晃。圓冰雙映。看朵朵鬢雲漾。剗地征鴻情狀。問犀帷。春人

無恙。天涯夢穩。也應驚斷。轆轤聲響。總有朝霞。料難照見眉間腮上。得知他一片晨紅射到。幾樞窗亮。

紅娘子 春暮

陰薄榆錢仄。絮重游絲織。錦段般春。桃波般去。鶯梭般擲。漸東牆拆盡。畫鞦韆也無人知得。密約憐樊懣。錦字沈烏鰓。澹墨輕衫。楊花小扇。層城消息。鎮傷春夢雨。一年年了。清明寒食。

洞仙歌 七夕四首

昏鐘動早。漸魚雲葉卸。蛤月纖纖一眉射。記簸錢、綺侶蠟鳳雛齡。陳瓜果、共拜雲輶星駕。前塵風電掃。鰈散鰣分。冷落秋娘好亭榭。隨分且銜杯。旅伴天涯。只一桁、翠桐花架。縱巧煞靈蛛網。條條須繪。不分明情絲今夜。

星雛靈匹。想九霞光底。卻扇天孫定遙企。笑疏籬、錦石朵朵牽牛。搖風蔓、也解向人流喜。銀灣橋度了。霧幌雲幃。隔歲離愁細提起。只恐感霜娥。碧海青天。長孤守、爛

銀盤裏。果風月人天一般情。應歷歷星榆。盡成連理。

癡兒丐巧。奈靈機易得。第一難求點金訣。看拋殘鸞杼。十萬猶賒。持籌算。爭得天錢無缺。斜河低絡角。溝水東西。眨眼悲歡判環玦。蚪箭忒分明。滴滴蓮花。渾促就。雲車風警。問何物金錢。恁無情。儘天上人間。坐他離別。

爛斑珠斗。漸秋庭影寂。獨指參旗望鄉國。任簾紋。皺水簾。縠瀟雲。誰消受。一枕素馨花側。明星杯易醉。索笑無人。穀板花瓜等閒設。憔悴損紅顏。玉露金風。負幾許。紗明幃碧。恰政好新涼未寒時。趁落月千山。夢歸還值。

浪淘沙 雁

天色越窳開。身落雲階。擔霜閃月一繩來。逼近星辰書蠹脚。也有些才。孤客白楊齋。沒箇安排。半窗風弄小松欒。讀了離騷溫了七。交過秋懷。

臨江仙 蟋蟀

一點秋心誰領略。除儂便要推他。涼宵絮盡雨如麻。歲莎沿砌草。躑躅半牆花。還

有飛奴兼嬾婦。霜天一例牙牙。流螢福分較爭些。不知風露怨。只傍畫蟬紗。

祝英臺近

響犀梳。聽鳳奏。春影玉臺展。小小璿宮。恰對綠筠館。要知有限紅牆。無多碧落。只幾扇、絳紗遮斷。許相見。爭奈玉暖酥凝。花鈴夜深綰。點屐更衣。望斷隔窗眼。禁他甲帳鉤聲。丁簾燭影。儘紅豆、一庭栽滿。

風蝶令 月夜

鮫褥招涼浸。犀簾鑄玉懸。金釵料得曲闌邊。畫了幾痕花影。暗淒然。破盡團圓夢。歌殘相府蓮。一年一十二回圓。畢竟姮娥有福。住情天。

瑤花 齋前桂花盛開作

青雲翦葉。粟玉黏枝。訝秋浮如許。紺幡豹腳。飛不定。人在越沈堆住。星高月午。早溼了。一庭珠露。逗桃笙簟底微馨。鶴唳水香簾戶。八公舊有盟言。歎鴻寶書成。欲寄誰與。芙蓉金鏡。夢不到。七寶圓輪深處。小山好在。算風幔。攤書也苦。但丁寧有日歸。

來。檢點椒漿遺譜。

綺羅香 齋中聞前廳演劇似是玉簪記中茶敘一齣漫賦

霞帔金絲花冠玉葉。人在墉城天咫。選得春場。略與武林相似。盼得到、蟬竦天邊。先坐向、藕絲雲底。逗蘭風、軟語如弦。泠泠勝譜女冠子。 薜香人影何許。爲問魚家姊妹。可曾有此。小洞雲根。目斷蕊珠宮裏。渾不見、洛下元淳。又何況、季蘭仙李。攝春魂、一曲翻香。璣囊尋鳳紙。陳妙常南宋時人詞見名媛璣囊中

長亭怨慢 賞菊卽席

漸碧落、一箏鴻陣。喚醒花英。麴塵還嫩。軟腳筵開。玲瓏影、彈錦屏穩。鱸魚莢筍。終不似、萼鄉信。隨意捉銅陽。切莫把陶潛錯認。 偷省。問筵六枳。歸夢甚時才準。額黃無賴。奈政好、夕陽山映。爽雲亭、半卷簾波。知瘦到、幾家秋鬢。賸萬斛相思。醉譜霜颿寒韻。

邁陂塘 秋海棠

淅秋魂。心紅點點。啼妝娟楚如許。雲歛霞蹙。恨芳砌。恨葉情波無數。低泣露。耐風色。淒迷亞字牆陰暮。東君無主。任翦淚爲根。裁愁作朵。紅顫一痕雨。嬌春態。不是華清伴侶。夜涼銀燭勤護。鮫綃誰搵。圓姿臉。碧瑩橫波。偷注儂和汝。算瘦影。檀心薄命。平分取。重門深處。屬莫灑零煙。停些嫩月。對作斷腸語。

疏影 旅中聞雞作

何來膈膊。早驚起。棲煙松頂元鶴。一盞蛾燈。亂點傳籌。六更譙鼓纔殺。黃茅冷驛商山店。有多少。鞭絲風鐸。記少年。立馬函關。邊月如盆初落。誰道燕南。湖北又吳頭。楚尾。隨分棲託。酒力依微。殘夢惺忪。耐盡半衾寒薄。自從翠羽催離後。便到處。聞聲都惡。料今宵。碧樹窗間。定有人憐飄泊。

南樓令 落葉

策策復悽悽。小樓黃篋扉。響空山。舊徑都非。記取秦雲關隴首。第十起。鷓鴣飛。斜照漏微微。亭皋一片稀。再休提。陰綠梅肥。消息謝娘聽得否。須及早。換秋衣。

木蘭花慢 寄尤二娛金陵

酒邊人去也。雁絡起一天淒。有瞰燭飢飈。吟莎潛蝨。叫樹酸雞。牢耶石耶滿眼。問何人解唱白銅鞮。欲賦郊居傳客。愁他讀錯雌霓。
小姑祠屋水東西。邸舍儻青溪。想桃葉江空。石橋巷小。丁字簾低。楊家楨家無恙。定翻香。小令脆於梨。記否蕭齋風雨。寒花一稜秋畦。

尉遲杯 蠟梅

霜威獵。誰染他。吉了花紗。雲天教杏子單衫。付與羅浮人著。風鬢十八。想病按新妝。道家恰綴苔枝。無限眉山。一抹鴉痕黃狹。浮窗梔貌天然。想妙墨徐熙。橫幅難搨。九月籠宵。積雲護玉。未許蜂鬚偷插。倩紙閣。蘆簾遮匝。更醲取。寒醅糟牀壓。倚微酣。椒壁初昏。對訴天涯殘臘。

聒龍謠 炙硯

商陸添爐。都梁灼艾。紫玉池蒸雲現。鳳咻呵來。把冰澌融徧。穿蠡殼。羊角風尖。試翠

墨麋丸香軟。問蟾蜍。那解閒愁。也時有、淚痕泣。霜花緊。雪花繁。怕戰手。擘紙。薑芽還顫。經生事業。只紅絲一片。算何如。盾鼻磨書。還博得、天山傳箭。勝年年、枯守烏皮。俛他冷暖。

少年游 自題遊山詩卷

衝波一槳。衝苔雙屐。衫約綠雲香。十載黃塵。三生碧落。搔首向斜陽。新詩當作棲幽券。歸去好商量。采箬生涯。牽蘿家計。細與話燈涼。

臺城路 春寒罷繡圖爲蔣履齋亡姬雲娘作

鬢華散了香光影。芳容尙留播喏。翦葉衫單。堆鴉鬢。人怯嫩寒蘭榭。彩霞飛也。料十二層城。天風吹乍。一縷殘絨。冑花記否繡牀罅。曾陪捧香司硯。悵縷金衣。疊紫玉煙化。大婦憐深。書生福淺。悔不留仙裙把。綠窗清暇。怕檢到針箱。蛛絲塵惹。魂斷春庭。梨雲門對亞。

邁陂塘 王述庵少司寇三泖漁莊圖

占葦鄉、鱸莊魚菴。鵝兒春漾明穀。煙波一片空濛裏。聽徧菱歌斷續。鱗六六。諒不似
鷓班、鷺序長安局。鑑湖一曲。算老矣千秋。四明狂客。此樂讓公獨。貂蟬事。萬里存
邛諭蜀。詩名官職都足。繭絲浮子瓜皮艇。洗了軟紅三斛。思爛熟。恰一笑看雲、蘭筍
雙尖簇。煙莎獨速。儘鷗夢圓時。金鑿話罷。風皺半湖綠。

金貂換酒

徐山民待詔重葺徐俟齋先生祠并以其遺像及臨危絕筆合裝

素册索題敬成此詞

繙盡遺民表。問空山、茫茫甲子。過來多少。完卻平生臣子事。臨去遺言草草。想擲筆、
凌雲一笑。賸有金仙盈把淚。認西風、鉛水雙瞳皎。還勝似、拜朱鳥。草堂秋場靈巖
道。有高懷、南州徐穉。替扶家廟。吳苑鶯花渾無限。誰問荒煙斯老。共杜宇、斜陽相弔。
小雅離騷情爾爾。算風人、心事歸忠孝。零粉墨、萬年寶。

齊天樂

珊瑚女史天平攬勝圖

萬螺圍住雙珠影。遙遙翠痕濃染。石黛分眉。山禽捉對。偷覩壁人花管。瓊田路遠。問

可有當時采芝仙伴。尺五天低。料他穿了望雲眼。勞薪自憐鄉里。累推煙唾。月嬉春都嬾。屐齒封塵。蘿衣冒架。只把畫屏山看。扁舟急辦。等棹過香溪。胭脂匯畔。傲爾煙波。五湖人姓范。

金縷曲 徐嬾雲今宵酒醒圖

月落烏啼矣。甚西風、將愁吹到樽前眉底。一半巫雲多半淚。并在五更鐘裏。闌不住、平頭行李。惱煞眠沙鷗對對。問此時、夢也醒來未。雙翠袖。替他曳。十年失盡江湖計。怕重提、寶釵樓上。粉香脂膩。楊柳千絲船一隻。君是離筵第幾。儂想到、燕支北地。也要描情煩畫稿。畫疏林、馬踏霜花細。同一樣、愁滋味。

臺城路 倚竹圖

碧鮮一片篔簹谷。幽居箇人三徑。采柏歸時。牽蘿補後。遮莫斜陽寒近。琅玕綠淨。正掠袂西風。送將秋信。掩冉驚鴻。假雲較取瘦來影。苔花料應路瑩。問雛鬟何處。翠袖孤另。鳳子來無。平安報否。愁在飛蓬雙鬢。瑤情暗警。憶夢到瀟湘。蒼梧雲凝。防惹

秋心。月高珠露冷。

疏影 題倪米樓帆影圖卽送之漢口

悲哉秋氣。問日斜江上。望遠人幾。半葉敲波。八字分煙。出沒短長亭底。西風慣惹傷
心眼。和幾片冷雲扶起。認遙遙天末鴻孤。一髮楚山青矣。欲問飄蓬詞客武昌道
上柳。同否搖曳。芳草晴川。整整斜斜。愁在船唇船尾。津梁總聽銅鞮唱。怕欲遣秋懷
無計。觸相思。往日鴻蹤人立小長千里。

祝英臺近 蠹蝶爲何夢華賦

認蟲雕。猜鳳子。天巧遽如許。不怕鶯捎。好護墨花雨。儘教竹素開園。海苔棲夢。抵八
幅羅裙化去。展方絮。應笑案上乾螢。僵老甚情緒。書癖前身。合幻采香侶。誇他修
到衣魚。千年脈望。算花底。一生輸汝。

憶舊遊 何夢華媚蘭小影册子

迦金堂左側。一笑三生鶯絮。花羞冷落。蘼蕪夢。賸美人瑤怨。訴與靈修。芳姿尙容播

喙班管替描愁。認脈脈香芽。盈盈露眼。心上眉頭。秦樓迴盼處。問斜月窺檐。何處簾鉤。六曲屏風底。料依然弱影。紉葭風流。坤靈咒他扇牒。好夢倘圓鷗。待驗取薰香。春風人面無恙不。

臺城路 眞州汪飲泉秋隱庵填詞圖

竹西一角煙花地。秋心是誰消受。夢醒雲孤。燈涼蟲語。拋盡紅兒歌豆。蕉梧庭牖。料山字肩寒。新來添瘦。潭水桃花。深情得似箇人否。鄉山井華歌柳。定雕瓊鏤葉。賭取仙手。楓樹紅時。鱸魚賣處。儂記當年被酒。秋江左右。想明月三分。二分依舊。好聽新聲。落帆瓜步口。

清平樂 題葉小鸞疏香閣眉子硯銘拓本

綠窗清課。珠字留些箇。想見臨池雙黛妥。照到雲漪一朵。伊人碧海青天。餘香誰試松煙。勾取遊仙幽夢。女牀山月初弦。

金貂換酒 郭頻伽寒壚貫醉卷子

西子湖頭路。問能消、幾番骯髒。幾番淒楚。千古才人傷心地。都在斜陽秋樹。只合向、畫帘招處。那管區區杖頭費。儘無聊、傾動青裙女。傳異客、此間去。吳儂題徧旗亭句。賸蕭然、江湖酒病。年年添取。指點銀瓶少時事。誤了桃花仙侶。算爭似、文君夫婿。但祝茅堂補羅穩。好買春、自賞零星雨。醉鄉約、我和汝。

菩薩蠻

秋燈伴讀圖爲友人悼亡作

十年鏡閣三生夢。玉蟲挑盡釵頭鳳。雙影讀書幃。六更花漏催。淚痕遺掛漬。誰問疑難字。一樣小銀釭。秋宵如許長。

減蘭

一丸螺黛。墨瀋香痕秋意態。十八煙鬟。人在鴛鴦卅六間。愁風愁水。徧地楊花春去矣。鏡約何年。紅雨飄零滿畫船。

浣溪紗

雲鬢花鈿顫步搖。采蘭時候蕩輕橈。關心一帶小紅橋。烏鰂傳書香宛宛。驚鴻留

影夢迢迢。困人天氣可憐宵。

又

葉葉銖香透薄羅。自臨瀟照寫愁蛾。通詞曾記託微波。飛絮飛花芳信杳。闌風闌雨好春過。一生南浦斷腸多。

齊天樂 汪蛟門少壯三好圖爲秦敦夫太史題

半生結習鴻泥影。琅琅萬籤圍住。力士鎗邊。兜娘歌裏。曾被清愁幾許。桃花潭侶。算詞客貞元。風流天與。枉費吟朋。解嘲送難迭奴主。堂堂歲華飄逝。有深情淮海。錦躩收取。妙墨三朝。濃香一夢。根觸天涯倦旅。中年心緒。耐盞底芸邊。最消凝處。卻怕聽秋。四條弦上語。

賀新涼 戈小蓮科頭箕踞長松下圖

之子堪邱壑。笑紛紛、金張許史。嚴安徐樂。不世情推何等物。祇有蒼官落落。好看我、解衣槃礴。一曲天風海濤奏。儘人間、飄盡秋林籟。遙和者、九霄鶴。書生漫說匡時

略。有娛人、在山泉水。吹笙樓閣。節日本來多磊砢。況抱冬心恬漠。只莫負、琴弦酒酌。我亦相看成偃蹇。問何時、免插風塵腳。同爾證、歲寒約。

南歌子 天寒翠袖障子

裙衩亭亭影。銖香薄薄羅。秋心如許奈秋何。偷向秋煙涼處、注橫波。風露侵蟬鬢。班行妒翠蛾。此生無分說牽蘿。剛是莫愁心上、著愁多。

浣溪紗 郭頻伽秦淮打槳圖

渺渺閒愁水不如。畫闌干影褪輕朱。阿誰妍唱譜藤蕪。桃葉不知何處去。秋陰都滿舊窗疏。重簾一一上燈初。

疏影 頻伽月底修簫譜畫扇

香羅疊雪。恰鱗鱗雲淨。風露淒絕。十八鴉鬟。六曲朱闌。參差花底吹徹。新詞白石誰同調。只分判、小紅能說。怕夜闌、珠字排成。冷了一爐銀葉。爲問鴛鴦珍偶。阻風中酒裏。幾度離別。迢遞瑤臺。悵望飛瓊。風前怨曲孤咽。青山隱隱秋無際。有江上、愁心

千疊。鎮淒涼。廿四橋頭。又是幾宵明月。

邁陂塘 頰伽浮眉樓圖卷

隱垂楊。曲瓊低掛。方疏榻子初做。遠山一髮青於染。略比箇人眉樣。秋水漲。渾不羨。三層閣上松風響。畫屏斜放。儘月底調笙。酒邊嘗芡。遙和采菱唱。家山夢。我亦紅深翠障。廿年前費迴想。芙蓉花外闌干影。曬徧夕陽衣桁。綃幕颺。笑過眼煙雲。讓與鄰家賞。文窗無恙。算丸髻年華。咒瓊伴侶。往事總惆悵。

菩薩蠻 婉秋小影

六萌車去朱樓冷。沈煙小像風鬟影。一片落花香。江流東下長。二分纖月瘦。猶記拋歌豆。莫道不消魂。春衫也褪痕。

疏影 湯雨生證因圖

昏黃煙月。有翠禽枝上。春信啼徹。數把香茅。半箇團蒲。空山自探消息。冰魂雪魄。三生事。料幾點。疏花能識。怕荒荒。夢也迷離。祇有過雲明滅。誰遣江南江北。風塵骭

髒裏情事孤絕。銅井銅坑。淺水平橋。吳儂記踏殘雪。寥寥各抱冬心在。準辦了、他年
瓢笠待霜天。柳栗衝寒聽爾一林風笛。

點絳脣

一徑荒荒。斷無人處闌干亞。重簾不掛。漠漠落花惹。生愛閒行。生怕閒亭榭。銷魂
乍。碧梧桐下。殘月昏黃夜。

齊天樂

江鄭堂繪五更疏欲斷一樹碧無情詩意屬題爲賦此解

陰陰芳樹深深院。依依夢魂迴處。借蔭吟風。驚寒抱葉。斷續殘聲如許。疏鐘一杵。正
渺渺長天。亂鴉催曙。縱有高枝。滿身風露孰憐汝。仙都幾曾化羽。只淒淒切切似
怨齊女。畫障紗明。凝妝鬢薄。那有少年心緒。綠窗無語。又幾點蕭疏豆花涼雨。別館
櫻桃。黯然秋思苦。

臺城路

春夜讀手山少年游詞悄然感均填此解和之

露華如水天如洗。六街蓮漏遙聽。酒重黏衫。花低壓帽。巷窄獮兒未醒。玉羅窗靜。恰

待燼蘭釭。尙支匿鏡。傳語呼茶。小紅鸚鵡隔簾應。年年江湖泛梗。有傷心影事。腸斷誰省。一樣清游。依然俊侶。換了少年情性。眉峯煙冷。指珠斗闌干。斜斜整整。半晌魂消。畫樓殘月影。

謁金門 巢松齋中秋海棠忽發重臺繪瑞棠圖索題

燕支勻染。雙笑梨渦痕茜。莫道秋紅春色淺。西風簾自捲。六曲屏山雲豔。一角蟬牆煙斂。只有幽花心事嬾。盈盈低露眼。

金貂換酒 金子裴曝書圖

風幔開晴晝。看紛紛珠墳笙典。鴉奴左右。漢殿秭侯官總貴。祇說黃金繫肘。問有此百城擁否。誰抱遺經酸寒甚。只長鬚赤腳供趨走。遮莫笑。玉川叟。少年我亦殘編守。嘆蹉跎。書淫墨癖。龍鐘卅九。案上乾螢成底事。負了一囊塵垢。儘茅屋漏痕都透。徑欲全拋兔園冊。但江湖料理綸竿手。閒曬網。夕陽後。

高陽臺 若冰女士遺照

翦水凝眸。積雲鞦髻。畫闌庭院春深。風絮天涯。離愁負了瑤琴。迴文機上珍珠字。問幾番、傳語青禽。鎮微吟。明月樓西。羅襪花陰。阿誰腸斷。筇篨夢。賸悽然。遺掛壁帶塵侵。翠石蒼苔。衣香何處重尋。晶簾數點梅花小。尙依稀、瘦影檀心。恨難禁。碧海青天。消息沈沈。

買陂塘

李子仙投壺夜飲圖

夜沈沈。吟朋俊侶。紛然中酒而作。誰歟中雋。誰浮白。注目寒山秋閣。堪一噓。算得失人間。萬事如斯。爵逢場戲角。儘驍脫蓮花。天流笑電。勝負定忘卻。前遊記。裘帶羣公。油幕也曾。壺矢爲樂。琴心劍膽。消磨盡。悔插風塵雙腳。交落落。使爛醉狂歌。金戟都休拓。私心暗諾。只白酒黃雞。檐花細雨。莫負故人約。

又 吳爽庵藝菘圖

笑人間。朱門梁肉。羣兒酣豢多少。筍奴箇妾。山居供我。與何曾同飽。場圃小。放露甲煙苗。一例都栽到。江湖才調。指說餅清門。飲泉家法。風味箇人好。書生腹。只配紫

葵紅蓼。故鄉隨分漁釣。殘杯冷炙年年客。多怕舊畦荒了。憑報道。論託命長鑱。作計真須早。閒園淨掃。要澀勒編籬。團焦支屋。更約漢陰老。

疏影 巢松詠花圖

暗香欲滴。有刺嘈翠羽。見爾清寂。霜亦精神。玉亦溫磨。素綃衣袂薰徹。金尊檀板都拋卻。莫溷了、仙姿姑射。但風前、攤鼻吟成。濃笑疏枝漸坼。試問瀛洲登後。九英一樹下。記否朝日。風絮前蹤。我似何郎。揚州東閣能說。天涯歲暮參橫夜。生怕聽、玉龍哀笛。只鄉愁、減盡詩懷。閒煞滿庭煙月。

桂枝香 題王丹生與其友汪炤庭合作秋堂延桂小影時汪已下世

文寮虛敞。有金粟浮空。畫蟾窺幌。嵇呂心期交映。玉壺冰朗。水晶簾下玲瓏望。一天秋、一天瑤想。小山何處。素懷誰託。暝煙空蕩。嘆石火、流年易往。又庾公思舊。伯牙絃曠。橫笛西鄰遙夜。送來淒響。畫圖留得連蜷樣。賸寥寥、幽興孤賞。屋梁月落。閒愁萬斛。古香仍放。

百字令 金堅齋臥游圖

藏春小鷗。問人間蠟屐。勞勞何苦。綠水丹崖。金碧畫。都在先生巖戶。絹素雲煙。滄江虹月。便是扶搖路。蟠胸五嶽。一塵中有千古。堪歎湖海平生。浪萍飛絮。往事愁重數。徑把遠游冠卸了。休說登高能賦。上箇籃輿。拖條竹杖。并嬾尋花步。疏簾清簟。與君同看山雨。

又 王秀才斐成爲吾鄉煙客先生耳。孫工六法得其祖風。繪耳畫室圖索題。爲填此解。卽送其之瀨水。

懷哉耆舊。話清門文采。孰如卿好。尙壘司農家法在。又見仍孫英妙。老樹顛厓。江山煙霧。眞覺聰明到。丹青引裏。杜陵感慨多少。記取隆福寺前。小祇園畔。卅日同遊釣。此是家鄉眞畫本。可惜翻飛鴻爪。甚日關門。湖亭莢泝。摹箇藍田藁。鷗盟珍重。鬢絲我已垂老。

臺城路 題六合汪紫珊碧梧山館圖時紫珊將需次比上而予有皖江之行。瀨發書此。

十年夢想汪倫久。相逢秣陵羈旅。璧月詞人。微雲女壻。君爲隨園太史。館甥家住石。

帆深處。藥闌花激。有翠鳳棲檐。冷蛩當戶。一片吟情。秋聲都在最高樹。纔聞踏歌岸上。又東勞西燕。相背飛去。江草黏天。楊花滾雪。愁聽離亭津鼓。銀牀小鶻。問甚日閒蹤。再團鷗侶。寫我西窗。翦燈同話雨。

又 徐漱石僧廬聽雨圖

蕭蕭槭槭淒淒裏。荒寒梵宮深院。修竹初鳴。飢鼯欲出。中有妙明心澹。前塵如電。笑羅帳青樓。霜天斷雁。過眼空花。人間何事可留戀。吾生幾場夢幻。也悲歡離合。雙鬢都換。一鉢山棲。半龕雲臥。要結淨名禪伴。宵涼香泛。儘蕉葉秋喧。塔鈴風亂。分箇團蒲。佛前燈共翦。

十二郎 書盛子履孝廉詩卷後

一鞭席帽。纔拂了。軟紅塵土。看文杏雲邊。碧桃天上。愁絕芙蓉江渚。莫問春卿遺才事。只湘水。衡山鑒取。嗟十指朱絲。七條冷玉。有人心許。千古錦囊留得。綠章新句。記吾谷花穠。尙湖杯暖。傳徧旗亭歌處。穎士奴憐。香山嫗解。儂也兩眉軒舞。暢好約海畔成連。日日刺船聽去。


詞 柯

家

山

館

運 齋



嚴元照（乾隆三八——嘉慶二二）

字久能。浙江歸安人。少聰慧。十歲能作四體書。有奇童之目。致力經傳。絕意仕進。於聲音訓詁之學。多所闡發。著有爾雅匡名娛親雅言悔庵學文等書。

序

球總角時。讀書修吉堂。見伯父飴庵先生所樂與談者。獨悔菴居士爲最。居士歸安人。閱數月一至。至必作竟日談。球雖不知所談。然心竊喜之。喜其久而不去也。丙寅冬。居士違其故鄉。卜居吾邑城北柯家山之麓。時家大人閒居里門。風月之夕。居士輒過吾家之谿閣。球藉得聞緒論。然是時未聞言及于詞也。越二年。大人補官京師。居士亦有會城校書之役。過從猶未數。自己巳以還。居士杜門山館。球於舉業之暇。偶作韻語。輒以就正。居士往往獎飾之。且時以所作見示。球因得盡讀居士詩文。并見所爲詞。球於庚午冬喪偶之後。臥病谿樓。居士所以慰藉之者甚殷。球感居士有古人風。恆從居士游。而居士倚聲之作。亦因球往還而寢多矣。去秋居士鬱憂成疾。入冬少蘇。乃料檢新舊所作。刪定若干。手寫未及半而憊。付球續之。念無以慰牢愁之況。錄旣終卷。乃從臾付諸梓人。剞劂旣就。命爲之序。非球所敢承也。顧念周旋日久。惠好彌竺。有不能已於言者。又念吾鄉當南宋時。詞人有李氏商隱。周隱。晁弟。與

公謹聖與相伯仲。元明以後。嗣響者寥寥。近日吾邑許兵部有鑑止水齋詞刻。居士與兵部爲中表兄弟。經神學海。並擅品目。雖詩人之餘事。天亦不生是使獨也。以視二隱之競爽。夫何讓焉。嘉慶癸酉秋七月。德清徐球序。

柯家山館詞

歸安嚴元照修能

生查子

殘霞天際紅。黯黯窗紗暮。窗下寂無人。窗外梧桐樹。
無言倚翠闌。愁思將誰訴。雁字一行斜。低抹寒煙去。

減字木蘭花

瑣窗皎皎。只道夢回天已曉。不是朝光。月上梅梢夜正長。
鴛鴦瓦冷。遙憶沈沈妝閣靜。顚顚紅顏。怎禁西風徹骨寒。

秋波媚

彩雲一片過巫峯。飛去已無蹤。春來春去。花開花謝。一樣東風。
棗花簾外相逢處。賦別苦怱怱。而今重見。除非夢裏。或是圖中。

小重山

窗外梅梢月正明。校書頻炙硯，對孤檠。嚴妝乍卸，伴銀屏。人寂寂，時有剪刀聲。霜氣入疏櫺。指寒纖手熨，可憐生。丁丁玉漏試同聽。金猊冷，今夜又三更。

柳梢青

買得春來，春風散盡，舊日閒愁。卻又因伊，無端顛顛，重上眉頭。迢迢月到紅樓。凝望處，魂銷也不。春水樓前，東流無語，一樣悠悠。

一翦梅

誰把空庭翠竹敲。風也蕭蕭。雨也蕭蕭。斷魂未許楚詞招。燈也搖搖。心也搖搖。無限關山隔夢遙。山也迢迢。水也迢迢。等閒孤負可憐宵。愁也朝朝。病也朝朝。

阮郎歸

曉妝初罷問鸚哥。落紅簾外多。三分春色二分過。惜春人怎麼。微雨霽，午風和。倚闌顰翠蛾。偶然捉得柳花窠。日長無奈何。

憶秦娥

花陰仄。晝長難得窗紗黑。窗紗黑。遙山如畫，夕陽簾隙。故鄉迢遞空相憶。深閨一片愁如織。愁如織。江南春好，杏花寒食。

蘭陵王

亂紅落。門掩青苔漠漠。斜陽外、啼煞杜鵑。春已將歸更催著。傷春轉瘦削。消卻纖腰一搦。回頭見、飛倦柳花，似向風前訴飄泊。縵繆舊簾幕。但鎮日垂垂，深護妝閣。書長怎遣情懷惡。儘鬢影斜鞞，淚痕常溼。紅窗誰與慰寂寞。聽花下鈴索。斟酌。燕鶯約。便挽得韶華，芳信難託也。休頻悔當時錯。算只合消受，病纏愁縛。黃昏將近，倚砌竹，翠袖薄。

減字木蘭花

淡雲微雨。枝上嬌紅嬌欲語。卷地風吹。無語嬌紅片片飛。莫嫌風惡。不見無風花不落。一任花殘。還惜殘花子細看。

風光好

問東風。恨東風。枝上天桃春正濃。又殘紅。
殘紅滿地閒春繡。人空瘦。困倚香篝兩
鬢鬆。晚妝慵。

菩薩蠻

花開長被東風虐。花殘又被東風謔。空有惜花心。看花淚滿襟。
春花空窈窕。怎比
秋花好。不見玉芙蓉。試霜深淺紅。

金縷曲

無那春歸早。正連宵、風風雨雨。落紅如掃。狼藉韶光留不住。啼煞花閒嬌鳥。又惹起、
閒愁多少。風貌祇今成惆悵。對菱花、不比當年好。簾半卷、柳絲裊。天涯是處多芳
草。問東君、恁恁此去。幾時重到。來歲瑤闌還依舊。只怕凭闌人老。須底物、懺除煩惱。
離合悲歡渾閒事。似雪泥、偶印飛鴻爪。人世恨、更何道。

相見歡

斜陽只在樓西。暮煙迷。一色長隄、芳草又萋萋。
春情嬾。春腸轉。翠眉低。惆悵十年

前事再休題。

巫山一段雲

深院花爭放。妝樓日漸長。隄邊垂柳復垂楊。容易斷人腸。學語鶯兒巧。銜泥燕子忙。沈沈簾幕護蘭堂。無那好風光。

南鄉子 華秋槎丈以白團扇畫秋江載月圖見惠

仙吏老西湖。迢遞傳來一紙書。扇面墨花誰點染。模糊。認取秋江載月圖。妝閣付清娛。珍重題詞顆顆珠。纖手擎來燈畔讀。踟躕。小字分明被客呼。

醉太平

風聲竹聲。泉聲雨聲。翠衾無那寒生。是樓頭幾更。天明未明。愁醒未醒。有誰伴我淒清。颭銀燈一星。春光漸闌。桃花又殘。可憐零落紅顏。最春人怕看。修眉翠攢。清愁萬端。斷腸十二闌干。正高樓暮寒。

疏影

幾竿翠竹。倚曲闌窈窕。偷放新綠。暮雨瀟瀟。做出秋聲。孤眠未許清熟。熏鑪消得心
香盡。消不得。閒愁千斛。記昨宵夢裏家山。依舊杜鵑紅簇。身似風中柳絮。十年故
國恨。長頓心曲。數徧當前。誰是知音。只有多情銀燭。清宵爲我垂紅淚。又伴我。瑣窗
幽獨。怕斷腸。不比冰弦。縱覓鳳膠難續。

祝英臺近

峭寒輕。晴晝永。特地卷珠箔。池上桃花。紅意已非昨。倚闌欲問東風。吹開幾日。又何
苦。將它吹落。怨風惡。細算卻是桃花。生來命元薄。隨意天斜。只合傍籬約。無端移
近房櫺。釀成春恨。悔當日用心真錯。

河傳

愁絕。明月。上紅牆。移過回廊似霜。繡屏夢回思故鄉。淒涼。夜闌空斷腸。
啼杵字。歸不去。歸去向何處。峭寒生。翡翠衾。沈吟。何人知此情。休聽花閒

點絳脣

霜片無聲。夜來端合黃花受。翠簾涼透。人與花爭瘦。同此消魂。看到黃昏後。休相負。斷腸時候。來歲花開又。

齊天樂

西風簾外霜華重。黃花又開無數。翠減眉峯。釧鬆腕玉。消卻昔年丰度。涼生繡戶。更誰省嬌娥。此時情緒。多謝涼蟾。夜深依舊上高樹。長憑清淚洗面。早紅潮褪盡。顛顛頓如許。羅幃燈昏。熏爐灰冷。檢點閒愁千縷。蘭心正苦。聽落葉驚秋。伴人淒楚。直到天明。紙窗聲似雨。

采桑子

香篝斜倚雲鬢禪。生怕郎愁。暫起梳頭。試卷湘簾怯上鉤。可憐人比黃花瘦。怎禁颼颼。強說新瘳。驀地眉低不自由。

秋波媚

殘秋病起畫屏中。顏減舊時紅。朝來簾卷，凭闌翠袖，怯盡西風。不妨顛顚重臨鏡，妝淡勝妝濃。妝成自笑，生來心性，不慣嬌慵。

淡黃柳 江南道中

霜華如雪，中夜西風急。獨掩低篷衾似鐵。莫道客懷孤迥，此際紅樓更愁絕。怨離別。蘭釭半明滅。把心事，向誰說。聽聲聲，野外哀鴻過。一餉消凝，奈他殘角，吹落江村片月。

念奴嬌

小姑江上，記當年、初與伊人相遇。豆蔻梢頭芳意淺，嬌小未通眉語。十載心期，三春病訊，端被多情誤。妝成金屋，美人容易遲暮。惆悵花謝花開，豔桃穠李，總惹東風妒。鶯語丁寧留不得，零落紅英無數。草草年華，沈沈風雨，此恨憑誰訴。重尋陳迹，一如春夢無據。

南樓令 初冬月季花開

花信久無蹤。經秋又到冬。怎孤芳、還傍簾櫳。又向枝頭嬌欲語。誰管領、暫時紅。意
外恰相逢。不如當日容。對西風、顛顛如儂。應怨花開時候錯。休錯怨、曉霜濃。

霜天曉角

春風一宿。池水銷寒玉。待到深深妝閣。吹不散、翠蛾蹙。心曲。愁幾斛。斷腸難再續。
閒問茜紗窗外。芭蕉葉、甚時綠。

浣谿沙 月河旅次

越女洲邊去采蘋。行雲惆悵隔三旬。登山臨水總思君。幾度小樓聽夜雨。幾番紅
淚溼羅巾。幾時纔展翠眉顰。

蝶戀花 乙丑正月初三日

紅鄂枝頭春信轉。又是秋娘。一度年華換。椒酒盛來金璞滿。美人頭上花枝戰。回
首客秋秋過半。十二巫峯。準擬行雲散。不分妝臺今又見。芙蓉依舊春風面。

自柳梢青以下廿七首。乃畫扇齋秋怨所汰存者。悔菴記。

減字木蘭花 爲何夢華題西湖買春冊子

十年前誤。儂亦段家橋畔住。燕約鶯盟。著意尋春卻讓卿。明珠幾斛。消受樓中人似玉。生計何如。還有牀頭萬卷書。

又 華秋槎丈罷官寓居西湖之德生菴方蘭如爲畫北山旅館圖僕昔曾以文記之酒闌重見有感於懷更賦此解

段家橋畔。二十年來風景換。滄海英雄。白髮飄蕭老此中。清風明月。到此一錢都不值。費盡摩挲。特地尊前喚奈何。

秋波媚 孫秋士作蕭山之行聞閨中人之訃而還乃畫之江感逝冊子索僕題之

寒江斷雁一聲聲。篷背攪離情。青綾如水。霜華似雪。怎不消魂。回腸九轉江三折。轉折可憐生。者番歸去。玉梅花下。誰更卿卿。

太常引 丙寅初冬僕買屋德清北郭外柯家山麓與郎秀才杏園結鄰臘月

僕歸里謀先人窀穸杏圃來送葬於其歸也賦此送之
柯家山上月玲瓏。夜夜掛孤松。如此月明中。似隔著、蓬山萬重。
何妨再住。短檠長伴。解纜忒怱怱。揜茱一燈紅。聽譙鼓、城頭幾通。

高陽臺

寒柝聲殘。熏鑪香冷。聯牀坐到更深。絮語無端。燈前勾起傷心。干卿何事添愁緒。卻
爲儂、幾費沈吟。最難忘、蠟淚成堆。對擁孤衾。怱怱便掛蒲帆去。賸寒窗相憶。直到
而今。窗外梅花。枝頭點點香凝。連朝風雪回腸斷。儘夜長、清夢相尋。更何時、翦燭中
宵。重訴離情。

望江南

何夢華索題所拓葉小鸞疏香閣眉子硯銘册子

疏香閣。想像憶當年。小院春深花市匝。綺窗風靜月嬋娟。清福玉人偏。
疏香閣。舊事說零星。天上彩雲容易散。人間片石可憐生。流轉付何人。
疏香閣。清祕屬何郎。自拓香銘留粉本。平添嘉話譜文房。小字認瓊章。

疏香閣。窗下費摩娑。過眼煙雲成悵惘。傷心香豔半消磨。淚比玉蟬多。

念奴嬌 過陳二松職方別業風日清美海棠盛開憶甲子之秋攜家避地曾

借居於此匝月感賦

輕陰掩靄。正海棠花發、深深庭宇。簾幙四垂晴晝永。一樹嬌紅欲語。鈴索悵悵。游絲裊裊。寂寞閒窗戶。舊游棖觸。中宵曾聽秋雨。依約梧竹便娟。房櫳窈窕。都是消魂處。亞字闌干凭徧了。棋局中心難訴。身世飄蓬。年華逝水。只有春如故。韶光暘好。莫教輕放歸去。

阮郎歸

柳絲嫋嫋水粼粼。風光愁殺人。寂寥孤館正傷春。爲誰春又分。酥雨過。草痕新。隨人綠上城。鶯花迤邐到清明。幾時愁使醒。

采桑子 感遇爲梁甫作

莫愁堂後簾垂地。鬢影朦朧。不分相逢。人在雲窗霧閣中。依稀似說新來瘦。祕語

惺鬆。今日萍蹤。賸有靈犀一點通。

太常引 送別沈譜梅

垂楊垂柳傍紅橋。仿佛楚娘腰。酒醒客魂消。怎奈此、千條萬條。故鄉山好，故人情重。休去逐蓬飄。風雨又連朝。且繫了、谿頭畫橈。

賣花聲 戊辰季夏備書會城寓武林門內之興福寺僧樓秋風生矣歸思彌

切賦此題壁

休去倚闌干。秋已闌珊。西風吹夢繞鄉關。隔著重城拋不得。一抹青山。蔬圃十弓寬。也算清閒。布帆整頓趁風還。黃米飯香青菜熟。容我加餐。

長相思 丁見堂索題載書訪友圖

風颼颼。雨颼颼。萬卷書裝一葉舟。問君何處游。蓼花秋。荻花秋。落葉寒雲古渡頭。

故人無恙不。

江城子 作客會城偶見曲中人映華爲賦此解異日戴刑部金谿見之爲和

四闋合而刻之名之曰青棠館詞

阻風中酒客西冷。感飄零似浮萍。白鷺飛來。何意慕娉婷。一朵芙蓉開未過。江上見。欲消魂。夕陽山映淡霞晴。帶春醒。待誰醒。疏雨芭蕉。點滴太分明。惆悵孤山山外路。樓一角。隔重城。

點絳脣 送別梁甫

清漏無聲。一燈窗外瀟瀟雨。夜闌聽去。點滴離人語。共惜飄零。怕作消魂句。江南路。幾聲柔櫓。煙樹無重數。

又

戊辰備書會城之時。寒宵無事。與戴金谿李西齋倪米樓作茗肆之集。僕命茗肆曰留鴻館。續圖賦詩。以誌其事。歲暮始散去。次年長夏。抵杭。與西齋夜過館中試茗。藉聞金谿江北寄聲之語。時米樓正作姑蘇之游。感愴之餘。爲賦此解。又憶客冬同人集於城北天后宮。爲秋鴻館之會。米樓欲於姑蘇啓

春燕樓。招僕往集。故詞中及之。

燈火闌珊。幾多春恨留鴻館。爲誰腸斷。零落寒宵伴。消息傳來。天際逢歸雁。飄零慣。小樓春燕。忘了西湖畔。

菩薩蠻 長至前二日得米樓仲秋所寄詞札南樓令一解試茗見懷之作點

絳脣二解一以和僕一以寄曲中人香雲卽春燕主人也因賦此寄之約與臘月十九日同祭坡公也

亭亭千尺霜林月。懷人幾度成圓缺。谿水碧於苔。錦鱗遲上來。彩雲香不遠。惆悵何曾見。準擬慰相思。歲寒風雪時。坡祠在歲寒巖畔

臨江仙 寄米樓書久而未發更闌無俚更賦此解以寄兼致金谿西齋

炙硯寒窗裁尺素。連朝開了還封。畫圖歷歷數游蹤。簾波侵茗綠。燈暈襯妝紅。孤館春深聽夜雨。關心鴻影怱怱。天涯腸斷幾人同。雲龍分上下。風絮各西東。

采桑子

朝來隱約重簾下。顛顛無端。莫是輕寒。淡了盈盈一抹山。啼妝卻較嚴妝好。粉薄香殘。幾曲闌干。借作春閨畫障看。

浣溪沙 徐詠梅招集溪閣

一桁風簾俯碧溪。隔溪山影壓窗低。夕陽紅在畫闌西。自有清言霏玉屑。可無翠袖卷銀泥。一聲何處杜鵑啼。

鷓鴣天 爲徐小平丈題春郊放牧小影

浩蕩郊原自在春。垂楊如幄草如茵。騎牛年少誰家子。此是當時徐小平。霜點鬢。面生紋。廿年投筆去從軍。而今好辦青蓑笠。更向江湖作散人。

又 題米樓畫蘭卽以寄懷

中酒篝燈夜漏遲。風莖露朵寫相思。平將楚澤千秋恨。併作明窗一段奇。疏雨後。淺寒時。河橋燈火送君歸。幽香滿幅還留在。爲譜新詞付雪兒。

又 顧蓉娘者戴芝山之侍兒也歸芝山十日而亡芝山爲作春蓉曲并圖其

貌索題

惆悵詩成話昔游。穠華見說不勝秋。蒙龍缺月三生夢。零斷行雲十日留。燈寂寂。夜悠悠。惜花人苦替花愁。春蓉一曲聽歌罷。風皺銀塘水不流。

又 春分垂近返權故園書堂老梅正放高枝疏英撩人心目賦此寄意
要與青山結比鄰。三年負了草堂春。梅花畢竟多情煞。故故遲開待主人。風料峭。月清噉。凌波依舊掌中身。商量一幅鵝谿絹。喚起花光爲寫真。

又 書堂老梅二株紅已著花綠尙含蕊又賦
珍重輕寒薄暖時。紅梅開早綠梅遲。花開遲早花情性。不是春風兩樣吹。芳意在。最高枝。瑣窗先報玉人知。寒香不比閒桃李。分付東君好護持。

又
窗戶玲瓏喚玉笙。惜惜香霧冪庭心。苔階一片蒙龍月。纔上梅梢別有情。芳信冷。未分明。當年情事可憐生。綠陰結子青如豆。短夢空憑翠羽尋。

滿江紅 落梅約許二兵部同作

羌笛悠悠。又吹送、高樓峭寒。閒庭掩、玉英千片，狼藉誰看。驛路曉風人去遠，瑣窗落月夢無端。問佩環、何意別匆匆，春未闌。逋仙去，湖影寒。暮煙斷，白雲閒。誤飛來，飢鶴啄徧苔斑。孤負春風詞筆在，一重簾外，卽關山。向夜深，惆悵折空枝，貽所歡。

點絳脣 題戴芝山秋院填詞冊子

深院惜惜。翠簾空卷梧桐影。女兒香冷。人與秋俱靜。斟酌閒愁，憑仗詞情迥。風流盡。芙蓉紅褪。幽恨無人省。

鷓鴣天 海棠

一樹嬌紅壓綺羅。蜂喧蝶趁占春多。天涯記否曾流落，三載黃州伴老坡。深院靜，醉顏酡。尊前一曲斷腸歌。養花清露催花雨，不那東風剗地何。

滿江紅 惜海棠

迷了蒼苔。見一徑、燕支雪封。生憎是、五更初過，微雨冥濛。惆悵愛花人起早，闌珊看

竹客來慵。賸幾條、鈴索苦多情。丁又東。吹還歇。花信風。感零落。惜豐稜。看滿城桃
李。一樣怱怱。金谷夢殘紅燭冷。柘枝舞罷翠簾空。最曉窗。妝倦可憐生。僂僂同。

賣花聲

薄暝獨登城。何處簫聲。杏花飛盡過清明。城上浮嵐城下水。一碧無痕。天氣換新
晴。淡日輕陰。萋萋芳草綠隨人。磯畔閒鷗眠欲醒。笑我多情。

念奴嬌

送春歸也。是深林深處。幾聲啼鴉。一片韶華剛可惜。付與滿階榆莢。中酒情懷。帶香
心事。忍向東風說。銀塘水滿。縠紋輕皺。還歇。隄外楊柳垂垂。纖腰踈地。舞盡春無
力。回首紅樓天樣遠。懊惱半空晴雪。簾幕重重。闌干隱隱。環珮無消息。問花知否。看
花人已華髮。

滿江紅

詠梅秀才喪偶寄此慰之

三五良宵。卻依舊、清影滿樓。難禁是、燄消金鴨。聲咽銅蚪。帳冷芙蓉春寂寂。簾垂翡

翠夜悠悠。想獨眠、生怕見燈花。開並頭。梨雲夢、還自幽。鳳釵斷、蝶裙留。看眼前谿水可解西流。空有瑤華消不得。尊前萬點落紅愁。問鏡鸞、何事苦催人。潘鬢秋。

鷓鴣天 辛未正月十一日夜子時立春

裊裊花幡綴鬢新。佳人頭上巧迎春。梅花雪裏無消息，夜半東風與返魂。冰澗泮，石泉溫。隔牆小鳥報芳辰。勸儂料理閒巾笠，次第青山看白雲。

又 元夕雪

桂子香濃凝不飄。東風吹雪過元宵。街頭人靜無燈看，枕上愁多有夢撩。銀燭暗，玉笙調。誰家歌板夜相邀。綠窗坐對清於水，墮砌仙雲一片嬌。

高陽臺 三月十六日許表姪叔貞婚期是歲三月置閏十四日清明十六日

望僕於清明前歸里留此贈之

筆嫵遙山。鑪溫沈水。佳期纔過清明。雲豔風香，最宜天氣新晴。杏梁乳燕雙栖穩，護淺寒、垂下簾旌。只難禁、深巷朝來，斷續簫聲。神仙富貴尋常事，算何如年少，錦帳

金屏春也長留。憑君細數階。當頭況有團圓月。較昨宵。還更分明。恨谿邊。無數垂楊。催送歸程。

柳梢青 宋人以此調賦桂子乃易之以賦梅云

閒倚疏寮。問春何在。春在梅梢。蕊欲飄風。枝疑著雪。淡到無聊。清寒細雨連宵。定愁溼、雙鬢翠翹。驛路三千。闌干十二。芳信迢迢。

秋波媚

消息羅浮夢低迷。夢醒十年遲。當初不合。早梅花下。種了相思。而今怕到花時候。心事幾人知。春風詞筆。儘判孤負。玉骨冰肌。

采桑子

斜陽庭院無人到。誰倚房櫳。獨笑東風。照水天桃一樹紅。黃昏不覺春光靜。月澹花濃。灑灑溶溶。彷彿妝成曉鏡中。

踏莎行

雨裊衰桃。風搖纖柳。日長池館凭闌久。珠簾不爲看花開。惜惜況是飛紅後。幽夢
疑雲。別情如酒。薄寒只怕欺羅裊。欲憑雙燕寄相思。遙山一夜和春瘦。

漁家傲

簾幙遮愁遮不住。畫梁棲燕殷勤訴。片片飛花隨水去。知幾許。可憐昨夜廉纖雨。
芳草黏天誰是主。踏青怕過橫塘路。鏡裏紅顏容易誤。朝復暮。山重水複臨溪渡。

采桑子

玲瓏骰子安紅豆。刻骨相思。新漲平隄。幾見鴛鴦兩處飛。垂楊不綰烏篷住。輕別
前谿。明月圓時。空對桃花發滿枝。

鷓鴣天

凌亂殘英露井東。三更禁雨五更風。游絲苦要留春住。自向庭心罨落紅。高閣靜。
翠簾空。今年花事忒怱怱。花開還有明年在。惆悵芳華逝水同。

醉太平 童佛菴以羅兩峯芭蕉雨聲劉睡猿秋林月色二畫合裝一軸鈴以

漢印二方。一曰欒長卿。一曰焦細卿。米樓爲賦。瑣窗寒。一解佛菴。又以見屬
芭蕉雨清。疏林月明。傳來多少秋情。認蕭齋畫屏。欒家長卿。焦家細卿。喚他千古
魂醒。說淒涼與聽。

蘇幕遮 題詠梅居

畫屏空。羅幌靜。檻外平山。澹翠無人問。穠杏朝來紅欲褪。不爲傷春。卻也慊慊病。
惜分飛。憐薄命。護水鴛鴦。慣向銀塘並。風裏楊花吹作粉。莫近珠簾。怕綴潘郎鬢。

點絳脣

曲沼蒲深。水楊低映紅窗遠。繡巾香扇。人隔春風岸。波面紋生。衣上飛花滿。尋常
見。好山青遍。未較雙蛾淺。

更漏子 題許氏谿上草堂寄懷王聲甫許念茲并示詠梅

燭光紅。簾影綠。茶鼎竹閒初熟。清露重。雜花香。畫堂春漏長。東風緊。輕帆穩。好夢
幾番勾引。芳草暗。遠山低。錦箋和恨題。

大酺 二月中米樓過訪山居卽作中吳之行約暮春歸里韶光已去歸計未
成賦此寄之

記野梅開。叢蘭茁。碧山春早寒嫩。林梢上弦月。正峭帆初卸。半川風緊。清供隨身。古
香留篋。添得草堂人韻。行裝富詩卷。看吳霜晚晚。暗侵雙鬢。賸聽歌心事。低徊重說。
夜闌燈燼。舊游戀芳訊。五湖去。鶯燕漫勾引。算怎忘。城頭澹翠。牆角嫣紅。便路遙。
歸夢猶認。拋殘吐花筆。料寫徧。尊前幽恨。煙波遠。芳菲盡。故鄉鷗鷺。盼斷江南音信。
歸期只愁未穩。

八歸 野薔薇

輕撩客恨。偷傳芳思。偏愛晚晚時節。積垣密篠無人處。誰見等閒開徧。粉痕狼籍。露
重煙輕。風日薄。更不受。惜香人惜。任畫閣。壓架繽紛。未許寄愁寂。零亂嬌紅淡素。
相逢何晚。惆悵江南詞客。半竿斜照。一灣流水。閒了狂蜂癡蝶。歎韶華老矣。暮雨連
天聽啼鴉。年年換。鏡中雙鬢。幾度春歸。而今真個白。

驀山谿 許叔貞招同許敬姚袁修梅徐詠梅置酒文明塔谿閣卽席有懷邀
諸君同賦

閒情喚酒。柳下停柔櫓。惆悵好春歸。看隔岸、低迷眉嫵。煙波如畫。中有綠蓑衣。新漲
漫。拍漁磯。不見閒鷗鷺。楊花辛苦。鎮日隨風舞。天末渺嬋娟。漫倚徧、危欄日暮。谿
山如此。莫放玉尊空。青鬢在。幾多時。最怕心期誤。

一落索

一片落花飛絮。送將春去。東風吹斷綠楊絲。斷不得、瀟瀟雨。回首高樓欲暮。遠山
無數。短長亭隔短長橋。甚處是、愁來路。

浣谿沙

夢破梨花一縷雲。隔窗鶯語喚真真。舞鸞侵曉不生塵。眉翠細分山態度。臉紅斜
襯月精神。畫梁雙燕許相親。

齊天樂 懷無錫楊緝甫王佩青時緝甫禮闈報罷

春風第二泉邊夢。青衫酒痕猶漬。小閣題襟。層樓聽雨。歷歷當年情事。別離容易。過幾度鶯花。幾重山水。那不銷魂。茶煙孤裊竹鱸細。嬋娟雲外遠寄。漫低徊看鏡。誰省顛顛。鷗鷺盟寒。芷蘭香老。空憶故人千里。年年歲歲。算最是多情。西神眉翠。有日相逢。舊愁重喚起。

探春慢 新竹

乾蘗苞霜。嫩梢掛月。清陰旋滿庭牖。倚檻參差。亞牆阿那。還較妝臺人瘦。連夜瀟瀟雨。未算是。淒涼時候。載花雙槳歸來。從前應笑空呪。幽谷簣簣此際。正醞釀綠雲。煙淨千畝。玉版禪空。錦綉嬰脫。誰信風流依舊。蕭颯幽窗下。喚一餉。微涼消受。怕到秋深。西風留在鴛鴦。

摸魚兒 詠梅屬題明月前身冊子其夫人袁淑英之小影也爲賦此解

恨梨雲半牀幽夢。夢回人似天遠。樓頭一抹遙山在。依約黛痕深淺。愁怎遣。借數尺吳綃。留取春風面。真真空喚。便畫到妝臺。翠顰紅笑。難禁寸腸斷。癡兒女。世上紛

紛恩怨。班姬曾賦紈扇。多情只數何郎筆。判爲梅花吟倦。君不見。明鏡裏清霜暗逐。年華換。春宵能短。儘判卻相思。蘭缸夜夜看了又重看。

菩薩蠻

米樓屬賦蓮衣詞同詠梅作

涼波昨夜西風起。秋衣一片紅隨水。三十六陂寬。珮環生暮寒。鴛鴦清夢穩。疏雨催教醒。何處寄相思。苦心儂自知。

浣谿沙

送米樓同詠梅作

又是尋春一度回。輕帆影落碧谿隈。谿邊沙鳥莫相猜。無主荷花留小住。多情山翠待重來。尊前蠟淚看成堆。

點絳脣

深夜回廊。木樨搖影金波碎。翠簾垂地。卻喚涼雲起。舊事而今都是愁滋味。人顛顛。夜闌空對。孤鶴階前睡。

又 爲詠梅作

紈扇辭秋，舊時香褪芙蓉被。月華如水。祇照人無寐。一寸吟箋，隨意斜行字。相思淚。仙山迢遞，覓箇青鸞寄。

南鄉子 慈相寺面壁窩看桂時詠梅吳興未歸

晴日漾清輝。城外青山列畫眉。如此秋光閒過了，真癡。風雨來時悔也遲。獨自叩招提。金粟香濃滿翠微。凭徧闌干無限意。誰知。新雁天邊一字低。

清平樂 重過面壁窩和前作

松風花雨。閣中額字如此高。閣清如許。依舊嚶娑香滿樹。又是凭闌一度。汀洲極目兼葭。雲邊葉葉帆斜。只怕秋光遲暮。那人還戀蘋花。

踏莎行 中秋漸近懷人未歸率爾成此寄詠梅

巖桂看殘，汀蘋漸老。畫船也合歸來了。幾番鄉夢乍回時。客窗無那秋山好。碧海沈沈，青鸞杳杳。姮娥一樣傷懷抱。欲圓何事未成圓。徘徊留向情人照。

好事近 題盛研樵香溪獨釣圖

過雨落花多。添了半溪新碧。磯畔更無人到。有雙雙鸕鷀。朝來閒理釣魚竿。青蓑
少人識。休戀一絲風好。賺英雄頭白。

南樓令 米樓屬題慧雲小影

玉頰暈紅潮。翠釵雙鳳翹。是丹青、還是妖嬈。花底燈前開更好。看墮地、片雲嬌。旅
館夜迢迢。秋窗蠟淚銷。記清歌、暮雨瀟瀟。歸去煙波三百里。空回首、短長橋。

念奴嬌

紅樓珠箔。護輕寒、四面垂垂不卷。鴛鴦幾番連夜雨。添了曉妝春倦。柳待搖波。梅還
慳雪。未覺東風軟。橫塘路過。踏青情緒先嬾。望極迢遞春江。歸帆何處。芳草和天
遠。欲寄天涯無好夢。夢與行雲都斷。鸞鏡塵昏。獸鑪香冷。顛願無人管。西園花事。一
年判付鶯燕。

東風第一枝 新柳

暖日烘黃。輕陰殢綠。垂垂學舞還未。長亭不管離歌。綺陌漫縈旅思。章臺初見。恰十

四、十三年紀。傍玉闌，不織愁煙，卻織嫩寒如水。留不住、少年風致。拋不盡、去年心事。俊游歸夢無憑。蓋篋袷衣乍試。秋風秋雨，怕重問、江潭顛顛。待畫眉、綵筆閒來，乞與謝娘修翠。

清平樂

春分過了。依舊輕寒峭。細柳含風剛裊裊。已織愁絲多少。紅窗幽夢無憑。長隄芳草無情。幾陣杏花疏雨。看看又是清明。

摸魚兒 寄懷戴刑部金谿

轉危檣、夜寒津鼓，分襟消盡英氣。征鴻社燕更番換，過眼年華容易。還又記。霜月底、半簾人影清於水。餅笙輕沸。看候火吳娘，更闌倦坐，愁壓遠山翠。三千里、不見相思一字。秋風卻送歸騎。歸來重問西湖好，依舊花明月媚。知也未。青鏡裏、故人雙鬢今如此。幾多心事。悵隔斷春江，層層煙柳，欲訴竟無地。

疏影 題詠梅小影

亭亭玉立。看一枝獨秀。江左誰匹。記取吹笙。夜半驂鸞。緱山曾伴明月。迎風卻笑靈和柳。怎便惹、當年相憶。恨寂寥、月地雲階。咫尺故人輕別。 顛顛年來綠鬢。對花暗灑淚。心事誰識。冷雨疏煙。喚起瓊妃。脈脈相看愁絕。春風展卷幽窗下。悄一似、消凝時節。漸畫樓、蟾影重圓。莫把舊愁頻說。

南浦 碧山玉田皆用此調賦春水頃見友人賦春草詩因倚其聲以碧山體詠之

錦陌渺含煙。認去年、黛痕依舊天遠。新翠亂波光。尋芳去、香塵乍連還斷。那時南浦。離筵曾襯葺茵展。斷腸一色斜照裏。黯黯牽人望眼。 西湖歷歷游蹤。記一道裙腰。畫輪輕碾。惆悵再來時。橫塘路、空惹落紅留戀。分明畫出。豔魂千載江南怨。又聽林外吹橫笛。牛背聲聲歸晚。

金縷曲 壬申三月廿四日僕四十初度前期十日徐詠梅邀同人置酒溪閣爲僕稱觴酒邊賦此時會者徐飴菴戴已三倪德輝許敬姚袁修梅徐玉厓

胡霖巖蔡寅九許叔貞

酒泛金船穩。問琵琶、尊前彈徹。幾多幽恨。逝水年華剛四十。一度香紅夢醒。早面皺、
觀河難認。占取煙波移家具。悄回頭、還與家山近。思往事、怕重省。東風廿四番花
信。恨園林、一番花放。一番風緊。到眼韶光須愛惜。花下休辭酩酊。況對此、溪山名勝。
多事流鶯啼芳樹。驀教人、清淚當筵迸。沈醉也、試臨鏡。

蝶戀花

三月二十三日丁綺巖枉過山居邀往武林春光已老遊船未盡計

別西湖一年餘矣因賦此解

水面風輕吹綠皺。畫舫疏簾。看徧沿隄柳。多少翠鬟凝望久。重逢應笑新來瘦。還
有蘭橈停渡口。拾翠人來。也在飛紅後。柳色今朝濃似酒。春心一點還依舊。

清平樂

訪項秋子話舊

輕陰池閣。翠羽搖鈴索。滿地苔錢春漠漠。一架紫藤花落。高齋尊俎長閒。昔游滿
眼關山。只有雙峯無恙。春來依舊妝鬢。

玉樓春 癸酉正月初三日立春前一日也

東風又到江南岸。妝閣來朝風景換。江邊千樹玉梅嬌。頭上一枝金鳳戰。向陽池面冰先泮。殘雪園林消一半。滿城簫鼓動春聲。已覺繡簾風力慢。

江梅引 塘西宋斗爲葬其先人於餘不谿邊種梅數十本於墓道葬後未幾

斗爲卽下世其墓去僕山居里許去春曾與米樓一往尋之枝榦蒼老香雪歎薄染人衿袖蓋距斗爲之歿已十餘年矣感歎之餘約米樓以江梅引賦之皆不成章而罷忽忽歲又一周久病支枕花時不出試蘸藥汁漫成此解孤筇芒屨訪寒梅。蹋蒼苔。有誰來。記得去年詞客共徘徊。又是一番風信到。碧谿隈。無人見。寂寞去聲開。淡煙細雨護冰胎。憶年時。親手栽。玉妃冷落。料應也。夢斷瑤臺。欲問千年遼鶴幾時回。驀地高樓橫玉笛。一聲催。宮妝薄。淚滿顚。

鷓鴣天

杏臉微紅柳眼青。尋春人漸出春城。鬢華似□年年換。芳草如愁故故生。疏箔卷。

袷衣輕。畫廊絲雨。晝愔愔。曲闌干外。流鶯喚。一枕游仙夢不成。

定風波 擬六一詞

蝶舞蜂喧。暮復朝。日長鈴索護嬌饒。可惜繁華成一夢。斷送紅窗。半夜雨瀟瀟。清曉殘紅飛滿地。無計將花。依舊上花梢。不是看花人薄命。緣甚。花開時候總無聊。

又

一寸光陰一寸金。養花天氣半晴陰。莫管新來人漸老。還要玉觴。花下十分深。往事分明還記得。傾國清歌。一曲墮瑤簪。幾日恹恹成酒病。休問。去年花放到而今。

點絳脣

沈水熏殘。雁燈珠蠟垂垂凍。更無人共。繡被春寒重。多少相思。不合和愁種。銀屏夢。月斜鐘動。做也成何用。

破陣子

亞水柳眉翠瘦。拂牆杏臉丹融。心事碧城春欲暮。消息紅樓訊未通。春情似水慵。

鳳紙箋愁字密。蛟綃寄淚香濃。一縷相思牽不斷。繞徧巫山十二峯。除非夢裏逢。

好事近

微雨過簾櫳。牆角杏梢紅溼。側側輕寒無那。做春陰如墨。去年風物故依然。夢斷

楚雲碧。不怕瑤臺路迥。怕鴛鴦頭白。

點絳脣 送詠梅就婚箬谿

汀草汀花。木蘭橈傍煙江口。且停尊酒。試話分襟後。小拓篷窗。莫也懷人不。津亭

柳。雨僝風憇。如我恹恹瘦。

意難忘 孟夏上旬病榻送行惜別述懷

剛送殘春。恰河橋柳色。又送行人。遠山低落日。煙樹暗通津。花滿路。酒盈尊。最此別

銷魂。繫畫橈。今宵甚處。水驛漁村。廿年恩怨休論。笑白衣蒼狗。一例浮雲。參差箬

柱雁。斷爛錦機紋。潮有信。夢無痕。空淚漬羅巾。第四聲。陽關唱徹。莫也輕顰。

生查子

珠簾一半垂。睡起無情緒。殘夢未分明。卻被流鶯誤。
 薦紅溼不飛。纖柳隨風舞。羅袖翠雙籠。獨自看春雨。

清平樂

新荷池沼。一一如錢小。簾外楊花吹盡了。人與青春同老。
 青春有日重來。朱顏曾幾時回。花事三春如夢。芳心一寸成灰。

浣谿沙

簾揭熏風寶瑟斜。滿庭新綠護窗紗。一株嬌殺石榴花。
 何處層樓拈翠管。可憐低黛映明霞。柳陰深處那人家。

尉遲盃 仲夏望前送詠梅重赴筓谿

津亭暮。怎畫舫、連夜催人去。煙江楊柳千條。無力留將伊住。
 歸帆掛也。待海上、冰輪淨商素。怕雙飛、愛傍蘭苕。舊盟閒了鷗鷺。
 推篷一路看山。妝臺畔依依。鏡裏眉嫵。小別經旬尋常事。早綠暗、芭蕉窗戶。彈琴看、春風鬢影。慰消渴茶經檢顧渚。儻吟情、

暫付雲箋。薜蘿人也延佇。

渡江雲

送馮通甫歸嘉興并堅其秋閒重來之約

勾留纔幾日。亭亭畫舸。又趁晚來風。尊前聽不得。水面琵琶。續續響萍逢。青山對客。也惜別。低鎖眉峯。君看取。玉觴春釀。不抵別情濃。 怱怱。冰輪圓缺。溝水東西。歎舊游如夢。愁見伊。霜彫鬢綠。酒誤顏紅。離筵何限。關心事。怕負了。江上芙蓉。煙柳暝。風燈漸颭孤篷。

菩薩蠻

棟花寒盡聽啼鳩。鬢絲禪榻愁時節。香帶悔輕分。遠山低黛痕。 相思空有淚。不那人顛顛。疏響到梧桐。銀屏昨夜風。

芭蕉又送黃昏雨。畫廊細碎秋蛩語。蓮漏報新涼。一聲聲正長。 檀槽雙紫鳳。夜久殷勤弄。新恨上眉端。明朝鏡裏看。

菰蒲雨過紅衣卸。荷塘一半秋香謝。翠蓋顛亭亭。鴛鴦夢未醒。 采蓮雙玉腕。羅袖

黃金釧。畫槩怨來遲。淥波風起時。

鳳皇臺上憶吹簫。仲秋之月得所郵書并樂府四闋茗薜一裹寄醅此解

荷蓋敲風。豆花帶雨。小樓低罨輕陰。忽征鴻遞到天末秋心。顛顛經年病榻。香褪盡、昔日鴛衾。瑤臺曲。十年夢斷。又許重尋。惜惜瑣窗夜靜。宛轉爲文園。費了清吟。更緘題箋裏。綠雪如鍼。茗裏上有銀鍼字。知有愁端多少。還又是、兒女情深。清宵淚。新痕舊痕。都在羅襟。

水龍吟

僕自客歲遘疾。度冬經春。沈緜牀蓐。山居湫隘。俛仰不自聊。初夏既望。許叔貞掃除書室。邀往追暑。枕簟安閒。臥起殊適。時蔡孝廉宮山館於叔貞家中。把手晤言。相知恨晚。稱藥量水。調護殷勤。留止十旬。病又加劇。中秋前數日。望辭言歸。相隔不及半里。相見仍可昕夕。而分袂之際。皆黯然有別離之色。感故人之深情。悵重來之未卜。爲賦此解。呈宮山。兼似叔貞。傷離惜別。悵悵

萬端不自覺言之掩抑矣。

檀欒市地清陰。書堂枕簟涼於水。回廊宛轉。荷風吹送。藥鑪香氣。別館簫聲。隔城山色。可忺情味。任林閒杜宇。催歸不去。鶯花願。判休矣。 顛顛桂花香裏。對西風。又添離淚。井梧蕭索。一番清曉。畫檐雨碎。任是無情。瑯闌倚徧。又還重倚。看今宵短夢。疏鐘淡月。怎和愁寄。

點絳脣

既歸山館將往無錫就醫叔貞爲僕治裝臨行留別

誰分今宵。畫船愁水愁風去。日斜津鼓。腸斷秋江渡。 迢遞江關。只怕心期誤。難忘處。一燈深語。夜半梧桐雨。

清平樂

暮雲天遠。樓角珠簾卷。過盡南來無數雁。一見一回腸斷。 梧桐消息分明。無風也作秋聲。夜夜蕭蕭槭槭。枝枝葉葉生情。

又

爲鄒春農題所藏孟津王少保畫卷畫爲商邱宋相國邸中有枯蘭復發

一莖三花而作時順治己丑五月也卷長三丈圖中雜綴蘭竹花草樹石似
不經意而位置蹊徑迥出象表極筆墨之偉觀吾鄉萬九沙編修以八分書
枯蘭復華圖五大字於卷端後有牧仲中丞跋語
楚香魂返。幽夢經年斷。二十四番風不管。一箭重開生面。良宵對酒華堂。尊前墨
彩生香。狼籍花花草草。可憐白髮王郎。

采桑子 重陽垂近悄然有懷

江鄉迢遞重陽近。身在天涯。短夢還家。曲曲屏山故故遮。銅鋪漸見霜華白。秋到
黃花。莫近窗紗。有個人人瘦似他。

鵲橋仙 憶山居

嬖娒老桂。便娟修竹。籬下黃花無數。故鄉最好是清秋。怎不喚、扁舟歸去。紅燈搖
暈。翠簾垂地。寂寞夜寒窗戶。算來何事最縈心。是一縷、遙山眉嫵。

謁金門

風竹影。日上紅窗徐引。露葉煙梢如有恨。倚闌搖不定。千里江南夢醒。淚溼合歡鴛枕。六曲畫屏山遠近。斷鴻何處問。

采桑子 題所臥室壁窗前有紅柿一樹

回廊小院經行地。細數芳蹤。鬢影怱怱。記得春生一笑中。鴛鴦夢醒西風急。怎不愁儂。窗戶玲瓏。柿葉猶翻舊日紅。

西江月

向於高蘋洲齋中閱所藏名流扇頭書畫。中有松圓老人一幅。畫蕭仁祖詩意。拒霜數叢。蔭以疏柳。小舟傍岸。有美人把團扇看月。金箋水墨。神韻盎然。署款卅有六字云。崇禎十年八月廿四日。僧筏同舅氏魯生過成老亭。少飲午酒。戲筆作此。孟陽時年七十有三。小行狎書。適媚無比。鈐以朱文孟陽二字小印。僕愛其位置景物。宛然秋江載月之圖。思欲購之。蘋洲惠然輟贈。遂以畫扇名齋。弄之十餘年矣。旅窗病榻。睹茲妙蹟。感懷往事。不能無言。

楊柳已知秋晚。芙蓉還帶霜妍。夜涼人在木蘭船。明月圓如紈扇。讀畫情懷草草。惜香心事年年。拋殘金粉誤嬋娟。惆悵春風便面。

蝶戀花

病榻岑寂。顧菴塘孝廉過訪。翦燭銜杯與話。西湖舊事感懷有作。且

索繼聲

湖畔芙蓉秋欲暮。草草逢君。共此閒尊俎。舊約湖山容易誤。淡妝西子今何許。回首冷楓紅亂舞。客裏光陰。愁病平分取。惆悵江南腸斷句。黃昏水榭瀟瀟雨。

三姝媚

勾留梁谿。既三市月。病情轉劇。亟鼓歸棹。留別鄒春農楊緝甫王佩

青鄒洛園顧菴塘嵇秋濤諸君

風霜江路滿。正寒煙連波。暮雲無雁。舊板橋邊。掛歸帆容易。去程天遠。水調歌殘。恨羅帶、牽愁不斷。欲寄相思。且待梅梢。數椒紅綻。回首漪瀾堂畔。記屐齒莓痕。昔年曾徧。多病文園。歎重來華髮。滿襟依黯。鴻影萍蹤。怕此別、便隨雲散。愁對斜陽。髡柳年華又晚。

卜算子

淚眼鎮相看。分手渾無語。門外分明見遠山。山外知何處。雙槳載愁來。又送愁歸去。今夜紅閨夢裏人。獨聽孤篷雨。

念奴嬌

奚虛白居易城南碧浪湖畔樓外有高榆數章因以榆蔭名樓績圖徵詩僕久有諾責因循未踐梁谿歸棹掩篷支枕書寄此解以慰其意

驛西橋下近城南一角高樓天遠樓外清陰涼似水隔了遙山青斷鏡檻眉痕書牀指印風味真蕭散新詩大好醉來題壁都滿屈指當日樓中題襟喚酒我亦尋芳伴拋卻家山長作客鏡裏新霜暗換一抹斜陽幾重雲樹總被相思染它年雅集話儂多少淒惋。

虞美人

沈山樵丁綺巖倪笙巢奚虛白計自新正枉顧問疾律琯又一周矣思之不見我勞如何爰賦此解聊紓余懷

玉梅花下怱怱別。經歲無消息。芙蓉湖畔畫船回。寂寞山窗。又報玉梅開。看山喚

酒都無分。往事縈方寸。相思隔不斷。谿山清夢新來。夜夜繞蘇灣。

菩薩蠻 臘八後吳成一吳勤旃來問疾

譙樓鼓角聲聲咽。空林侵曉霜風歇。片月下城頭。啼鳥未肯休。峭帆沙際落。不負年時約。消息夢中來。寒梅昨夜開。

青玉案

昔年曾以梅椿二盆。移植書堂前。向陽得地。曾未幾年。扶疏高聳。已出檐際矣。自移居龜谿以來。每歲花時。輒不相值。唯庚午歲。著花最遲。清明之後。返櫂故園。紅梅乃正爛漫。曾爲賦鷓鴣天二解。今余臥病年餘。生理殆盡。里中人來。知二梅已相繼萎謝。嗟乎。樹猶如此。人何以堪。余豈能無桓司馬之感也。

谿山好處移家具。怎移得。寒梅樹。寂寞花開經幾度。淡雲微月。冷煙疏雨。誰與春爲主。何郎老去多愁緒。嬾賦春風彩箋句。金屋安排心事誤。縞衣珮解。翠禽飛去。夢

斷孤山路。

浣谿沙 除夕

響竹聲中歲欲除。溫暾香滿博山爐。三更燈影暗流蘇。華髮驚心中酒後，梅英點額試妝初。迢迢枕上數銅壺。

風入松 甲戌元夕立春

春城花市夜迢迢。霜月壓河橋。東風嬾趁新年約，江鄉信遲到今朝。錦帳夢和雲暖，綺窗人若梅嬌。文園顛顛病無憀。鴛被舊香銷。離情最怕逢佳節，關心是春水蘭橈。坐久紅垂珠蠟，愁多淚負金蕉。

瑞鷓鴣

增城一別怨遙天。夢斷湘靈五十絃。一半華年隨逝水，萬千心事託啼鵑。鴛鴦空負雙栖願，明月曾經一餉圓。細雨清寒簾不卷，梅花落盡夜無眠。

人月圓 春寒雨雪病軀殊不能支擁爐偃臥偶成此解

連宵風霰敲窗急。冷落負芳春。繡牀金鴨。香殘灰燼。誰與溫存。暗催華鬢。能消如此。幾箇黃昏。梅花落盡。詞人老去。一樣消魂。

好事近 沈山樵來問疾

豔雪臥牆腰。滿地落梅狼籍。砌下霜蕪未綠。了無人行迹。寥天一鶴忽飛來。點破暮雲碧。正自愁腸縈損。憶城南山色。

悔菴居士於壬申仲秋遘疾。久而弗瘳。去年曾從臾刊其樂府二卷。今茲見其新作。襞積。又得如干解。乃錄其副。續付諸梓。甲戌春二月徐球記。

補遺

漁家傲 春分已過飛雪積檐支枕賦此

卷地東風吹雪大。韶光暗裏平分過。竹外桃花紅暈破。開幾多。燕支判被春泥澆。佳約杜陵應未果。清寒鎮日愁無那。妝閣有人雙鬢妥。窗下坐。隔窗認做楊花墮。

謁金門

寒食近。長日陰晴難準。深院柳絲遮不盡。秋千牆外影。午夢瞢騰未穩。早被鴛簫吹醒。疏雨隔年三兩陣。落紅蜂廝趁。

玉樓春

溶溶一片春庭月。影落金樽生細纈。西園桃李儘怱怱。一樹梨花連夜發。人生難得芳菲節。何況駸駸頭半白。勸君爛醉伴花眠。莫待風狂兼雨疾。

杏花天

雨餘芳樹惜惜綠。深院靜日長人獨。無端翠響簾鉤玉。海燕歸來誤觸。銀塘水紋生細縠。柳絲罩彩雙鴛宿。檀槽休撥陽春曲。生怕眉峯翠蹙。

更漏子

柳按絲花卷雪。簾外晚寒猶力。妝閣暗。繡屏空。春愁細雨中。芳草渡。旗亭暮。曾是送君行處。思往事。到黃昏。粉痕和淚痕。篆烟消。清漏歇。高樹曉鶯殘。月燈揜。夢迷離。玉驄門外嘶。青青柳。纖纖手。相勸

玉釭春酒。檀板急。又還停。怨歌君怕聽。

夜行船 送梁甫

斜日鶻啼芳草渡。點征衫、柳花無數。水調聽歌，旗亭喚酒，怎檣燕、無語。正恨留春春不住。送行人又隨春去。烟樹千重，風帆一片，離愁滿江南路。

木蘭花慢 暮春之杪米樓過訪疾狀留五六日而歸於其行賦此解送之

又相逢一笑。記分袂、恰三年。問吳市鶯花，邗溝烟月，那處留連。尊前豔情似水，寫閒愁、都滿薛濤箋。到處阻風中酒，何時禪榻茶烟。谿邊鷗夢重圓。飛絮嬾。落花顛。賸買醉風情，聽歌心事，付與啼鶻。應憐故人老矣，駐行程、休便放歸船。卻恨無情箏管，教人腸斷離筵。

清平樂 題米樓畫蘭石小幅

一峯清峭。獨伴幽蘭笑。又被采毫收拾了。卻是幾時尋到。空山誰是知音。風前自結同心。一自江皋珮解，相思直到而今。

醉太平

春風柳條。春波畫橋。日斜人上蘭橈。趁春江暮潮。秦臺鳳簫。章臺細腰。春山低黛。誰描。任拋殘翠翹。

清平樂 立秋

綠天窗戶。幾陣疏疏雨。不見西風吹碧樹。已覺嫩涼如許。藕花還倚紅嬌。垂楊依舊長條。誰遞井梧消息。驚心一葉先彫。

憶舊游 寄詠梅箸谿

渺春江一望。綠徧汀洲。相送輕橈。惜別尊前約。待荷塘錦爛。十頃紅嬌。流光過也容易。片葉井梧飄。問罨畫谿邊。文鱗何事。不趁歸潮。迢迢漫回首。記快閣追涼。同話深宵。依舊盈盈月。蕩翠漣無語。窗影空搖。揚州一霎風動。禪榻鬢絲彫。憑寄語劉郎。蓬山海上休恨遙。

蝶戀花 題華隱樓詞

華隱樓在杭之南湖。樊榭山民昔曾卜居於此。今茲金谿西齋米樓訪秋過之。流連累月。各譜新聲。又續圖以紀事。仲冬下旬。金谿寄示詞刻。支牀省覽。悵焉興歎。追念戊辰之冬。試茗賦詩之樂。與我共者。卽此三君。彈指已六閱寒暑。僕臥病索居。亦已三載矣。輒賦此解。附諸君後塵。不能不慨然也。

樓上紅窗開了鳥。宛轉橋通指點南湖道。惆悵湖邊秋信早。玉芙蓉也垂垂老。誰譜新詞傳畫稿。雲影歌塵惹起愁多少。莫道干卿何事好。雪泥曾點飛鴻爪。

悔菴居士詞。旣刊成三卷。今歲孟夏。復檢甲戌贖稿。付球繕寫。球旣報命。而居士病劇。竟不起。茲爲續授諸梓。居士已弗及見。曷禁愴然。丁丑中秋。徐球記。



國家圖書館



000797740